









OTIVM  
SINE LITERIS  
MORS EST

*Seneca*

*Ex Libris Joannis Nenoing*

*1874*





D. 1.

M. TULLII  
CICERONIS  
OPERA.  
TOMUS QUARTUS.

---

HOC VOLUMINE  
*continentur*

ACTIONIS SECUNDÆ IN VERREM LIBRI  
III, IV & V.

ORATIONES PRO FONTEIO:

PRO CÆCINA.

PRO LEGE MANILIA.



M. TULLII  
CICERONIS  
OPERA.

*Recensuit J. N. LALLEMAND.*

TOMUS QUARTUS.



PARISIIS,

Apud { SAILLANT, viâ S. Joannis Bellov.  
          { DESAINT, viâ Fœneâ.  
          { BARBOU, viâ Mathurinenſium.

M DCC LXVIII.



THE

OF



ACTIONIS SECUNDÆ  
IN VERREM  
LIBER TERTIUS.

DE RE FRUMENTARIA.

ORATIO OCTAVA.

*Continet hic liber furta Verris in omni  
frumenti genere. Frumenti autem ,  
quod prætor Siculus ab aratoribus  
exigere poterat & debebat , erat pri-  
mò decumanum , quod aratores pro  
agris sibi attributis dabant : alte-  
rum erat emptum , quod vi legis  
Rupiliæ tenebantur populi Siciliae  
velligales populo Romano certo præ-  
tio vendere. Id erat vel decumanum  
alterum , cui pretium erat a senatu*  
Tomus IV. A

*Romano constitutum in modios singulos H-S terni : vel imperatum, cui H-S quaterni constituti erant. Constituebatur autem a senatu in annos singulos e lege Terentia & Cassia frumentaria, quanta pecuniæ summa in utrumque empti genus ex ærario impenderetur. Tertium erat æstimatum, quod prætoris in cellam imperabatur. Dabat senatus quæstori prætoris certam ex ærario pecuniam, unde ab aratoribus emeret, & quidem modium tritici H-S IV. hordei autem H-S II. Illam pecuniam aratoribus adnumerabat, & deinde frumentum vehabatur quod prætor volebat. Licebat autem prætori certam pecuniam, quantum scilicet æquum erat, ab aratoribus pro frumento & vectura pacisci.*  
**ERNESTUS.**

I. **O**MNES, qui alterum, Judices, nullis impulsu inimicitiiis, nullâ privatim læsi injuriâ, nullo præmio adducti, in judicium reipublicæ causâ vocant, providere



*ACTIONIS II. L. III. 3*

debent, non solum quid oneris in præsentia tollant, sed etiam quantum in omnem vitam negotii suscipere conentur. Legem enim sibi ipsi dicunt innocentiae, continentiae, virtutumque omnium, qui ab altero rationem vitae reposcunt: atque eò magis, si id, ut antè dixi, faciunt nullâ re commoti aliâ, nisi utilitate communi.

2. Nam qui sibi hoc sumpsit, ut corrigat mores aliorum, ac peccata reprehendat, quis huic ignoscat, si qua in re ipse ab religione officii declinarit? Quapropter hoc etiam magis ab omnibus ejusmodi civis laudandus, ac diligendus est, qui non solum ab republica civem improbum removet, verum etiam se ipsum ejusmodi fore profitetur, ac praestat, ut sibi non modo communi voluntate virtutis, atque officii, sed etiam ut quadam magis necessariâ ratione rectè sit honestèque vivendum.

3. Itaque hoc, Judices, ex homine clarissimo, atque eloquentissimo, L. Crasso, sæpe auditum est, quum se nullius rei tam poenitere diceret, quàm quòd C. Carbonem umquam in judicium vocavisset: minùs enim liberas omnium rerum voluntates habebat; & vitam suam pluribus, quàm vellet, observari oculis arbitrabatur. Atque ille his praesidiis ingenii, for-

tūnæque munitus , tamen hac curâ continēbatur , quam sibi , nondum confirmatō consilio , sed ineunte ætate , suscepērat : quō minūſ etiam pērspicitur eorum virtus , & integritas , qui ad hanc rem adolēſcentūli , quā ſam firmatā ætate deſcendunt : illi enim , antequam potuerunt exiſtimare , quāto liberior vita ſit eorum , qui neminem accuſarint , gloriæ cauſā , atque oſtentationis , accuſant : nos , qui jam , & quid facere , & quantulum judicare poſſemus , oſtendimus , niſi facilē cupiditates noſtras teneremus , numquam ipſimet nobis præcideremus iſtam licentiam , libertatemque vivendi.

II. Atque hoc ego plus oneris habeo , quā ſam qui ceteros accuſarunt ( ſi onus eſt id appellandum , quod cum lætitiā feras , ac voluptate ) verumtamen hoc ego amplius ſuſcepi , quā ſam ceteri ; quōd ita poſtulat ab omnibus , ut ab iis ſe abſtineant maximē vitijs , in quibus alterum reprehenderint. Furem aliquem , aut rapacem accuſaris ? vitanda tibi ſemper erit omnis avaritiæ ſuſpicio. Maleficum quēmpiam adduxeris , aut crudelem ? cavendum erit ſemper , ne qua in re aſperior , aut inhumanius fuiſſe videare. Corruptorem , adulterum ? providendum diligenter , ne quōd in vita veſtigium libidinis appareat : omnia poſtremo , quæ vindicaris in altero , tibi

*ACTIONIS II. L. III. 5*

ipsi vehementer fugienda sunt. Etenim non modò accusator, sed ne objurgator quidem ferendus est is, qui, quod in altero vitium reprehendit, in eo ipse deprehenditur. Ego in uno homine omnia vitia, quæ possunt in homine perditò, nefarioque esse, reprehendo: nullum esse dico indicium libidinis, sceleris, audaciæ, quod non in istius unius vita perspicere possitis.

5. Ego in isto reo legem hanc, Judices, mihi statuo; vivendum ita esse, ut isti non modò factis, dictisque omnibus, sed etiam oris, oculorumque illà contumacià, ac superbià, quam videtis, dissimillimus esse, ac semper fuisse videar. Patiòr non molestè, Judices, eam vitam, quæ mihi suâ sponte antea jucunda fuerit, nunc jam meâ lege, & conditione necessariam quoque futuram.

III. Et in hoc homine sæpe a me quæris, Hortensi, quibus inimicitiis, aut quâ injuriâ adductus, ad accusandum descenderim. Mitto jam rationem officii mei, necessitudinisque Siculorum: de ipsis tibi inimicitiis respondeo. An tu majores ullas inimicitias putas esse, quàm contrarias hominum sententias, ac dissimilitudines studiorum, & voluntatum? fidem sanctissimam in vita qui putat, potest ei non inimicus esse, qui quæstor consulem suum,

consiliis commissis , pecuniâ traditâ , rebus omnibus creditis , spoliare , relinquere , prodere , oppugnare ausus sit ? pudorem , & pudicitiam qui colit , potest animo æquo istius quotidiana adulteria , metreticam disciplinam , domesticum lenocinium videre ? qui religiones deorum immortalium retinere vult , ei , qui fana spoliavit omnia , qui ex thesaurum orbitis prædari sit ausus , inimicus non esse quî potest ? qui jure æquo omnes putat esse oportere , is tibi non infestissimus sit ; quum cogitet varietatem , libidinemque decretorum tuorum ? qui sociorum injuriis , provinciarumque incommodis doleat , is in te non expilatione Asiæ , vexatione Pamphiliæ , squalore & lacrymis Siciliæ concitetur ? qui civium Romanorum jura , ac libertatem , sanctam apud omnes haberi velit , is non tibi plus etiam , quàm inimicus esse debeat , quum tua verbera , quum secures , quum cruces ad civium Romanorum supplicia fixas recordetur ?

7. An , si qua in re contra rem meam decreisset aliquid injuriâ , jure me ei inimicum esse arbitrarer : quum omnia contra omnium bonorum rem , causam , rationem , utilitatem , voluntatemque fecerit , quæris , cur ei sim inimicus , cui populus Romanus infestus sit , qui præsertim plus etiam , quàm pars virilis postulat ,

*ACTIONIS II. L. III. 7*

pro voluntate populi Romani; oneris ac muneris suscipere debeam?

IV. Quid illa, quæ leviora videntur esse, non cujusvis animum possunt movere? quodd ad tuam ipsius amicitiam, ceterorumque hominum magnorum, atque nobilium, faciliorem aditum istius habet nequitia, & audacia, quàm cujusquam nostrum virtus, & integritas? odistis hominum novorum industrias: despiciitis eorum frugalitatem: pudorem contemnitis: ingenium verò, & virtutem, depresso, extinctamque cupitis.

8. Verrem amatis. Ita credo: si non virtute, non industriâ, non innocentia, non pudore, non pudicitia; at sermone, at litteris, at humanitate ejus delectamini. Nihil horum est: contraque sunt omnia quum summo dedecore, ac turpitudine, tum singulari stultitia, atque inhumanitate oblita. Huic homini si cujus domus patet, utrum ea patere, an hiare, ac poscere aliquid videtur? Hunc vestri janitores, hunc cubicularii diligunt: hunc liberti vestri, hunc servi, ancillæque amant: hic quum venit, extra ordinem vocatur: hic solus introducitur: ceteri sæpe frugalissimi homines excluduntur: ex quo intelligi potest, eos vobis esse carissimos, qui ita vixerunt, ut sine vestro præsidio salvi esse non possint.

9. Quid ? hoc cuiquam ferendum putas esse , nos ita vivere in pecunia tenui , ut prorsus nihil acquirere velimus : ut dignitatem nostram , populique Romani beneficia non copiis , sed virtute tueamur : istum rebus omnibus undique ereptis , impunè eludentem , circumfluere , atque abundare ? hujus argento domos vestras , hujus signis & tabulis forum comitiumque ornari ? præsertim quum vos vestro Marte his rebus omnibus abundetis ? Verrem esse , qui vestras villas suis manubiis ornet ? Verrem esse , qui cum L. Mummio certet , ut plures hic sociorum urbes , quàm ille hostium , spoliasse videatur ? plures hic solus villas ornamentis fanorum , quàm ille fana spoliis hostium ornasse ? & is erit ob eam rem vobis carior , ut ceteri libentiùs suo periculo vestris cupiditatibus serviant ?

V. Verùm hæc & dicentur aliq loco , & dicta sunt : nunc proficiscemur ad reliqua , si pauca antè fuerimus a vobis , Iudices , deprecati. Superiore omni oratione perattentos vestros animos habuimus : id fuit nobis gratum admodum. Sed multò erit gratius , si reliqua voletis attendere : propterea quòd in his omnibus , quæ antea dicta sunt , erat quædam ex ipsa varietate ac novitate rerum ac criminum delectatio : nunc tractare causam instituimus frumentariam ; quæ magnitudine injuriæ , ferè criminibus

## ACTIONIS II. L. III. 9

ceteris antecellit ; jucunditatis in agendo , & varietatis minùs habebit : vestrà autem auctoritate & prudentiâ dignissimum est , Judices , in audiendi diligentia , non minùs religioni tribuere , quàm voluptati.

II. In hac causâ frumentariâ cognoscendâ hæc vobis proponite , Judices , vos de rebus fortunisque Siculorum omnium , de civium Romanorum , qui erant in Sicilia , bonis , de vectigalibus a majoribus traditis , de vitâ victuque populi Romani cognituros : quæ si magna , atque adeo maxima vobis videntur ; quàm variè & quàm copiosè dicantur , expectare nolite. Neminem vestrûm præterit , Judices , omnem utilitatem , opportunitatemque provinciæ Siciliæ , quæ ad commoda populi Romani adjuncta sit , consistere in re frumentariâ maximè : nam ceteris rebus adjuvamus ex illa provincia ; hac verò alimur , ac sustinemur. Ea causa tripartita , Judices , erit in accusatione : primùm enim de *Decumano* , deinde de *Empto* dicemus frumento , postremò de *Æstimato*.

VI. Inter Siciliam ceterasque provincias , Judices , in agrorum vectigalium ratione hoc interest , quòd ceteris aut impositum vectigal est certum , quòd stipendiarium dicitur , ut Hispanis , & plerisque Poenorum , quasi victoriæ præmium , ac poena belli : aut censoria locatio constituta

est, ut Asiæ, lege Semproniâ. Siciliæ civitates sic in amicitiam fidemque recepimus, ut eodem jure essent, quo fuissent; eâdem conditione populo Romano parent, quâ suis antea paruissent.

13. Perpaucae Siciliæ civitates sunt bello a majoribus nostris subactæ: quarum ager quum esset publicus populi Romani factus, tamen illis est redditus: is ager a censoribus locari solet. Fœderatæ civitates duæ sunt, quarum decumæ venire non soleant, Mamertina & Taurominitana: quinque præterea sine fœdere immunes civitates ac liberæ, Centuripina, Halesina, Segestana, Haliciensis, Panormitana: præterea omnis ager Siciliæ civitatum decumanus est: itemque ante imperium populi Romani ipsorum Siculorum voluntate & institutis fuit.

14. Videte nunc majorum sapientiam: qui, quum Siciliam, tam opportunum subsidium belli, atque pacis, ad rempublicam adjunxissent, tantâ curâ Siculos tueri & retinere voluerunt, ut non modò eorum agris vectigal novum nullum imponerent, sed ne legem quidem venditionis decumarum, neque vendendi aut tempus, aut locum commutarent: ut certo tempore anni, ut ibidem in Siciliâ, denique ut lege Hieronicâ venderent. Voluerunt eos in suis rebus ipsos interesse; eorumque ani-



*ACTIONIS II. L. III. 11*

mos, non modò lege novâ, sed ne nomine quidem legis novo commoveri.

15. Ita decumas lege Hieronicâ semper vendendas censuerunt, ut iis jucundior esset muneris illius functio, si ejus regis, qui Siculis carissimus fuit, non solum instituta, commutato imperio, verum etiam nomen maneret. Hoc jure ante Verrem prætorem Siculi semper usi sunt: hic primus instituta omnium, consuetudinem a majoribus traditam, conditionem amicitiae, jus societatis, convellere & commutare ausus est.

VII. Quâ in re primùm illud reprehendo, & accuso, cur in re tam veteri, tam usitata, quidquam novi feceris. Ingeniò aliquid assecutus es? tot homines sapientissimos & clarissimos, qui illam provinciam ante te tenuerunt, prudentiâ consilioque vicisti? Est tuum, est ingenii, diligentiaeque tuae: do hoc tibi, & concedo: scio, te Romæ, quum prætor esses, edicto tuo possessiones hereditatum a liberis ad alienos, a primis heredibus ad secundos, a legibus ad libidinem tuam transfuisse: scio, te edicta superiorum omnium correxisse, & possessiones hereditatum non secundùm eos, qui proferrent, sed secundùm eos, qui dicerent testamentum factum, dedisse: easque res novas abs te prolatas & inventas, magno tibi quæstui

fuisse scio : eundemque te memini censorias quoque leges in fartis tectis exigendis tollere , & commutare : ne is redimeret , cuja res esset : ne pupillo tutores , propinquire consulerent , quò minùs fortunis omnibus everteretur : exiguam diem præfinire operi , quâ ceteros ab negotio excluderes , ipse in tuo redemptore nullam certam diem observares.

17. Quamobrem novam legem te in decumis statuisse non miror , hominem in edictis prætoriiis , in censoriis legibus tam prudentem , tam exercitatum : non , inquam , miror , te aliquid excogitasse : sed quòd tuâ sponte , injussu populi , sine senatûs auctoritate jura provinciæ Siciliæ mutâris , id reprehendo , id accuso.

18. L. Octavio , & C. Cottæ consulibus senatus permisit , ut vini & olei decumas , & frugum minutarum , quas ante te quæstores in Sicilia vendere consueverant , Romæ venderent , legemque his rebus , quam ipsis videretur , dicerent. Quum locatio fieret , publicani postularunt , quasdam res ut ad legem adderent , neque tamen a censoriis ceteris legibus recederent. Contrà dixit is , qui casu tum Romæ fuit , tuus hospes , Verres , hospes , inquam , & familiaris tuus , Sthenius hic Thermitanus , Consules causam cognoverunt : quum viros primarios atque amplis-

*ACTIONIS II. L. III. 13*

simos civitatis multos in consilium advocassent, de consilii sententiâ pronuntiarunt, se lege Hieronicâ vendituros.

VIII. Itane verò? prudentissimi viri, summâ auctoritate præditi, quibus senatus legum dicendarum in locandis vectigalibus omnem potestatem permiserat, populusque Romanus idem jusserat, Siculo uno recusante, cum amplificatione vectigalium, nomen Hieronicæ legis mutare noluerunt: tu homo minimi consilii, nullius auctoritatis, injussu populi ac senatûs, totâ Siciliâ recusante, cum maximo detrimento, atque adeo exitio vectigalium, totam Hieronicam legem sustulisti.

20. At quam legem corrigit, Judices, atque adeo totam tollit? acutissimè ac diligentissimè scriptam: quæ omnibus custodiis subjectum aratorem decumano tradit, ut neque in fegetibus, neque in areis, neque in horreis, neque in amovendo, neque in asportando frumento, grano uno posset arator sine maximâ poenâ fraudare decumanum. Scripta lex ita diligenter est, ut eum scripsisse appareat, qui alia vectigalia non haberet: ita acutè, ut Siculum: ita severè, ut tyrannum: quâ lege Siculis tamen arare expediret: nam ita diligenter constituta sunt jura decumano, ut tamen ab invito aratore plus decumâ non possit auferri.

21. Quum hæc essent ita constituta, Verres tot annis, atque adeo seculis inventus est, qui hæc non commutaret, sed everteret; quæ jamdiu ad salutem sociorum, utilitatemque reipublicæ composita, comparataque essent, ad suos improbissimos quæstus converteret: qui primum certos instituerit nomine decumanos, re verâ ministros, ac satellites cupiditatum suarum: per quos ostendam sic provinciam per triennium vexatam atque vastatam, Judices, ut eam multis annis, multorum innocentiam, sapientiâque recreare nequeamus.

IX. Eorum omnium, qui decumani vocabantur, princeps erat Q. ille Apronius, quem videtis: de cujus improbitate singulari, gravissimarum legationum querimonias audistis. Adspicite, Judices vultum hominis, & adspectum: & ex eâ contumaciâ, quam hic in perditis rebus retinet, illos ejus spiritus Sicilienses quos fuisset putetis, cogitate, ac recordamini. Hic est Apronius, quem in provinciâ totâ Verres, quum undique nequissimos homines conquisisset, & quum ipse secum suî similes duxisset, non parum multos, nequitiam, luxuriâ, audaciâ, suî simillimum judicavit. Itaque istos inter se perbrevis tempore, non res, non ratio, non commendatio aliqua, sed studiorum turpitudine, similitudoque conjunxit.

23. Verris mores improbos, impurosque nostis: fingite vobis, si potestis, aliquem, qui in omnibus istis rebus par ad omnium flagitiorum nefarias libidines esse possit; is erit Apronius ille: qui, ut ipse non solum vitâ, sed etiam corpore atque ore significat, immensa aliqua vorago est, ac gurges vitiorum turpitudinumque omnium. Hunc in omnibus stupris, hunc in fanorum expilationibus, hunc in impuris conviviis principem adhibebat: tantamque habebat morum similitudo conjunctionem atque concordiam, ut Apronius, qui aliis inhumanus ac barbarus, isti uni commodus ac disertus videretur: ut, quem omnes odissent, neque videre vellet, sine eo iste esse non posset: ut, quum alii, ne conviviis quidem iisdem, quibus Apronius, hic iisdem etiam poculis uteretur: postremò, ut odor Apronii terribilioris oris & corporis, quem, ut aiunt, ne bestiae quidem ferre possent, uni isti suavis & jucundus videretur. Ille erat in tribunali proximus: in cubiculo solus: in convivio dominus, ac tum maximè, quum, accubante prætextato prætoris filio, in convivio saltare nudus cœperat.

X. Hunc, uti dicere institui, principem Verres ad fortunas aratorum vexandas, diripiendasque esse voluit: hujus audaciæ, nequitiae, crudelitati, fidelissimos socios,

optimosque cives scitote hoc prætoris traditos, Judices, atque addictos fuisse, novis institutis & edictis, totâ Hieronicâ lege (quemadmodum antea dixi) rejectâ & repudiatâ.

25. Primum, edictum, Judices, audite præclarum: *QUANTUM decumanus edidisset aratorem sibi decumæ dare oportere, ut tantum arator decumano dare cogeretur.* Quomodo? quantum poposcerit. Apropius, dato. Quid est hoc? utrûm prætoris institutum in socios, an in hostes victos insani edictum, atque imperium tyranni? Ego tantum dem, quantum ille poposcerit? poscet omne, quantum exaravero. Quid omne? immo plus etiam, inquit, si volet. Quid tum? Quid censes? Aut dabis, aut contra edictum fecisse damnabere. Per deos immortales! quid est hoc? verisimile enim non est.

26. Sic mihi persuadeo, Judices, tametsi omnia in istum hominem convenire putetis, tamen hoc vobis falsum videri: ego enim, quum hoc tota Sicilia diceret, tamen affirmare non auderem, si hæc edicta non ex ipsius tabulis totidem verbis recitare possem, sicuti faciam: da, quæso, scribæ: recitet ex codice. Recita edictum de professione. *EDICTUM DE PROFESSIONE.* Negat me recitare totum: nam id significare nutu videtur. Quid prætereo?

an illud, ubi caves tamen Siculis, & miser-  
ros respicis aratores? edicis enim, te in de-  
cumanum, si plura sustulerit, quàm debi-  
tum sit, in octuplum judicium daturum  
esse. Nihil mihi placet prætermitti. Recita  
hoc quoque, quod postulat; totum recita.  
**EDICTUM DE JUDICIO IN OCTUPLUM.**  
Judicio ut arator decumanum persequatur?  
miserum, atque iniquum, ex agro homi-  
nes traduci in forum, ab aratro ad sub-  
sellia, ab usu rerum rusticarum ad inso-  
litam litem, atque judicium.

XI. Quum omnibus in aliis vectigali-  
bus, Asiæ, Macedoniæ, Hispaniæ, Gal-  
liæ, Africæ, Sardinia, ipsius Italiæ, quæ  
vectigalia sunt; quum in his, inquam, re-  
bus omnibus publicanus petitor, ac pigne-  
rator, non ereptor, neque possessor soleat  
esse: tu de optimo, de justissimo, de hones-  
tissimo genere hominum, hoc est, de ara-  
toribus, ea jura constituebas, quæ omnibus  
aliis essent contraria. Utrum est æquius,  
decumanum petere, an aratorem repe-  
tere? judicium, integrâ re, an perdi-  
tâ, fieri? eum, qui manu quæsierit, an  
eum, qui digito licitus sit, possidere?  
Quid? qui in singulis jugis arant, qui ab  
opere ipsi non recedunt, quo in numero  
magnus ante te prætorem numerus, ma-  
gna multitudo Siculorum fuit: quid fa-  
cient? quum dederint Apronio, quod por-

poscerit, relinquent arationes, relinquent Larem familiarem suum? venient Syracusas, ut, te prætor, videlicet, æquo jure, Apronium, delicias, ac vitam tuam, judicio recuperatorio persequantur?

28. Verum esto: reperietur aliquis fortis, & experiens arator, qui, quum tantum dederit decumano, quantum ille deberi dixerit, judicio repetat, & pœnam octupli persequatur. Exspecto vim edicti, severitatem prætoris: faveo aratori, cupio octupli damnari Apronium. Quid tandem postulat arator? nihil, nisi ex edicto judicium in octuplum. Quid Apronius? non recusat. Quid prætor? jubet recuperatores rejicere. Decurias scribamus. Quas decurias? de cohorte mea rejicies, inquit. Quid? ista cohors quorum hominum est? Volusii haruspici, & Cornelii medici, & horum canum, quos tribunal meum vides lambere. Nam de conventu nullum umquam judicem, nec recuperatorem dedit: iniquos decumanis esse aiebat omnes, qui ullam agri glebam possiderent: veniendum erat ad eos contra Apronium, qui nondum etiam Aproniani convivii crapulam exhalassent.

XII. O præclarum, & commemorandum judicium! ô severum edictum! ô tutum perfugium aratorum! Atque, ut intelligatis, cujusmodi ista judicia in octu-



plum, cujusmodi istius de cohorte recuperatores existimati sint: sic attendite. Ecquem putatis decumanum, hac licentiâ permissâ, ut tantum ab aratore, quantum poposcisset, auferret, plus quàm deberetur, poposcisse? considerate cum vestris animis vosmetipsi, ecquem puteatis; presertim quum id non solum avaritiâ, sed etiam imprudentiâ accidere potuerit: multos, necesse est. At ego omnes dico plus, ac multò plus, quàm decumas, abstulisse. Cedo mihi unum ex triennio præturæ tuæ, qui octupli damnatus sit. Damnatus? immo verò in quem iudicium ex edicto tuo postulatum sit. Nemo erat videlicet aratorum, qui injuriam sibi factam queri posset: nemo decumanorum, qui grano amplius sibi, quàm deberetur, deberi professus esset. Immo verò contrà, rapiebat, & asportabat, quantum a quoque volebat, Apronius: omnibus autem locis aratores spoliati, ac vexati querebantur: neque tamen ullum iudicium reperietur.

30. Quid est hoc? tot viri fortes, honesti, gratiosi, tot Siculi, tot equites Romani ab uno homine nequissimo, ac turpissimo læsi, pœnam octupli sine ulla dubitatione commissam, non persequabantur? quæ causa? quæ ratio est? una illa, Iudices, quam videtis: quòd ultro etiam

illos se, & irrisos ab iudicio discessuros videbant. Etenim quod esset iudicium, quum e Verris turpissimo, flagitiosissimoque comitatu tres recuperatorum nomine assedissent, assedisse istius, non a patre ei traditi, sed a meretricula commendati?

31. Ageret videlicet causam arator: nihil sibi frumenti ab Apronio relictum, bona sua etiam direpta: se pulsatum, verberatumque diceret: conferrent viri boni capita: de commissatione loquerentur inter se, ac de mulierculis, si quas a prætore abeuntes possent deprehendere: res agi videretur: surrexisset Apronius, nova dignitas publicani, non ut decumanus, squaloris plenus, ac pulveris; sed unguentis oblitus, vino, vigiliisque languidus: omnia primo motu, ac spiritu suo, vini, unguenti, corporis odore compleisset: dixisset hæc, quæ vulgò dicere solebat, non se decumas emisse, sed bona, fortunæque aratorum: non se decumanum esse Apronium, sed Verrem alterum, dominum illorum, ac tyrannum. Quæ quum dixisset, illi viri optimi de cohorte istius recuperatores, non de absolvendo Apronio deliberarent, sed quærent, ecquo modo petitorem ipsum Apronio condemnare possent.

XIII. Hanc tu licentiam diripiendorum aratorum quum decumanis, hoc est Apro-

nio, permisisses, ut, quantum vellet, posceret: quantum poposcisset, auferret: hoc tibi defensionis ad iudicium tuum comparabas, habuisse te edictum, recuperatores daturum in octuplum? Si mehercule ex omni copia conventus Syracusani, splendidissimorum, honestissimorumque hominum faceres potestatem aratori, non modò rejiciendi, sed etiam sumendi recuperatores: tamen hoc novum genus injuriæ ferre nemo posset; te, quum tuos omnes fructus publicano tradidisses, & rem de manibus amisisses, tum bona tua repetere, ac persequi lite atque iudicio.

33. Quum verò verbo, iudicium sit in edicto; re quidem verà tuorum comitum, hominum nequissimorum collusio cum decumanis, sociis tuis, atque adeo procuratoribus: tamen audes ullius iudicii mentionem facere, præsertim quum id non modò oratione meâ, sed etiam re ipsâ refellatur? quum in tantis incommodis aratorum, injuriisque decumanorum, nullum ex isto præclaro edicto non modò factum, sed ne postulatum quidem iudicium inveniatur?

34. Erit tamen in aratores lenior, quàm videtur: nam; qui in decumanos octupli iudicium se daturum edixit, idem habuit in edicto, se in aratorem in quadruplum daturum. Quis hunc audet dicere aratori-

bus infestum, aut inimicum fuisse? quantò lenior est, quàm in publicanum? Edixit, ut, quod decumanus edidisset sibi dari oportere, id ab aratore magistratus Siculus exigeret. Quid dereliquit iudicii, quod in aratorem dari posset? Non malum est, inquit, esse istam formidinem: ut quum exactum sit ab aratore, tamen ne se commoveat, reliquus metus iudicii sit. Si iudicio a me vis exigere, remove Siculum magistratum: si hanc vim adhibes, quid opus est iudicio? Quis porro erit, qui non malit decumanis tuis dare, quod poposcerint, quàm ab affeclis tuis quadruplo condemnari?

XIV. Illa verò præclara est clausula edicti, quòd omnium controversiarum, quæ essent inter aratorem, & decumanum, si uter velit, edicit, se recuperatores daturum. Primum, quæ potest esse controversia, quum is, qui petere debet, aufert? & quum is non, quantum debetur, sed quantum commodum est, aufert? ille autem, unde ablatum est, iudicio suum recuperare nullo modo potest? Deinde in hoc homo luteus, etiam callidus ac veterinarian esse vult, quod ita scribit, *Si uter volet, recuperatores dabo*. Quàm lepidè se furari putat? Utrique facit potestatem: sed utrùm ita scripserit, *Si uter volet*, an, *si decumanus volet*, nihil interest: arator

enim tuos istos recuperatores numquam volet.

36. Quid ? illa cujusmodi sunt , quæ ex tempore , ab Apronio admonitus , edixit ? Q. Septitio , honestissimo homine , equiteque Romano , resistente Apronio , & affirmante , se plus decumâ non daturum , exoritur peculiare edictum repentinum , ne quis frumentum de area. tolleret , antequam cum decumano pactus esset. Ferebat hanc quoque iniquitatem Septitius , & imbri frumentum corrumpi in area patiebatur : quum illud edictum repente uberri- mum & quæstuosissimum nascitur , ut ante Kalendas Sext. omnes decumas ad aquam deportatas haberent.

37. Hoc edicto non Siculi ( nam eos quidem jam superioribus edictis satis per- diderat , atque afflixerat ) sed isti ipsi equi- tes Romani , qui suum jus retinere se con- tra Apronium posse erant arbitrati , splen- didi homines , & aliis prætoribus gratiosi , vincti Apronio traditi sunt. Attendite enim , cujusmodi edicta sint. *Ne tollat* , inquit , *ex area , nisi erit pactus*. Satis hæc magna vis est ad iniquè paciscendum : malo enim plus dare , quàm non maturè ex area tol- lere. At ista vis Septitium , & nonnullos Septitii similes non coërcet ; qui ita di- cunt : Non tollam potius , quàm paciscar. His hoc apponitur : Deportatum habeas

ante Kalendas Sext. Deportabo igitur. Nisi pactus eris, non commovebis. Sic deportandi dies præstituta tollere cogebat ex area. Prohibitio tollendi nisi pactus esset, vim adhibebat pactioni, non voluntatem.

XV. Jam verò illud non solum contra legem Hieronicam, nec solum contra consuetudinem superiorum, sed etiam contra omnia jura Siculorum, quæ habent a senatu, populoque Romano, ne extra suum forum vadimonium promittere cogantur. Statuit iste, ut arator decumano, quò vellet decumanus, vadimonium promitteret: ut hic quoque Apronio, quum a Leontinis usque Lilybæum aliquem vadaretur, ex miseris aratoribus calumniandi quæstus accederet. Quamquam illa fuit ad calumniam singulari consilio reperta ratio, quòd edixerat, ut aratores jugera sationum suarum profiterentur. Quæ res quum ad pactiones iniquissimas magnam vim habuit, sicut ostendam, neque ad ullam utilitatem reipublicæ pertinuit: tum verò ad calumnias, in quas omnes inciderent, quos vellet Apronius.

39. Ut enim quisque contra voluntatem ejus dixerat, ita in eum iudicium de professione jugerum postulabatur: cujus iudicii metu magnus a multis frumenti numerus ablatus, magnæque pecuniæ coactæ sunt: non quò jugerum numerum verè profiteri

*ACTIONIS II. L. III. 25*

profiteri esset difficile, aut amplius etiam profiteri (quid enim in eo periculi esse posset?) sed causa erat iudicii postulandi, quod ex edicto professus non esset: iudicium autem quod fuerit isto prætore, si, quæ cohors, & qui comitatus fuerit, meministis, scire debetis. Quid igitur est, quod ex hac iniquitate novorum edictorum intelligi velim, Iudices? Injuriamne factam sociis? at videtis. Auctoritatem superiorum repudiatam? non audebit negare. Tantum Apronium isto prætore potuisse? confiteatur, necesse est.

XVI. Sed vos fortasse, quod vos lex commonet, id in hoc loco quæretis, num quas ex hisce rebus pecunias ceperit. Docebo, cepisse maximas, omnesque eas iniquitates, de quibus antea dixi, sui quæstus causâ constituisse vincam, si prius illud propugnaculum, quo contra omnes meos impetus usurum se putat, ex defensione ejus dejecero. Magno, inquit, decumas vendidi. Quid ais? an tu decumas, homo audacissime atque amentissime, vendidisti? tu partes eas, quas te senatus populusque Romanus voluit, an fructus integros, atque adeo bona, fortunasque aratorum omnes vendidisti? Si palam præco jussu tuo prædicasset, non decumas frumenti, sed dimidias venire partes, & ita emptores accessissent, ut ad dimi-

dias partes emendas ; si pluris vendidisses tu dimidias , quàm ceteri decumas , cui nam mirum videretur ? Quid verò , si præco decumas pronuntiavit : re verâ , hoc est , lege , edicto , conditione plus etiam , quàm dimidiæ venierunt ? tamen hoc tibi præclarum putabis , te pluris quod non licebat , quàm ceteros quod oportebat , vendidisse ?

41. Pluris vendidi decumas , quàm ceteri. Quibus rebus id affecutus es ? innocentia ? adspice ædem Castoris : deinde , si audes , fac mentionem innocentia. Diligentia ? codicis lituras tui contemplare in Sthenii Thermitani nomine : deinde aude te dicere diligentem. Ingenio ? qui testes interrogari priore actione nolueris , & iis tacitum os tuum præbere malueris , quantumvis , & te , & patronos tuos , ingeniosos esse , dicito. Quâ re igitur id , quod ais , affecutus es ? magna est enim laus , si superiores consilio vicisti , posterioribus exemplum atque auctoritatem reliquisti. Tibi fortasse idoneus fuit nemo , quem imitarere : at te videlicet , inventorem rerum optimarum , ac principem , imitabuntur omnes.

42. Quis aratorum , te prætor , decumam dedit ? quis duas ? quis non maximo se affectum beneficio putavit , quum tribus decumis pro una defungeretur , præter



paucos , qui propter societatem furtorum tuorum nihil omnino dederunt ? Vide , inter importunitatem tuam , senatûsque bonitatem , quid intersit. Senatus , quum temporibus reipublicæ cogitur , ut decernat , ut alteræ decumæ exigantur ; ita decernit , ut pecunia pro his decumis solvatur aratoribus : ut , quod plus sumitur , quàm debetur , id emi , non auferri putetur. Tu , quum tot decumas non senatusconsulto , sed novis edictis tuis , nefariisq[ue] institutis exigeres , & eriperes : magnum te fecisse arbitrare , si pluris vendideris , quàm L. Hortensius , pater istius Q. Hortensii , quàm Cn. Pompeius , quàm C. Marcellus : qui ab æquitate , ab lege , ab institutis non recesserunt ?

XVII. An tibi unius anni aut biennii ratio habenda fuit : salus provinciæ , comoda rei frumentariæ , ratio reipublicæ in posteritatem fuit negligenda ? quum ita rem constitutam accepisses , ut & populo Romano satis frumenti ex Sicilia suppeditaretur , & aratoribus tamen arare , atque agros colere expediret : quid effecisti ? quid assecutus es ? Ut populo Romano , prætore te , nescio quid ad decumas accederet , deferendas arationes relinquentesque curasti. Successit tibi L. Metellus. Tu innocentior , quàm Metellus ? tu laudis & honoris cupidior ? tibi enim consu-

latus quærebatur, Metello paternus honor, & avitus negligebatur. Multò minoris vendidit, non modò, quàm tu, sed etiam, quàm qui ante te vendiderunt.

44. Quæro, si ipse excogitare non poterat, quemadmodum quàm plurimo venderet: ne tua quidem recentia proximi prætoris vestigia persequi poterat, ut tuis præclaris, abs te principe inventis, & excogitatis edictis, atque institutis uteretur? Ille verò tum se Metellum minimè fore putasset, si te ulla in re imitatus esset: qui ab urbe Roma, quod nemo umquam post hominum memoriam fecit, quum sibi in provinciam proficiscendum putaret, litteras ad Siciliae civitates misit, per quas hortatur & rogat, ut arent, ut serant beneficio populi Romani. Hoc petit aliquantò ante adventum suum: & simul ostendit, se lege Hieronicâ venditurum, hoc est, in omni ratione decumarum nihil isti simile facturum. Atque hæc, non cupiditate aliquâ scribit adductus, ut in alienam provinciam mittat litteras ante tempus: sed consilio, ne, si tempus sationis præterisset, granum in provincia Sicilia nullum haberemus. Cognoscite Metelli litteras. Recita epistolam L. Metelli. LITTERÆ L. METELLI.

XVIII. Hæ litteræ, Judices, L. Metelli, quas audistis, hoc, quantum est ex

*ACTIONIS II. L. III. 29*

Sicilia frumenti hornotini exaraverunt: glebam commosset in agro decumano Siciliae nemo, si Metellus hanc epistolam non misisset. Quid? Metello divinitus hoc venit in mentem: an ab Siculis, qui Romam frequentissimi convenerant, negotiatoribusque Siciliae doctus est? quorum, quanti conventus ad Marcellos, antiquissimos Siciliae patronos, quanti ad Cn. Pompeium, consulem designatum, ceterosque illius provinciae necessarios, fieri soliti sint, quis ignorat? Quod quidem iudicium nullo umquam de homine factum est, ut absens accusaretur ab iis palam, quorum in bona, liberosque summum imperium, potestatemque haberet. Tanta vis erat injuriarum, ut homines quidvis perpeti, quàm non de istius pravitate & injuriis deplorare, & conqueri mallent.

46. Quas litteras quum ad omnes civitates propè suppliciter misisset Metellus, tamen antiquum modum sationis nulla ex parte assequi potuit: diffugerant enim permulti, id quod ostendam: non solum arationes, sed etiam sedes suas patrias, istius injuriis exagitati, reliquerant. Non mehercule criminis augendi causâ dicam, Iudices: sed, quem accepi ipse oculis, animoque sensum, hunc verè apud vos, &, ut potero, planissimè exponam.

47. Nam, quum quadriennio pòst in

Siciliam venissem : sic mihi affecta visa est , ut hæ terræ solent , in quibus bellum acerbum , diuturnumque versatum est : quos ego campos antea , collesque nitidissimos , viridissimosque vidissem , hos ita vastatos nunc , ac desertos videbam , ut ager ipse cultorem desiderare , ac lugere dominum videretur. Herbitensis ager , Ennensis , Murgentinus , Afforinus , Imacharensis , Agyrinensis , ita relictus erat ex maxima parte , ut non solum jugerum , sed etiam dominorum multitudinem quæreremus. Ætnensis verò ager , qui solebat esse cultissimus , & quod caput est rei frumentariæ , campus Leontinus , cujus antea species hæc erat , ut , quum obsitum videres , annonæ caritatem non vererere ; sic erat deformis , atque horridus , ut in uberrima Siciliæ parte Siciliam quæreremus. Labefactarat enim vehementer aratores jam superior annus : proximus verò funditus everterat.

XIX. Tu mihi etiam audes mentionem facere decumarum ? tu in tanta improbitate , tu in tanta acerbitate , in tot & tantis injuriis , quum in arationibus , & in earum rerum jure provincia Sicilia consistat , eversis funditus aratoribus , relictis agris , quum in provincia tam locuplete , ac referta , non modò rem , sed ne spem quidem ullam reliquam cuiquam feceris , ali-

quid te populare putabis habere, quum dices, te pluris, quàm ceteros, decumas vendidisse? Quasi verò aut populus Romanus hoc voluerit, aut senatus hoc tibi mandaverit, ut, quum omnes aratorum fortunas decumarum nomine eriperes, in posterum fructu illo, commodoque rei frumentariæ populum Romanum privares: deinde, si quam partem tuæ prædæ ad summam decumarum addidisses, bene de populo Romano meritus viderere. Atque hæc perinde loquor, quasi in eo sit iniquitas ejus reprehendenda, quòd propter gloriæ cupiditatem, ut aliquos summâ decumarum vinceret, acerbiorē legem, duriora edicta interposuerit, omnium superiorum auctoritatem repudiarit.

49. Magno tu decumas vendidisti. Quid, si doceo, te non minùs domum tuam aver-  
tisse, quàm Romam misisse, decumarum nomine? quid habet populare ratio tua, quum ex provincia populi Romani æquam partem tu tibi sumpseris, atque populo Romano miseris? quid, si duabus partibus doceo te amplius frumenti abstulisse, quàm populo Romano misisse? tamenne putamus patronum tuum in hoc crimine cerviculam jactaturum, & populo se ac coronæ daturum? Hæc vos antea, Judices, audistis: verum fortasse ita audistis, ut auctorem rumorem haberetis, sermonem-

que omnium : cognoscite nunc , innumerabilem pecuniam frumentario nomine ereptam ; ut simul illam quoque ejus vocem improbam agnoscatis ; qui se uno quæstu decumarum omnia sua pericula redempturum esse dicebat.

XX. Audimus hoc jamdiu , Judices ; nego quemquam esse vestrûm , quin sæpe audierit , socios istius fuisse decumanos : nihil aliud arbitror in istum falsò esse dictum ab iis , qui malè de isto existimarint , nisi hoc : nam focii putandi sunt , quos inter res communicata est. Ego rem totam , fortunasque aratorum omnes , istius fuisse dico : Apronium , Veneriosque servos , quod isto prætore fuit novum genus publicanorum , ceterosque decumanos , procuratores istius quæstûs , & ministros rapinarum fuisse dico.

§ 1. Quo modo hoc doces ? quo modo ex locatione illa columnarum docui istum esse prædatum ? opinor , ex eo maximè , quòd iniquam legem , novamque dixisset. Quis enim umquam conatus est jura omnia , & consuetudinem omnium commutare cum vituperatione , sine quæstu ? Pergam , atque insequar longiùs : iniquâ lege vendebas , quò pluris venderes : cur , jam addictis , & venditis decumis , quum jam ad summam decumarum nihil , ad tuum quæstum multum posset accedere , subito

atque ex tempore nova nascebantur edicta ? nam , ut vadimonium decumano , quocumque is vellet , promitteretur : ut ex area , nisi pactus esset , arator ne tolleretur : ut ante Kalend. Sext. decumas deportatas haberent : hæc omnia , venditis jam decumis , anno tertio te edixisse dico : quæ si reipublicæ causâ faceres , in vendendo essent pronuntiata : quia tuâ causâ faciebas , quod erat imprudentiâ prætermisum , id quæstu , ac tempore admonitus reprehendisti.

52. Illud verò cui probari potest ? te sine tuo quæstu , ac maximo quæstu , tantam tuam infamiam , tantum capitis tui , fortunarumque periculum neglexisse ; ut , quum totius Siciliæ quotidie gemitus , querimoniae que audires ; quum , ut ipse dixisti , reum te fore putares ; quum hujusce iudicii discrimen ab opinione tua non abhorreret ; paterere tamen aratores indignissimis injuriis vexari , ac diripi ? profectò , quamquam es singulari crudelitate & audaciâ ; tamen abs te totam alienari provinciam , tot homines honestissimos , ac locupletissimos , tibi inimicissimos fieri nolles , nisi hanc rationem , & cogitationem salutis tuæ , pecuniæ cupiditas , ac præsens illa præda superaret. Etenim , quoniam summam , & numerum injuriarum , Iudices , vobis non possum exponere : singulatim autem de uniuscujusque incommodo

dicere infinitum est : genera ipsa injuriarum , quæso , cognoscite.

XXI. Nympho est Centuripinus , hominavus , & industrius , experientissimus , ac diligentissimus arator : is quum arationes magnas conductas haberet ( quod homines etiam locupletes , sicut ille est , in Sicilia facere consueverunt ) easque magnâ impensâ , magno instrumento tueretur : tantâ ab isto iniquitate oppressus est , ut non modò arationes relinqueret , sed etiam ex Sicilia profugeret , Romamque unâ cum multis ab isto ejectis veniret. Fecit ut decumanus Nymphonem negaret ex edicto illo præclaro , quod nullam ad aliam rem , nisi ad hujusmodi quæstus pertinebat , numerum jugerum professum esse.

54. Nympho quum se vellet æquo judicio defendere , iste viros optimos recuperatores dat , eundem illum medicum Cornelium ( is est Artemidorus Pergæus , qui in sua patria dux isti quondam & magister ad despoliandum Dianæ templum fuit ) & haruspicem Volusianum , & Valerium præconem. Nympho , antequam planè constitit ; condemnatur. Quanti , fortasse quæritis : nulla erat edicti pœna certa : frumenti ejus omnis , quod in areis esset. Sic Apronius decumanus , non decumam debitam , non frumentum remotum atque celatum ; sed tritici septem



*ACTIONIS II. L. III. 35*

millia medimnûm ex Nymphonis arationibus, edicti pœnâ, non redemptionis aliquo jure tollit.

XXII. Xenonis Meneni, nobilissimi hominis, uxoris fundus erat, colono locatus: colonus, quòd decumanorum injurias ferre non poterat, ex agro profugerat. Verres in Xenonem judicium dabat illud suum damnatorium de jugerum professione. Xeno ad se pertinere negabat: fundum elocatum esse dicebat. Dabat iste judicium, *Si pareret jugera ejus fundi esse plura, quàm colonus esset professus, tum uti Xeno damnaretur.* Dicebat ille, non modò non arasse se, id quod satis erat, sed nec dominum esse ejus fundi, nec locatorem: uxoris esse: eam ipsam suum negotium gerere: ipsam locavisse. Defendebat Xenonem homo summo splendore, & summâ auctoritate præditus, M. Cossenius. Iste nihilominus judicium H-S LXXX millium dabat. Ille tametsi recuperatores de cohorte latronum sibi parari videbat; tamen judicium accepturum se esse dicebat. Tum iste magnâ voce Veneriis imperat, ut Xeno audiret: *Dum res judicetur, hominem ut asservent: quum judicatum sit, ad se adducant:* & illud simul dixit; se non putare, illum, si propter divitias, pœnas damnationis contemneret, etiam virgas contemnere. Hac ille

vi, & hoc metu adductus, tantum decumanis, quantum iste imperavit, exsolvit.

XXIII. Polemarchus est Murgentinus, vir bonus atque honestus: is, quum pro jugeribus quinquaginta, medimna DCC decumæ imperarentur, quòd recusabat, domum ad istum in jus eductus est: &, quum iste etiam cubaret, in cubiculum introductus est: quod, nisi mulieri, & decumano, patebat nemini alii. Ibi, quum pugnis & calcibus conscissus esset; qui DCC medimnis decidere noluisset, mille promisit. Ebulides est Grasphus, Centuripinus, homo quum virtute & nobilitate domi suæ, tum etiam pecuniâ princeps: huic homini, Judices, honestissimæ civitatis honestissimo, non modò frumenti scitote, sed etiam vitæ & sanguinis tantum relictum esse, quantum Apronii libido tulit: nam vi, malo, plagis adductus est, ut frumenti daret, non quantum haberet, sed quantum cogeretur.

57. Sostratus, & Numenius, & Nymphodorus ejusdem civitatis, quum ex agris tres fratres consortes profugissent, quòd iis plus frumenti imperabatur, quàm quantum exarant: hominibus coactis, in eorum arationes Apronius venit, omne instrumentum diripuit, familiam abduxit, pecus abegit: postea quum ad eum Nym-

phodorus venisset Ætnam, & oraret, ut sibi sua restituerentur; hominem corripere, ac suspendi jussit in oleastro quodam; quæ est arbor, Judices, in foro: tamdiu pependit in arbore socius amicusque populi Romani, in sociorum urbe ac foro, colonus aratorque vester, quamdiu voluntas Apronii tulit.

§8. Genera jamdudum innumerabilium injuriarum, Judices, singulis nominibus profero: infinitam multitudinem injuriarum prætermitto: vos ante oculos animosque vestros, totâ Siciliâ decumanorum hos impetus, aratorum direptiones, hujus importunitatem, Apronii regnum proponite. Contempsit Siculos: non duxit homines, nec ipsos ad persequendum vehementes fore, & vos eorum injurias leviter laturos existimavit.

XXIV. Esto: falsam de illis habuit opinionem, malam de vobis: verumtamen quum de Siculis malè mereretur, cives Romanos coluit, his indulxit, eorum voluntati & gratiæ deditus fuit. Iste cives Romanos? At nullus inimicior, aut infestior fuit. Mitto vincla, mitto carcerem, mitto verbera, mitto secures: crucem denique illam prætermitto, quam iste civibus Romanis testem humanitatis in eos, ac benevolentiae suæ voluit esse: mitto, inquam, hæc omnia, atque in aliud di-

cendi tempus rejicio : de decumis , de civium Romanorum conditione in arationibus disputo : qui quemadmodum essent accepti , Judices , audistis ex ipsis : bona sibi erepta esse dixere.

60. Verum hæc , quoniam ejusmodi causa fuit , ferenda sunt : nihil valuisse æquitatem , nihil consuetudinem : damna denique , Judices , nulla tanta sunt , quæ non viri fortes , magno & libero animo affecti , ferenda arbitrentur. Quid , si equitibus Romanis non obscuris , neque ignotis , sed honestis & illustribus , manus ab Apronio , isto prætore , sine ulla dubitatione afferebantur ? quid expectatis ? quid a me amplius dicendum putatis ? an id agendum , ut eò celerius de isto transigamus , quò maturius ad Apronium possimus , id quod ego illi jam in Sicilia pollicitus sum , pervenire ? qui C. Matrinium , Judices , summâ virtute hominem , summâ industriâ , summâ gratiâ , Leontinis , in publico , biduum tenuit. Atqui ab Apronio , Judices , homine in dedecore nato , ad turpitudinem educato , ad Verris flagitia libidinesque accommodato , equitem Romanum scitote biduum cibo tectoque prohibitum : biduum Leontinis , in foro , custodiis Apronii retentum atque servatum , neque antè dimissum , quàm ad conditiones ejus depactus est.

XXV. Nam quid ego de Q. Lollio, Judices, dicam, equite Romano spectato atque honesto? Clara res est, quam dicturus sum, totâ Siciliâ celeberrima, atque notissima: qui quum araret in Ætnensi, quumque is ager Apronio cum ceteris agris esset traditus, equestri vetere illâ & auctoritate & gratiâ fretus, affirmavit, se decumanis plus quàm deberet, non daturum: refertur ejus sermo ad Apronium. Enimvero iste ridere, ac mirari, Lollium nihil de Matrinio, nihil de ceteris rebus audisse: mittit ad hominem Venerios (hoc quoque attendite, apparitores a prætore assignatos habuisse decumanum; si hoc mediocre argumentum videri potest, istum decumanorum nomine ad suos quæstus esse abusum) adducitur a Veneriis, atque adeo attrahitur Lollius commodè, quum Apronius e palæstra redisset, & in triclinio, quod in foro Ætnæ straverat, decubisset.

62. Statuitur Lollius in illo tempestivo gladiatorum convivio. Non mehercule, quæ loquor, crederem, Judices, tametsi vulgò audieram, nisi mecum ipse senex, quum mihi, atque huic voluntati accusationis meæ lacrymans gratias ageret, summa cum auctoritate esset locutus. Statuitur, ut dico, eques Romanus, propè annos XC natus, in Apronii convivio, quum

interea Apronius caput, atque os suum unguento perfricaret. Quid est, Lolli, inquit? tu, nisi malo coactus, rectè facere nescis? Homo quid ageret; taceret, responderet; quid faceret denique, illà auctoritate, & ætate præditus, nesciebat. Apronius interea cœnam, ac pocula poscebat: servi autem ejus, qui & moribus iisdem essent, quibus dominus, & eodem genere ac loco nati, præter oculos Lollii hæc omnia ferebant. Ridere convivæ: cachinnari ipse Apronius: nisi fortè existimatis, eum in vino, ac luxu non risisse, qui nunc in periculo, atque exitio suorum tenere non possit. Ne multa, Iudices: his contumeliis scitote Q. Lollium coactum ad Apronii leges, conditionesque venisse.

63. Lollius, ætate & morbo impeditus, ad testimonium dicendum venire non potuit. Quid opus est Lollio? nemo hoc nescit: nemo tuorum amicorum, nemo abs te productus, nemo interrogatus, nunc se primum hoc dicet audire. M. Lollius, ejus filius, adolescens lectissimus, præstò est: hujus verba audietis: nam Q. Lollius, ejus filius, qui Calidium accusavit, adolescens & bonus, & fortis, & in primis disertus, quum his injuriis, contumeliisque commotus, in Siciliam esset profectus, in itinere occisus est: cujus mortis

*ACTIONIS II. L. III. §1*

causam fugitivi sustinent : re quidem verâ nemo in Sicilia dubitat , quin eò sit occisus , quòd habere clausa non potuerit sua consilia de Verre. Iste porro non dubitabat , quin is , qui antea alium studio adductus accusasset , sibi advenienti præstò esset futurus , quum esset parentis injuriis , & domestico dolore commotus.

XXVI. Jamne intelligitis , Judices , quæ pestis , quæ immanitas in vestra antiquissima , fidelissima , proximaque provincia versata sit ? Jam videtis , quam ob causam Sicilia tot hominum antea furta , rapinas , iniquitates , ignominiasque perpeffa , non potuerit hoc novum , ac singulare , atque incredibile genus injuriarum , contumeliarumque perferre ? Jam omnes intelligunt , cur universa provincia defensorem suæ salutis eum quæsivit , cujus iste fidei , diligentiae , perseverantiae , nullâ ratione eripi possit. Tot judiciis interfuistis : tot homines nocentes & improbos accusatos , & vestrâ , & superiorum memoriâ scitis esse : ecquem vidistis , ecquem audistis , in tantis furtis , in tam apertis , in tanta audacia , tanta impudentia esse versatum ?

65. Apronius stipatores Venerios secum habebat : ducebat eos circum civitates : publicè sibi convivia parari , sterni triclinia , & in foro sterni jubebat : eò vocari

homines honestissimos , non solum Siculos , sed etiam equites Romanos : ut , quicum inire convivium nemo umquam , nisi turpis , impurusque voluisset ; ad ejus convivium spectatissimi , atque honestissimi viri tenerentur. Hæc tu , omnium mortalium profligatissime , ac perditissime , quum scires , quum audires quotidie , quum videres : si sine tuo maximo quæstu fierent , cum tanto periculo tuo fieri paterere , atque concederes ? & tantum apud te quæstus Apronii , tantum ejus sermo inquinatissimus , & blanditiæ flagitiosæ valuerunt , ut numquam animum tuum cura tuarum fortunarum , cogitatioque tangeret ?

. 66. Cernitis , Judices , quod & quantum incendium , decumanorum impetu ; non solum per agros , sed etiam per reliquas fortunas aratorum ; neque solum per bona , sed etiam per jura libertatis , & civitatis , isto prætore pervaserit : videtis pendere alios ex arbore : pulsari autem alios , & verberari : porro alios in publico custodiri : destitui alios in convivio : condemnari alios a medico , & præcone prætoris : bona tamen interea nihilominus eorum omnium ex agris auferri ac diripi. Quid est hoc ? populi Romani imperium ? populi Romani leges ? judicia ? socii fideles ? provincia suburbana ? nonne



omnia potius ejusmodi sunt, quæ, si Athenio vicisset, in Sicilia non fecisset? non, inquam, Judices, esset ullam partem istius nequitiae fugitivorum insolentia consecuta.

XXVII. Privatim hoc modo: quid? publicè civitates quemadmodum tractatæ sunt? audistis permulta indicia & testimonia civitatum, & reliquarum audietis. Ac primùm de Agyrinensi populo, fidei & illustri, breviter cognoscite. Agyrinensis est in primis honesta civitas Siciliæ, hominum ante hunc prætorem locupletium, summorumque aratorum: ejus agri decumas quum emisset idem Apronius, Agyrium venit. Qui quum eò cum apparitoribus, id est, cum minis ac vi venisset, poscere pecuniam grandem cœpit, ut, accepto lucro, discederet: nolle se negotii quidquam habere dicebat, sed acceptâ pecuniâ, quàm primùm aliam civitatem occurrere. Sunt omnes Siculi non contemnendi, si per nostros magistratus liceat: sed homines & satis fortes, & satis planè frugi ac sobrii; & in primis hæc civitas, de qua loquor, Judices. Itaque homini in primis improbissimo respondent Agyrinenses, sese decumas ei, quemadmodum deberent, daturus: lucrum, quum ille magno præsertim emisset, non addituros. Apronius certorem

facit istum, cuja res erat, quid rei esset.

XXVIII. Statim, tamquam conjuratio aliqua Agyrii contra rempublicam facta, aut legatus prætoris pulsatus esset, ita Agyrio magistratus, & quinque-primi, accitu istius evocantur. Veniunt Syracusas: præstò est Apronius: ait eos ipsos, qui venissent, contra edictum prætoris fecisse. Quærebant, quid? respondebat, se ad recuperatores esse dicturum. Iste, æquisimus homo, formidinem illam suam miseris Agyrinensibus injiciebat: recuperatores se de cohorte sua daturum minabatur. Agyrinenses, viri fortissimi, judicium se passuros esse dicebant.

69. Ingerebat iste Artemidorum, Cornelium medicum, Valerium præconem, Tlepoleum pictorem, & ejusmodi recuperatores; quorum civis Romanus nemo erat: sed Græci sacrilegi, jampridem improbi, repentè Cornelii. Videbant Agyrinenses, quidquid ad eos recuperatores Apronius attulisset, illum perfacile probaturum: condemnari cum istius invidia infamiaque malebant, quàm ad ejus condiciones pactionesque accedere. Quærebant, quæ in verba recuperatores daret. Respondebat, *Si pareret adversus edictum fecisse*, quæ se in judicio dicturum esse dicebat. Iniquissimis verbis, improbissimis recuperatoribus, conflictari malebant, quàm

ACTIÖNIS II. L. III. 45

quidquam cum isto suâ voluntate decidere. Summittebat iste Timarchidem, qui moneret eos, si scaperent, ut transigerent. Pernegabant. Quid ergo? in singulos H-S quinquagenis millibus damnari mavultis? Malle dicebant. Tum iste clarè, omnibus audientibus, *Qui damnatus erit, inquit, virgis ad necem cadetur.* Hic illi flentes rogare atque orare cœperunt, ut sibi suas segetes, fructusque omnes, arationesque vacuas Apronio tradere liceret: ut ipsi sine ignominia, molestiaque discederent. Hac lege, Judices, decumas vendidit Verres. Dicat licet Hortensius, si volet, magno Verrem vendidisse.

XXIX. Hæc conditio fuit isto prætore aratorum, ut secum præclarè agi arbitrantur, si vacuos agros Apronio tradere liceret: multas enim cruces propositas efugere cupiebant: quantum Apronius edidisset deberi, tantum ex edicto dandum erat. Etiamne si plus edidisset, quàm quantum natum esset? Etiam. Quomodo? Magistratus ex ipsius edicto exigere debebant. At arator repetere poterat. Verùm Artemidoro recuperatore. Quid, si minùs arator dedisset, quàm poposcisset Apronius? Judicium in aratorem in quadruplum. Ex quo iudicium numero? Ex cohorte prætoris præclara hominum honestissimorum. Quid ampliùs? minus te iugerum profes-

sum esse dico : recuperatores rejice , quòd adversum edictum feceris. Ex quo numero ? ex eadem cohorte. Quid erit extremum ? Si damnatus eris ( nam dubitatio damnationis , illis recuperatoribus , quæ poterat esse ? ) virgis te ad necem cædi necesse erit. His legibus , his conditionibus , erit quisquam tam stultus , qui decumas venisse arbitretur ? qui aratori novem partes reliquas factas esse existimet ? qui non intelligat , istum sibi quæstui prædæque habuisse bona , possessiones , fortunas aratorum ? Virgarum metu Agyrinenses , quod imperatum esset , facturos se esse dixerunt.

XXX. Accipite nunc , quid imperarit : & dissimulate vos , si potestis , vos intelligere , ipsum prætorem , quod tota Sicilia perspexerit , redemptorem decumarum , atque adeo aratorum dominum ac regem fuisse. Imperat Agyrinensibus , ut decumas ipsi publicè accipiant : Apronio lucrum dent. Si magno emerat , quoniam tu es , qui diligentissimè pretium exquisisti ; qui , ut ais , magno vendidisti : quare putabas emptori lucrum addi oportere ? Esto : putabas. Quamobrem imperabas , ut adderent ? Quid est aliud capere , & conciliare pecunias , in quo te lex tenet , si hoc non est , vi atque imperio cogere invitos lucrum dare alteri , hoc est , pecuniam dare ?

*ACTIONIS II. L. III. 47*

72. Age, quid tum? si Apronio, delictis prætoris, lucelli aliquid jussi sunt dare, putate Apronio datum, si Apronianum lucellum, ac non prætoriam prædā vobis videbitur. Imperas, ut decumas accipiant: Apronio dent lucrum, tritici medimnū xxxiii millia. Quid est hoc? una civitas, ex uno agro, plebi Romanæ propè menstrua cibaria prætoris imperio donare Apronio cogitur. Tu magno decumas vendidisti, quum tantum lucri decumano sit datum? profectò, si pretium exquississes diligenter, tum, quum vendebas, x. medimnū potius addidissent, quàm H-S dc postea. Magna præda videtur: audite reliqua, & diligenter attendite, quominus miremini, Sículos, re necessariā coactos, auxilium a patronis, a consulibus, a senatu, a legibus, a judiciis petivisse. Ut probaret Apronius hoc triticum, quod ei dabatur, imperat Agyriensibus Verres, ut in medimna singula dentur Apronio H-S iii.

XXXI. Quid est hoc? tanto numero frumenti, lucri nomine, imperato & expresso, nummi præterea exigentur, ut probetur frumentum? an poterat non modò Apronius, sed quivis, exercitui si metiendum esset, improbare Siculum frumentum, quod isti ex area, si vellet, admetiri licebat? Frumenti tantus numerus im-

perio tuo datur, & cogitur: non est satis: nummi præterea imperantur: dantur: parum est. Pro decumis hordei alia pecunia cogitur. Jubes H-S xxx lucri dari. Ita ab una civitate, vi, minis, imperio, injuriâque prætoris eripiuntur tritici medimnûm xxxiii, & præterea H-S lx. An hæc obscura sunt? aut, si omnes homines velint, obscura esse possunt? quæ tu palam egisti? in conventu imperasti? omnibus inspectantibus coëgisti? qua de re Agyrinenses magistratus, & quinque-primi, quos tu, tuique quæstûs causâ evocasti, acta & imperia tua domum ad senatum suum renuntiaverunt: quorum renuntiatio, legibus illorum, litteris publicis mandata est: quorum legati, homines nobilissimi, Romæ sunt, qui hoc idem pro testimonio dixerunt?

74. Cognoscite Agyrinensium publicas litteras: deinde testimonium publicum civitatis. Recita litteras publicas. LITTERÆ PUBLICÆ. Recita testimonium publicum. TESTIMONIUM PUBLICUM. Animadvertistis in hoc testimonio, Judices, Apollodorum, cui Pyragro cognomen est, principem suæ civitatis, lacrymantem testari, ac dicere, numquam post populi Romani nomen ab Siculis auditum, & cognitum, Agyrinenses contra quemquam infimum civem Romanum dixisse, aut fecisse quippiam:

piam : qui nunc contra prætorem populi Romani magnis injuriis, & magno dolore publicè testimonium dicere cogentur. Uni mehercule, huic civitati, Verres, obsistere tuâ defensione non potes : tanta auctoritas est in eorum hominum fidelitate, tantus dolor in injuria, tanta religio in testimonio. Verùm non una te tantum, sed universæ similibus afflictæ incommodis, legationibus, ac testimoniis publicis persequuntur.

XXXII. Etenim deinceps videamus, Herbitensis civitas, honesta, & antea copiosa, quemadmodum spoliata ab isto, ac vexata sit. At quorum hominum ? summorum aratorum, remotissimorum a foro, judiciis, & controversiis : quibus parcere, & consulere, homo impurissime, & quod genus hominum studiosissimè conservare debuisti. Primo anno venierunt ejus agri decumæ tritici medimnũ XVIII. Atidius, istius item minister in decumis, quum emisset, & præfecti nomine quum venisset Herbitam cum Veneriis, locusque ei publicè, quò diverteretur, datus esset : coguntur Herbitenses ei lucri dare tritici medimnũ XXXVII millia, quum decumæ venissent tritici medimnũ XVIII millibus. Atque hoc tantum triticum lucri coguntur dare publicè, quum jam privatim aratores ex agris, spoliati, atque exagi-

tati decumanorum injuriis, profugissent.

76. Anno secundo quum emisset Apronius decumas tritici medimnûm xxv millibus, & ipse Herbitam cum illa prædonum copia, manuque venisset: populus publicè coactus est ei conferre lucri tritici medimnûm xxvi, & accessionem H-S cio cio. De accessione dubito, an Apronio ipsi data sit, merces operæ, pretiumque impudentiæ. De tritici quidem numero tanto quis potest dubitare, quin ad istum prædonem frumentarium, sicut Agyrinense frumentum, pervenerit? Anno verò tertio in hoc agro consuetudine usus est regiâ.

XXXIII. Solere aiunt barbaros reges Persarum, ac Syrorum, plures uxores habere: his autem uxoribus civitates attribuerent, hoc modo: Hæc civitas mulieri redimiculum præbeat, hæc in collum, hæc in crines: ita populos habent universos non solum conscios libidinis suæ, verum etiam administratos. Eamdem istius, qm se regem Siculorum esse ducebat, licentiam, libidinemque fuisse cognoscite. Æschrionis Syracusani uxor est Pippa: cujus nomen, istius nequitia, totâ Siciliâ pervulgatum est: de qua muliere versus plurimi supra tribunal, & supra prætoris caput scribebantur. Hic Æschrio, Pippæ vir adumbratus, in Herbitensibus decumis novus instituitur publicanus. Herbitenses quum



viderent, si ad Æschrionem pretium reddisset, se ad arbitrium libidinosissimæ mulieris spoliatum iri; liciti sunt usque eò, quoad se efficere posse arbitrabantur. Suprà adjecit Æschrio: neque enim metuebat, ne, prætor Verre, decumana mulier damno affici posset. Addicitur medimnûm xxxv millibus; dimidio ferè pluris, quàm superiore anno. Aratores funditus evertabantur: & eò magis, quòd jam superioribus annis exhausti erant, ac pene perdit. Intellexit iste ita magno venisse, ut amplius ab Herbitensibus exprimi non posset. Demit de capite medimnûm cio cio cio. Jubet in tabulas pro medimnûm xxxv, referri xxxi, & cccc. Hordei decumas ejusdem agri Docimus emerat.

XXXIV. Hic est Docimus, qui ad istum deduxerat Tertiam, Isidori mimi filiam, vî abductam ab Rhodio tibicine. Hujus Tertie plus etiam, quàm Pippæ, plus quàm ceterarum, ac propè dicam, tantum apud istum in Siciliensi prætura auctoritas valuit, quantum in urbana Chelidonis. Veniunt Herbitam duo prætoris æmuli non molesti, muliercularum teterimarum improbissimi cognitores: incipiunt postulare, poscere, minari: non poterant tamen, quum cuperent, Apronium imitari. Siculi Siculos non tam pertimescebant. Quum omni ratione tamen

illi calumniarentur ; promittunt Herbitenses vadimonium Syracusas. Eò posteaquam ventum est , coguntur Æschrioni , id est , Pippæ , dare tantum , quantum erat de capite demptum , tritici medimnûm CIO CIO CIO IC. Mulierculæ publicanæ noluit ex decumis nimium lucri dare , ne fortè ab nocturno suo quæstu animum ad vectigalia redimenda transferret.

79. Transactum putabant Herbitenses ; quum iste , Quid de hordeo , inquit , & Docimo , amiculo meo ? quid cogitatis ? At hoc agebat in cubiculo , Judices , atque in lectulo suo. Negabant illi sibi quidquam esse mandatum. Non audio : numerate H-S xv. Quid facerent miseri ? aut quid recusarent ? præsertim quum in lectulo decumanæ mulieris vestigia viderent recentia , quibus illum inflammari ad perseverandum intelligebant ? Ita civitas una sociorum , atque amicorum duabus teterrimis mulierculis , Verre prætore , vectigalis fuit. Atque ego nunc eum frumenti numerum , & eas publicè pecunias decumanis ab Herbitensibus datas esse dico : quo illi frumento , & quibus pecuniis tamen a decumanorum injuriis cives suos non redemerunt : perditis enim , & direptis aratorum bonis , hæc decumanis merces dabatur , ut aliquando ex eorum agris , atque ex urbibus abirent.

*ACTIONIS II. L. III. 53*

80. Itaque quum Philinus Herbitensis, homo disertus, & prudens, & domi nobilis, de calamitate aratorum, & de fuga, & de reliquorum paucitate publicè diceret, animadvertistis, Iudices, gemitum populi Romani, cujus frequentia huic causæ numquam defuit: qua de paucitate aratorum alio loco dicam.

XXXV. Nunc illud, quod pene præterii, non omnino relinquendum videtur: nam, per deos immortales! quod de capite ipso dempsit, quo tandem modo vobis non modò ferendum, verùm etiam audiendum videtur?

81. Unus adhuc fuit post Romam conditam (dii immortales faxint, ne sit alter!) cui respublica totam se traderet temporibus coacta & malis domesticis, L. Sulla. Hic tantum potuit, ut nemo, illo invito, nec bona, nec patriam, nec vitam retinere posset: tantum animi habuit ad audaciam, ut dicere in concione non dubitaret, bona civium Romanorum quum venderet, se prædam suam vendere. Ejus omnes res gestas non solum obtinemus; verùm etiam propter majorum incommodorum & calamitatum metum, publicâ auctoritate defendimus. Unum hoc illius senatusconsulto reprehensum decretumque est, ut, quibus ille de capite dempsisset, hi pecunias in ærarium refer-

rent. Statuit senatus, hoc ne illi quidem esse licitum, cui concesserat omnia, a populo factarum quæsitarumque rerum summas imminuere.

82. Illum viris fortissimis judicarunt patres conscripti remittere de summa non potuisse: te mulieri teterrimæ remisisse senatores judicabunt? Ille, de quo lege populus Romanus jusserat, ut ipsius voluntas populo Romano esset pro lege, tamen in hoc uno genere, veterum religione legum, reprehenditur: tu, qui omnibus legibus implicatus tenebare, libidinem tibi tuam pro lege esse voluisti? In illo reprehenditur, quod ex ea pecunia remisit, quam ipse quæsierat: tibi concedetur, qui de capite vectigalium populi Romani remisisti?

XXXVI. Atque in hoc genere audaciæ multò etiam impudentius in decumis Segestensium versatus est: quas quum addixisset eidem illi Docimo, hoc est, Tertiæ, tritici modiûm quinque millibus, & accessionem adscripsisset H-S MD, coëgit Segestenses a Docimo tantidem publicè accipere: id quod ex Segestensium publico testimonio cognoscite. Recita testimonium publicum. TESTIMONIUM PUBLICUM. Audistis, quanti decumas acceperit a Docimo civitas, tritici modiûm quinque millibus, & accessionem. Cognoscite

nunc , quanti se vendidisse retulerit. LEX DECUMIS VENDENDIS C. VERRE PR. Hoc nomine videtis tritici modiũm CIO CIO CIO de capite esse dempta , quæ quum de populi Romani victu , de vestigalium nervis , de sanguine detraxisset ærarii , Tertiæ mimæ condonavit. Utrũ impudentius a sociis abstulit , an turpius meretrici dedit ? an improbius populo Romano ademit ? an audaciũs tabulas publicas commutavit ? Ex horum severitate te ulla vis , aut ulla largitio eripiet ? Sed si eripuerit ; non intelligis , hæc , quæ jamdudum loquor , ad aliam quæstionem , atque ad peculatũs iudicium pertinere ? Itaque hoc mihi reservabo genus integrum totum : ad illam , quam institui , causam frumenti ac decumarum revertar. Qui quum agros maximos ac feracissimos per seipsum , hoc est per Apronium , Verrem alterum , depopularetur : ad minores civitates habebat alios , quos , tamquam canes immitteret , nequam homines & improbos ; quibus aut frumentum , aut pecuniam publicè cogebat dari.

XXXVII. A. Valentius est in Sicilia , interpres : quo iste interprete non ad linguam Græcam , sed ad furta & flagitia uti solebat. Fit interpres hic , homo levis , atque egens , repentè decumanus : emit agri Liparensis , miseri atque jejuni , decumas tritici medimnis DC. Liparenses vo-

cantur : ipsi accipere decumas , & numerare Valentio coguntur lucri H-S xxx millia. Per deos immortales ! utrum tibi fumes ad defensionem ? tantone minoris te decumas vendidisse , ut ad medimna DC , H-S xxx millia lucri , statim suâ voluntate civitas adderet , hoc est , tritici medimnûm duo millia ? an , quum magno decumas vendidisses , te expressisse ab invitis Liparensibus hanc pecuniam ?

85. Sed quid ego ex te quæro , quid defensus sis potius , quàm cognoscam ex ipsa civitate , quid gestum sit ? Recita testimonium publicum Liparensium , deinde quemadmodum Valentio nummi sint dati. *TESTIMONIUM PUBLICUM , quomodo solum sit , ex litteris publicis.* Etiamne hæc tam parva civitas , tam procul a manibus tuis , atque a conspectu remota , sejuncta a Sicilia , in insula inculta , tenuique posita , cumulata aliis tuis majoribus injuriis , in hoc quoque frumentario genere prædæ tibi & quæstui fuit ? Quam tu totam insulam cuidam tuorum sodalium , sicut aliquod munusculum , condonaras : ab hac etiam hæc frumentaria lucra , tamquam a mediterraneis , exigebantur ? Itaque qui tot annis agellos suos ante te prætorem redimere a piratis solebant , iidem seipsos a te pretio imposito redemerunt.

XXXVIII. Quid ergo ? a Tiffensibus

perparva & tenui civitate , sed aratoribus laboriosissimis , frugalissimisque hominibus , nonne plus , lucri nomine , eripitur , quàm quantum frumenti omnino exararant? ad quos tu decumanum Diognotum Venerium misisti , novum genus publicani. Cur hoc auctore non Romæ quoque servi publici ad vectigalia accedant ? Anno secundo Tiffenses H-S XXI lucri dare coguntur inviti. Tertio anno , CIO CIO medimnûm tritici lucri Diognoto Venerio dare coacti sunt. Hic Diognotus , qui ex publicis vectigalibus tanta lucra facit , vicarium nullum habet , nihil omnino peculii. Vos etiam nunc dubitate , si potestis , utrùm tantum numerum tritici Venerius apparitor istius sibi acceperit , an huic exegerit.

87. Atque hæc ex publico Tiffensium testimonio cognoscite. **TESTIMONIUM PUBLICUM TISSENSIUM.** Obscurè , Iudices , prætor ipse decumanus est , quum ejus apparitores frumentum a civitatibus exigant , pecunias imperent , aliquantò plus ipsi lucri auferant , quàm quantum populo Romano decumarum nomine daturi sunt ? Hæc æquitas in tuo imperio fuit , hæc prætoris dignitas , ut servos Venerios Siculorum dominos esse velles : hic delectus , hoc discrimen , te prætorè , fuit , ut aratores in servorum numero essent , servi in publicanorum.

XXXIX. Quid? Amestratini miseri; impositis ita magnis decumis, ut ipsis reliqui nihil fieret, nonne tamen numerare pecunias coacti sunt? Addicuntur decumæ M. Cæsio, quum adessent legati Amestratini: statim cogitur Heraclius legatus numerare H-S XXII. Quid hoc est? quæ est ista præda? quæ vis? quæ direptio sociorum? Si erat Heraclio ab senatu mandatum, ut emeret; emisset: si non erat; quî poterat suâ sponte pecuniam numerare? Cæsio renuntiat se dedisse.

89. Cognoscite renuntiationem ex litteris. Recita ex litteris publicis. LITTERÆ PUBLICÆ. Quo senatusconsulto erat hoc legato permissum? nullo: cur fecit? coactus est: quis hoc dicit? tota civitas. Recita testimonium publicum. TESTIMONIUM PUBLICUM. Ab hac eadem civitate anno secundo simili ratione extortam esse pecuniam, & Sext. Vennonio datam, ex eodem testimonio cognovistis. At Amestratinos, homines tenues, quum eorum decumas medimnis DCCC vendidisses Banobali Venerio (cognoscite nomina publicanorum) cogis eos plus lucri addere, quàm quanti venierant, quum magno venissent. Dant Banobali medimnis DCCC, H-S MD. Profectò numquam iste tam amens fuisset, ut ex agro populi Romani plus frumenti servo Venerio, quàm populo.



*ACTIONIS II. L. III. 59*

Romano tribui pateretur, nisi omnis ea præda, servi nomine, ad istum ipsum perveniret.

90. Petrini, quum eorum decumæ magno addictæ essent, tamen invitissimi P. Nævio Turpioni, improbissimo homini, qui injuriarum, Sacerdote prætore, damnatus est, H-S XXXVII & 10 dare coacti sunt. Itane dissolutè decumas vendidisti, ut, quum modiûm XV millibus venissent, medimnûm C10 C10 C10 hoc est, H-S XLV lucri decumano darentur? At permagno decumas ejus agri vendidi. Videlicet gloriatur, non Turpioni lucrum datum, sed Petrinis pecuniam ereptam.

X L. Quid? Halicienses, quorum incolæ decumas dant, ipsi agros immunes habent, nonne huic eidem Turpioni, quum decumæ c. med. venissent, H-S XV C10 dare coacti sunt? Si id, quod maximè vis, posses probare, hæc ad decumanos lucra venisse, nihil te attigisse: tamen hæc pecuniæ per vim, atque injuriam tuam captæ & conciliatæ, tibi fraudi, & damnationi esse deberent: quum verò hoc nemini persuadere possis, te tam amentem fuisse, ut Apronium, ac Turpionem, servos homines, tuo liberorumque tuorum periculo divites fieri velles: dubitaturum quemquam existimas, quin illis emissariis hæc tibi omnis pecunia quæsitæ sit?

C vj

92. Segestam item ad immunem civitatem Venerius Symmachus decumanus immittitur : is ab isto litteras affert , ut sibi contra omnia senatusconsulta , contra omnia jura , contraque legem Rupiliam , extra forum vadimonium promittant aratores. Audite litteras , quas ad Segestanos miserit. LITTERÆ C. VERRIS. Hic Venerius quemadmodum aratores eluserit , ex una pactione hominis honesti , gratiosique cognoscite : in eodem enim genere sunt cetera.

93. Diocles est Panormitanus , Phimes cognomine , homo illustris , ac nobilis. Is agrum in Segestano ( nam commercium in eo agro Panormitanis est ) conductum habebat H-S sex millibus : pro decuma quum pulsatus a Venerio esset , decidit H-S XVI millibus , & DCLIV : id ex tabulis ipsius cognoscite. NOMEN DIOCLIS PANORMITANI. Huic eidem Symmacho , Anneius Brocchus , senator , homo eo splendore , eâ virtute , quâ omnes existimatis , nummos præter frumentum coactus est dare. Venerione servo , te prætor , talis vir , senator populi Romani , quæstui fuit ?

XLI. Hunc ordinem si dignitate antecellere non existimabas , ne hoc quidem sciebas , *judicare* ? Antea quum equester ordo judicaret , improbi , & rapaces ma-

gistratus in provinciis inserviebant publicanis : ornabant eos , quicumque in operis erant : quemcumque equitem Romanum in provincia viderant , beneficiis , ac liberalitate prosequiebantur : neque tantum illa res nocentibus proderat , quantum obfuit multis , quum aliquid contra utilitatem ejus ordinis , voluntatemque fecissent. Retinebatur hoc tum nescio quomodo , quasi communi consilio ab illis diligenter , ut , qui unum equitem Romanum contumeliâ dignum putasset , ab universo ordine malo dignus judicaretur.

95. Tu sic ordinem senatorium despectisti : sic ad injurias , libidinesque tuas omnia coæquasti : sic habuisti statutum cum animo , ac deliberatum , omnes , qui habitarent in Sicilia , aut , qui Siciliam , te prætoris , attigissent , judices rejicere , ut illud non cogitares , tamen ad ejusdem ordinis homines te judices esse venturum ? in quibus , si ex ipsorum domestico incommodo nullus dolor insideret ; tamen esset illa cogitatio , in alterius injuria sese despectos , dignitatemque ordinis contemptam , & abjectam : quod mehercule , Judices , mihi non mediocriter ferendum videtur. Habet enim quemdam aculeum contumelia , quem pati prudentes , ac viri boni difficillimè possunt.

96. Spoliasti Siculos : solent enim inulti

esse in injuriis suis provinciales. Vexasti negotiatores : inviti enim Romam ; raroque decedunt. Equitem Romanum ad Apronii injurias dedisti : quid enim jam nocere possunt , quibus non licet judicare ? Quid , quum senatores summis injuriis afficis ? quid aliud dicis , nisi hoc ? cedo mihi etiam istum senatorem : ut hoc amplissimum nomen senatorium non modò ad invidiam imperitorum , sed etiam ad contumeliam improborum natum esse videatur.

97. Neque hoc in uno fecit Anneio , sed in omnibus senatoribus : ut ordinis nomen non tantum ad honorem , quantum ad ignominiam valeret. In C. Cassio , viro clarissimo & fortissimo , quum is eo ipso tempore , primo istius anno , consul esset , tantà improbitate usus est , ut , quum ejus uxor , femina primaria , paternas haberet arationes in Leontino , frumentum omne in decumas auferre jussisset. Hunc tu in hac causa testem , Verres , habebis : quoniam , judicem ne haberes , providisti.

98. Vos autem , Judices , putare debetis , esse quiddam nobis inter nos commune atque conjunctum : multa sunt imposita huic ordini munera , multi labores , multa pericula , non solùm legum ac judiciorum , sed etiam rumorum ac tempo-

rum. Sic est hic ordo quasi propositus ,  
atque editus in altum , ut ab omnibus  
ventis invidiæ circumflari posse videatur.  
In hac tam misera & iniqua conditione  
vitæ , ne hoc quidem retinebimus , Judi-  
ces , ut magistratibus nostris in obtinendo  
jure nostro ne contemptissimi ac despec-  
tissimi esse videamur ?

XLII. Thermitanæ miserunt , qui de-  
cumas emerent agri sui. Magni sua puta-  
bant interesse , publicè potius , quamvis  
magno emi , quàm in aliquem istius emis-  
sarium incidere. Appositus erat Venuleius  
quidam , qui emeret. Is liceri non destitit :  
illi , quoad videbatur ferri aliquo modo  
posse , contenderunt : postremò liceri de-  
stitit : addicitur Venuleio tritici mo-  
diûm VIII millibus. Legatus Possidorus  
renuntiat. Quum omnibus hoc intoleran-  
dum videretur , tamen Venuleio dantur ,  
ne accedat , tritici modiûm VI. præterea  
H-S CIO CIO. Ex quo facilè apparet , quæ  
merces decumani , quæ prætoris præda  
esse videatur. Cedo Thermitanorum mihi  
litteras , & testimonium. *TABULÆ THER-  
MITANORUM , ET TESTIMONIUM.*

100. Imacharenses jam omni frumento  
ablato , jam omnibus injuriis tuis exina-  
nitos , tributum facere , miseros ac per-  
ditos coëgisti ; ut Apronio darent H-S  
xx millia. Recita decretum de tributis , &

publicum testimonium. SENATUSCONSULTUM DE TRIBUTO CONFERENDO. TESTIMONIUM IMACHARENSIUM. Ennenses, quum decumæ venissent agri Ennensis medimnûm CIO CIO CIO CC, Apronio coacti sunt dare tritici modium XVIII millia, & H-S III millia. Quæso, attendite, quantus numerus frumenti cogatur ex omni agro decumano : nam per omnes civitates, quæ decumas debent, percurrit oratio mea : & in hoc genere nunc, Iudices, verſor, in quo non ſingillatim aratores eversi bonis omnibus ſunt, ſed publicè decumanis lucra data ſunt, ut aliquando ex eorum agris atque urbibus, expleti atque ſaturi, cum hoc cumulo quæſtûs decederent.

XLIII. Calactinis quamobrem imperaſti anno tertio, ut decumas agri ſui, quas Calactæ dare conſueverant, Ameftrati M. Cæſio decumano darent ; quod neque ante te prætorem illi fecerant, neque tu ipſe hoc ita ſtatueras antea per biennium ? Theomnaſtus Syracuſanus in agrum Mutycenſem cur abs te immiſſus eſt ? qui aratores ita vexavit, ut illi in alteras decumas, id quod in aliis quoque civitatibus oſtendam, triticum emere neceſſariò, propter inopiam, cogerentur.

102. Jam verò ex Hyblenſium pactio-

*ACTIONIS II. L. III. 65*

nibus intelligetis , quæ pactæ sint cum decumano Cn. Sergio , sexties tantum , quàm quantum satum sit , ablatum esse ab aratoribus. Recita sationes , & pactiones ex litteris publicis. Recita. **PACTIONES HYBLENSIUM CUM VENERIO SERVO EX LITTERIS PUBLICIS.** Cognoscite item professiones sationum , & pactiones Menenorum cum Venerio servo. Recita ex litteris publicis. **PROFESSIONES SATIONUM , ET PACTIONES MENENORUM CUM VENERIO SERVO EX LITTERIS PUBLICIS.** Patiemiini , Iudices , a sociis , ab aratoribus populi Romani , ab iis , qui vobis laborant , vobis serviunt , qui ita plebem Romanam ab sese ali volunt , ut sibi ac liberis suis tantum supersit , quo ipsi ali possint ; ab his , per summam injuriam , per acerbissimas contumelias , plus aliquantò ablatum esse , quàm natum sit ?

103. Sentio , Iudices , moderandum mihi esse jam orationi meæ , fugiendamque vestram satietatem : non versabor in uno genere diutius , & ita cetera de oratione mea tollam , ut tamen in causa relinquam. Audietis Agrigentinorum , fortissimorum virorum , diligentissimorumque querimonias : cognoscetis , Iudices , Entellinorum summi laboris , summæque industriæ , dolorem & injurias : Heracliensium , Gelenium , Solentinorum incommoda profe-

rentur : Catinensium , locupletissimorum hominum , amicissimorumque agros vexatos ab Apronio cognoscetis : Tyndaritanam , nobilissimam civitatem , Cephalœditanam , Halentinam , Apolloniensem , Engynam , Capitinam , perditas esse hac iniquitate decumarum intelligetis : Murgentinis , Assorinis , Elorinis , Ennensibus , Ietinis , nihil omninò relictum : Citarinos , Acherinos , parvarum civitatum homines , omnino abjectos esse ac perditos : omnes denique agros decumanos per triennium populo Romano ex parte decuma , C. Verri ex omni reliquo , vestigales fuisse : & plerisque aratoribus nihil omnino superfuisse : si cui quid remissum , aut relictum sit , id fuisse tantum , quantum ex eo , quo istius avaritia contenta fuit , redundarit.

XLIV. Duarum mihi civitatum reliquos feci agros , Judices , ferè optimos ac nobilissimos , Ætensem , & Leontinum. Horum agrorum ego missos faciam quæstus triennii : unum annum eligam , quod faciliùs id , quod institui , explicare possim. Sumam annum tertium , quod & recentissimus est , & ab isto ita administratus , ut , quum se certè decessurum videret , non laboraret , si aratorem nullum in Sicilia omnino esset relicturus. Agri Ætensis , & Leontini decumas agemus.



*ACTIONIS II. L. III. 67*

Attendite , Judices , diligenter. Agri sunt feraces : annus tertius : decumanus Apronius.

105. De Ætensibus perpauca dicam : dixerunt enim ipsi priore actione publicè : memoriâ tenetis , Artemidorum Ætensem , legationis ejus principem , publicè dicere , Apronium venisse Ætnam cum Veneriis : vocasse ad se magistratum : imperasse , ut in foro sibi medio lecti sternerentur : quotidie solitum esse non modò in publico , sed etiam de publico convivari : quum in eis conviviiis symphonia caneret , maximisque poculis ministraretur , retinere solitum esse aratores , atque ab iis non modò per injuriam , sed etiam per contumeliam , tantum exprimi frumenti , quantum Apronius imperasset.

106. Audistis hæc , Judices , quæ nunc ego omnia prætereo , ac relinquo. Nihil de luxuria Apronii loquor , nihil de insolentia , nihil de singulari nequitia , ac turpitudine : tantum de quæstu , ac lucro dicam unius agri , & unius anni , quò facilis vos conjecturam de triennio , & de tota Sicilia facere possitis. Sed mihi Ætensium brevis est oratio : ipsi enim venerunt : ipsi publicas litteras deportarunt : docuerunt vos , quid lucelli fecerit homo non malus , familiaris prætoris , Apronius : id , quæso , ex ipsorum testimonio cognos-

cite. Recita testimonium Ætensium. **TESTIMONIUM ÆTENSIVM.**

**XLV.** Quid ais? dic, dic, quæso, clariùs, ut populus Romanus de suis vectigalibus, de suis aratoribus, de suis sociis atque amicis audiat, **L. MEDIMNUM, L. H-S MILLIA.** Per deos immortales! unus ager uno anno **CCC** millia modium tritici; & præterea **H-S L.** millia, lucri dat Apronio? tantone minoris decumæ venierunt, quàm fuerunt? an quum satis magno venissent, hic tantus tamen frumenti, pecuniæque numerus ab aratoribus per vim ablati est? utrum enim horum dixeris, in eo culpa & crimen hærebit.

**107.** Nam illud quidem non dices, quod utinam dicas, ad Apronium non pervenisse tantum. Ita te non modò publicis tenebo, sed etiam privatis aratorum pactionibus, ac litteris; ut intelligas, non te diligentior in faciendis furtis fuisse, quàm me in deprehendendis. Hoc tu feres? hoc quisquam defendet? hoc hi, si aliter de te statuere voluerint, sustinebunt? Uno adventu, ex uno agro, **Q.** Apronium, præter eam, quam dixi, pecuniam numeratam, **CCC** millia modium tritici lucri nomine sustulisse?

**108.** Quid? hoc Ætenses soli dicunt? immo etiam Centuripini, qui agri Ætensis multò maximam partem possident:

*ACTIONIS II. L. III. 69*

quorum legatis, hominibus nobilissimis, Androni & Arthemoni, senatus ea mandata dedit, quæ publicè ad civitatem ipsorum pertinebant: de iis injuriis, quas cives Centuripini non in suis, sed in aliorum finibus acceperunt, senatus & populus Centuripinus legatos noluit mittere: ipsi aratores Centuripini, qui numerus est in Sicilia maximus, hominum honestissimorum, & locupletissimorum, tres legatos, cives suos, delegerunt: ut eorum testimonio non unius agri, sed propè totius Siciliae calamitates cognosceretis. Arant enim totâ Siciliâ ferè Centuripini: & hoc in te graviore, certioresque testes sunt, quòd ceteræ civitates suis solùm incommodis commoventur: Centuripini, quòd in omnium ferè finibus habent possessiones, etiam ceterarum civitatum damna, ac detrimenta senserunt.

XLVI. Verùm, uti dixi, ratio certa est Ætnensium, & publicis, & privatis litteris consignata: meæ diligentiae pensum magis in Leontino agro est exigendum, propter hanc causam, quòd ipsi Leontini publicè non sanè me multum adjuverunt: neque enim eos, isto prætore, hæ decumanorum injuriæ læserunt: potius etiam, Judices, adjuverunt. Mirum fortassè hoc vobis, aut incredibile videatur, in tantis aratorum incommodis, Leontinos, qui

principes rei frumentariæ fuerunt, expertes incommodorum, atque injuriarum fuisse: hoc causæ est, Judices, quod in agro Leontino, præter unam Mnasistrati familiam, glebam Leontinorum possidet nemo. Itaque Mnasistrati, hominis honestissimi, atque optimi viri testimonium, Judices, audietis: ceteros Leontinos, quibus non modò Apronius in agris, sed ne tempestas quidem ulla nocere potuit, expectare nolite: etenim non modò incommodi nihil ceperunt: sed etiam in Apronianis illis rapinis in quæstu sunt, compendioque versati.

110. Quapropter, quoniam me Leontina civitas, atque legatio, propter eam, quam dixi, causam, defecit: mihimet ineunda ratio, & via reperienda est, quâ ad Apronii quæstum, sive adeo, quâ ad istius ingentem, immanemque prædam possim pervenire. Agri Leontini decumæ anno tertio venierunt tritici medimnûm XXXVI, hoc est, tritici modiûm CCXVI. Magno, Judices, magno: neque enim hoc possum negare: itaque necesse est aut damnum, aut certè non magnum lucrum fecisse decumanum: hoc enim solet usu venire iis, qui magno redemerunt.

111. Quid, si ostendo, in hac una emptione lucri fieri tritici modiûm c? quid, si CC? quid, si CCC? quid, si CCCC?

millia? dubitatis etiam, cui ista tanta praeda quæsitae sit? Iniquum me esse quispiam dicet, qui ex lucri magnitudine conjecturam faciam furti, atque praeda. Quid, si doceo, Judices, eos, qui cccc millia modicum lucri faciunt, damnum facturos fuisse, si tua iniquitas, si tui ex cohorte recuperatores non intercederent? num quis poterit in tanto lucro, tantaque iniquitate dubitare, quin propter improbitatem tam magnos quæstus feceris? propter magnitudinem quæstus improbus esse volueris?

XLVII. Quomodo igitur hoc assequar, Judices, ut sciam, quantum lucri factum sit? non ex Apronii tabulis, quas ego quum conquirerem, non inveni: & quum in jus ipsum eduxi, expressi, ut conficere tabulas se negaret. Si mentiebatur: quamobrem removebat, si hæ tabulae nihil tibi erant obfuturæ? Si omnino nullas confecerat litteras: ne id quidem satis significabat, illum non suum negotium gessisse? ea est enim ratio decumanorum, ut sine plurimis litteris confici non possit: singula enim nomina aratorum, & cum singulis portiones decumanorum, litteris persequi, & conficere necesse est. Jugera professi sunt aratores omnes imperio, atque instituto tuo: non opinor quemquam minus esse professum, quam, quantum arasset, quum tot cruce, tot supplicia, tot ex cohorte

recuperatores proponerentur. In jugere agri Leontini medimnum ferè tritici feritur, perpetuâ, atque æquabili satione: ager efficit, cum octavo bene ut agatur: verum, ut omnes dii adjuvent, cum decimo: quod si quando accidit, tum fit, ut tantum decumæ sit, quantum severis: hoc est, ut, quot jugera sunt fata, totidem medimna decumæ debeantur.

113. Hoc quum ita esset: primùm illud dico, pluribus millibus medimnùm venisse decumas agri Leontini, quàm quot millia jugerum fata erant in agro Leontino. Quòd si fieri non poterat, ut plus quàm decem medimna ex jugere ararent: medimnum autem ex jugere decumano dari poterat, quum ager, id quod perrarò evenit, cum decimo extulisset: quæ erat ratio decumani (si quidem decumæ, ac non bona venibant aratorum) ut pluribus aliquantò medimnis decumas emeret, quàm jugera erant fata?

XLVIII. In Leontino jugerum subscriptio, ac professio non est plus xxx millium. Decumæ xxxvi medimnis venierunt. Erravit, an potius insanivit Apronius? immo tum insanisset, si aratoribus, quod deberent, licitum esset; & non, quod Apronius imperasset, necesse fuisset dare. Si ostendo, minùs tribus medimnis in jugerum neminem dedisse decumæ: concedes,

concedes, opinor, ut cum decimo fructus arationis perceptus sit, neminem minus tribus decumis dedisse. Atqui hoc in beneficii loco petatum est ab Apronio, ut in jugera singula ternis medimnis decidere liceret. Nam quum a multis quaterna, etiam quina, exigerentur: multis autem non modò granum nullum, sed ne paleæ quidem ex omni fructu, atque ex annuo labore relinquerentur: tum aratores Centuripini, qui numerus in agro Leontino maximus est, unum in locum conveniunt: hominem suæ civitatis, in primis honestum ac nobilem, Andronem Centuripinum, legarunt ad Apronium, eundem, quem hoc tempore ad hoc iudicium, legatum & testem Centuripina civitas misit; ut is apud eum causam aratorum ageret, ab eoque peteret, ut ab aratoribus Centuripinis ne amplius in jugera singula, quàm terna medimna, exigeret.

115. Hoc vix ab Apronio in summo beneficio, pro iis, qui etiam tum incolumes erant, impetratum est. Id quum impetrabatur, hoc videlicet impetrabatur, ut pro singulis decumis ternas decumas dare liceret. Quòd si tua res non ageretur, a te potiùs postularent, ne amplius, quàm singulas, quàm ab Apronio, ut ne plus, quàm ternas decumas darent. Nunc, ut hoc tempore ea, quæ regiè, seu potiùs

tyrannicè, statuit in aratores Apronius ; prætermittam ; neque eos appellem , a quibus omne frumentum eripuit , & quibus nihil non modò de fructu , sed ne de bonis quidem suis reliqui fecit : ex his ternis medimnis ( quod beneficii , gratiæque causâ concessit ) quid lucri fiat , cognoscite.

XLIX. Professio est agri Leontini ad jugerum xxx millia. Hæc sunt ad tritici medimnûm xc , id est , tritici modiûm dxl millia. Deductis tritici modiûm ccxvi millibus , quanti decumæ venierunt , reliqua sunt tritici cccxxiv millia. Adde totius summæ dxl milliam modiûm tres quinquagesimas , id est , tritici modiûm xxxii millia cccc ( ab omnibus enim ternæ præterea quinquagesimæ exigebantur ) sunt hæc jam ad ccclvi millia cccc modiûm tritici. At ego cccc millia lucri facta esse dixeram. Non enim duco in hac ratione , eos , quibus ternis medimnis non est licitum decidere. Verùm , ut hâc ipsâ ratione summam mei promissi compleam , ad singula medimna multi H-S duo , multi H-S quinque accessionis cogebantur dare : qui minimum , singulos nummos. Hoc minimum ut sequamur , quoniam xc medimnûm millia duximus , accedant eò novo , pessimoque exemplo H-S xc millia.

117. Hic mihi etiam dicere audebit ,



*ACTIONIS II. L. III. 75*

magno se decumas vendidisse, quum ex eodem agro, dimidio plus ipse abstulerit, quàm populo Romano miserit? CCXVI modiùm millibus decumas agri Leontini vendidisti. Si ex lege, magno: si, ut lex esset libido tua, parvo: si, ut, quæ dimidiæ essent, decumæ vocarentur, parvo vendidisti: multò enim pluris fructus annui Siciliae venire potuerunt, si id te senatus, aut populus Romanus facere voluisset. Etenim sæpe decumæ tanti venierunt, quum lege Hieronicâ venirent, quanti nunc lege Verreâ venierunt. Cedo mihi C. Norbani decumas venditas. C. NORBANI DECUMÆ VENDITÆ AGRI LEONTINI. Atqui tum neque iudicium de modo jugerum dabatur: neque enim erat Artemidorus Cornelius recuperator: neque ab aratore magistratus Siculus tantum exigebat, quantum decumanus ediderat: nec beneficium petebatur a decumano, ut in jugera singula ternis medimnis decidere liceret: nec nummorum accessionem cogebatur arator dare, nec ternas quinquagesimas frumenti addere: & tamen populo Romano magnus frumenti numerus mittebatur.

L. Quid verò istæ sibi quinquagesimæ, quid porrò nummorum accessiones volunt? quo id jure, atque adeo, quo id potius ore fecisti? Nummos dabat arator: quò-

D ij

modo? aut unde? qui, si largissimus esse vellet, cumulatione mensurâ uteretur, ut antea solebant facere in decumis, quum æquâ lege, & conditione venibant. Is nummum dabat? unde? de frumento? quasi habuisset, te prætore, quod venderet. De vivo igitur erat aliquid refecandum, ut esset, unde Apronio ad illos fructus arationum hoc corollarium nummorum adderetur. Jam id porrò utrùm libentes, an inviti dabant? libentes? amabant, credo, Apronium: inviti? quâ re, nisi vi, & malo, cogebantur? Jam iste, homo amentissimus, in vendendis decumis, nummorum faciebat accessiones ad singulas decumas, neque multum: bina, aut terna millia addebat: fiunt per triennium H-S fortasse 15 millia. Hoc neque exemplo cujusquam, neque ullo jure fecit: neque eam pecuniam retulit: neque hoc parvum crimen quemadmodum defensor sit, homo quisquam umquam excogitavit.

119. Quod quum ita sit, audes dicere, te magno decumas vendidisse, quum sit perspicuum, te bona, fortunâque aratorum, non populi Romani, sed tui quæstus causâ, vendidisse? Ut, si quis villicus ex eo fundo, cui H-S dena merces esset, excisis arboribus, ac venditis, demptis regulis, instrumento, pecore abalienato,

domino xx millia nummum pro x miserit : sibi alia præterea centum confecerit : primo dominus , ignarus incommodi sui , gaudeat , villicoque delectetur , quod tanto sibi plus mercedis ex fundo refectum sit : deinde , quum audierit , eas res , quibus fundi fructus , & cultura continetur , amotas , & venditas , summo supplicio villicum afficiat , & secum male actum putet : item populus Romanus , quum audit , pluris decumas vendidisse C. Verrem , quam innocentissimum hominem , cui iste successit , C. Sacerdotem , putat se bonum in arationibus , fructibusque suis habuisse custodem , ac villicum : quum senserit , istum omne instrumentum aratorum , omnia subsidia vectigalium vendidisse , omnem spem posteritatis avaritiâ suâ sustulisse , arationes , & agros vectigales vastasse , atque exinanisse , ipsum maximos quaestus , prædasque fecisse , intelliget secum actum esse pessimè : istum autem summo supplicio dignum existimabit.

LI. Unde ergo hoc intelligi potest ? ex hoc maximè , quod ager decumanus provinciae Siciliae propter istius avaritiam desertus est : neque id solum accidit , uti minus multis jugis ararent , si qui in agris remanserunt ; sed etiam , ut permulti locupletes homines , magni & navi aratores , agros lætos ac fertiles desererent ,

totasque arationes derelinquerent. Id adeo sciri facillimè potest ex litteris publicis civitatum, propterea quòd lege Hieronicâ numerus aratorum quotannis apud magistratus publicè subscribitur. Recita tandem, quot acceperit aratores agri Leontini Verres. OCTOGINTA TRES : quot anno tertio profiteantur. TRIGINTA DUO. Unum & quinquaginta aratores ita video dejectos, ut his ne vicarii quidem successerint. Quot aratores, adveniente te, fuerunt agri Mutycensis ? videamus ex litteris publicis. CENTUM OCTOGINTA OCTO : quid ? anno tertio ? CENTUM ET UNUS. Octoginta septem aratores unus ager istius injuriâ desiderat : atque adeo nostra respublica, quoniam illa populi Romani vectigalia sunt, hunc tot patrumfamiliâs numerum desiderat, & reposcit. Ager Herbitensis primo anno habuit aratores ducentos quinquaginta septem, tertio centum viginti : hinc centum triginta septem patresfamiliâs extorres profugerunt. Agyrinensis ager, quorum hominum ! quàm honestorum ! quàm locupletium ! ducentos quinquaginta aratores habuit primo anno præturæ tuæ : quid tertio anno ? octoginta, quemadmodum legatos Agyrinenses recitare ex publicis litteris audistis.

LII. Prò dii immortales ! si ex provincia tota centum septuaginta ejecisses, pos-

*ACTIONIS II. L. III. 79*

fefne , feveris iudicibus , falvus effe ? Unus ager Agyrinensis centum feptuaginta aratoribus inanior quum fit , vos conjecturam totius provinciæ non facietis ? Atque hoc peræquè in omni agro decumano reperietis : quibus aliquid tamen reliqui fuerit ex magno patrimonio , eos in agris minore instrumento , minùs multis jugis , remaniffè , quòd metuebant , fi recessiffent , ne reliquas fortunas omnes amitterent : quibus autem ifte nihil reliqui , quod perderent , fecerat , eos planè non folum ex agris , verùm ex civitatibus fuis profugiffè. Illi ipfi , qui remanferant , vix decuma pars aratorum , relicturi agros omnes erant , nifi ad eos Metellus Româ litteras miffet , fe decumas lege Hieronicâ venditurum ; & nifi ab iis hoc petiffet , ut fererent quàm plurimum : quod illi femper fui causâ fecerant , quum eos nemo rogaret , quamdiu intelligebant , fefe fibi , & populo Romano , non Verri & Apronio ferere , impendere , laborare. Jam verò , Iudices , fi Siculorum fortunas negligitis : fi , quemadmodum focii populi Romani a magiftratibus noftris tractentur , non laboratis : at vos communem populi Romani causam fufcipite , atque defendite. Ejectos aratores effe dico : agros veftigales vexatos atque exinanitos a Verre : populatam vexatamque provinciam : hæc omnia doceo lit-

teris civitatum , & privatis primariorum virorum testimoniis.

LIII. Quid vultis amplius? num expectatis , dum L. Metellus is , qui multos in istum testes imperio & potestate deteruit , idem absens de istius scelere , improbitate , audaciâ testimonium dicat? non opinor. At is optimè , qui successit isti , potuit cognoscere. Ita est : verum amicitia impeditur. At debet nos certiores facere , quo pacto se habeat provincia.

123. Debet : verumtamen non cogitur. Num quis in Verrem L. Metelli testimonium requirit? nemo. Num quis postulat? non opinor. Quid si testimonio L. Metelli ac litteris hæc omnia vera esse docebo? quid dicetis? utrùm Metellum falsum scribere? an amicum lædendi esse cupidum? an prætorem , quemadmodum provincia affecta sit , nescire? Recita litteras L. Metelli , quas ad Cn. Pompeium , & M. Crassum consules , quas ad M. Mummius prætorem , quas ad quæstores urbis misit. EPISTOLA L. METELLI. *Decumas frumenti lege Hieronicâ vendidi.* Quum scribit , se lege Hieronicâ vendidisse , quid scribit? ita se vendidisse , ut omnes , præter Verrem : quum scribit , se lege Hieronicâ vendidisse , quid scribit? se per istum erepta Siculis majorum nostrorum beneficia , jus ipsorum , conditionem socie-

ACTIONIS II. L. III. 81

tatis, amicitiae, foederum reddidisse. Dicit, quanti cujusque agri decumas venderit. Deinde quid scribit?

124. Recita de epistola reliqua. *Summâ vi data est opera a me, ut quàm plurimo decumas venderem.* Cur igitur, Metelle, non ita magno vendidisti? quia desertas arationes, inanes agros, provinciam miseram, perditamque offendi. Quid? id ipsum, quod satum est, quâ ratione quisquam, qui sereret, inventus est? Recita litteras. LITTERÆ. Ait se misisse, & præsentem confirmasse, suam interposuisse auctoritatem: tantum quòd aratoribus Metellus obsides non dedit, se nulla in re Verri similem futurum. At quid est tandem, in quo se laborasse dicat? Recita. *Ut aratores, qui reliqui erant, quàm plurimum sererent.* Qui reliqui? quid hoc est, reliqui? quo ex bello? qua ex vastitate? quænam in Sicilia tanta clades, aut quod bellum tam diuturnum, tam calamitosum, te prætore, versatum est, ut is, qui tibi successerit, reliquos aratores collegisse, & recreasse videatur?

LIV. Quum bellis Carthaginiensibus Sicilia vexata est, & post nostrâ patrumque memoriâ, quum bis in ea provincia magnæ fugitivorum copiae versatæ sunt, tamen aratorum interitio facta nulla est: tum, semente prohibitâ, aut messe amissâ,

fructus annuus interibat : tamen incolumis numerus manebat dominorum , atque aratorum : tum , qui M. Levinio , aut P. Rupilio , aut M'. Aquilio , prætoribus in eam provinciam successerant , aratores reliquos non colligebant. Tantòne plus Verres cum Apronio provinciæ Siciliæ calamitatis importavit , quàm aut Hasdrubal cum Pœnorum exercitu , aut Athenio cum fugitivorum maximis copiis , ut temporibus illis simulatque hostis superatus esset , ager araretur omnis , neque aratori prætor per litteras supplicaret , neque eum præsens oraret , ut quàm plurimum fereret : nunc autem , ne post abitum quidem hujus importunissimæ pestis , quisquam reperiretur , qui suâ voluntate araret ? pauci essent reliqui , qui L. Metelli auctoritate in agros , atque ad suum larem familiarem redirent ?

126. His te litteris , homo audacissime , atque amentissime , jugulatum esse non sentis ? non vides , quum is , qui tibi successit , aratores reliquos appellet , hoc eum disertè scribere , reliquos hos esse , non ex bello , neque ex aliqua hujusmodi calamitate , sed ex tuo scelere , importunitate , avaritiâ , crudelitate ? Recita cetera. *Tamen pro eo , ut temporis difficultas , aratorumque penuria tulit. Aratorum , inquit , penuria. Si ego accusator to-*



ties de re eadem dicerem, vereretur, ne animos vestros offenderem, Iudices. Clamat Metellus: *Nisi litteras misissem*: non est satis: *nisi præsens confirmassem*: ne id quidem satis est. *Reliquos*, inquit, *aratores*. Reliquos? propè lugubri verbò calamitatem provinciæ Siciliæ significat. Addit, *Aratorum penuria*.

L V. Expectate etiam, Iudices, expectate, si potestis, auctoritatem accusationis meæ: dico aratores istius avaritiâ ejectos: scribit Metellus, reliquos ab se esse confirmatos: dico agros relictos, arationesque desertas esse: scribit Metellus aratorum esse penuriam: hoc quum scribit, illud ostendit, dejectos, ejectos, fortunis omnibus expulsos esse populi Romani socios atque amicos: quibus si qua calamitas propter istum, salvis vectigalibus nostris, accidisset, animadvertere in eum vos oportebat: præsertim quum eâ lege iudicaretis, quæ sociorum causâ esset constituta: quum verò, perditis profligatisque fociis, vectigalia populi Romani sint diminuta; res frumentaria, commeatus, copiæ, salus urbis atque exercituum nostrorum in posteritatem istius avaritiâ interierit: saltem commoda populi Romani respicite, si fociis fidelissimis prospicere non laboratis.

128. Atque, ut intelligatis, ab isto,  
D vj

præ lucro prædaque præfenti, nec vectigalium, nec posteritatis habitam esse rationem: cognoscite, quid ad extremum scribat Metellus. *In reliquum tempus vectigalibus prospexi.* In reliquum tempus ait se vectigalibus prospexisse: non scriberet, se vectigalibus prospexisse, nisi hoc vellet ostendere, te vectigalia perdidisse. Quid enim erat, quod vectigalibus prospiceret Metellus in decumis, & in tota re frumentaria, si iste non vectigalia populi Romani suo quæstu pervertisset? Atque ipse Metellus, qui vectigalibus prospicit, qui reliquos aratores colligit, quid assequitur, nisi hoc, ut arent, si qui possunt, quibus aratrum saltem aliquod satelles istius Apronius reliquum fecit; qui tamen in agris spe, atque expectatione Metelli remanserunt? Quid ceteri Siculi? quid ille maximus numerus aratorum, qui non modò ex agris ejecti sunt, sed etiam ex civitatibus suis, ex provincia denique, bonis, fortunisque omnibus ereptis, profugerunt? quâ ratione ii revocabuntur? quot prætorum innocentia, sapientiaque opus est, ut illa aratorum multitudo aliquando in suis agris, ac sedibus collocetur?

LVI. Ac, ne miremini tantam multitudinem profugisse, quantam ex litteris publicis, aratorumque professionibus cognovistis: scitote, tantam acerbitatem istius, tantum.

*ACTIONIS II. L. III. 85*

scelus in aratores fuisse (incredibile dictum est, *Judices* : sed & factum, & totâ Sici-  
liâ pervulgatum) ut homines, propter in-  
jurias, licentiamque decumanorum, mor-  
tem sibi ipsi consciverint. *Centuripinum*  
*Dioclem*, hominem locupletem, suspen-  
disse se constat, quo die sit ei nuntiatum,  
*Apronium* decumas redemisse. *Dyrrachi-*  
*num*, primum civitatis, eâdem ratione mor-  
tem oppetisse dixit apud vos homo nobilis-  
simus, *Archonidas Elorinus*, quum audis-  
set tantum decumanum professum esse ex  
edicto istius sibi deberi, quantum ille bo-  
nis suis omnibus efficere non posset. Hæc  
tu, tametsi omnium hominum dissolutissi-  
mus, crudelissimusque semper fuisti, ta-  
men numquam perpeterere, propterea  
quòd illi gemitus, luctusque provinciæ ad  
tui capitis periculum pertinebant : non,  
inquam, perpeterere, ut homines injuriæ  
tuæ remedium morte, ac suspendio quæ-  
rerent, nisi ea res ad quæstum, & ad  
prædam tuam pertineret.

130. Quid? illud perpeterere? Atten-  
dite, *Judices*; omnibus enim nervis mihi  
connitendum est, atque in hoc laboran-  
dum, ut omnes intelligant, quàm impro-  
bam, quàm manifestam, quàm confessam  
rem pecuniâ redimere conentur. Grave  
crimen est hoc, & vehemens, & post  
hominum memoriam, judiciaque de pe-

cuniis repetundis constituta, gravissimum, prætorem populi Romani socios habuisse decumanos.

LVII. Non hoc nunc primum audit privatus de inimico, reus ab accusatore: jam antea in sella sedens prætor, quum provinciam Siciliam obtineret, quum ab omnibus non solum (id quod commune est) propter imperium, sed etiam (id quod istius præcipuum est) propter crudelitatem metueretur, millies audivit, quum ejus animum ad persequendum non negligentia tardaret, sed conscientia sceleris, avaritiæque suæ refrenaret. Loquebantur enim decumani palam, & præter ceteros is, qui apud istum plurimum poterat, maximosque agros populabatur, Apronius: perparvum ex illis magnis lucris ad sese pervenire: prætorem esse socium.

131. Hoc quum palam decumani totâ provinciâ loquerentur, tuumque nomen in re tam turpi, nefariaque interponerent: nihilne tibi venit in mentem existimationi tuæ consulere? nihil denique capiti, ac fortunis tuis providere? quum tui nominis terror in auribus, animisque aratorum versaretur: quum decumani aratoribus ad pacationes faciendas, non suam vim, sed tuum scelus, ac nomen opponerent: ecquod iudicium Romæ tam dissolutum, tam perdi-

*ACTIONIS II. L. III. 87*

tum, tam nummarium fore putasti, quo ex iudicio te ulla Salus servare posset? quum planum fieret, decumis contra instituta, leges, consuetudinemque omnium venditis, in aratorum bonis, fortunisque diripiendis decumanos dictitasse tuas esse partes, tuam rem, tuam prædam: idque te tacuisse, & quum dissimulare non posses, potuisse tamen perpeti, & perferre, quòd magnitudo lucris obscuraret periculi magnitudinem, plusque aliquantò apud te pecuniæ cupiditas, quàm iudicii metus, posset?

132. Esto: cetera negare non potes: ne illud quidem tibi reliquum fecisti, ut hoc posses dicere, nihil eorum te audisse, nihil ad tuas aures de infamia tua pervenisse. Querebantur cum luctu, & gemitu aratores. Tu id nesciebas? Fremebat tota provincia. Nemo id tibi renuntiabat? Romæ querimoniæ de tuis injuriis, conventusque habebantur. Ignorabas hæc? ignorabas hæc omnia? Quid? quum palam Syracusis, te audiente, maximo conventu P. Rubrius Q. Apronium sponsione lacesivit, *Ni Apronius dictitaret, te sibi in decumis esse socium*: hæc te vox non perculit? non perturbavit? non, ut capiti, & fortunis tuis prospiceret, excitavit? Tacuisti: sedasti etiam lites illorum: & sponsio illa ne fieret, laborasti.

LVIII. Prò dii immortales ! hoc aut innocens homo perpeti potuisset , aut quamvis nocens , qui modò judicia Romæ fore putaret , non aliquâ simulatione existimationi se hominum venditasset ? Quid est hoc ? sponsio fit de capite , ac fortunis tuis : tu sedes , & quiescis ? non persequeris ? non perseveras ? non perquisis , cui dixerit Apronius ? quis audierit ? unde hoc natum , quemadmodum prolatum sit ? Si quis tibi ad aurem accessisset , & dixisset , Apronium dictitare , te sibi esse socium : commoveri te oportuit , vocare Apronium , nec illum antè tibi satisfacere , quàm tu omnium existimationi satisfecisses : quum verò in foro celeberrimo , tantâ frequentiâ , hoc , verbo & simulatione , Apronio , re verâ tibi objectum esset ; tu umquam tantam plagam tacitus accipere potuisses , nisi hoc ita statuisses , in re tam manifestâ quidquid dixisses , te deterius esse facturum ?

134. Quæstores , legatos , præfectos suos , tribunos , multi missos fecerunt , & de provincia decedere jusserunt , quòd eorum culpa se minùs commodè audire arbitrarentur , aut quòd peccare illos aliqua in re judicarent. Tu Apronium , hominem vix liberum , contaminatum , perditum , flagitiosum , qui non modò animum integrum , sed ne animam quidem

*ACTIONIS II. L. III. 89*

puram conservare potuisset ; eum in tanto tuo dedecore profectò ne verbo quidem graviore appellasses : neque apud te tam sancta religio societatis fuisset , ut tuî capitis periculum negligeres , nisi rem tam notam esse omnibus , & tam manifestam videres.

135. Cum eodem Apronio postea P. Scandilius , eques Romanus , quem vos omnes nostis , eandem sponsionem de societate fecit , quam Rubrius facere voluerat. Institit , oppressit , non remisit : facta est sponsio H-S v millium. Cœpit Scandilius recuperatores , aut judicem postulare.

LIX. Satisne vobis prætori improbo circumdati cancelli videntur in sua provincia ; immo verò in sella ac tribunali : ut aut de suo capite iudicium fieri patiatur præsens , ac sedens ; aut confiteatur , se omnibus iudiciis convinci necesse esse ? Sponsio est , *Ni te Apronius in decumis socium esse dicat* : provincia tua est , ades , abs te iudicium postulatur. Quid facis ? quid decernis ? Recuperatores dicis te daturum : bene ais : tametsi qui erunt tantis cervicibus recuperatores , qui audeant in provincia , quum prætor adsit , non solum contra voluntatem ejus , sed etiam contra fortunas judicare ?

136. Verum esto : manifesta res est ,

quum nemo esset , quin hoc se audisse li-  
quidò diceret , locupletissimus quisque cer-  
tissimus testis esset : nemo erat Siciliâ to-  
tâ , qui nesciret decumas esse prætoris :  
nemo , qui non audisset ita Apronium dic-  
titasse : præterea conventus honestus Sy-  
racusis , multi equites Romani , viri pri-  
marii , ex qua copia recuperatores rejici  
oporteret , qui aliter judicare nullo modo  
possent. Instat Scandilius poscere recupe-  
ratores : tum iste homo innocens , qui illam  
suspicionem levare , atque ab se remove-  
cuperet , recuperatores dicit se de cohorte  
sua daturum.

LX. Prò deûm hominumque fidem !  
quem ego accuso ? in quo meam indus-  
triam ac diligentiam spectari volo ? quid  
est , quod ego dicendo , aut cogitando  
efficere , aut assequi debeam ? Teneo , te-  
neo , inquam , in mediis vectigalibus po-  
puli Romani , in ipsis fructibus provinciæ  
Siciliæ furem manifestò avertentem rem  
frumentariam omnem , pecuniam maxi-  
mam : teneo , inquam , ita , ut negare non  
possit. Nam quid hîc dicet ? Sponsio fac-  
ta est cum cognitore tuo Apronio de for-  
tunis tuis omnibus , ni socium se tibi in  
decumis esse dictitaret. Exspectant omnes ,  
quantæ tibi ea res curæ sit , quemadmo-  
dum hominum existimationi te atque in-  
nocentiam tuam probari velis. Hîc tu



medicum , & haruspicem , & præconem tuum , recuperatores dabis , aut etiam illum ipsum , quem tu in cohorte tua Cassianum judicem habebas , si qua res major esset , Papirium Potamonem , hominem severum , ex vetere illa equestri disciplina ? Scandilius postulare de conventu recuperatores. Tum iste negat se de existimatione sua cuiquam , nisi suis , commissurum. Negotiatores putant esse turpe , id forum sibi iniquum ejurare , ubi negotientur. Prætor provinciam suam totam sibi iniquam ejurat.

138. O impudentiam singularem ! Hic postulat se Romæ absolvi , qui in sua provincia judicavit se absolvi nullo modo posse ? qui plus existimet apud lectissimos senatores pecuniam , quàm apud tres negotiatores metum valere ? Scandilius verò negat sese apud Artemidorum recuperatorem verbum esse facturum : & tamen auget , atque onerat te bonis conditionibus , si tu uti velis. Si ex provincia Sicilia tota statuas idoneum judicem , aut recuperatorem nullum posse reperiri , postulat a te , ut Romam rejicias.

139. Hic enimvero tu exclamas , hominem improbum , qui postulet ibi de tua existimatione judicium fieri , ubi te invidiosum esse intelligebat : negas te Romam rejecturum : negas de conventu recupe-

ratores daturum : cohortem tuam proponis. Scandilius rem se totam relicturum dicit , & suo tempore esse rediturum. Quid tu ibi tum ? quid facis ? Scandilium cogis. Quid ? sponsonem acceptam facere ? Impudenter tollis expectatum existimationis tuæ iudicium : non facis.

140. Quid ergo ? Apronio permittis , ut , quos velit , de cohorteumat recuperatores ? Indignum , uni potius ex iniquis sumendi , quàm utrisque ex æquis rejiciendi fieri potestatem. Neutrum facis eorum. Quid ergo ? est aliquid , quod improbius fieri potest. Cogit enim Scandilium quinque illa millia nummum dare atque adnumerare Apronio. Quid potuit elegantius facere prætor cupidus existimationis bonæ , qui ab sese omnem suspicionem propulsaret ? qui se eripere ex infamia cuperet ?

LXI. Adductus erat in sermonem , invidiam , vituperationem : dictitabat homo improbus atque impurus , Apronius , socium esse prætorem : venerat res in iudicium atque discrimen : potestas erat isti , homini integro , atque innocenti , data , ut in Apronium quum animadvertisset , sese gravissimâ levaret infamiâ. Quid excogitat poenæ ? quid animadversionis in Apronium ? cogit Scandilium Apronio , ob singularem improbitatem , atque au-

daciam, prædicationemque nefariæ societatis, H-S v millia mercedis, ac præmii dare.

141. Quid interfuit, homo audacissime, utrùm hoc decerneres; an id, quod Apronius dictitabat, tute de te profiterere, ac dictitares? quem hominem, si quis pudor in te, atque adeo si quis metus fuisset, sine supplicio dimittere non debuisti: hunc abs te sine præmio discedere noluisti. Omnia simul intelligere potuistis, Judices, ex uno crimine Scandiliano: primum, hoc non esse Romæ natum de societate decumarum; non ab accusatore fictum; non (ut solemus interdum in defensionibus dicere) crimen domesticum, ac vernaculum; non ex tempore periculi tui constitutum: sed vetus, excogitatum jam, & te prætoris jactatum; & non ab inimicis Romæ compositum, sed Romam de provincia exportatum. Simul intelligi potest illud istius in Apronium studium, Apronii de isto non modò confessio, verum etiam commemoratio: eodem accedit, quòd hoc quoque intelligere potestis, istum statuisse, in provincia sua, estimationis suæ judicium extra cohortem suam committendum fuisse nemini.

LXII. Ecquis est iudex, cui non ab initio decumani criminis persuasum sit, istum in aratorum bona, fortunæque im-

petum fecisse ? quis hoc non ex eo statim judicavit , quod ostendi , istum decumas novâ lege , atque adeo nullâ lege , contra omnium consuetudinem , atque instituta vendidisse ?

143. Verùm , ut istos ego judices tam severos , tam diligentes , tam religiosos non haberem : ecquis est , ex injuriarum magnitudine , improbitate decretorum , judiciorum iniquitate , qui hoc non jamdudum statuerit , & judicarit ? Etiam sanè sit aliquis dissolutior in judicando : legum , officii , reipublicæ , sociorum , atque amicorum negligentior : quid ? is possitne de istius improbitate dubitare , quum tanta lucra facta , tam iniquas pactiones , vi , & metu expressas cognoverit ? quum tanta præmia civitates , vi , atque imperio , virgarum , ac mortis metu , non modò Apro- nio , atque ejus similibus , verùm etiam Veneriis servis dare coactas.

144. Quòd si quis sociorum incommodis minùs movetur : si quem aratorum fugæ , calamitates , exsilia , suspendia denique non permovent : non possum dubitare , quin is tamen , quum vastatam Sici- liam , relictos agros , ex civitatum litteris , & epistola L. Metelli cognoverit ; statuat , fieri non posse , ut de isto non severissimè judicetur. Erit etiam aliquis , qui hæc omnia dissimulare , ac negligere possit ? At-

ACTIÖNIS II. L. III. 95

tuli sponsiones ipso præfente factas de decumarum societate , ab ipfo prohibitas judicari. Quid eft , quod poffet quifquam manifeflius hoc desiderare ? Non dubito , quin vobis fatisfecerim , Judices : verumtamen progrediar longius : non mehercule quò magis hoc vobis perfuadeatur , quàm jam perfuafum effe confido : fed ut ille aliquando impudentiæ fuæ finem faciat : aliquando desinat , ea fe putare poffe emere , quæ ipfe femper habuit venalia , fidem , jufjurandum , veritatem , officium , religionem : desinant amici ejus ea dictitare , quæ detrimento , maculæ , invidiæ , infamiæ nobis omnibus effe poffint. At qui amici ?

145. O miferum , atque invidiofum , offenfumque paucorum culpâ , atque indignitate ordinem fenatorium ! Albam Æmilium fedentem in faucibus macelli loqui palam , *viciffe* Verrem , emptos habere judices , alium H-S cccc millibus , alium H-S D ; quem minimo , ccc. Atque ei quum refponfum effet , fieri non poffe : multos testes effe dicturos ; me præterea causæ non defuturum : *Licet , hercules* , inquit , *omnes omnia dicant in illum : nisi ita res manifesta erit allata , ut responderi nihil poffit , vicimus.*

146. Bene ais , Alba : ad tuam veniam conditionem : nihil putas valere in judi-

ciis conjecturam , nihil suspicionem , nihil anteaetæ vitæ existimationem , nihil bonorum virorum testimonia , nihil civitatum auctoritates , ac testimonia : litteras manifestas quæris. Non quæro judices Cassianos : veterum judiciorum severitatem non requiro : vestram in hoc fidem , dignitatem , religionem in judicando non implo-ro : Albam habebō judicem , eum hominem , qui se ipse scurram improbissimum existimari vult : qui a scurris potius semper gladiator , quàm scurra appellatus sit : afferam rem ejusmodi in decumis , ut Alba fateatur , istum in re frumentaria , & in bonis aratorum apertè , palamque esse prædatum.

LXIII. Decumas agri Leontini magno dicit se vendidisse. Ostendi jam illud initio , non existimandum magno vendidisse eum , qui verbo decumas vendiderit ; re , & conditione , & lege , & edicto , & licentiâ decumanorum , decumas aratoribus nullas reliquas fecerit : etiam illud ostendi , vendidisse alios magno decumas agri Leontini , ceterorumque agrorum ; & lege Hieronicâ vendidisse ; & pluris etiam , quàm te vendidisse ; nec aratorem quemquam esse questum : nec enim fuit quod quisquam queri posset , quum lege æquis-simè scriptâ venirent ; neque illud umquam aratoris interfuit , quanti decumæ venirent :  
non

*ACTIONIS II. L. III. 97*

non enim ita est, ut, si magno venierint, plus arator debeat; si parvo, minus. Ut frumenta nata sunt, ita decumæ veneunt: aratoris autem interest, ita se frumenta habere, ut decumæ quàm plurimo venire possint: dum arator ne plus decumâ det, expedit ei decumam esse quàm maximi.

148. Verùm hoc, ut opinor, esse vis caput defensionis tuæ, magno te decumas vendidisse: agri verò Leontini, qui plurimum efficit, tritici modiùm CCXVI milibus. Si doceo, pluris aliquantò potuisse te vendere, neque his voluisse addicere, qui contra Apronium licerentur: & Apronio multò minoris, quàm aliis potueris, tradidisse: si hoc doceo; poteritne te; Alba, tuus antiquissimus non solum amicus, verùm etiam amator, absolvere?

LXIV. Dico equitem Romanum, hominem in primis honestum, Q. Minucium, cum sui similibus, ad decumas agri Leontini tritici modiùm non CIO, non CIO CIO, non CIO CIO CIO, sed ad unas unius agri decumas tritici modiùm xxx millia voluisse addere, & ei potestatem emendi non esse factam, ne res abiret ab Apronio.

149. Negare hoc, nisi fortè negare omnia constituisti, nullo modo potes: palam res gesta est, maximo conventu, Syra-

cusis : testis est tota provincia , propterea quòd undique ad emendas decumas solent eò convenire : quod sive fateris , sive convinceris ; quot , & quàm manifestis in rebus teneare , non vides ? primùm tuam rem illam , & prædam fuisse : nam , nisi ita esset , cur tu Apronium malebas ( quem omnes tuum procurare in decumis negotium loquebantur ) quàm Minucium , decumas agri Leontini sumere ? deinde immensum , atque infinitum lucrum esse factum : nam si xxx millibus modium tritici tu commotus non esses : certè hoc idem lucri Minucius Apronio libenter dedisset , si ille accipere voluisset.

150. Quantam igitur illi spem prædæ propositam arbitramur fuisse , qui tantum præsens lucrum , nullâ operâ infumptâ , contempserit , atque despexerit ? deinde ipse Minucius numquam tanti habere voluisset , si decumas tu lege Hieronicâ venderes : sed quòd tuis novis edictis , & iniquissimis institutis plus aliquantò se , quàm decumas , ablaturum videbat , idcirco longiùs progressus est. At Apronio semper plus etiam multò abs te permissum est , quàm quod edixeras. Quantum igitur quæsumus factum esse per eum , cui quidvis licitum sit : quum tantum lucri voluerit addere is , cui , si decumas emisset , idem non liceret ?



## ACTIONIS II. L. III. 99

151. Postremò illa quidem certè tibi præcisa defensio est, in qua tu semper omnia tua furta, atque flagitia latere posse arbitratus es : *magno te decumas vendidisse : plebi Romanæ consuluisse : annonæ prospexisse.* Non potest hoc dicere is, qui negare non potest, se unius agri decumas xxx millibus modium minoris, quàm potuerit, vendidisse : ut etiam, si tibi hoc concedam, Minucio ideo te non tradidisse, quòd jam addixisses Apronio : aiunt enim te ita dictitare ; quod ego exspecto, cupioque te ita illud defendere : verùm ut ita sit, tamen non potes hoc, quasi præclarum aliquid prædicare, magno te decumas vendidisse, quum fuisse fateare, qui multò pluris voluerint emere.

LXV. Tenetur igitur jam, Judices, & manifestò tenetur avaritia, cupiditas hominis, scelus, improbitas, audacia. Quid si hæc, quæ dico, ipsius amici defensoresque judicarunt ? quid vultis amplius ? Adventu L. Metelli, prætoris, quum omnes ejus comites iste sibi suo illo panchresto medicamento amicos reddidisset ; aditum est ad Metellum : eductus est Apronius : eduxit vir primarius C. Gallius, senator : postulavit a L. Metello, ut ex edicto suo iudicium daret in Apronium, *Quod per vim, aut metum abstulisset* : quam formulam Octavianam, & Ro-

mæ Metellus habuerat, & habebat in provincia : non impetrat ; quum hoc diceret Metellus, præjudicium a se de capite C. Verris per hoc judicium nolle fieri. Tota Metelli cohors, hominum non ingratorum, aderat Apronio. C. Gallius, homo nostri ordinis, a suo familiarissimo L. Metello judicium ex edicto non potest impetrare.

153. Non reprehendo Metellum : pepercit homini amico, & quemadmodum ipsam dicere audiui, necessario : non reprehendo, inquam, Metellum : sed hoc miror, quomodo, de quo homine præjudicium noluerit fieri per recuperatores, de hoc ipso non modò præjudicarit, verùm gravissimè, ac vehementissimè judicarit. Primùm enim, si Apronium absolutum iri putaret ; nihil erat, quòd ullum præjudicium vereretur : deinde, si condemnato Apronio, conjunctam cum eo Verris causam omnes erant existimaturi ; Metellus quidem certè jam hoc judicabat, eorum rem, causamque esse conjunctam ; qui statuerit, Apronio condemnato, de isto præjudicium futurum : & simul una res utrique rei est argumento ; & aratores vi & metu coactos, Apronio multò plus, quàm debuerint, dedisse ; & Apronium istius rem suo nomine egisse, quum L. Metellus statuerit non posse Apronium

ACTIIONIS II. L. III. 101

condemnari, quin simul de istius scelere; atque improbitate judicaretur.

LXVI. Venio nunc ad epistolam Timarchidis, liberti istius, & accensi: de qua quum dixerò, totum hoc crimen decumanum peroraro. Hæc epistola est, Judices, quam nos Syracusis in ædibus Apronii, quum litteras conquireremus; invenimus: missa est, ut ipsa significat, ex itinere, quum Verres jam de provir-  
cia decessisset, Timarchidis manu scripta. Recita epistolam Timarchidis. TIMARCHIDES *Verris accensus* APRONIO salutem dicit. Jam hoc quidem non reprehendo, quod adscripsit, *Accensus*. Cur enim sibi hoc scribæ soli sumant? L. PAPIRIUS scriba. Volo ego hoc esse commune accensorum, liCTORUM, viatorum. *Fac diligentiam adhibeas, quod ad existimationem prætoris attinet.* Commendat Apronio Verrem, & hortatur, ut inimicis ejus resistat. Bono præsidio munitur existimatio tua: si quidem in Apronii constituitur diligentia, atque auctoritate. *Habes virtutem, atque eloquentiam.*

155. Quàm copiosè laudatur Apronius a Timarchide? quàm magnificè? cui ego non putem illum placere oportere, qui tantopere Timarchidi probatus sit? *Habes sumptum unde facias.* Necesse est, quod redundarit de vestro frumentario quæstu,

E iij



ad illum potissimum, per quem agebatis, defluxisse. *Scribas, apparitores recentes arripe: cum L. Vulteio, qui plurimum potest, cæde, concide.* Videte, quàm valde malitiæ suæ confidat Timarchides, qui etiam Apronio improbitatis præcepta det. Jam hoc, *cæde, concide*, nonne verba domo patroni depromere videtur, ad omne genus nequitiae accommodata? *Volo, mi frater, fraterculo tuo credas.* Consorti quidem in lucris, atque furtis, gemino & simillimo nequitia, improbitate, audaciâ.

LXVII. *In cohorte carus habebere.* Quid est hoc, *in cohorte*? quò pertinet? Apronium doces? quid? in vestram cohortem, te monitore, an suâ sponte pervenerat? *Quod cuique opus sit, oppone.* Quâ impudentiâ putatis eum in dominatione fuisse, qui in fuga tam improbus sit? ait, omnia pecuniâ effici posse. *Da, profunde, oppone, si velis vincere.* Non hoc mihi tam molestum est, Apronio suadere Timarchidem, quàm quodd hoc idem patrono suo præcipit.

156. *Te postulante omnes vincere solent.* Verre quidem prætore, non Sacerdote, non Peducæo, non hoc ipso Metello. *Scis Metellum sapientem esse.* Hoc verò ferri jam non potest, irrideri viri optimi, L. Metelli, ingenium, & contemni, ac despici a fugitivo Timarchide. *Si Vulteium habebis,*

*omnia ludibundus conficies.* Hic vehementer errat Timarchides, qui aut Vulteium pecuniâ corrumpi putet posse, aut Metellum unius arbitratu gerere præturam: sed erravit conjecturâ domesticâ: quia multos per se, & per alios multa ludibundos libidinosè apud Verrem effecisse vidit; ad omnes eosdem patere aditus arbitrabatur. Facilius vos efficiebatis ludibundi, quæ volebatis a Verre, quòd multa ejus ludorum genera noratis. *Inculcatum est Metello, & Vulteiò, te aratores everisse.* Quis istuc Apronio attribuebat, quum aratorem aliquem everterat? aut Timarchidi, quum ob judicandum, aut decernendum, aut imperandum aliquid, aut remittendum, pecuniam acceperat, aut Sextio lictori, quum aliquem innocentem securi percusserrat? nemo: omnes ei Verri tunc attribuebant, quem nunc condemnari volunt.

157. *Obtuderunt ejus aures, te socium prætoris fuisse.* Videsne, hoc quàm clarum sit, ac fuerit? quum etiam Timarchides hoc metuat; concedes, non hoc crimen nos in te confingere, sed jampridem ad crimen aliquam defensionem libertum quærere. Libertus, & accensus tuus, & tibi, ac liberis tuis, omnibus in rebus conjunctus, ac proximus, ad Apronium scribit, vulgò esse ab omnibus ita demonstratum Metello, tibi Apronium in decumis socium fuisse.

*Fac sciat improbitatem aratorum : ipsi sudabunt , si dii volent.* Quod istuc , per deos immortales ! aut qua de causa excitatum esse dicamus in aratores tam infestum odium , atque tantum ? quantam injuriam fecerunt Verri aratores , ut eos etiam libertus , & accensus ejus tam irato animo his litteris insequatur ?

LXVIII. Neque ego hujus fugitivi , Judices , epistolam vobis recitassem , nisi ut ex ea totius familiæ præcepta , & instituta , & disciplinam cognosceretis. Videtis , ut moneat Apronium ? quibus rebus , ac muneribus insinuet in familiaritatem Metelli ? Vulteium corrumpat ? scribas , accensumque pretio delinuat ? ea præcipit , quæ vidit : ea monet alienum hominem , quæ domi didicit ipse. Verùm in hoc errat uno , quòd easdem existimat vias ad omnium familiaritates esse munitas.

158. Quamquam meritò sum iratus Metello : tamen hæc quæ vera sunt , dicam. Apronius ipsum Metellum non pretio , ut Verrem , non convivio , non muliere , non sermone incauto atque improbo posset corrumpere : quibus rebus non sensim , atque moderatè ad istius amicitiam adreperat , sed brevi tempore totum hominem , totamque ejus præturam possederat. Cohortem autem Metelli , quam vocat , quid erat , quòd corrumperet , ex qua

in aratorem recuperatores nulli dabantur?

159. Nam quod scribit, Metelli filium puerum esse, vehementer errat: non enim ad omnes prætorum filios iidem aditus sunt. O Timarchide, Metelli est filius in provincia, non puer, sed adolescens bonus ac pudens, dignus illo loco ac nomine: vester ille puer prætextatus, in provincia quemadmodum fuisset, non dicerem, si pueri esse illam culpam, ac non patris existimarem. Tunc, quum te ac tuam vitam nosses, in Siciliam tecum grandem prætextatum filium ducebas? ut, etiam si natura puerum a paternis vitiis, atque a generis similitudine abduceret, consuetudo tamen eum & disciplina degenerare non sineret?

160. Fac enim fuisse in isto C. Lælii, M. Catonis materiem atque indolem: quid ex eo boni sperari atque effici potest, qui in patris luxurie sic vixerit, ut nullum umquam pudicum neque sobrium convivium viderit? qui in epulis quotidianis, adultâ ætate, per triennium inter impudicas mulieres & intemperantes viros versatus sit? nihil umquam a patre audierit, quo pudentior aut melior esset? nihil umquam patrem agere viderit, quod quum imitatus esset, non, id quod turpissimum est, patri similis putaretur?

LXIX. Quibus in rebus non solum filio, verum etiam reipublicæ fecisti inju-

riam. Susceperas enim liberos non solum tibi, sed etiam patriæ: qui non modò tibi voluptati, sed etiam qui aliquando usui reipublicæ esse possent. Eos instituere, atque erudire ad majorum instituta, atque civitatis disciplinam, non ad tua flagitia, neque ad tuas turpitudines debuisti. Esset ex inertī atque impuro & improbo parente navus, & pudens, & probus filius: haberet aliquid abs te respublica muneris. Nunc pro te Verrem substituísti alterum civitati: nisi hoc fortè deterior est, si fieri potest, quòd tu ejusmodi evasisti, non in hominis luxuriosi, sed tantum in furis ac divisoris disciplinâ educatus.

162. Quid isto festivius fore arbitramur, qui est tuus naturâ filius, consuetudine discipulus, voluntate similis? Quem ego, Judices, quamvis bonum fortemque facile paterer evadere: non enim me inimiciæ commovent, si quæ mihi cum isto futuræ sint: nam si in omnibus rebus innocens fuero, meique similis; quid mihi istius inimiciæ nocebunt? sin aliqua in re Verri similis fuero; non magis mihi deerit inimicus, quàm Verri defuit. Etenim, Judices, ejusmodi respublica debet esse, & erit, severitate judiciorum constitutâ, ut inimicus neque deesse nocenti possit, neque obesse innocenti. Quapropter nulla res est, quam obrem ego istum nolim ex paternis probris



ac vitiis emergere : id quod tametsi isti difficile est , tamen haud scio an fieri possit ; præsertim si , ut nunc fit , custodes amicorum eum sectabuntur : quoniam pater tam negligens ac dissolutus est.

163. Verùm huc longius , quàm voluntas fuit , ab epistola Timarchidis digressa est oratio mea : quâ recitatâ , conclusurum me esse crimen decumarum dixeram : ex quo intellexistis , innumerabilem frumenti numerum per triennium aversum a republica esse , ereptumque aratoribus.

LXX. Sequitur , ut de frumento EMPTO vos , Iudices , doceam , maximo atque impudentissimo furto : de quo dum certa , & pauca , & magna dicam breviter , attendite. Frumentum emere in Sicilia debuit Verres ex senatusconsulto , & ex lege Terentia , & Cassia frumentaria. Emendi duo genera fuerunt : unum alterarum decumarum : alterum , quod præterea civitatibus æqualiter esset distributum. Illius decumani tantum , quantum ex primis decumis fuisset : hujus imperati tritici modium DCCC millia : pretium autem constitutum decumano in modios singulos H-S terni : imperato H-S IV. Ita in frumentum imperatum H-S bis & tricies in annos singulos Verri decernebatur , quod aratoribus solveret : in alteras decumas fermè ad nonagies : sic per triennium ad

hanc frumenti emptionem Siciliensem propè centies & tricies erogatum est.

164. Hanc pecuniam tantam, datam tibi ex ærario inopi atque exhausto : datam ad frumentum, hoc est, ad necessitatem salutis & vitæ : datam, ut Siculis aratoribus, quibus tanta onera respublica imponeret, solveretur : abs te sic lacertam esse dico, ut possim illud probare, si velim, omnem te hanc pecuniam domum tuam avertisse : etenim sic hanc rem totam administraſti, ut hoc, quod dico, probari æquissimo judici possit. Sed ego habebo rationem auctoritatis meæ : meminero, quo animo, quo consilio ad causam publicam accesserim : non agam tecum accusatoriè : nihil fingam : nihil cuiquam probari velim, me dicente, quod non antè mihimetipsi probatum sit.

165. In hac pecunia publica, Judices, hæc insunt tria genera furtorum. Primùm, quum posita esset pecunia apud eas societates, unde erat attributa, binis centesimis fœneratus est : deinde, permultis civitatibus pro frumento nihil solvit omnino : postremò, si cui civitati solvit ; tantum detraxit, quantum commodum fuit : nulli, quod debitum est, reddidit.

LXXI. Ac primùm hoc ex te quæro : tu, cui publicani ex Carpinatii litteris gratias egerunt, pecunia publica ex ærario

erogata, ex vestigalibus populi Romani ad emendum frumentum attributa, fueritne tibi quæstui? pensitaritne tibi binas centesimas? Credo te negaturum: turpis enim est, & periculosa confessio. Mihi autem hoc perarduum est demonstrare: quibus enim testibus? publicanis? tractati honorificè sunt: tacebunt. Litteræ eorum? decreto decumanorum remotæ sunt. Quod me igitur vertam? rem tam improbam, crimen tantæ audaciæ, tantæque impudentiæ propter inopiam testium ac litterarum prætermittam? Non faciam, Iudices: utar teste: quo? L. Vettio Chilone, homine equestri ordinis honestissimo atque ornatissimo: qui isti ita amicus & necessarius est, ut, etiam si vir bonus non esset, tamen, quod contra istum diceret, grave videretur: ita vir bonus est, ut, etiam si inimicissimus isti esset, tamen ejus testimonio credi oporteret.

167. Admiratur & expectat, quidnam Vettius dicturus sit. Nihil dicet ex tempore: nihil ex sua voluntate: nihil, ut ei utrumvis licuisse videatur. Misit in Siciliam litteras ad Carpinatium, quum esset magister scripturæ, & ejus societatis publicanorum: quas ego Syracusis, apud Carpinatium in litterarum allatarum libris; Romæ, in litterarum missarum apud magistrum Tullium, familiarem tuum inveni: quibus ex litteris impudentiam fœneratio-

nis, quæso, cognoscite. LITTERÆ MISSÆ L. VETTII, P. SERVILII, C. ANTISTII, MAGISTRORUM. Præstò se tibi ait futurum Vettius, & observaturum, quemadmodum rationes ad ærarium referas: ut, si hanc ex fœnore populo pecuniam non retuleris, reddas societati. Possumus hoc teste, possumus P. Servilii, & C. Antistii, magistrorum litteris, primorum hominum atque honestissimorum, possumus auctoritate societatis, cujus litteris utimur, quod dicimus, obtinere? an aliqua firmiora, aut graviora quærenda sunt?

LXXII. Vettius, tuus familiarissimus; Vettius, tuus affinis, cujus sororem habes in matrimonio, tuæ frater uxoris Vettius, frater tui quæstoris, testatur impudentissimum tuum furtum, certissimumque peculatum: nam quo alio nomine, pecuniæ publicæ fœneratio est appellanda? RECITA RELIQUA. Scribam tuum, dicit, Verres, hujus præscriptorem fœnerationis fuisse: ei quoque magistri minantur in litteris: etenim casu scribæ tum duo magistri fuerunt cum Vettio. Binas centesimas ab se ablatas ferendum non putant: & rectè non putant. Quis enim hoc fecit umquam? quis denique conatus est facere, aut posse fieri cogitavit, ut, quum senatus publicanos usurâ sæpè juvisset, magistratus a publicanis pecuniam pro usuris

*ACTIONIS II. L. III. III*

auderet auferre? Certè huic homini spes nulla salutis esset, si publicani; hoc est, si equites Romani judicarent.

169. Minor esse nunc, Iudices, vobis disceptantibus debet; & tantò minor, quantò est honestius alienis injuriis, quàm re suâ commoveri. Quid ad hæc respondere cogitas? Utrùm factum negabis? an tibi hoc licitum esse defendes? negare quipotes? an ut tantâ auctoritate litterarum, tot testibus publicanis convincare? licuisse verò quî? si mehercule te pecuniam tuam, non populi Romani, in provincia fœneratum docerem, tamen effugere non posses: sed publicam, sed ob frumentum decretam, sed a publicanis fœnore acceptò; hoc licuisse cuiquam probabis? quo non modò ceteri, sed tu ipse nihil audacius, improbiusque fecisti. Non mehercule hoc, quod omnibus singulare videtur, de quo mihi deinceps dicendum est, possum, Iudices, dicere audacius esse, aut impudentius, quòd permultis civitatibus pro frumento nihil solvit omnino: major hæc præda fortasse est; sed illa impudentia certè non minor. Et, quoniam de illa fœneratione satis dictum est, nunc de hac tota pecunia averfa, quæso, cognoscite.

LXXIII. Siciliæ civitates multæ sunt, Iudices, ornatae, atque honestæ; ex quibus in primis numeranda est civitas Hale-

sina : nullam enim reperietis aut officiis  
fidelio rem , aut copiis locupletio rem , aut  
auctoritate gravio rem . Huic iste in annos  
singulos , quum sexaginta tritici millia mo-  
diũm imperavisset , pro tritico nummos  
abstulit , quanti erat in Sicilia triticum :  
quos de publico nummos acceperat , re-  
tinuit omnes . Obstupui , Iudices , quum  
hoc mihi primũm Halesiæ demonstravit  
in senatu Halesinorum homo summo in-  
genio , summã prudentiã , summã aucto-  
ritate præditus , Halésinus Æneas : cui se-  
natus dederat publicè causam , ut mihi ,  
fratrique meo gratias ageret ; & simul qui  
nos ea , quæ ad iudicium pertinerent ,  
doceret .

171. Demonstrat , hanc istius consue-  
tudinẽ ac rationem fuisse : quum omnis  
frumenti copia decumarum nomine penes  
istum esset redacta , solitum esse istum pe-  
cuniam cogere a civitatibus ; frumentum  
improbare ; quantum frumenti Romam  
esset mittendum , tantum de suo quæstu ,  
ac de sua copia frumenti mittere . Posco  
rationes : inspicio litteras : video frumenti  
gramm Halesinos , quibus LX millia mo-  
diũm imperata erant , nullum dedisse : pe-  
cuniam Volcatio , Timarchidi , scribæ de-  
disse : reperio genus huiusmodi , Iudices ,  
prædæ , ut prætor , qui frumentum emere  
debebat , non emat , sed vendat : pecunias ,

*ACTIONIS II. L. III. 113*

quas civitatibus distribuere debebat, eas omnes avertat, atque auferat. Non mihi jam furtum, sed monstrum, ac prodigium videbatur: civitatum frumentum improbare, suum probare: quum suum probasset, pretium ei frumento constituere: quod constituisset, id civitatibus auferre: quod a populo Romano accepisset, tenere.

LXXIV. Quot vultis esse in uno furto peccatorum gradus? ut si singulis insistere velim, progredi iste non possit. Improbas frumentum Siculum. Quid? ipse quod mittis? peculiarem habes aliquam Siciliam, quæ tibi ex alio genere frumentum suppeditare possit? Quum senatus decernit, ut ematur in Sicilia frumentum, aut quum populus jubet; hoc, ut opinor, intelligit, ex Sicilia Siculum frumentum apportari oportere. Tu, quum civitatum Siciliae vulgò omne frumentum improbas, num ex Ægypto, aut ex Syria frumentum Romam mittis? Improbas Halesinum, Cephalœditanum, Thermitanum, Amestratinum, Tyndaritanum, Herbitense, multarum præterea civitatum. Quid accidit tandem, ut horum populorum agri frumentum ejusmodi, te prætor, ferrent, quod numquam antea; ut neque mihi, neque tibi, neque populo Romano posset probari, præsertim quum ex iisdem agris,

eiusdemque anni frumentum ex decumis Romam mancipēs advexissent? quid acciderat, ut ex eodem horreo decumanum probaretur, emptum non probaretur? Dubiumne est, quin ista omnis improbatio cogendæ pecuniæ causâ nata sit?

173. Esto: improbas Halesinum: habes ab alio populo quod probes: eme illud, quod placet: missos fac eos, quorum frumentum improbasti. Sed ab iis, quos repudias, exigis tantum pecuniæ, quantum ad eum numerum frumenti satis sit, quem civitati imperas. Dubium est quid egeris? In medimna singula video ex litteris publicis tibi Halesinos H-S quinos denos dedisse. Ostendam ex tabulis locupletissimorum aratorum, eodem tempore neminem in Sicilia pluris frumentum vendidisse.

LXXV. Quæ est ergo ista ratio, aut quæ potius amentia, frumentum improbare id, quod ex eo loco sit, ex quo senatus & populus Romanus emi voluerit: ex eo acervo, ex quo partem tu idem, decumarum nomine, probaris: deinde a civitatibus pecunias, ad emendum frumentum, cogere, quum ex ærario acceperis? Utrum te lex Terentia Siculorum pecuniâ frumentum emere a Siculis, an populi Romani pecuniâ frumentum ab Siculis emere jussit?

174. Jam verò ab isto omnem illam ex



*ACTIONIS II. L. III. 115*

æratio pecuniam, quam his oportuit civitatibus pro frumento dari, lucrifactam videtis : accipis enim H-S XV pro medimno ; tanti enim est illo tempore medimnum : retines H-S XVIII ; tanti enim est frumentum Siciliense ex lege æstimatum. Quid interest, utrùm hoc feceris, an frumentum non improbaris, sed frumento probato & accepto, pecuniam publicam tenueris omnem, neque quidquam ulli dissolveris civitati, quum æstimatio legis ejusmodi sit, ut ceteris temporibus tolerabilis Siculis, te prætorè etiam grata esse debuerit ? Est enim modius lege H-S III æstimatus : fuit autem, te prætorè, ut tu multis epistolis ad amicos tuos gloriaris, H-S II. Sed fuerit H-S III, quoniam tu tantum a civitatibus in modios singulos exegisti. Quum, si solveres Siculis tantum, quantum te populus Romanus jusserat, aratoribus fieri gratissimum posset : tu non modò eos accipere quod oportebat, noluisti : sed etiam dare, quod non debebant, coëgisti.

175. Atque hæc ita gesta esse, Judices, cognoscite, & ex litteris publicis civitatum, & ex testimoniis publicis : in quibus nihil fictum, nihil ad tempus accommodatum intelligetis. Omnia, quæ dicimus, rationibus populorum non interpositis, neque perturbatis, neque repentinis ; sed

certis , institutis , ordine relata , atque confecta sunt. Recita rationes Halesinorum. Cui pecuniam datam dicit ? Dic , dic etiam clariùs. *Volcatio , Timarchidi , Mævio.*

LXXVI. Quid est , Verres ? ne illam quidem tibi defensionem reliquam fecisti , mancipēs in istis rebus esse versatos ? mancipēs frumentum improbasse ? mancipēs pretio cum civitatibus decidisse , & eosdem abs te , illarum civitatum nomine , pecunias abstulisse : deinde ipsos sibi frumentum coëmisse : nihil hæc ad te pertinere ? Mala mehercule , ac misera defensio , prætorem hoc dicere , Ego frumentum neque attigi , neque adspexi : mancipibus potestatem probandi , improbandique permisi : mancipēs a civitatibus pecunias extorserunt : ego autem , quam pecuniam populi dare debui , mancipibus dedi. Mala est hæc quidem , ut dixi , defensio criminis : sed tamen hac ipsâ tibi , si uti cupias , non licet : vetat te Volcatius , tuæ , tuorumque deliciæ , mentionem mancipis facere. Timarchides autem , columen familiæ vestræ , premit fauces defensionis tuæ : cui simul , & Volcatio pecunia a civitate numerata est. Jam verò scribe tuus annulo aureo sup , quem ex his rebus invenit , istâ te ratione uti non sinet. Quid igitur est reliquum , nisi uti fateare , te Romam frumentum emptum Siculorum pecuniâ mi-

sisse : publicam pecuniam domum tuam convertisse ? O consuetudo peccandi , quantum habes jucunditatem in improbis , & audacibus , quum pœna abfuit , & licentia consecuta est !

177. Iste in hoc genere peculatûs non nunc primùm invenitur : sed nunc demum tenetur. Vidimus huic ab æraſio pecuniam numerari quæſtori ad ſumptum exercitûs conſularis : vidimus paucis poſt menſibus & exercitum , & conſulem ſpoliatum. Illa omnis pecuria latuit in illa caligine , ac tenebris , quæ totam rempublicam tum eccupaverant. Iterum gessit hereditariam quæſturam cum Dolabella : magnam pecuniam avertit : sed ejus rationem cum damnatione Dolabellæ permiscuit. Commiſſa eſt pecunia tanta prætori : non reperietis hominem timidè , nec leviter hæc improbiſſima lucra ligurientem : devorare omnem pecuniam publicam non dubitavit. Ita ſerpit illud inſitum in natura malum , conſuetudine peccandi liberâ , finem ut audaciæ ſtatueret ipſe ſibi non poſſit. Tenetur igitur aliquando , & in rebus tum maximis , tum manifeſtis tenetur. Atque in eam fraudem mihi videtur divinitus incidiſſe , non ſolùm ut eas pœnas , quas proximè meruiſſet , ſolveret : ſed ut illa etiam ſcelera ejus in Carbonem , & in Dolabellam vindicarentur.

LXXVII. Etenim nova quoque alia res exstitit, Judices, in hoc crimine, quæ tollat omnem dubitationem superioris illius decumani criminis. Nam, ut illud missum faciam, permultos aratores in alteras decumas, & in hæc DCCC millia modium, quod emptum populo Romano darent, non habuisse; sed a tuo procuratore, hoc est Apronio, emisse; ex quo intelligi potest, nihil te aratoribus reliqui fecisse: ut hoc præteream, quod in multis est testimoniis expositum: potest illo quidquam esse certius, in tua potestate, atque in tuis horreis omne frumentum Siciliae, per triennium, atque omnes fructus agri decumani, fuisse?

179. Quum enim a civitatibus pro frumento pecuniam exigebas, unde erat frumentum, quod Romam mitteres, si tu id non omne clausum, & compressum possidebas? Itaque in eo frumento primus tibi ille quæstus fuit, ipsius frumenti, quod erat ereptum ab aratoribus: alter, quod id frumentum improbissimè per triennium partum, non semel, sed bis, neque uno, sed duobus pretiis, unum & idem frumentum vendidisti: semel civitatibus H-S xv in medimnum; iterum populo Romano, a quo H-S xviii in medimna, pro eodem illo frumento abstulisti.

180. At enim frumentum Centuripino-

rum, & Agrigentinorum, & nonnullorum fortasse præterea, probasti; & his populis pecuniam dissolvisti. Sint aliquæ civitates in eo numero, quarum frumentum improbare nolueris: quid tandem? his civitatibus omnisne pecunia, quæ pro frumento debita est, dissoluta est? Unum mihi reperi, non populum, sed aratorem: vide, quære, circumspice, si quis fortè ex ea provincia, in qua tu triennium præfuisi, qui te nolit perisse: unum, inquam, da mihi ex illis aratoribus, qui tibi vel ad statuam pecuniam contulerunt, qui sibi dicat pro frumento omne esse, quod oportuerit, solutum: confirmo, Judices, neminem esse dicturum.

**LXXVIII.** Ex omni pecunia, quam aratoribus solvere debuisti, certis nominibus deductiones fieri solebant: primum pro spectatione, & collybo: deinde pro nescio quo cerario. Hæc omnia, Judices, non rerum certarum, sed furtorum improbissimorum sunt vocabula: nam collybus esse qui potest, quum utantur omnes uno genere nummorum? cerarium verò quid? quomodo hoc nomen ad rationes magistratûs, quomodo ad pecuniam publicam allatum est? Nam illud genus tertium deductionis erat ejusmodi, quasi non modò liceret, sed etiam oporteret: nec solùm oporteret, sed planè necesse esset. Scribæ

nomine de tota pecunia binæ quinquagesimæ detrahebantur. Quis tibi hoc concessit? quæ lex? quæ senatûs auctoritas? quæ porro æquitas, ut tantam pecuniam scriba tuus averteret, sive de aratorum bonis, sive de populi Romani vestigalibus?

182. Nam si potest ista pecunia sine aratorum injuria detrahi; populus Romanus habeat, præsertim in tantis ærarii angustiis: sin autem & populus id voluit, & æquum ita est, solvi aratoribus; tuus apparitor parvâ mercede populi conductus, de aratorum bonis prædabitur? & in hac causa scribarum ordinem in me concitabit Hortensius? & eorum commoda a me labefactari, atque oppugnari injuriâ dicet? quasi verò hoc scribis ullo exemplo sit, aut ullo jure concessum. Quid ego vetera repetam? aut quid eorum scribarum mentionem faciam, quos constat sanctissimos homines, atque innocentissimos fuisse? non me fugit, Judices, vetera exempla pro fictis fabulis jam audiri, atque haberi: in his temporibus versabor miseris ac perditis. Nuper, Hortensi, quæstor fuisti: quid tui scribæ fecerint, tu potes dicere: ego de meis hoc dico, quum in eadem ista Sicilia pro frumento civitatibus pecuniam solverem; & mecum duos frugalissimos homines scribas haberem, L. Mamilium, & L. Sergium: non modò istas  
duas

duas quinquagesimas, sed omnino nummum nullum cuiquam esse deductum.

LXXIX. Dicerem, hoc mihi totum esse attribuendum, Iudices, si illi umquam a me hoc postulassent, si umquam omnino cogitassent. Quamobrem enim scriba deducat, ac non potius mulio, qui advexit? tabellarius, cujus adventu certiores facti petiverunt? præco, qui adire jussit? viator, ac Venerius, qui fiscum sustulit? quæ pars operæ, aut opportunitatis in scriba est, cur ei non modò merces tanta detur, sed cur cum eo tantæ pecuniæ partitio fiat? Ordo est honestus: quis negat? aut quid ea res ad hanc rem pertinet? est verò honestus, quòd eorum hominum fidei tabulæ publicæ, periculaque magistratum committuntur. Itaque ex his scribis, qui digni sunt illo ordine, patribusfamiliâs, viris bonis, atque honestis, percontamini, quid sibi istæ quinquagesimæ velint: jam omnes intelligetis, novam rem totam, atque indignam videri.

184. Ad eos me scribas revoca, si placeat: noli hos colligere, qui nummulis corrogatis de nepotum donis, ac de scenicorum corollariis, quum decuriam emerunt, ex primo ordine explosorum in secundum ordinem civitatis se venisse dicunt. Eos scribas tecum disceptatores hujus criminis habebo, qui istos scribas esse mo-

lestè ferunt. Tametsi, quum in eo ordine videamus esse multos non idoneos, qui ordo industriæ propositus est, & dignitati: mirabimur, turpes aliquos ibi esse, quò cuivis licet pretio pervenire?

LXXX. Tu ex pecunia publica H-S tredecies scribam tuum permissu tuo quum abstulisse fateare, reliquam tibi ullam defensionem putas esse? hoc ferre quemquam posse? hoc quemquam denique nunc tuorum advocatorum animo æquo audire arbitrare? qua in civitate C. Catoni, clarissimo viro, consulari homini, H-S XVIII millibus æstimata sit; in eadem civitate apparitori tuo esse concessum, ut H-S uno nomine tredecies auferret? Hinc ille est annulus aureus, quo tu istum in concione donasti: quæ tuæ donatio singulari impudentiâ prædita, nova Siculis omnibus, mihi verò etiam incredibilis videbatur. Sæpe enim nostri imperatores, superatis hostibus, optimè republicâ gestâ, scribas suos annulis aureis in concione donarunt. Tu verò quibus rebus gestis, quo hoste superato, concionem, donandi causâ, advocare ausus es? Neque enim solum scribam tuum annulo, sed etiam virum fortissimum, ac tui dissimillimum, Q. Rubrium, excellentem virtute, auctoritate, copiis, coronâ & phaleris, & torque donasti: M. Cossutium, sanctissimum virum, atque honestum.



tissimum : M. Castritium , summo splendore , ingenio , gratiâ præditum.

186. Quid hæc sibi horum trium civium Romanorum dona voluerunt ? Siculos præterea , potentissimos , nobilissimosque donasti ; qui non , quemadmodum sperasti , tardiores fuerunt : sed ornatiores tuo iudicio ad testimonia dicenda venerunt. Quibus ex hostium spoliis ? de qua victoria ? qua ex præda aut manubiis , hæc abs te donatio constituta est ? an quòd , te prætorè , paucorum adventu myoparonum , classis pulcherrima , Siciliae propugnaculum , præsidiumque provinciæ , piratarum manibus incensa est ? an quòd ager Syracusanus prædonum incendiis , te prætorè , vastatus est ? an quòd forum Syracusanum navarchorum sanguine redundavit ? an quòd in portu Syracusano piraticus myoparo navigavit ? Nihil possum reperire , quamobrem te in istam amentiam incidisse arbitrer : nisi fortè id egisti , ut hominibus ne oblivisci quidem rerum tuarum malè gestarum liceret.

187. Annulo est aureo scriba donatus , & ad eam donationem concio est advocata. Quod erat os tuum , quum videbas in concione eos homines , quorum ex bonis iste annulus aureus donabatur , qui ipsi annulos aureos posuerant , liberisque detraxerant , ut esset , unde scriba tuus hoc

tuum munus ac beneficium tueretur ? quæ porro præfatio tuæ donationis fuit ? Illa scilicet vetus , atque imperatoria ? *Quando tu quidem in prælio , in bello , in re militari : cujus ne mentio quidem , te prætore , ulla facta est : an illa ? Quandoquidem tu nulla umquam mihi in cupiditate , ac turpitudine defuisti ; omnibusque in iisdem flagitiis mecum & in legatione , & in prætura , & hîc in Sicilia versatus es : ob hæc res , quoniam te locupletavi , hoc annulo aureo dono.* Vera hæc fuisset oratio : non enim iste annulus aureus abs te datus , istum virum fortem , sed hominem locupletem esse declarat. Ita eundem annulum ab alio datum , testem virtutis ducemus : abs te donatum , comitem pecuniæ judicamus.

LXXXI. Dictum , Judices , est de *decumano* frumento : dictum de *empto* : extremum & reliquum est , de *æstimato* : quod quum magnitudine pecuniæ , tum injuriæ genere quemvis debet commovere : tum verò eò magis , quòd ad hoc crimen non ingeniosa aliqua defensio , sed improbissima confessio comparatur. Nam quum ex senatusconsulto & ex legibus frumentum ei in cellam sumere liceret ; idque frumentum senatus ita æstimasset , quaternis H-S tritici modium ; binis hordei : iste , numero ad summam tritici adjecto , tritici

*ACTIONIS II. L. III. 125*

modios singulos cum aratoribus denariis ternis æstimavit. Non est in hoc crimen, Hortensi : ne fortè ad hoc meditare ; multos sæpè viros bonos, & fortes, & innocentes cum aratoribus, & cum civitatibus frumentum, in cellam quod sumi oporteret, æstimasse, & pecuniam pro frumento abstulisse. Scio, quid soleat fieri : scio, quid liceat. Nihil, quod antea fuerat in consuetudine bonorum, nunc in istius facti reprehenditur.

189. Hoc reprehendo, quòd, quum in Sicilia H-S 11 tritici modius esset, ut istius epistola ad te missa declarat, summum H-S ternis : id quod & testimoniis omnibus, & tabulis aratorum planum factum antea est : tum iste pro tritici modiis singulis ternos ab aratoribus denarios exegit. Hoc crimen est ; ut intelligas, non ex æstimatione, neque ex ternis denariis pendere crimen, sed ex coactione annonæ, atque æstimationis.

LXXXII. Etenim hæc æstimatio nata est, Judices, initio, non ex prætorum aut consulum, sed ex aratorum atque civitatum commodo. Nemo enim fuit initio tam impudens, qui quum frumentum deberetur, pecuniam posceret : certè hoc ab aratore primum est profectum, aut ab ea civitate, cui imperabatur : quum aut frumentum vendidisset, aut servare vellet, aut in eum

locum, quò imperabatur, portare nollet: petivit in beneficii loco & gratiæ, ut sibi pro frumento, quanti frumentum esset, dare liceret. Ex hujusmodi principio, atque ex liberalitate, atque accommodatione magistratuum, consuetudo æstimationis introducta est.

190. Secuti sunt avariores magistratus; qui tamen in avaritia sua non solum viam quæstûs invenerunt, verum etiam exitum, ac rationem defensionis. Instituerunt semper ad ultima ac difficillima loca adportandum frumentum imperare, ut vecturæ difficultate, ad quam vellent, æstimationem pervenirent. In hoc genere facilior est existimatio, quàm reprehensio, ideo quòd eum, qui hoc facit, avarum possumus existimare: crimen in eo constituere non tam facile possumus, quòd videtur concedendum magistratibus nostris esse, ut iis, quo loco velint, frumentum accipere liceat. Itaque hoc est, quod multi fortasse fecerunt: & ita multi, ut ii, quos innocentissimos meminimus, aut audivimus, non fecerint.

LXXXIII. Quæro nunc a te, Hortensi, cum utris tandem istius factum collaturus es? cum iis, credo, qui benignitate adducti, per beneficium & gratiam civitatibus concesserunt, ut nummos pro frumento darent. Ita credo, petuisse ab

isto aratores , ut , quum H-S ternis tritici modium vendere non possent , pro singulis modiis ternos denarios dare liceret. An , quoniam hoc non audes dicere , illuc confugies , vecturæ difficultate adductos , ternos denarios dare maluisse ? Cujus vecturæ ? quo ex loco , in quem locum ne portarent ? Philomelione Ephesum ? Video , quid inter annonam interesse soleat : video , quot dierum via sit : video Philomeliensibus expedire , quanti Ephesi sit frumentum , tantum dare potius in Phrygia , quàm Ephesum portare , aut ad emendum frumentum Ephesum pecuniam & legatos mittere.

192. In Sicilia verò quid ejusmodi ? Enna mediterranea est maximè : coge , ut ad aquam tibi , id quod summi juris est , frumentum Ennenses metiantur ; vel Phintiam ? vel Halesam , vel Catinam , loca inter se maximè diversa : eodem die , quo jusseris , deportabunt : tametsi ne vecturâ quidem opus est. Nam totus quæstus hic , Judices , æstimationis , ex annonæ natus est varietate : hoc enim magistratus in provincia assequi potest , ut ibi accipiat , ubi est carissimum : ideo valet ista ratio æstimationis in Asia : valet in Hispania : valet in his provinciis , in quibus unum pretium frumento esse non solet . In Sicilia verò quid cujusquam intererat , quo loco daret ? ne-

que enim portandum erat ; & quò quisque vehere iussus esset , ibi tantidem frumentum emeret , quanti domi vendidisset. Quamobrem si quid , Hortensi , docere vis , aliquid ab isto simile , in æstimatione , atque a ceteris , esse factum : doceas oportet , aliquo in loco Siciliae , prætor Verre , ternis denariis tritici modium fuisse.

LXXXIV. Vide , quam tibi defensionem patefecerim ; quàm iniquam in socios , quàm remotam ab utilitate reipublicæ , quàm sejunctam a voluntate atque sententiâ legis. Tu , quum tibi ego frumentum in meis agris , atque in mea civitate ; denique quum in iis locis , in quibus es , versaris , rem geris , provinciam administras , paratus sim dare : angulum mihi aliquem eligas provinciæ , reconditum ac derelictum ? jubeas ibi me metiri , quò portare non expediat ? ubi emere non possum ?

194. Improbum facinus , Judices ; non ferendum , nemini lege concessum , sed fortasse adhuc in nullo etiam vindicatum : tamen ego hoc , quod ferri nego posse , Verri , Judices , concedo , & largior. Si ullo in loco ejus provinciæ frumentum tanti fuit , quanti iste æstimavit , hoc crimen in istum reum valere oportere non arbitror. Verùm enimvero quum esset H-S binis , aut etiam ternis , quibusvis in locis

provinciae, duodenos sestertios exegisti. Si mihi tecum neque de annona, neque de aestimatione tua potest esse controversia, quid sedes? quid exspectas, quid defendes? Utrum tibi pecuniae conciliatae videntur adversum leges, adversum rempublicam, cum maxima sociorum injuria: an verò id rectè, ordine, e republica, sine cujusquam injuria factum esse defendes?

195. Quum tibi senatus ex ærario pecuniam prompsisset, & singulos tibi denarios adnumerasset, quos tu pro singulis modiis aratoribus solveres: quid facere debuisti? Si, quod L. Piso ille Frugi, qui legem de pecuniis repetundis primus tulit; quum emisisses quanti esset; quod superaret pecuniae, retulisses: si, ut ambitiosi homines, aut benigni; quum pluris senatus aestimasset, quàm quanti esset annona, ex senatûs aestimatione, non ex annonae ratione, solvisses: sin, ut plerique faciunt, in quo etiam erat aliquis quæstus, sed is honestus atque concessus; frumentum, quoniam vilius erat, ne emisisses: sumpsisses id nummorum, quod tibi senatus, cellæ nomine, concesserat.

LXXXV. Hoc verò quid est? quam habet rationem, non quæro æquitatis, sed ipsius improbitatis, atque impudentiæ? Neque enim est ferè quidquam, quod homines palam facere audeant in magistratu,

quamvis improbi, quin ejus facti, si non bonam, at aliquam rationem afferre soleant. Hoc quid est? Venit prætor: frumentum, inquit, me abs te emere oportet. Optimè. Modium denario. Benignè, ac liberaliter: nam ego tribus H-S non possum vendere. Mihi frumento non opus est: nummos volo. Nam speraveram, inquit arator, me ad denarios perventurum: sed, si ita necesse est, quanti frumentum sit, considera. Video esse binis H-S. Quid ergo a me tibi nummorum dari potest, quum senatus tibi quaternos H-S dederit? Quid poscat, attendite: & vos, quæso, simul, Judices, æquitatem prætoris attendite.

197. Quaternos H-S, quos mihi senatus decrevit, & ex ærario dedit, ego habebō, & in cistam transferam ex fisco. Quid postea? quid? pro singulis modiis, quos tibi impero, tu mihi octonos H-S dato. Quâ ratione? Quid quæris rationem? non tantam rationem res habet, quantam utilitatem, atque prædam. Dic, dic, inquit ille, planius. Senatus te voluit mihi nummos dare: me tibi frumentum metiri: tu eos nummos, quos mihi senatus dari voluit, ipse habebis; a me, cui singulos denarios dari oportuit, binos auferis? & huic prædæ ac direptioni, cellæ nomen imponis?



198. Hæc deerat injuria , & hæc calamitas aratoribus , te prætor , quâ reliquis fortunis omnibus everterentur : nam quid esse reliqui poterat ei , qui per hanc injuriam non modò frumentum omne amittere , sed etiam omne instrumentum vendere cogeretur ? Quò enim se verteret , non habebat. Ex quo fructu nummos , quos tibi daret , inveniret ? decumarum nomine tantum erat ablatum , quantum voluntas tulerat Apronii : pro alteris decumis , emptoque frumento , aut nihil datum ; aut tantum datum , quantum reliqui scriba fecerat ; aut ultro etiam , id quod didicistis , ablatum.

LXXXVI. Cogantur etiam nummi ab aratore ? quomodo ? quo jure ? quo exemplo ? Nam , quum fructus diripiebantur aratorum , atque omni lacerabantur injuriâ , videbatur id perdere arator , quod aratro ipse quæsisset , in quo elaborasset , quod agri segetesque extulissent. Quibus injuriis gravissimis tamen illud erat miserum solatium , quòd id perdere videbatur , quod alio prætor , eodem ex agro reparare posset. Nummos verò ut daret arator , quos non aratro , ac manu quærit ; boves , & aratrum ipsum , & omne instrumentum vendat , necesse est. Non enim debetis hoc cogitare : habet idem in nummis : habet idem in urbanis prædiis. Nam

quum aratori onus aliquod imponitur, non hominis, si quæ sunt præterea facultates, sed arationis ipsius vis, ac ratio consideranda est; quid ea sustinere, quid pati, quid efficere possit, ac debeat. Quamquam illi quoque sunt homines ab isto omni ratione exinaniti, ac perdit: tamen hoc vobis est statuendum, quid aratorem ipsum, arationis nomine, muneris in republica fungi, ac sustinere velitis. Imponitis decumas: patiuntur. Alteras: temporibus vestris serviendum putant. Dent emptum præterea: dabunt, si voletis.

200. Hæc quàm sint gravia, & quid, his rebus detractis, possit ad dominos puri, ac reliqui pervenire, credo vos ex vestris rebus rusticis conjecturâ assequi posse. Addite nunc eódem istius edicta, instituta, injurias: addite Apronii, Veneriorumque servorum, in agro decumano regna, ac rapinas. Quamquam hæc omitto: de cella loquor. Placetne vobis, in cellam magistratibus nostris frumentum Siculos gratis dare? quid hoc indignius? quid iniquius? atqui hoc scitote, aratoribus, hoc prætor, optandum, ac petendum fuisse.

LXXXVII. Sositenus est Entellinus, homo cum primis prudens, & domi nobilis: cujus verba audistis; qui ad hoc iudicium legatus publicè cum Arthemone,

& Menisco , primariis viris , missus est. Is quum in senatu Entellino multa mecum de istius injuriis ageret , hoc dixit : si hoc de cella , atque hac æstimatione concederetur , velle Siculos senatui polliceri frumentum in cellam gratis , ne posthac tantas pecunias magistratibus nostris decerneremus.

201. Perspicere vos certò scio , Siculis quantopere hoc expediat , non ad æquitatem conditionis , sed ad minima malorum eligenda : nam , qui mille modium Verri suæ partis in cellam gratis dedisset , duo millia nummum , aut summum tria dedisset : idem nunc pro eodem numero frumenti H-S VIII millia dare coactus est : hoc arator assequi per triennium certè fructu suo non potuit : vendiderit instrumentum , necesse est. Quòd si hoc munus , & hoc vectigal aratio tolerare , hoc est , Sicilia ferre , ac pati potest ; populo Romano ferat potius , quàm nostris magistratibus. Magna est pecunia : magnum , præclarumque vectigal : si modò id salvâ provinciâ , si sine injuria sociorum percipere possitis : nihil detraho. Magistratibus tantumdem detur in cellam , quantum semper datum est : quod præterea Verres imperat , id , si facere non possunt , recusent : si possunt , populi Romani potius hoc sit vectigal , quàm præda prætoris.

202. Deinde cur in uno genere solo frumenti ista æstimatio constituitur? Si est æqua, & ferenda: debet populo Romano Sicilia decumas: det pro singulis tritici modiis ternos denarios: sibi habeat frumentum. Data tibi pecunia est, Verres: una, quâ frumentum tibi emeris in cellam: altera, quâ frumentum emeris a civitatibus, quod Romam mitteres. Tibi datam pecuniam domi retines: & præterea pecuniam permagnam tuo nomine aufers: fac idem in eo frumento, quod ad populum Romanum pertinet: exige eadem æstimatione pecuniam a civitatibus; & refer, quam accepisti: tum refertius erit ærarium populi Romani, quàm umquam fuit.

203. At enim istam rem in publico frumento Sicilia non ferret: hanc rem in meo frumento tulit. Perinde quasi aut æquior sit ista æstimatio in tuo, quàm in populi Romani commodo: aut ea res, quam ego dico, & ea, quam tu fecisti, inter se genere injuriæ, non magnitudine pecuniæ differat. Verùm istam ipsam cellam ferre nullo modo possunt: ut omnia remittantur, ut omnibus injuriis, & calamitatibus, quas te prætor tulerunt, in posterum liberentur; istam cellam, atque istam æstimationem negant se ullo modo ferre posse.

LXXXVIII. Multa Sophocles Agri-

gentinus apud Cn. Pompeium consulem nuper, homo disertissimus, & omni doctrinâ, & virtute ornatissimus, pro tota Sicilia de aratorum miseriis graviter, ac copiosè dixisse, ac deplorasse dicitur: ex quibus hoc, iis, qui aderant (nam magno conventu acta res est) indignissimum videbatur; qua in re senatus optimè, ac benignissimè cum aratoribus egisset, largè, liberaliterque aestimasset, in ea re prædari prætorem, bonis everti aratores; & id non modò fieri, sed ita fieri, quasi liceat, concessumque sit.

205. Quid ad hæc Hortensius? falsum esse crimen? hoc numquam dicet, Non magnam hac ratione pecuniam captam? ne id quidem dicet. Non injuriam factam Siculis, atque aratoribus? qui poterit dicere? Quid igitur dicet? fecisse alios. Quid est hoc? utrùm crimini defensio, an comitatus exsilio quæritur? Tu in hac republica, an in hæc hominum libidine, & (ut adhuc habuit se status judiciorum) etiam licentia, non ex jure, non ex æquitate, non ex lege, non ex eo, quod oportuerit, non ex eo, quod licuerit; sed ex eo, quod aliquis fecerit, id quod reprehenditur, rectè factum esse defendes?

206. Fecerunt alii alia quàm multa: cur in hoc uno crimine isto genere defensionis uteris? Sunt quædam omnino in te singu-

laria, quæ in nullum alium hominem dici; neque convenire possint: quædam tibi cum multis communia. Ergo, ut omittam tuos peculatus, ut ob. jus dicendum pecunias acceptas, ut ejusmodi cetera, quæ forsitan alii quoque etiam fecerint: illud, in quo te gravissimè accusavi, quòd ob judicandam rem pecuniam accepisses, eâdem istâ ratione defendes, fecisse alios? Ut ego assentiar orationi, defensionem tamen non probabo. Potius enim, te damnato, ceteris angustior locus improbitatis defendendæ relinquetur, quàm, te absoluto, alii, quod audacissimè fecerunt, rectè fecisse existimentur.

LXXXIX. Lugent omnes provinciæ: queruntur omnes liberi populi: regna denique jam omnia de nostris cupiditatibus & injuriis expostulant: locus intra oceanum jam nullus est, neque tam longinquus, neque tam reconditus, quòd non, per hæc tempora, nostrorum hominum libido, iniquitasque pervaserit: sustinere jam populus Romanus omnium nationum non vim, non arma, non bellum, sed luctum, lacrymas, querimonias non potest. In ejusmodi re, ac moribus, si is, qui erit adductus in judicium, quum manifestis in flagitiis tenebitur, alios eadem fecisse dicet; illi exempla non deerunt: reipublicæ salus deerit, si improborum

exemplis improbi iudicio , ac periculo liberabuntur.

208. Placent vobis hominum mores ? placet ita geri magistratus , ut geruntur ? placet socios sic tractari , quod restat , ut per hæc tempora tractatos videtis ? Cur hæc a me opera consumitur ? quid sedetis ? cur non in media oratione mea confurgitis , atque disceditis ? Vultis autem istorum audacias , ac libidines aliqua ex parte refecare ? Desinite dubitare , utrum sit utilius , propter multos improbos , uni parcere , an unius improbi supplicio multorum improbitatem coercere.

209. Tametsi quæ ista sunt exempla multorum ? nam quum in causa tanta , quum in crimine maximo dici a defensore coeptum est , factitatum esse aliquid : expectant ii , qui audiunt , exempla ex veteri memoria , & monumentis , ac litteris , plena dignitatis , plena antiquitatis.

X C. Hæc plurimum solent & auctoritatis habere ad probandum , & iucunditatis ad audiendum. Africanos mihi , & Catores , & Lælios commemorabis ? & eos fecisse idem dices ? quamvis res mihi non placeat : tamen contra hominum auctoritatem pugnare non potero. An quum eos non poteris proferre , proferes hos recentes , Q. Catulum patrem , C. Marium , Q. Scævola , M. Scaurum , Q. Metel-

lum ? qui omnes provincias habuerunt , & frumentum cellæ nomine imperaverunt : magna est hominum auctoritas , & tanta , ut etiam delicti suspicionem tegere possit.

210. Non habes , ne ex his quidem hominibus , qui nuper fuerunt , ullum auctorem istius æstimationis. Quò me igitur , aut ad quæ exempla revocas ? Ab illis hominibus , qui tum versati sunt in republica , quum & optimi mores erant , & hominum existimatio gravis habebatur , & judicia severa fiebant , ad hanc hominum licentiam , & libidinem me adducis ? & in quos aliquid exempli populus Romanus statui putat oportere , ab iis tu defensionis exempla quæris ? Non fugio ne hos quidem mores , dummodo ex his ea , quæ probat populus Romanus exempla , non ea , quæ condemnat , sequamur. Non circumspiciam , non quæram foris , quum habeas iudices , principes civitatis , P. Servilium , Q. Catulum : qui tantâ auctoritate sunt , tantis rebus gestis , ut in illo antiquorum , & clarissimorum hominum , de quibus antea dixi , numero reponantur.

211. Exempla quærimus , & ea non antiqua : modò uterque horum exercitum habuit. Quære , Hortensi , quoniam te recentia exempla delectant , quid fecerint. Itane verò ? Q. Catulus frumento est usus , pecuniam non coëgit. P. Servilius



quinguennium exercitui quum præesset , & istâ ratione innumerabilem pecuniam facere posset , non statuit sibi quidquam licere , quod non patrem suum , non avum Q. Metellum facere vidisset. C. Verres reperietur , qui , quod expediat , id licere dicat ? quod nemo , nisi improbus , fecerit , id aliorum exemplo se fecisse defendat ? At in Sicilia factitatum est.

XCI. Quæ est ista conditio Siciliæ ? cur , quæ optimo jure , propter vetustatem , fidelitatem , propinquitatem esse debet , huic præcipua lex injuriæ definitur ? Sed in ista ipsa Sicilia non quæram exemplum foris : hoc ipso ex concilio utar exemplis. C. Marcelle , te appello. Siciliæ provinciæ , quum esses pro consule , præfuisi : num quæ in tuo imperio pecuniæ cellæ nomine coactæ sunt ? neque ego hoc in tua laude pono : alia sunt tua facta , atque consilia , summâ laude digna , quibus illam tu provinciam afflictam & perditam erexisti , atque recreasti : nam hoc de cella ne Lepidus quidem fecerat , cui tu successisti. Quæ sunt tibi igitur exempla in Sicilia cellæ , si hoc crimen non modò Marcelli factò , sed ne lepidi quidem potes defendere.

213. An me ad M. Antonii æstimationem frumenti , exactionemque pecuniæ revocaturus es ? Ita , inquit , ad M. An-

tonii : hoc enim mihi significasse , & annuisse visus est. Ex omnibusne igitur populi Romani prætoribus , proconsulibus , imperatoribus , M. Antonium delegisti , & ejus unum improbissimum factum , quod imitarere ? Et hic utrùm mihi difficile est dicere , an his existimare , ita se in illo infinito imperio M. Antonium gessisse , ut multò isti perniciosius sit dicere , se in re improbissima voluisse Antonium imitari , quàm , si possit , defendere nihil in vita se M. Antonii simile fecisse. Homines in judiciis ad crimen defendendum , non , quid fecerit quispiam , proferre solent , sed quid probarit. Antonium , quum multa contra sociorum salutem , multa contra utilitatem provinciarum & faceret , & cogitaret , in mediis ejus injuriis & cupiditatibus mors oppressit. Tu mihi , quasi ejus omnia facta atque consilia senatus populusque Romanus , judices , comprobant , ita M. Antonii exemplo istius audaciam defendis.

XCII. At idem fecit Sacerdos. Hominem innocentem , & summâ prudentiâ præditum nominas : sed tum idem fecisse erit existimandus , si eodem consilio fecerit. Nam genus æstimationis ipsum a me numquam est reprehensum : sed ejus æquitas , aratorum commodo & voluntate perpenditur. Non potest reprehendi illa æstimatio , quæ aratori non modò incommoda

*ACTIONIS II. L. III. 141*

non est, sed etiam grata est. Sacerdōs, ut in provinciam venit, frumentum in cellam imperavit. Quum esset, ante novum, tritici modius denariis quinque; petiverunt ab eo civitates, ut æstimaret: remissior aliquantò ejus fuit æstimation, quàm annonæ: nam æstimavit denariis III. Vides, eandem æstimationem, propter temporis dissimilitudinem, in illo laudis causam habere, in te, criminis: in illo, beneficii; in te, injuriæ?

215. Eodem tempore Antonius III denariis æstimavit, post messem, summa in vilitate, quum aratores frumentum dare gratis malebant: & aiebat, se tantidem æstimasse, quanti Sacerdotem: neque mentiebatur: sed eâdem istâ æstimatione alter sublevarat aratores, alter everterat. Quodd nisi omnis frumenti ratio ex temporibus esset, & annona, non ex numero, neque ex summa, considerata; numquam tam grati hi sesquimodii, Q. Hortensi, fuissent: quos tu quum ad mensuræ tam exigua rationem populo Romano in capita descripsisses, gratissimum omnibus fecisti: caritas enim annonæ faciebat, ut istuc, quod re parvum videbatur, tempore magnum videretur. Idem istuc si in vilitate populo Romano largiri voluisses; derisum tuum beneficium esset, atque contemptum.

**XCIII.** Noli igitur dicere, istum idem fecisse, quod Sacerdotem : quoniam non eo tempore, neque simili fecit annonâ. Dico potius, quoniam habes auctorem idoneum, quod Antonius uno adventu & vix mēstruis cibariis fecerit, id istum per triennium fecisse : & istius innocentiam M. Antonii factô, atque auctoritate defendito. Nam de Sex. quidem Peducæo, fortissimo atque innocentissimo viro, quid dicetis ? de quo quis umquam arator questus est ? aut quis non ad hoc tempus innocentissimam omnium diligentissimamque præturam illius hominis existimavit ? Bienium provinciam obtinuit : quum alter annus in vilitate, alter in summa caritate fuerit ; num aut in vilitate nummum arator quisquam dedit ; aut in caritate de æstimatione frumenti questus est ? At uberiora cibaria facta sunt caritate. Credo : neque id est novum, neque reprehendendum.

217. Modò C. Sentium vidimus, hominem vetere illâ ac singulari innocentia præditum, propter caritatem frumenti, quæ fuerat in Macedonia, permagnam ex cibariis pecuniam deportare. Quamobrem non ego invideo tuis commodis, si quâ ad te lege venerunt : injuriam queror, improbitatem coarguo : avaritiam in crimen, & in iudicium voco. Quòd si suspensiones injicere voletis, ad plures homines, & ad

plures provincias crimen hoc pertinere : non ego istam defensionem vestram pertimescam , sed me omnium provinciarum defensorem esse profitebor. Etenim hoc dico , & magnâ voce dico : *Ubicumque hoc factum est , improbè factum est : quicumque hoc fecit , supplicio dignus est.*

XCIV. Nam , per deos immortales ! videte , Iudices , & prospicite animis , quid futurum sit. Multi magnas pecunias ab invitis civitatibus , atque ab invitis aratoribus istâ ratione , cellæ nomine , coëgerunt ( omnino ego neminem video , præter istum : sed do hoc vobis , & concedo , esse multos ) in hoc homine rem adductam in iudicium videtis : quid facere potestis ? Utrùm , quum iudices sitis de pecunia captâ , conciliata , tantam pecuniam captam negligere : an , quum lex sociorum causâ rogata sit , sociorum querimonias non audire ?

219. Verùm hoc quoque vobis remitto : negligite præterita , si vultis : sed ne reliquas spes turbetis , atque omnes provincias evertatis ; id providete , ne avaritiæ , quæ antehac occultis itineribus atque angustis uti solebat , auctoritate vestrâ viam patefaciatis illustrem atque latam. Nam si hoc probatis , & si hoc licere , pecunias isto nomine capi , iudicatis : certè hoc , quod adhuc nemo , nisi improbissimus , fecit ,

posthac nemo, nisi stultissimus, non faciet. Improbi sunt, qui pecunias contra leges cogunt: stulti, qui, quod licere judicatum est, prætermittunt.

220. Deinde, Judices, videte, quam infinitam sitis hominibus licentiam pecuniarum eripiendarum daturi. Si ternos denarios qui coëgit, erit absolutus: quater-nos, quinos, denos denique, aut videnos coget alius. Quæ erit reprehensio? in quo primùm injuriæ gradu resistere incipiet severitas judicis? quotus erit iste denarius, qui non sit ferendus, & in quo primùm æstimationis iniquitas, atque improbitas reprehendatur? non enim a vobis summa, sed genus æstimationis erit comprobatum. Neque hoc potestis judicare, ternis denariis æstimare licere; denis non licere: ubi enim semel ab annonæ ratione, & ab aratorum voluntate res ad prætoris libidinem translata est; non est jam in lege, atque in officio, sed in voluntate hominum, atque avaritia, positus modus æstimandi.

XCV. Quapropter, si vos semel in judicando finem æquitatis & legis transieritis; scitote, vos nullum ceteris in æstimando finem improbitatis & avaritiæ reliquisse. Videte igitur, quàm multa simul a vobis postulentur. Absolvite eum, qui se fateatur maximas pecunias cum summa sociorum injuria cepisse: non est satis. Sunt alii

alii quoque plures, qui idem fecerint: absolvite etiam illos, si qui sunt; ut uno iudicio quàm plurimos improbos liberetis. Ne id quidem satis est: facite ut ceteris posthac idem liceat: licebit. Adhuc parum est: permittite, ut liceat, quanti quisque velit, tanti æstimet: æstimabit. Videtis jam profecto, Iudices, hac æstimatione a vobis comprobata, neque modum posthac avaritiæ cujusquam, neque pœnam improbitatis futuram.

222. Quas ob res quid agis, Hortensi? consul es designatus: provinciam sortitus es: de æstimatione quum dices frumenti, sic te audiemus, quasi id, quod ab isto rectè factum esse defendes, te facturum profiteare, & quasi, quod isti licitum esse dices, vehementer cupias tibi licere. Atqui, si id licebit, nihil est quod putetis quemquam posthac commissurum, ut de pecuniis repetundis condemnari possit. Quantam enim quisque concupierit pecuniam, tantam licebit per cellæ nomen, æstimationis magnitudine, consequatur.

XCVI. At enim est quiddam, quod, etiam si palam in defendendo non dicit Hortensius, tamen ita dicit, ut vos id suspicari, & cogitare possitis; pertinere hoc ad commodum senatorium: pertinere ad utilitatem eorum qui iudicent, qui in

provinciis cum potestate, aut cum legatione se futuros aliquando arbitrentur. Præclaros verò existimas iudices nos habere, quos alienis peccatis concessuros putes, quò facilius ipsos peccare liceat. Ergo id volumus populum Romanum, id provincias, id socios, nationesque exteras existimare, si senatores judicent, hoc certè unum genus infinitæ pecuniæ per summam injuriam cogendæ, nullo modo posse reprehendi?

224. Quod si ita est, quid possumus contra illum prætorem dicere, qui quotidie templum tenet, qui rempublicam sistere negat posse, ni ad equestrem ordinem judicia referantur? Quòd si ille hoc unum agitare cœperit, esse aliquod genus cogendæ pecuniæ, senatorum commune, & jam propè concessum ordini, quo genere ab sociis maxima pecunia per summam injuriam avertatur; neque ullo modo senatoriis judiciis reprehendi posse, idque, dum equester ordo judicaret, numquam esse commissum: quis obsistet? quis erit tam cupidus vestrum, tam fautor ordinis, qui de transferendis judiciis possit recusare?

XC VII. Atque utinam posset aliquâ ratione hoc crimen, quamvis falsâ, modò humanâ atque usitatâ, defendere! minore periculo vestro, minore periculo



*ACTIONIS II. L. III. 147*

provinciarum omnium, judicaretis. Negaret hic æstimatione se usum ? vos id credidisse homini, non factum comprobasse videremini. Nullo modo negare potest : urgetur a tota Sicilia, nemo est ex tanto numero aratorum, a quo pecunia cellæ nomine non sit exacta.

225. Vellem etiam hoc posset dicere, nihil ad se istam rationem pertinere : per quæstores rem frumentariam esse administratam. Ne id quidem ei licet dicere : propterea quòd ipsius litteræ recitantur, ad civitates de ternis denariis missæ. Quæ est igitur defensio ? Feci quod arguis : coëgi pecunias maximas cellæ nomine : sed hoc mihi licuit : vobis, si prospicitis, licebit. Periculosum provinciis, genus injuriæ confirmari judicio : perniciosum nostro ordini, populum Romanum existimare, non posse eos homines, qui ipsi legibus teneantur, leges in judicando religiosè defendere. Atque isto prætore, Judices, non solum æstimandi frumenti modus non fuit, sed ne imperandi quidem : neque enim id, quod debebatur, sed quantum commodum fuit, imperavit. Summam faciam vobis ex publicis litteris & testimoniis civitatum, frumenti in cellam imperati : reperietis quinquies tantò, Judices, amplius istum, quàm quantum ei in cellam sumere licitum sit, civitatibus imperasse. Quid ad hanc

G ij

impudentiam addi potest, si & æstimavit tanti, ut homines ferre non possent, & tantò plus, quàm erat ei concessum legibus, imperavit?

226. Quapropter, cognitâ totâ re frumentariâ, Judices, jam facillimè perspicere potestis, amissam esse populo Romano Siciliam, fructuosissimam atque opportunissimam provinciam, nisi eam vos istius damnatione recuperatis. Quid est enim Sicilia, si ei agri cultionem sustuleris, & si aratorum numerum ac nomen exstinxeris? quid enim potest esse in calamitate residui, quod non ad miseros aratores, isto præ-tore, per summam injuriam ignominiamque pervenerit? quibus, quum decumas dare deberent, vix ipsis decumæ relictæ sunt: quum pecunia deberetur, soluta non est: quum optimâ æstimatione senatus frumentum eos in cellam dare voluisset, etiam instrumenta agrorum vendere coacti sunt.

XCVIII. Dixi jam antea, Judices, ut has omnes injurias tollatis, tamen ipsam rationem arandi spe magis, & jucunditate quadam, quàm fructu, atque emolumento teneri: etenim ad incertum casum, & eventum, certus quotannis labor, & certus sumptus impenditur: annona porrò, pretium, nisi in calamitate fructuum, non habet: si autem ubertas in

percipiendis fructibus fuit , consequitur vilitas in vendendis : ut aut malè vendendum intelligas , si processit ; aut malè perceptos fructus , si rectè licet vendere. Totæ autem res rusticæ ejusmodi sunt , ut eas non ratio , neque labor , sed res incertissimæ , venti , tempestatesque moderentur. Hinc quum unæ decumæ lege , & conditione trahantur : alteræ novis institutis propter annonæ rationem imperentur : ematur præterea frumentum quotannis publicè : postremò etiam in cellam magistratibus , & legis imperetur : quid , aut quantum præterea est , quod aut liberum possit habere ille arator , ac dominus in potestate , suorum fructuum , aut in ipsis fructibus solutum ?

228. Quòd si hæc feruntur omnia : si vobis potius , ac populo Romano , quàm sibi , & suis commodis , operâ , sumptu , labore deserviunt : etiamne hæc nova debent edicta , & imperia prætorum , & Apro-  
nii dominationem , & Veneriorum servorum furta , rapinasque perferre ? etiamne frumentum pro empto gratis dare ? etiamne in cellam quum cupiant gratis dare ultro , pecuniam grandem dare ? etiamne hæc tot detrimenta , atque damna maximis injuriis , contumeliisque perferre ? Itaque hæc , Judices , quæ pati nullo modo potuerunt , non pertulerunt : arationes totâ

150 *IN VER. ACT. II. L. III.*

Siciliâ desertas , atque a dominis relictas  
esse cognoscitis : neque quidquam aliud  
agitur hoc judicio , nisi ut antiquissimi fo-  
cii fidelissimique , Siculi , coloni populi  
Romani , atque aratores , vestrâ severitate  
& diligentîâ , me duce , atque auctore , in  
agros , atque in ædes suas revertantur.





ACTIONIS SECUNDÆ  
IN VERREM  
LIBER QUARTUS.  
DE SIGNIS.  
ORATIO NONA.

*Hic liber, cujus est inscriptio de Signis, continet furta Verris in signis & ornamentis Siciliae. Orditur Tullius a privatis tum Siciliensibus, tum civibus Romanis, quos ejusmodi rebus spoliatos fuisse demonstrat, quorum primus est Hejus, princeps legationis a Mamertinis in gratiam Verris missæ. Hinc invehitur in civitatem Messanam, prædarum & furtorum Verris, quem sola publice laudat, receptricem & sociam. At enim emptæ hæc omnia, non erepta*

*esse Verres dicitur : quam defensionem inanem esse probat , & quod magistratibus Romanis nihil in sua provincia mercari liceat , & quod ea vilissimo pretio per potestatem ablata sint. Enumeratis privatorum singulis adjungit Syriæ regem Antiochum , quem candelabro aureo , rebusque aliis pretiosissimis spoliatum e Sicilia Verres ejecit. Civitates inde recenset , quarum e locis publicis & Sacris ornamenta , ac præsertim Africani monumenta Verres sustulit. Ultima est direptio Syracusarum urbis , cujus e templis locisque publicis simulacra deorum , aliaque ornamenta sacra & profana Verres eripuit , quæ M. Marcellus , urbe captâ , religione impeditus , non attigerat. Quas ob rapinas Syracusanam civitatem Verri non minùs infestam esse ostendit , quam ceteras Siciliae civitates , præter Messanam , cui minas iterum intendit.*

VENIO nunc ad istius, quemadmodum ipse appellat, studium; ut amici ejus, morbum & insaniam; ut Siculi, latrocinium: ego, quo nomine appellem, nescio: rem vobis proponam: vos eam suo, non nominis pondere penditote. Genus ipsum prius cognoscite, Judices: deinde fortasse non magnopere quæretis, quo nomine appellandum putetis. Nego in Sicilia tota, tam locupleti, tam vetere provincia, tot oppidis, tot familiis, tam copiosis, ullum argenteum vas, ullum Corinthium, aut Deliacum fuisse; ullam gemmam, aut margaritam; quidquam ex auro, aut ebore factum; signum ullum æneum, marmoreum, eburneum; nego ullam picturam, neque in tabula, neque textili fuisse, quin conquiescit, inspexerit; quod placitum sit, abstulerit.

2. Magnum videor dicere: attendite etiam, quemadmodum dicam: non enim verbi, neque criminis augendi causâ complector omnia. Quum dico, nihil istum ejusmodi rerum in tota provincia reliquisse, Latine me scitote, non accusatorie loqui: etiam planius: nihil in ædibus cujusquam, ne in oppidis quidem: nihil apud Siculum, nihil apud civem Romanum; denique nihil istum, quod ad oculos, animumque acciderit, neque privati, neque

publici, neque profani, neque sacri, tota in Sicilia reliquisse. Unde igitur potius incipiam, quàm ab ea civitate, quæ tibi una in amore, atque in deliciis fuit? aut ex quo potius numero, quàm ex ipsis laudatoribus tuis? facilius enim perspicietur, qualis apud eos fueris, qui te oderunt, qui accusant, qui persequuntur; quum apud tuos Mamertinos invenire improbissimâ ratione esse prædatus.

II. C. Hejus est Mamertinus ( omnes hoc mihi facile concedent, qui Messanam accesserunt ) omnibus rebus in illa civitate ornatissimus : hujus domus est vel optima Messanæ, notissima quidem certè, & nostris hominibus apertissima, maximèque hospitalis : ea domus ante adventum istius sic ornata fuit, ut urbi quoque esset ornamento : nam ipsa Messana, quæ situ, mœnibus, portuque ornata sit, ab his rebus, quibus iste delectatur, sanè vacua, atque nuda est.

4. Erat apud Hejum sacrarium magna cum dignitate in ædibus, a majoribus traditum, perantiquum; in quo signa pulcherrima quatuor, summo artificio, summâ nobilitate; quæ non modò istum hominem, ingeniosum, atque intelligentem, verum etiam quemvis nostrum, quos iste idiotas appellat, delectare possent: unum Cupidinis, marmoreum, Praxitelis ( nimi-



*ACTIONIS II. L. IV. 155*

rum didici etiam, dum in istum inquiero, artificum nomina) idem, opinor, artifex ejusdem modi Cupidinem fecit illum, qui est Thespiis, propter quem Thespiæ visuntur: nam alia visendi causa nulla est. Itaque ille L. Mummius, quum Thespiadas, quæ ad ædem Felicitatis sunt, ceteraque profana ex illo oppido signa tolleret, hunc marmoreum Cupidinem, quod erat consecratus, non attigit.

- III. Verum, ut ad illud sacrarium redeam, signum erat hoc, quod dico, Cupidinis e marmore: ex altera parte Hercules egregiè factus ex ære: is dicebatur esse Myronis, ut opinor: & certè. Item ante hosce deos erant arulæ, quæ civis sacrarii religionem significare possent: erant ænea præterea duo signa, non maxima, verum eximiâ venustate, virginali habitu, atque vestitu, quæ manibus sublati sacra quædam more Atheniensium virginum reposita in capitibus sustinebant. Canephoræ ipsæ vocabantur: sed earum artificem quem? quemnam? rectè admones: Polycletum esse dicebant. Messaniam ut quisque nostrum venerat, hæc visere solebat: omnibus hæc ad visendum patebant quotidie: domus erat non domino magis ornamento, quàm civitati.

6. C. Claudius, cujus ædilitatem magnificentissimam scimus fuisse, usus est hoc

Cupidine tamdiu, dum forum diis immortalibus, populoque Romano habuit ornatum; &, quum esset hospes Hejorum, Mamertini autem populi patronus, ut illis benignis usus est ad commodandum, sic ipse diligens fuit ad reportandum. Nuper homines nobiles ejusmodi, Judices; & quid dico nuper? immo verò modò, ac planè paulò antè vidimus, qui forum ac basilicas, non spoliis provinciarum, sed ornamentis amicorum, commodis hospitum, non furtis nocentium, ornarent: qui tamen signa, atque ornamenta sua cuique reddebant: non ablata ex urbibus sociorum, quadridui causâ, per simulationem ædilitatis; domum deinde, atque ad suas villas auferebant. Hæc omnia, quæ dixi, signa, Judices, ab Hejo de sacrario Verres abstulit: nullum, inquam, horum reliquit, neque aliud ullum tamen, præter unum pervetus ligneum, Bonam Fortunam, ut opinor: eam iste habere domi suæ noluit.

IV. Proh deûm, hominumque fidem! quid hoc est? quæ hæc causa? quæ hæc impudentia est? quæ dico signa, antequam abs te sublata sunt, Messanam cum imperio nemo venit, quin viderit: tot prætores, tot consules in Sicilia, tum in pace, tum etiam in bello fuerunt; tot homines cujusque modi: non loquor de integris, innocentibus, religiosis: tot cupidi, tot improbi, tot

audaces ; quorum nemo sibi tam vehemens , tam potens , tam nobilis visus est , qui ex illo sacrario quidquam poscere , aut tollere , aut attingere auderet. Verres , quod ubique erit pulcherrimum , auferet ? nihil habere præterea cuiquam licebit ? tot domus locupletissimas domus istius una capiet ? idcirco nemo superiorum attigit , ut iste tolleret ? ideo C. Claudius Pulcher retulit , ut C. Verres posset auferre ? At non requirebat ille Cupido lenonis domum , ac meretriciam disciplinam : facilè illo sacrario patrio continebatur : Hejo se a majoribus relictum esse sciebat in hereditate sacrorum : non quærebat meretricis heredem.

8. Sed quid ego tam vehementer invehor ? verbo jam uno repellar. Emi , inquit. O dii immortales ! præclaram defensionem ! mercatorem cum imperio , ac securibus in provinciam misimus ; qui omnia signa , tabulas pictas , omne argentum , aurum , ebur , gemmas coëmeret ; nihil cuiquam relinqueret : hæc enim mihi ad omnia defensio patefieri videtur , *emisse*. Primum , si id , quod vis , tibi ego concedam , ut emeris ; quoniam in toto hoc genere hac unâ defensione usus es : quæro , cujusmodi tu judicia Romæ putaris esse , si tibi hoc quemquam concessurum putasti , te in prætura atque imperio , tot res , tam pretiosas , omnes denique res ,

quæ alicujus pretii fuerint, tota ex provincia coëmisse?

V. Videte majorum diligentiam, qui nihil dum etiam istiusmodi suspicabantur: verumtamen ea, quæ parvis in rebus accidere poterant, providebant. Neminem, qui cum potestate, aut legatione in provinciam esset profectus, tam amentem fore putarunt, ut emeret argentum; dabatur enim de publico: ut vestem; præbebatur enim legibus: mancipium putaverunt; quo & omnes utimur, & non præbetur a populo: sanxerunt, *Ne quis emeret mancipium, nisi in demortui locum*. Si qui Romæ esset demortuus? immo, si quis ibidem: non enim te instruere domum tuam voluerunt in provincia; sed illum usum provinciæ supplere.

10. Quæ fuit causa, cur tam diligenter nos in provinciis ab emptionibus removerent? hæc, Judices, quod putabant ereptionem esse, non emptionem, quum venditori suo arbitrati vendere non liceret: in provinciis intelligebant, si is, qui esset cum imperio ac potestate, quod apud quemque esset, emere vellet, idque ei liceret; fore, uti, quod quisque vellet, sive esset venale, sive non esset, quanti vellet, auferret. Dicit aliquis, Noli isto modo agere cum Verre: noli ejus facta ad antiquæ religionis rationem exquirere: concede, ut im-

ponè emerit , modò ut bonâ ratione emerit , nihil pro potestate , nihil ab invito , nihil per injuriam. Sic agam : si quid venale habuit Hejus , si id , quanti æstimabat , tanti vendidit : desino quærere , cur emeris.

V.I. Quid igitur nobis faciendum est ? num argumentis utendum in re ejusmodi ? quærendum est , credo , Hejus iste num æs alienum habuerit , num auctionem fecerit : si fecit , num tanta difficultas eum rei nummariæ tenuerit , tantâ egestas , tanta vis oppresserit , ut sacrarium suum spoliaret , ut deos patrios venderet. At hominem video auctionem fecisse nullam : vendidisse , præter fructus suos , nihil umquam : non modò in ære alieno nullo , sed in suis nummis multis esse , ac semper fuisse : si hæc contrâ , ac dico , essent omnia ; tamen illum hæc , quæ tot annos in familia , sacrarioque majorum fuissent , venditurum non fuisse. Quid si magnitudine pecuniæ persuasum est ei ? verisimile non est , ut ille homo tam locuples , tam honestus , religioni suæ , monumentisque majorum pecuniam anteponeret.

12. Sunt ista : verumtamen abducuntur homines nonnumquam etiam ab institutis suis magnitudine pecuniæ. Videamus , quanta ista pecunia fuit , quæ potuerit Hejum , hominem maximè locupletem , mi-

nimè avarum, ab humanitate, a pietate, ab religione deducere. Ita jussisti, opinor, ipsum in tabulas referre: *Hæc omnia signa Praxitelis, Myronis, Polycleti, H-S vñ mill. & D Verri vendita sunt.* Recita ex tabulis. TABULÆ HEJ. Juvat me, hæc præclara nomina artificum, quæ isti ad cælum ferunt, Verris æstimatione sic concidisse. Cupidinem Praxitelis H-S M. DC. profectò hinc natum est, *Malo emere, quàm rogare.*

VII. Dicet aliquis, Quid? tu ista permagno æstimas? Ego verò ad meam rationem, usumque non æstimo: verumtamen a vobis ita arbitror spectari oportere, quanti hæc eorum judicio, qui studiosi sunt harum rerum, æstimentur: quanti venire soleant: quanti hæc ipsa, si palam, liberèque venirent, venire possent; denique ipse Verres quanti æstimet: numquam enim, si denariis quadringentis Cupidinem illum putasset, commisisset, ut propter eum, in sermonem hominum, atque in tantam vituperationem veniret.

14. Quis vestrùm igitur nescit, quanti hæc æstimentur? In auctione signum æneum, non magnum, H-S cxx milibus venire non vidimus: Quid si velim nominare homines, qui aut non minoris, aut etiam pluris emerint? nonne possum? etenim qui modus est in his re-

*ACTIONIS II. L. IV. 161*

bus cupiditatis , idem est æstimationis : difficile est enim finem facere pretio , nisi libidini feceris. Video igitur Hejum , neque voluntate , neque difficultate aliquâ temporis , neque magnitudine pecuniæ adductum esse , ut hæc signa venderet : teque istâ simulatione emptionis , vi , metu , imperio , fascibus , ab homine eo , quem unâ cum ceteris sociis non solum potestati tuæ , sed etiam fidei populus Romanus commiserat , eripuisse , atque abstulisse.

15. Quid mihi tam optandum , Judices , potest esse in hoc crimine , quàm ut hæc eadem dicat ipse Hejus ? nihil profectò : sed ne difficilia optemus. Hejus est Mamertinus : Mamertina civitas istum publicè communi consilio sola laudat : omnibus ipse ceteris Siculis odio est : ab his solis amatur. Ejus autem legationis , quæ ad istum laudandum missa est , princeps est Hejus : etenim est primus civitatis : ne fortè , dum publicis mandatis serviât , de privatis injuriis reticeat.

16. Hæc quum scirem & cogitarem , commisi tamen me , Judices , Hejo : produxi eum primâ actione : neque id tamen ullo periculo feci. Quid enim poterat Hejus respondere , si esset improbus , si suâ dissimilis ? signa illa domi suæ esse , non apud Verrem ? qui poterat quidquam ejus.

modi dicere ? ut homo turpissimus esset ; impudentissimèque mentiretur , hoc diceret ; illa se habuisse venalia , eaque sese , quanti voluerit , vendidisse. Homo domi suæ nobilissimus , qui vos de religione sua , ac dignitate verè existimare maximè vellet , primò dixit se istum publicè laudare , quòd sibi ita mandatum esset : deinde neque se illa habuisse venalia , neque ullâ conditione , si , utrum vellet , liceret , adduci umquam potuisse , ut venderet illa , quæ in sacrario fuissent a majoribus suis relicta , & tradita.

VIII. Quid sedes , Verres ? quid expectas ? quid te a Centuripina civitate , a Catinensi , ab Halesina , ab Tyndaritana , Ennensi , Agyrinensi , ceterisque Siciliae civitatibus circumveniri , atque opprimi dicis ? tua te altera patria , quemadmodum dicere solebas , Messana circumvenit : tua , inquam , Messana , tuorum adjutrix scelerum , libidinum testis , prædarum ac furtorum receptrix : adest enim vir amplissimus ejus civitatis , legatus , hujusce judicii causâ domo missus , princeps laudationis tuæ ; qui te publicè laudat : ita enim mandatum , atque imperatum est : tametsi rogatus de Cybea , tenetis memoriâ , quid responderit : ædificatam publicis operis , publicè coactis , eique ædificandæ publicè Mamertinum senatorem præfuisse. Idem ad vos privatim ;



*ACTIONIS II. L. IV. 163*

Judices, confugit : utitur hac lege, quâ judicium est communis, & privatæ rei sociorum : tametsi lex est de pecuniis repetundis, ille se negat pecuniam repetere ; quam ereptam non tantopere desiderat : sacra se majorum suorum repetere abs te dicit : deos Penates a te patrios reposcit.

18. Ecqui pudor est ? ecqua religio, Verres ? ecqui metus ? habitasti apud Hejum Messanæ : res illum divinas apud eos deos in suo sacrario propè quotidie facere vidisti : non movetur pecuniâ : denique, quæ ornamenti causâ fuerunt, non requirit : habe Canephoros : deorum simulacra restitue. Quæ quia dixit : quia, tempore dato, modestè apud vos socius, amicusque populi Romani questus est : quia religioni suæ non modò in diis patriis repetendis, sed etiam in ipso jurejurando, ac testimonio, proximus fuit : hominem missum ab isto scitote esse Messanam de legatis unum ; illum ipsum, qui navî istius ædificandæ publicè præfuit ; qui a senatu peteret, ut Hejus ignominiâ afficeretur.

IX. Homo amentissime, quid putasti ? te impetraturum ? quanti is a civibus suis fieret, quanti auctoritas ejus haberetur, ignorabas ? Verùm fac te impetravisse : fac aliquid gravius in Hejum statuisse Mæmerinos ? quantam putas auctoritatem Jau-

dationis eorum futuram, si in eum, quem constet verum pro testimonio dixisse, pœnam constituerint? tametsi quæ est ista laudatio, quum laudator interrogatus lædat necesse est? Quid? isti laudatores tui, nonne testes mei sunt? Hejus est laudator; læsit gravissimè: producam ceteros: reticebunt, quæ poterunt, libenter: dicent, quæ necesse erit, ingratis. Negent isti onerariam navem maximam ædificatam esse Messanæ? negent, si possint: negent ei navi faciendæ senatorem Mamertinum publicè præfuisse? utinam negent! Sunt etiam cetera, quæ malo integra reservare, ut quàm minimum sit illis temporis ad meditandum, confirmandumque perjurium.

20. Hæc tibi laudatio procedat in numerum: hi te homines auctoritate suâ sublevant; qui te neque debent adjuvare, si possint; neque possunt, si velint: quibus tu privatim injurias plurimas, contumeliasque imposuisti: quo in oppido multas familias in perpetuum infames tuis stupris, flagitiisque fecisti. At publicè commodasti. Non sine magno quidem reipublicæ, provinciæque Siciliae detrimento. Tritici modium LX millia empti populo Romano dare debebant, & solebant: abs te solo remissum est. Respublica detrimentum fecit, quòd per te imperii jus una in

*ACTIONIS II. L. IV. 165*

civitate imminutum est : Siculi , quòd hoc non de summa frumenti detractum est , sed translatum in Centuripinos , & Halesinos , immunes populos : & hoc plus impositum , quàm ferre possent.

21. Navem imperare ex fœdere debuisti ; remisisti in triennium : militem nullum umquam poposcisti per tot annos : fecisti item , uti prædones solent ; qui quum communes hostes sint omnium , tamen aliquos sibi instituunt amicos , quibus non modò parcant , verùm etiam prædâ quos augeant , & eos maximè , qui habent oppidum opportuno loco , quò sæpe adeundum sit navibus , nonnumquam etiam necessariò.

X. Phaselis illa , quam cepit P. Servilius , non fuerat urbs antè Cilicum , atque prædonum : Lycii illam , Græci homines , incolebant : sed quòd erat ejusmodi loco , atque ita projecta in altum , ut & exeuntes e Cilicia prædones sæpe ad eam necessariò devenirent , & , quum ex hisce se locis reciperent , eòdem deferrentur ; adsciverunt illud sibi oppidum piratæ , primò commercio , deinde etiam societate.

22. Mamertina civitas improba antea non erat : etiam erat inimica improborum : quæ C. Catonis , illius , qui consul fuit , impedimenta retinuit : at cujus hominis ? clarissimi , potentissimique ; qui tamen

quum consul fuisset , cōdemnatus est : ita C. Cato , duorum hominum clarissimorum nepos , L. Pauli , & M. Catonis , & P. Africani sororis filius : quo damnato , tum , quum severa judicia fiebant , H-S XVIII millibus lis æstimata est : huic Mamertini irati fuerunt ; qui maiorem sumptum , quàm , quanti Catonis lis æstimata est , in Timarchidis prandium sæpè fecerunt.

23. Verùm hæc civitas isti prædoni , ac piratæ Siciliensi Phaselis fuit : huc omnia undique deportabantur ; apud istos relinquebantur : quod celari opus erat , habebant sepositum , ac reconditum : per istos , quæ volebat , in navem clam imponenda , occultè exportanda curabat : navem denique maximam , quam onustam furtis in Italiam mitteret , apud istos faciendam ædificandamque curavit : pro hisce rebus vacatio data est ab isto sumptûs , laboris , militiæ , rerum denique omnium : per triennium soli non modò in Sicilia , verùm , ut opinio mea fert , his quidem temporibus , in omni orbe terrarum , vacui , expertes , soluti , ac liberi fuerunt ab omni sumptu , molestiâ , munere.

24. Hinc illa Verrea nata sunt : hinc in convivium Sex. Cominium protrahi jussit , in quem scyphum de manu jacere conatus est : quem obtortâ gulâ de convivio in vincula , atque in tenebras abripi jussit : hinc

*ACTIONIS II. L. IV. 167*

illa crux, in quam civem Romanum iste, multis inspectantibus, sustulit : quam non ausus est usquam defigere, nisi apud eos, quibuscum omnia scelera sua, ac latrocinia communicasset.

XI. Laudatum etiam vos quemquam venire audetis? quâ auctoritate? utrùm, quam apud senatorium ordinem, an, quam apud populum Romanum habere debetis? Ecquæ civitas est, non modò in provinciis nostris, verùm etiam in ultimis nationibus, aut tam potens, aut tam libera, aut etiam tam immanis, ac barbara : rex denique ecquis est, qui senatorem populi Romani tecto, ac domo non invitet, qui honos non homini solùm habetur, sed primùm populo Romano, cujus beneficio nos in hunc ordinem venimus : deinde ordinis auctoritati, quæ nisi gravis erit apud socios, atque exteras nationes, ubi erit imperii nomen & dignitas? Mamer-  
tini me publicè non invitarunt : me quum dico, leve est. Senatorem populi Romani si non invitaverunt, honorem debitum detraxerunt, non homini, sed ordini. Nam ipsi Tullio patebat domus locupletissima, & amplissima Cn. Pompeii Basilisci, quò, etiam si esset invitatus a vobis, tamen devertisset : erat etiam Parcenniorum, qui nunc item Pompeii sunt, domus honestissima ; quò L. frater meus summâ illo-

rum voluntate devertit. Senator populi Romani, quod in vobis fuit, in vestro oppido jacuit, & pernoctavit in publico: nulla hoc civitas umquam alia commisit. Amicum enim nostrum in iudicium vocabas. Tu, quid ego privatim negotii geram, interpretabere imminuendo honore senatorio?

26. Verùm hæc tum queremur, si quid de vobis per eum ordinem agetur, qui ordo a vobis adhuc solis contemptus est. In populi Romani quidem conspectum quo ore vos commisistis? nec priùs illam crucem, quæ etiam nunc civis Romani sanguine redundat, quæ fixa est ad portum, urbemque vestram, revellistis, neque in profundum abjecistis, locumque illum omnem expiastis, quàm Romam, atque in horum conventum adiretis? In Mamertinorum solo fœderato atque pacato, monumentum istius crudelitatis constitutum est: vestrane urbs electa est, ad quam quum adirent ex Italia, crucem civis Romani priùs, quàm quemquam amicum populi Romani viderent? quam vos Rheginis, quorum civitati invidetis, item incolis vestris, civibus Romanis, ostendere soletis: quò minùs sibi arrogent, minùsque vos despiciant, quum videant jus civitatis illo supplicio esse mactatum.

XII. Verùm hæc emissee te dicis. Quid?  
illa

*ACTIONIS II. L. IV. 169*

illa Attalica , totâ Siciliâ nominata , ab eodem Hejo peripetasmata emere oblitus es ? licuit eodem modo , ut signa. Quid enim actum est ? an litteris pepercisti ? Verum hominem amentem hoc fugit : minus clarum putavit fore , quod de armario , quàm quod de sacrario esset ablatum. At quomodo abstulit ? non possum dicere planius , quàm ipse apud vos dixit Hejus : quum quæsissem , num quid aliud de bonis ejus pervenisset ad Verrem : respondit istum ad se misisse , ut sibi mitteret Agrigentum peripetasmata. Quæsivi an misisset : respondit id , quod necesse erat , scilicet dicto audientem fuisse prætori : misisse. Rogavi , pervenissentne Agrigentum : dixit pervenisse. Quæsivi , quemadmodum revertissent : negavit adhuc revertisse. Ritus populi , atque admurmuratio omnium facta est.

28. Hic tibi in mentem non venit jubere , ut hæc quoque referret , H-S vi millibus 10 se tibi vendidisse ? metuisti , ne æs alienum tibi cresceret , si H-S vi millibus 10 tibi constarent ea , quæ tu facile posses vendere H-S cc millibus ? fuit tanti , mihi crede : haberes quod defenderes : nemo quæreret , quanti illa res esset : si modò te posses docere emisse ; facile cui velles , tuam causam & factum probares : nunc de peripetasmatis

quemadmodum te expedias , non habes.

29. Quid ? a Philarcho Centuripino , homine locuplete , ac nobili , phaleras pulcherrimè factas , quæ regis Hieronis fuisse dicuntur , utrùm tandem abstulisti , an emisisti ? In Sicilia quidem quum essem , sic a Centuripinis , sic a ceteris audiebam : non enim parum res erat clara : tam te has phaleras a Philarcho Centuripino abstulisse dicebant , quàm alias item nobiles ab Aristo Panormitano ; quàm tertias a Cratippo Tyndaritano. Etenim si Philarchus vendidisset , non ei , posteaquam reus factus es , redditurum te promisisses : quod quia vidisti plures scire , cogitasti , si ei reddidisses , te minùs habiturum , rem nihilo minus testatam futuram : non reddidisti : dixit Philarchus pro testimonio , se , quòd nosset tuum istum morbum , ut amici tui appellant , studium , cupisse te celare de phaleris : quum abs te appellatus esset , negasse habere sese : apud alium quoque eas habuisse depositas , ne quà invenirentur : tuam tantam fuisse sagacitatem , ut eas per illum ipsum inspiceres , ubi erant depositæ : tum se deprehensum negare non potuisse : ita ab se invito ablatas phaleras gratis.

XIII. Jam ut hæc omnia reperire , ac perscrutari solitus sit , Judices , est operæ pretium cognoscere. Cybiratæ sunt fratres quidam , Tleptolemus , & Hiero : quorum



alterum fingere opinor e cera solitum esse, alterum esse pictorem : hosce opinor Cybiræ, quum in suspicionem venissent suis civibus, fanum expilasse Apollinis, veritos pœnam iudicii, ac legis, domo profugisse : quodd Verrem artificii sui cupidum cognoverant tum, quum iste, id quod ex testibus didicistis, Cybiram cum inanibus syngraphis venerat, domo profugientes ad eum se exsules, quum iste esset in Asia, contulerunt : habuit secum eos ab illo tempore ; & in legationis prædis atque furtis, multum illorum operâ, consilioque usus est.

31. Hi sunt illi, quibus, in tabulis retulit sese Q. Tadius dedisse jussu istius, Græcis pictoribus. Eos jam bene cognitos, & re probatos secum in Siciliam duxit. Quò posteaquam venerunt, mirandum in modum ( canes venaticos diceret ) ita odorabantur omnia, & pervestigabant, ut ubi quidque esset, aliquâ ratione invenirent : aliud minitendo, aliud pollicendo, aliud per servos, aliud per liberos, per amicum aliud, aliud per inimicum inveniebant : quidquid illis placuerat, perdendum erat : nihil aliud optabant, quorum poscebatur argentum, nisi ut Hieroni, & Tlepolemo displiceret.

XIV. Verè mèhercules hoc, Judices, dicam : memini Pamphilum Lilybætanum,

H ij

hospitem meum, & amicum, nobilem hominem, mihi narrare: quum iste ab sese hydriam Boëthi manu factam, præclaro opere, & grandi pondere, per potestatem abstulisset, se sanè tristem, & conturbatum domum revertisse, quòd vas ejusmodi, quod sibi a patre, & a majoribus esset relictum, quo solitus esset uti ad festos dies, ad hospitem adventum, a se esset ablatum. Quum federem, inquit, domi tristis, accurrit Venerius: jubet me scyphos sigillatos ad prætorem statim afferre: permotus sum, inquit: binos habebam: jubeo promi utrosque, ne quid plus mali nasceretur, & mecum ad prætoris domum ferri: eò quum venio, prætor quiescebat: fratres illi Cybiratæ inambulabant: qui me ubi viderunt, ubi sunt, Pamphile, inquirunt, scyphi? ostendo tristis: laudant: incipio queri, me nihil habiturum, quod alicujus esset pretii, si etiam scyphi essent ablati: tum illi, ubi me conturbatum vident: *Quid vis nobis dare, ut isti abs te ne auferantur?* ne multa, fester-tios CC me, inquit, poposcerunt: dixi me daturum C. Vocat interea prætor: scyphos poscit. Tum illos cœpisse prætori dicere, putasse se, id quod audissent, alicujus pretii scyphos esse Pamphili: luteum negotium esse, non dignum, quod in suo argento Verres haberet. Ait ille, idem

sibi videri : ita Pamphilus scyphos optimos aufert. Et mehercules ego antea , tametsi hoc nescio quid nugatorium sciebam esse , ista intelligere ; tamen mirari solebam , istum in his ipsis rebus aliquem sensum habere , quem scirem nulla in re quidquam simile hominis habere.

XV. Tum primum intellexi , ad eam rem istos fratres Cybiratas fuisse , ut iste in furando manibus suis , oculis illorum uteretur. At ita studiosus est hujus præclaræ existimationis , ut putetur in hisce rebus intelligens esse , ut nuper ( videte hominis amentiam ) posteaquam est comperendinatus , quum jam pro damnato , mortuoque esset , ludis Circensibus manè apud L. Sisennam , virum primarium , quum essent triclinia strata , argentumque expositum in ædibus ; quum pro dignitate L. Sisennæ domus esset plena hominum honestissimorum , accesserit ad argentum ; contemplari unumquodque otiosè , & considerare cœperit : mirari stultitiam alii , quòd in ipso judicio , ejus ipsius cupiditatis , cujus insimularetur , suspensionem augetet : alii amentiam , cui comperendinato , quum tam multi testes dixissent , quidquam illorum veniret in mentem : pueri autem Sisennæ , credo , qui audivissent , quæ in istum testimonia essent dicta , oculos de isto nusquam delicere ,

neque ab argento digitum discedere.

34. Est boni judicis , parvis ex rebus conjecturam facere uniuscujusque , & cupiditatis , & incontinentiæ ; qui reus lege , & reus comperendinatus , re , & opinione hominum pene damnatus , temperare non potuerit maximo conventu , quin L. Sisennæ argentum tractaret , & consideraret ; hunc in provincia prætorem quisquam putabit a Siculorum argento cupiditatem , aut manus abstinere potuisse ?

XVI. Verum uti Lilybæum , unde digressa est , oratio revertatur ; Diocles est , Pamphili gener , illius , a quo hydria ablata est , Popilius cognomine : ab hoc abaci vasa omnia , ut exposita fuerant , abstulit. Dicat se emisse : etenim hic propter magnitudinem furti , sunt , ut opinor , litteræ factæ : jussit Timarchidem æstimare argentum. Quo modo ? quo qui umquam tenuissimè in donatione histrionum æstimavit. Tametsi jamdudum erro , qui tam multa de tuis emptionibus verba faciam , & quæram , utrum emeris , necne , & quomodo , & quanti emeris ; quod verbo transigere possum. Ede mihi scriptum , quid argenti in provincia Sicilia pararis , unde quidque , aut quanti emeris.

36. Quid fit ? quamquam non debebam ego abs te has litteras poscere : me enim tabulas tuas habere , & proferre oportet.

ACTIONIS II. L. IV. 175

bat : verum negas te horum annorum aliquot confecisse : compone hoc , quod postulo , de argento : de reliquo videro. *Nec scriptum habeo , nec possum edere.* Quid futurum igitur est ? Quid existimas hosce iudices facere posse ? domus plena signorum pulcherrimorum , jam etiam ante praetoram : multa ad villas tuas posita , apud amicos multa deposita , multa aliis data , atque donata : tabulae nullum indicant emptum : omne argentum ablatum ex Sicilia est : nihil cuiquam , quod suum dici vellet , relictum : fingitur improba defensio , praetorem omne id argentum coemisse : tamen idipsum tabulis demonstrari non potest : si quas tabulas profers , in his , quid habeas , quomodo habeas , scriptum non est : horum autem temporum , quum te plurimas res emisse dicas , tabulas omnino nullas proferas ; nonne te & prolatis , & non prolatis tabulis , condemnari necesse est ?

XVII. Tu a M. Coelio , equite Romano , lectissimo adolescente , quae voluisti , vasa argentea Lilybaei abstulisti : tu C. Cacurii , promptissimi hominis , & experientis , & in primis gratiosi , supellectilem omnem auferre non dubitasti : tu maximam , & pulcherrimam mensam citream a Q. Lutatio Diodoro , qui Q. Catuli beneficio , a L. Sulla civis Romanus

factus est, omnibus scientibus Lilybæi abstulisti. Non tibi objicio, quod hominem dignissimum tuis moribus, Apollonium, Niconis filium, Drepanitanum, qui nunc A. Clodius vocatur, omni argento optimè facto spoliasti, ac depeculatus es: taceo: non enim putat ille sibi injuriam factam; propterea quod homini jam perditio, & collum in laqueum inferenti, subvenisti, quum pupillis Drepanitanis bona patria erepta cum illo partitus es: gaudeo etiam, si quid ab illo abstulisti; & abs te nihil rectius factum esse dico. A Lyfone verò Lilybætano, primo homine, apud quem deversatus es, Apollinis signum ablatum certè esse non oportuit. At dices te emis-  
se: scio: H-S CIO. Ita opinor: scio, inquam. Proferam litteras: & tamen id factum non oportuit. A pupillo Hejo, cui Marcellus tutor est, a quo pecuniam grandem eripueras, scaphia cum emblematis Lilybæi utrùm emptā esse dicis, an confiteris erepta?

38. Sed quid ego istius in ejusmodi rebus mediocres injurias colligo; quæ tantummodo in furtis istius, & damnis eorum, a quibus auferebat, versatæ esse videantur? accipite, si vultis, Judices, rem ejusmodi, ut amentiam singularem, ut furorem jam, non cupiditatem ejus perspicere possitis.

XVIII. Melitensis Diodorus est, qui apud vos antea testimonium dixit : is Lilybæi multos jam annos habitat, homo & domi nobilis, & apud eos, quò se contulit, propter virtutem splendidus, & gratiofus : de hoc Verri dicitur, habere eum perbona toreumata ; in his pocula duo quædam, quæ Thericlea nominantur, Mentoris manu, summo artificio, facta. Quod iste ubi audivit, sic cupiditate inflammatus est non solum inspiciendi, verum etiam auferendi, ut Diodorum ad se vocaret, ac posceret. Ille, qui illa non invitus haberet, respondet se Lilybæi non habere : Melitæ apud quemdam propinquum suum reliquisse.

39. Tum iste continuò mittit homines certos Melitam : scribit ad quosdam Melitenses, ut ea vasa perquirant : rogat Diodorum, ut ad illum suum propinquum det litteras : nihil ei longius videbatur, quàm dum illud videret argentum. Diodorus, homo frugi, ac diligens, qui sua servare vellet, propinquo suo scribit, ut iis, qui a Verre venissent, responderet, illud argentum se paucis illis diebus misisse Lilybæum. Ipse interea recedit : abesse ab domo paulisper maluit, quàm præsens illud optimè factum argentum amittere. Quod ubi audivit iste, usque eò est commotus, ut sine ulla dubitatione insanire omnibus,

ac furere videretur : quia non potuerat argentum eripere , ipse a Diodoro erepta sibi vasa optimè facta dicebat : minitari absenti Diodoro : vociferari palam : lacrymas interdum vix tenere. Eriphylam accepimus in fabulis eâ cupiditate , ut , quum vidisset monile , ut opinor , ex auro , & gemmis , pulchritudine ejus incensa , salutem viri proderet. Similis istius cupiditas ; hòc etiam acrior , atque infanior , quòd illa cupiebat id , quod viderat : hujus libidines non solùm oculis , sed etiam auribus excitabantur.

XIX. Conquiri Diòdorum totâ provinciâ jubet : ille ex Sicilia jam castra moverat , & vasa collegerat. Homo , ut aliquo modo illum in provinciam revocaret , hanc excogitavit rationem ; si hæc ratio potius , quàm amentia nominanda est : apponit de suis canibus quemdam , qui dicat , se Diòdorum Melitensem rei capitalis reum velle facere. Primò mirum omnibus videri , Diòdorum reum , hominem quietissimum , ab omni non modò facinoris , verùm etiam minimi errati suspicione remotissimum : deinde esse perspicuum , fieri omnia illa propter argentum. Ille non dubitat jubere nomen deferri : & tum primùm opinor istum absentis nomen recepisse.

41. Res clara Siciliâ totâ , propter cælati argenti cupiditatem reos fieri rerum



capitalium : neque solum præsentēs reos fieri , sed etiam absentes. Diodorus Romæ sordidatus circum patronos , atque hospites cursare : rem omnibus narrare. Litteræ mittuntur isti a patre vehementes ; ab amicis item ; videret , quid ageret , de Diodoro quò progredētur : rem claram esse , & invidiosam : insanire hominem : periturum hoc uno crimine , nisi cavisset. Iste etiam tum patrem , si non in parentis , at in hominum numero putabat : ad iudiciū nondum se satis instruxerat : primus annus erat provinciæ ; non , ut in Sthenio , iam refertus pecuniâ : itaque furor ejus , paululum non pudore , sed metu ac timore repressus est : condemnare Diodorum non audet : absentem de reis eximit. Diodorus interea , prætorē isto , propè triennium provinciâ , domoque caruit. Ceteri non solum Siculi , sed etiam cives Romani hoc statuerant , quoniam iste tantum cupiditate progredētur , nihil esse , quòd quisquam putaret , se , quod isti paulò magis placeret , conservare , aut domi retinere posse.

XX. Postea verò quàm intellexerunt , isti virum fortem , quem summè provincia expectabat , Q. Arrium , non succedere : statuerunt se nihil tam clausum , neque tam reconditum posse habere , quod non istius cupiditatì apertissimum , promptissimum-

que esset. Tum iste ab equite Romano splendido, & gratioso, Cn. Calidio, cujus filium sciebat senatorem populi Romani, & judicem esse, equuleos argenteos nobiles, quique maximi fuerant, aufert.

43. Imprudens huc incidi, Judices; emit enim, non abstulit: nollem dixisse: jactabit se, & in his equitabit equuleis. Emi; pecuniam solvi. Credo, etiam tabulæ proferentur: est tanti: cedo tabulas: dilue sanè crimen hoc Calidianum, dum ego tabulas adspicere possim. Verumtamen quid erat, quodd Calidius Romæ quereretur, se, quum tot annos in Sicilia negotiaretur, abs te solo ita esse contemptum, ita despectum, ut etiam unà cum ceteris Siculis despoliaretur, si emeris? quid erat, quodd confirmabat, se abs te argentum esse repetiturum, si tibi suâ voluntate vendiderat? tu porro posses facere, ut Cn. Calidio non redderes? præsertim quum is L. Sisennâ, defensore tuo, tam familiariter uteretur; & quum ceteris familiaribus Sisennæ reddidisses?

44. Deinde non opinor negaturum esse te, homini honesto, sed non gratiosiori, quàm Cn. Calidius est, L. Cordio argentum per Potamonem, amicum tuum, reddidisse: qui quidem ceterorum causam apud te difficiliorem fecit. Nam quum te compluribus confirmasses redditurum,

posteaquam Cordius pro testimonio dixit, te sibi reddidisse, finem reddendi fecisti; quod intellexisti, te, prædâ de manibus amissâ, testimonium tamen effugere non posse. Cn. Calidio, equiti Romano, per omnes prætores licuit argentum habere bene factum: licuit posse domesticis copiis, quum magistratum, aut aliquem superiorem invitasset, ornare, & apparare convivium: multi domi Cn. Calidii, cum imperio ac potestate fuerunt: nemo inventus est tam amens, qui illud argentum tam præclarum, ac tam nobile eriperet: nemo tam audax, qui posceret: nemo tam impudens, qui postularet, ut venderet.

45. Superbum est enim, Judices, & non ferendum, dicere prætorem in provincia homini honesto, locupleti, splendido, *Vende mihi vasa calata*: hoc est enim dicere; Non es dignus tu, qui habeas, quæ tam bene facta sint: meæ dignitatis ista sunt. Tu dignior, Verres, quam Calidius? qui (ut non conferam vitam, atque existimationem tuam cum illius; neque enim est conferenda; hoc ipsum conferam, quo tu te superiorem fingis) quod H-S LXXX millia divisoribus, ut prætor renuntiarere, dedisti; trecenta accusatori, ne tibi odiosus esset; eâ re contemnis equestrem ordinem, ac despicias? eâ re indignum tibi visum est,

quidquam, quod tibi placeret, Calidium potius habere, quàm te?

XXI. Jactat se jamdudum de Calidio: narrat omnibus, se emisse. Num etiam de L. Papirio, viro primario, locuplete, honestoque equite Romano, thuribulum emisti? qui pro testimonio dixit, te, quum inspiciendum poposcisses, avulso emblemate remisisse: ut intelligatis, in homine intelligentiam esse, non avaritiam: artificii cupidum, non argenti fuisse. Nec solum in Papirio fuit hac abstinentiâ: tenuit hoc institutum in thuribulis omnibus, quæcumque in Sicilia fuerunt: incredibile est autem quàm multa, & quàm præclara fuerint. Credo tum, quum Sicilia florebat opibus & copiis, magna artificia fuisse in ea insula: nam domus erat ante istum prætorem nulla paulò locupletior, qua in domo hæc non essent, etiamsi præterea nihil esset argenti; patella grandis cum sigillis, ac simulacris deorum; patera, quâ mulieres ad res divinas uterentur; thuribulum: hæc autem omnia antiquo opère, & summo artificio facta: ut hoc liceret suspicari, fuisse aliquando apud Siculos peræquâ proportionem cetera: sed quibus multa fortuna ademisset, tamen apud eos remansisse ea, quæ religio retinisset.

47. Dixi, Judices, multa fuisse ferè apud Siculos omnes: ego idem confirmo,

*ACTIONIS II. L. IV. 183*

nunc ne unum quidem esse. Quid hoc est ? quod monstrum, quod prodigium in provinciam misimus ? nonne vobis id egisse videtur, ut non unius libidinem, non suos oculos, sed omnium cupidissimorum infanias, quum Romam revertisset, expleret ? qui simul atque in oppidum quopiam venerat, immittebantur illi continuò Cybirci canes, qui investigabant, & perscrutabantur omnia. Si quod erat grande vas, & majus opus inventum, læti auferebant : si minùs ejusmodi quippiam venari potuerant ; illa quidem certè pro lepisculis capiebantur, patellæ, pateræ, thuribula. Hic quos putatis fletus mulierum ? quas lamentationes fieri solitas esse in hisce rebus ? quæ forsitan vobis parvæ esse videantur : sed magnum, & acerbum dolorem commovent, mulierculis præsertim, quum eripiuntur e manibus ea, quibus ad res divinas urî consueverunt, quæ a suis acceperunt, quæ in familia semper fuerunt.

XXII. Hic nolite expectare, dum ego hoc crimen agam ostiatim ; ab Æschylo Tyndaritano istum pateram abstulisse ; a Thrasone item Tyndaritano patellam ; a Nymphodoro Agrigentino thuribulum : quum testes ex Sicilia dabo, quem volet, ille eligat, quem ego interrogem de patellis, pateris, thuribulis : non modò op-

pidum nullum, sed ne domus quidem paulò locupletior expers hujus injuriæ reperietur: qui quum in convivium venisset, si quidquam cælati adspexerat, manum abstinere, Judices, non poterat. Cn. Pompeius est Philo, qui fuit Tyndaritanus: is cœnam isti dabat apud villam in Tyndaritano: fecit, quod Siculi non audebant: ille, civis Romanus quòd erat, impuniùs id se facturum putavit: apposuit patellam, in qua sigilla erant egregia. Iste continuo ut vidit, non dubitavit illud insigne penatium, hospitaliumque deorum, ex hospitali mensa tollere: sed tamen, quod antea de istius abstinentia dixeram, sigillis avulsis reliquum argentum sine ulla avaritia reddidit.

49. Quid? Eupolemo Calactino, homini nobili, Lucullorum hospiti, ac perfamiliari, qui nunc apud exercitum cum L. Lucullo est, non idem fecit? cœnabat apud eum: argentum ille ceterum purum apposuerat, ne purus ipse relinqueretur; duo pocula non magna, verumtamen cum emblematis. Hic, quasi festivumacroama, ne sine corollario de convivio discederet, ibidem convivis inspectantibus, emblemata avellenda curavit. Neque ego nunc istius facta omnia enumerare conor: neque opus est, nec fieri ullo modo potest. Tantummodo uniuscujusque de

*ACTIONIS II. L. IV. 185*

varia improbitate generis indicia apud vos ,  
& exempla profero : neque enim ita se  
gessit in his rebus , tamquam rationem  
aliquando esset redditurus : sed prorsus  
ita , quasi aut reus numquam esset futu-  
rus , aut , quò plura abstulisset , eò mi-  
nore periculo in iudicium esset venturus :  
qui hæc , quæ dico , jam non occultè ,  
non per amicos , atque interpretes , sed  
palam , de loco superiore , ageret pro im-  
perio & potestate.

XXIII. Catinam quum venisset , op-  
pidum locuples , honestum , copiosum ,  
Dionysiarum ad se proagorum , hoc est ,  
summum magistratum , vocari jubet : ei  
palam imperat ; ut omne argentum , quod  
apud quemque esset Catinæ , conquiren-  
dum curaret , & ad se transferendum.  
Philarchum Centuripinum , primum ho-  
minem genere , virtute , pecuniâ , non hoc  
idem juratum dicere audistis , sibi istum  
negotium dedisse , atque imperavisse , ut  
Centuripinis , in civitate totius Siciliæ mul-  
tò maxima , & locupletissima , omne ar-  
gentum conquireret , & ad se comportari  
juberet ? Agyrio similiter istius imperio  
vasa Corinthia per Apollodorum , quem  
testem audistis , Syracusas deportata sunt.

§ 1. Illa verò optima , quòd , quum ad  
Haluntium venisset prætor laboriosus &  
diligens , ipse in oppidum accedere noluit ,

quòd erat difficili adscensu , atque arduo ; Archagathum Haluntinum , hominem non solum domi suæ , sed totâ Siciliâ in primis nobilem , vocari jussit : ei negotium dedit , ut quidquid Haluntii esset argenti cælati , aut , si quid etiam Corinthiorum , id omne statim ad mare ex oppido deportaretur. Adscendit in oppidum Archagathus , homo nobilis , qui a suis & amari , & diligi vellet : ferebat graviter , illam sibi ab isto provinciam datam ; nec , quid faceret , habebat : pronuntiat , quid sibi imperatum esset : jubet omnes proferre , quæ haberent : metus erat summus : ipse enim tyrannus non discedebat longius : Archagathum , & argentum , in lectica cubans ad mare infra oppidum , expectabat.

52. Quem concursum in oppido factum putatis ? quem clamorem ? quem porro fletum mulierum ? qui viderent equum Trojanum introductum , urbem captam esse dicerent : efferri sine thecis vasa , extorqueri alia de manibus mulierum , effringi multorum fores , revelli claustra. Quid enim putatis ? scuta si quando conquiruntur a privatis in bello , ac tumultu ; tamen homines inviti dant , etsi ad salutem communem dari sentiunt : ne quem putetis sine maximo dolore argentum cælatum domo , quod alter eriperet , protulisse :



omnia deferuntur : Cybiratæ fratres vocantur : pauca improbant : quæ probarant , iis crustæ , aut emblemata detrahuntur. Sic Haluntini , excussis deliciis , cum argento puro domum reverterunt.

XXIV. Quod umquam , Judices , hujusmodi everriculum in illa provincia fuit ? avertere aliquid de publico quàm obscurissimè per magistratum solebant , etiam aliquid de privato nonnumquam occultè auferabant ; & illi tamen condemnabantur : & , si quæritis , ut ipse de me detraham ; illos ego accusatores puto fuisse , qui hujusmodi hominum furta odore , aut aliquo leviter presso vestigio persequerentur. Nam nos quidem quid facimus in Verre , quem in luto volutatum totius corporis vestigiis invenimus ? permagnum est in eum dicere aliquid , qui præteriens , lecticâ paulisper depositâ , non per præstigias , sed palam per potestatem , uno imperio ostiatim totum oppidum compilavit ? At tamen , ut possit se dicere emisisse , Archagatho imperat , ut aliquid illis , quorum argentum fuerat , nummularum , dicis causâ , daret : invenit Archagathus paucos , qui vellent accipere : his dedit : eos nummos tamen iste Archagathus non reddidit : voluit Romæ petere Archagathus : Cn. Lentulus Marcellinus dissuasit , sicut ipsum dicere audistis. *Recita*

## ARCHAGATHI ET LENTULI TESTIMONIUM.

54. Et, ne fortè hominem existimetis hanc tantam vim emblematum sine causa coacervare voluisse, videte, quanti vos, quanti existimationem populi Romani, quanti leges & judicia, quanti testes Siculos, negotiatoresque fecerit: posteaquam tantam multitudinem collegerat emblematum, ut ne unum quidem cuiquam reliquisset, instituit officinam Syracusis in regia maximam, palam; artifices omnes, cælatores, ac vasculares convocari jubet; & ipse suos complures habebat: eò conducit magnam hominum multitudinem: menses octo continuos opus his non defuit, quum vas nullum fieret, nisi aureum. Tum illa, ex patellis & thuribulis quæ vellerat, ita scitè in aureis poculis illigabat, ita aptè in scyphis aureis includebat, ut ea ad illam rem nata esse diceret: ipse tamen prætor, qui suâ vigilantia pacem in Sicilia dicit fuisse, in hac officina majorem partem diei cum tunica pulla sedere solebat, & pallio.

XXV. Hæc ego, Judices, non aude-rem proferre, ni vereretur, ne fortè plura de isto ab aliis in sermone, quàm a me in judicio audisse vos diceretis. Quis enim est, qui de hac officina, qui de vasis aureis, qui de istius pallio, tunicâ pullâ non

*ACTIONIS II. L. IV. 189*

audierit? quem voles de conventu Syracusanorum virum bonum nominato: producam: nemo erit, quin hoc se aut vidisse, aut audisse dicat.

56. O tempora, ô mores! nihil nimiùm vetus proferam. Sunt vestrùm, Judices, quàm multi, qui L. Pisonem cognoverunt, hujus L. Pisonis, qui prætor fuit, patrem: is quum esset in Hispania prætor, qua in provincia occisus est, nescio quo pacto, dum armis exercetur, annulus aureus, quem habebat, fractus est, & comminutus: quum vellet sibi annulum facere, aurificem jussit vocari in forum, ad sellam, Cordubæ, & ei palam appendit aurum: hominem in foro sellam jubet ponere, & facere annulum, omnibus præsentibus. Nimiùm fortasse dicet aliquis hunc diligentem: hætenus reprehendat, si quis volet: nihil amplius: verùm fuit ei concedendum: filius enim L. Pisonis erat, ejus, qui primus de pecuniis repetundis legem tulit.

57. Ridiculum est nunc de Verre me dicere, quum de Pisone Frugi dixerim. Verumtamen, quantum intersit, videte: iste quum aliquot abacorum faceret vasa aurea, non laboravit, quid non modò in Sicilia, verùm etiam Romæ in judicio audiret: ille in auri semuncia totam Hispaniam scire voluit, unde prætori annulus fieret:

nimirum, ut hic nomen suum comprobavit, sic ille cognomen.

XXVI. Nullo modo possum omnia istius facta aut memoriâ consequi, aut oratione complecti : genera ipsa cupio breviter attingere ; ut hic modò me commovuit Pisonis annulus, quod totum effluxe-  
rat. Quàm multis istum putatis hominibus honestis de digitis annulos aureos abstulisse? numquam dubitavit, quotiescumque alicujus aut gemmâ, aut annulo delectatus est. Incredibilem rem dicam, sed tam claram, ut ipsum negaturum non arbitrer.

58. Quum Valentio ejus interpreti epistola Agrigento allata esset, casu signum iste animadvertit in cretula : placuit ei : exquisivit, unde esset epistola : respondit, Agrigento : iste litteras, ad quos solebat, misit, ut is annulus ad se primo quoque tempore afferretur : ita litteris istius, patrifamiliâs L. Titio cuidam civi Romano annulus de digito detractus est. Illa verò ejus cupiditas incredibilis est : nam ut in singula conclavia, quæ iste non modò Romæ, sed in omnibus villis habet, tricenos lectos optimè stratos cum ceteris ornamentis convivii quæreret, nimium multa comparare videretur : nulla domus in Sicilia locuples fuit, ubi iste non tex-  
trinum instituerit.

59. Mulier est Segestana, perdives &

nobilis, Lamia nomine : per triennium isti, plenâ domo telarum, stragulam vestem confecit : nihil nisi conchylio tinctum. Attalus, homo pecuniosus, Neti ; Lyso, Lilybæi ; Critolaus, Ennæ ; Syracusis Æschrio, Cleomenes, Theomnastus ; Elori Archonides, Megistus ; vox me citius defecerit, quàm nomina. Ipse dabat purpuram tantum, amici operas, credo : jam enim non libet omnia criminari ; quasi hoc mihi non satis sit ad crimen, habuisse tam multum, quod daret : voluisse deportare tam multa : hoc denique, quod concedit, amicorum operis esse in hujuscemodi rebus usum. Jam verò lectos æratos, & candelabra ænea num cui, præter istum, Syracusis per triennium facta esse existimatis ? Emebat. Credo. Sed tantum vos certiores, Judices, facio, quid iste in provincia prætor egerit, ne cui fortè nimium negligens fuisse videatur, neque se satis, quum potestatem habuerit, instruxisse & ornasse.

XXVII. Venio nunc non jam ad furtum, non ad avaritiam, non ad cupiditatem, sed ad ejusmodi facinus, in quo omnia nefaria contineri mihi atque inesse videantur : in quo dii immortales violati, existimatio atque auctoritas nominis populi Romani imminuta, hospitium spoliatum ac proditum, abalienati scelere istius a nobis omnes reges amicissimi, nationesque,

quæ in eorum regno ac ditioe sunt.

61. Nam reges Syriæ, regis Antiochi filios pueros, icitis Romæ nuper fuisse : qui venerant non propter Syriæ regnum ; nam id sine controversia obtinebant, ut a patre, & a majoribus acceperant : sed regnum Ægypti ad se, & ad Selenen, matrem suam, pertinere arbitrabantur. Hi ipsi posteaquam temporibus reipublicæ exclusi, per senatum agere quæ voluerant, non potuerunt, in Syriam in regnum patrium profecti sunt : eorum alter, qui Antiochus vocatur, iter per Siciliam facere voluit : itaque, isto prætore, venit Syracusas.

62. Hic Verres hereditatem sibi venisse arbitratus est, quod in ejus regnum ac manus venerat is, quem iste & audierat multa secum præclara habere, & suspicabatur : mittit homini munera satis largè ; hæc ad usum domesticum : vini, olei quod visum erat : etiam tritici, quod satis esset, de suis decumis : deinde ipsum regem ad cœnam vocavit : exornat amplè, magnificèque triclinium : exponit ea, quibus abundabat, plurima ac pulcherrima vasa argentea : namque hæc aurea nondum fecerat : omnibus curat rebus instructum, & paratum ut sit convivium. Quid multa ? Rex ita discessit, ut & istum copiosè ornatum, & se honorificè acceptum arbitraretur :  
vocat

## *ACTIONIS II. L. IV. 193*

vocat ad cœnam deinde ipse prætorem :  
exponit suas copias omnes , multum ar-  
gentum , non pauca etiam pocula ex auro ,  
quæ , ut mos est regius , & maximè in  
Syria , gemmis erant distincta clarissimis.  
Erat etiam vas vinarium ex una gemma  
pergrandi , trulla excavata , manubrio au-  
reo : de qua , credo , satis idoneum , sa-  
tis gravem testem , Q. Minucium dicere  
audistis.

63. Iste unum quodque vas in manus  
sumere , laudare , mirari. Rex gaudere ,  
prætori populi Romani satis jucundum ,  
& gratum illud esse convivium. Postea-  
quam inde discessum est , cogitare iste ni-  
hil aliud , quod ipsa res declaravit , nisi ,  
quemadmodum regem ex provincia spo-  
liatum , expilatumque dimitteret : mittit  
rogatum vasa ea , quæ pulcherrima apud  
illum viderat : ait se suis cælatoribus velle  
ostendere. Rex , qui istum non nosset ,  
sine ulla suspicione libentissimè dedit.  
Mittit etiam trullam gemmeam rogatum :  
velle se eam diligentius considerare : ea  
quoque ei mittitur.

XXVIII. Nunc reliquum , Iudices ,  
attendite , de quo & vos audistis , & po-  
pulus Romanus non nunc primùm audiet ;  
& in exteris nationibus usque ad ultimas  
terras pervagatum est. Candelabrum e  
gemmis clarissimis , opere mirabili per-

fectum, reges hi, quos dico, Romam quum attulissent, ut in Capitolio ponerent; quòd nondum etiam perfectum templum offenderant, neque ponere potuerunt, neque vulgò ostendere, ac proferre voluerunt; ut & magnificentius videretur, quum suo tempore in cella Jovis Optimi Maximi poneretur, & clarius, quum pulchritudo ejus recens ad oculos hominum, atque integra perveniret: statuerunt id secum in Syriam reportare; ut, quum audissent simulacrum Jovis Optimi Maximi dedicatum, legatos mitterent, qui cum ceteris rebus illud quoque eximium, atque pulcherrimum donum in Capitolium afferrent. Pervenit res ad istius aures, nescio quomodo: nam rex id celatum voluerat: non quòd quidquam metueret, aut suspicaretur, sed ut ne multi illud antè præciperent oculis, quàm populus Romanus. Iste petit a rege, & eum pluribus verbis rogat, ut id ad se mittat: cupere se dicit inspicere, neque se aliis videnti potestatem esse facturum.

65. Antiochus, qui animo & puerili esset, & regio, nihil de istius improbitate suspicatus est: imperat suis, ut id in prætorium involutum quàm occultissimè deferrent: quòd posteaquam attulerunt, involutisque rejectis constituerunt; iste clamore coepit, dignam rem esse regno Sy-



riæ, dignam regio munere, dignam Capitolio. Etenim erat eo splendore, qui ex clarissimis & plurimis gemmis esse debebat: eâ varietate operum, ut ars certare videretur cum copia: eâ magnitudine, ut intelligi posset, non ad hominum apparatus, sed ad amplissimi templi ornamentum esse factum: quod quum satis jam perspexisse videretur, tollere incipiunt, ut referrent. Iste ait, se velle illud etiam atque etiam considerare: nequaquam se esse satiatum: jubet illos discedere, & candelabrum relinquere. Sic illi tum inanes ad Antiochum revertuntur.

XXIX. Rex primò nihil metuere, nihil suspicari: dies unus, alter, plures: non referri. Tum mittit rex ad istum, si sibi videatur, ut reddat. Jubet iste posterius ad se reverti: mirum illi videri: mittit iterum: non redditur. Ipse hominem appellat: rogat, ut reddat. Os hominis, insignemque impudentiam cognoscite. Quod sciret, quodque ex ipso rege audisset in Capitolio esse ponendum: quod Jovi Optimo Maximo, quod populo Romano servari videret, id sibi ut donaret, rogare, & vehementer petere cœpit. Quum ille se, & religione Jovis Capitolini, & hominum existimatione impediri diceret, quòd multæ nationes testes essent illius operis, ac muneris: iste homini mi-

nari acerrimè cœpit. Ubi videt eum nihilò magis minis , quàm precibus permoveri ; repentè hominem de provincia jubet ante noctem decedere : ait se comperisse , ex ejus regno piratas in Siciliam esse venturos.

67. Rex maximo conventu , Syracusis , in foro , ne quis fortè me\* in crimine obscuro versari , atque affingere aliquid suspicione hominum arbitretur , in foro , inquam , Syracusis flens , ac deos hominesque contestans , clamare cœpit , candelabrum factum e gemmis , quod in Capitolium missurus esset , quod in templo clarissimo , populo Romano monumentum suæ societatis , amicitiaque esse voluisset , id sibi C. Verrem abstulisse : de ceteris operibus ex auro , & gemmis , quæ sua penes illum essent , se non laborare : hoc sibi eripi , miserum esse , & indignum : id etsi antea jam mente , & cogitatione suâ , fratrisque sui , consecratum esset ; tamen tum se in illo conventu civium Romanorum dare , donare , dicare , consecrare Jovi Optimo Maximo , testemque ipsum Jovem suæ voluntatis , ac religionis adhibere.

XXX. Quæ vox ? quæ latera ? quæ vires hujus unius criminis querimoniam possint sustinere ? Rex Antiochus , qui Romæ ante oculos omnium nostrum bien-

nium ferè comitatu regio, atque ornatu fuisset; is quum amicus, & socius populi Romani esset, amicissimo patre, avo, majoribus, antiquissimis, & clarissimis regibus, opulentissimo, & maximo regno, præceps e provincia populi Romani exturbatus est.

68. Quemadmodum hoc accepturas nationes externas: quemadmodum hujus tui facti famam in regna aliorum, atque in ultimas terras perventuram putasti, quum audierint a prætore populi Romani in provincia violatum regem, spoliatum hospitem, ejectum socium populi Romani, atque amicum? Nomen vestrum populique Romani, odio, atque acerbitati scitote nationibus exteris, Judices, futurum, si istius hæc tanta injuria impunita discesserit: sic omnes arbitrabuntur, præsertim quum hæc omnino fama de nostrorum hominum avaritia, & cupiditate percrebuerit, non istius solius hoc esse facinus, sed eorum etiam, qui approbarint. Multi reges, multæ liberæ civitates, multi privati opulenti ac potentes, habent profectò in animo Capitolium sic ornare, ut templi dignitas, imperiique nostri nomen desiderat: qui si intellexerint, interverso regali hoc dono, graviter vos tulisse; grata fore vobis, populoque Romano sua studia, ac dona arbitrabuntur: sin hoc vos in rege

tam nobili, in re tam eximia, in injuria tam acerba, neglexisse audierint; non erunt tam amentes, ut operam, curam, pecuniam impendant in eas res, quas vobis gratas fore non arbitrentur.

XXXI. Hoc loco, Q. Catule, te appello: loquor enim de tuo clarissimo, pulcherrimoque monumento: non iudicis solum severitatem in hoc crimine, sed propè inimici, atque accusatoris vim suscipere debes: tuus est enim honos in illo templo, senatûs populique Romani beneficio: tui nominis æterna memoria simul cum templo illo consecratur: tibi hæc cura suscipienda, tibi hæc opera sumenda est, ut Capitolium, quomodo magnificentius est restitutum, sic copiosius ornatum sit, quàm fuit; ut illa flamma divinitus exstitisse videatur, non quæ deleret Jovis Optimi Maximi templum, sed quæ præclarius magnificentiusque deposceret.

70. Audisti Q. Minucium Rufum dicere, domi suæ deversatum esse Antiochum regem Syracusis: se illud scire ad istum esse delatum: se scire non redditum: audisti; & audies omni e conventu Syracusano; qui ita dicant, sese audientibus, illud Jovi Optimo Maximo dicatum esse ab rege Antiocho, & consecratum. Si iudex non esses, & hæc ad te delata res esset; te potissimum hoc persequi, te petere, te

agere oporteret. Quare non dubito, quo animo iudex hujus criminis esse debeas, qui apud alium judicem multò acrior, quàm ego sum, actor accusatorque esse deberes.

XXXII. Vobis autem, Iudices, quid hòc indignius, aut quid minùs ferendum videri potest? Verresne habebit domi suæ candelabrum Jovis Optimi Maximi e gemmis auroque perfectum? cujus fulgore colucere, atque illustrari Jovis Optimi Maximi templum oportebat, id apud istum in ejusmodi conviviiis constituetur, quæ domesticis stupris flagitiisque flagrabunt? in istius lenonis turpissimi domo, simul cum ceteris Chelidonis hereditariis ornamentis, Capitolii ornamenta ponentur? Quid huic sacri umquam fore, aut quid fuisse religiosi putatis, qui nunc tanto scelere se obstrictum esse non sentiat? qui in iudicium veniat, ubi ne precari quidem Jovem Optimum Maximum, atque ab eo auxilium petere more omnium possit? a quo etiam dii immortales sua repetunt in eo iudicio, quod hominibus ad suas res repetendas est constitutum? Miramur Athenis Minervam, Deli Apollinem, Junonem Sami, Pergæ Dianam, multos præterea ab isto deos totâ Asiâ, Græciâque violatos, qui a Capitolio manus abstinere non potuerit? quod privati homines de suis pecuniis ornant, ornaturique sunt, id C. Verres ab

regibus ornari non est passus. Itaque hoc nefario scelere concepto, nihil postea tota in Sicilia neque sacri, neque religiosi esse duxit : ita sese in ea provincia per triennium gessit, ut ab isto non solum hominibus, verum etiam diis immortalibus bellum indictum putaretur.

XXXIII. Segesta est oppidum pervertus in Sicilia, Judices, quod ab Ænea fugiente a Troja, atque in hæc loca veniente, conditum esse demonstrant. Itaque Segestani, non solum perpetuâ societate atque amicitia, verum etiam cognatione se cum populo Romano conjunctos esse arbitrantur. Hoc quondam oppidum, quum illa civitas cum Pœnis suo nomine, ac suâ sponte bellaret, a Carthaginiensibus vi captum atque deletum est; omniaque, quæ ornamento urbi esse possent, Carthaginem sunt ex illo loco deportata. Fuit apud Segestanos ex ære simulacrum Dianæ quum summâ, atque antiquissimâ præditum religione, tum singulari opere, artificioque perfectum : hoc translatum Carthaginem, locum tantum, hominesque mutarat : religionem quidem pristinam conservabat : nam propter eximiam pulchritudinem, etiam hostibus digna, quam sanctissimè colerent, videbatur.

73. Aliquot seculis post, P. Scipio bello Punico tertio Carthaginem cepit : qua in

victoria ( videte hominis virtutem , & diligenti-  
 am , ut & domesticis præclarissimæ  
 virtutis exemplis gaudeatis , & eò majore  
 odio dignam istius incredibilem audaciam  
 judicetis ) convocatis Siculis omnibus ,  
 quò diutissime , sæpissimeque Siciliam  
 vexatam a Carthaginensibus cognorat , ju-  
 bet omnia conqueri : pollicetur , sibi magnæ  
 curæ fore , ut civitatibus , quæ cujusque fuif-  
 sent , restituerentur. Tum illa , quæ quon-  
 dam fuerant Himerâ sublata , de quibus  
 antea dixi , Thermitanis sunt reddita : tum  
 alia Gelensibus , alia Agrigentinis : in qui-  
 bus etiam ille nobilis taurus , quem crude-  
 lissimus omnium tyrannorum Phalaris ha-  
 buisse dicitur , quò vivos , supplicii causâ ,  
 demittere homines , & subicere flammam  
 solebat : quem taurum Scipio quum red-  
 deret Agrigentinis , dixisse dicitur ; æquum  
 esse illos cogitare , utrum esset Siculis uti-  
 lius , fuisset servire , an populo Romano  
 obtemperare : quum idem monumentum ,  
 & domesticæ crudelitatis , & nostræ man-  
 suetudinis haberent.

XXXIV. Illo tempore Segestanis ma-  
 xima cum cura hæc ipsa Diana , de qua  
 dicimus , redditur : reportatur Segestam :  
 in suis antiquis sedibus summa cum gratu-  
 latione civium , & lætitia reponitur. Hæc  
 erat posita Segestæ , sanè excelsa in basi ;  
 in qua grandibus litteris P. AFRICANI

nomen erat incisum , eumque *CARTHAGINE CAPTA RESTITUISSE* , perscriptum : colebatur a civibus : ab omnibus advenis visebatur : quum quaestor essem , nihil mihi ab illis est demonstratum prius. Erat admodum amplum , & excelsum signum cum stola : verumtamen inerat in illa magnitudine aetas , atque habitus virginalis : sagittae pendeant ab humero : sinistrâ manu retinebat arcum : dextrâ ardentem faciem praeferebat.

75. Hanc quum iste factorum omnium hostis , religionumque praedo vidisset : quasi illâ ipsâ face percussus esset , ita flagrare cupiditate , atque amentiam coepit : imperat magistratibus isto , ut eam demoliantur , & sibi dent : nihil sibi gratius ostendit futurum : illi verò dicere , id sibi nefas esse ; seque quum summâ religione , tum summo metu legum & iudiciorum teneri : iste tum potere ab illis , tum minari , tum spem , tum metum ostendere. Opponebant illi interdum nomen Atricani : donum populi Romani illud esse dicebant : nihil se in eo potestatis habere , quod imperator clarissimus , urbe hostium captâ , monumentum victoriae populi Romani esse voluisset.

76. Quum iste nihil remissius , atque etiam multò vehementius instaret quotidie ; res agitur in senatu : vehementer ab



omnibus reclamatur. Itaque illo tempore , ac primo istius adventu pernegatur. Postea , quidquid erat oneris in nautis , remigibusque exigendis , in frumento imperando , Segestanis , præter ceteros , imponebat aliquantò amplius , quàm ferre possent : præterea magistratus eorum evocabat : optimum quemque , & nobilissimum ad se arcessebat : circum omnia provinciæ fora rapiebat : singillatim unicuique calamitatis fore se denuntiabat : universam se funditus illam everfurum esse civitatem minabatur. Itaque aliquando , multis malis , magnoque metu victi Segestani , prætoris imperio parendum esse decreverunt : magno cum luctu , & gemitu totius civitatis , multis cum lacrymis , & lamentatione virorum , mulierumque omnium , simulacrum Dianæ tollendum locatur.

X X X V. Videte quantâ religione fuerit : apud Segestanos repertum esse , Judices , scitote neminem , neque liberum , neque servum , neque civem , neque peregrinum , qui illud signum auderet attingere. Barbaros quosdam Lilybæo scitote advocatos esse operarios : hi denique illud , ignari totius negotii , ac religionis , mercede acceptâ , fustulerunt : quod quum ex oppido exportaretur , quem conventum mulierum factum esse arbitrâmini ? quem fletum majorum nata ? que-

rum nonnulli etiam illum diem memoriâ tenebant, quum illa eadem Diana Segestam, Carthagine reventa, victoriam populi Romani reditu suo nuntiasset. Quàm dissimilis hic dies illi tempori videbatur? tum imperator populi Romani, vir clarissimus, deos patrios reportabat Segestanis, ex urbe hostium recuperatos: nunc ex urbe sociorum prætor ejusdem populi turpissimus, atque impurissimus, eosdem illos deos nefario scelere auferebat. Quid hæc totâ Siciliâ est clarius, quàm omnes Segestanas matronas, & virgines convenisse, quum Diana exportaretur ex oppido: unxisse unguentis; complexisse coronis, & floribus; thure, odoribusque incensis, usque ad agri fines prosecutas esse?

78. Hanc tu tantam religionem, si tum in imperio propter cupiditatem, atque audaciam non pertimescebas, ne nunc quidem in tanto tuo, liberorumque tuorum periculo perhorrescis? Quem tibi aut hominem, invitis diis immortalibus, aut verò deum, tantis eorum religionibus violatis, auxilio futurum putas? Tibi illa Diana in pace, atque in otio religionem nullam attulit? quæ, quum duas urbes, in quibus locata fuerat, captas incensasque vidisset, bis ex duorum bellorum flamma, ferroque servata est: quæ Carthaginien-

sium victoriâ , loco mutato , religionem tamen non amisit : P. Africani virtute religionem simul cum loco recuperavit. Quo quidem scelere suscepto , quum inanis esset basis , & in ea P. Africani nomen incisum ; res indigna , atque intoleranda videbatur omnibus , non solum religiones esse violatas , verum etiam P. Africani , viri fortissimi , rerum gestarum gloriam , memoriam virtutis , monumenta victoriæ , C. Verrem sustulisse. Quod quum isti renunciaretur de basi , ac litteris , existimavit homines in oblivionem totius negotii esse venturos , si etiam basim , tamquam indicem sui sceleris , sustulisset : itaque tollendam istius imperio locaverunt ; quæ vobis locatio ex publicis Segestanorum litteris prioræ actione recitata est.

XXXVI. Te nunc , P. Scipio , te , inquam , lectissimum , ornatissimumque adolescentem appello : abs te officium tuum , debitum generi & nomini , requiro , & flagito. Cur pro isto , qui laudem , honoremque familiæ vestræ depeculatus est , pugnas ? cur eum defensum esse vis ? cur ego tuas partes suscipio ? cur tuum onus sustineo ? M. Tullius P. Africani monumenta requirit : P. Scipio eum , qui illa sustulit , defendit : quum mos a maioribus traditus sit , ut monumenta majorum ita suorum quisque defendat , ut ea ne or-

nari quidem nomine alieno sinat ; tu isti aderis , qui non obtrusit aliqua ex parte monumenta P. Scipionis , sed funditus sustulit , ac delevit ?

80. Quisnam igitur , per deos immortales ! tuebitur P. Scipionis memoriam mortui ? quis monumenta , atque indicia virtutis , si tu ea relinquis , ac deferis ? neque solum spoliata illa pati , sed etiam eorum spoliatores , vexatoresque defendes ? adsunt Segestani , clientes tui , focii populi Romani , atque amici : certiores te faciunt , P. Africanum , Carthagine delerâ , simulacrum Dianæ majoribus suis restituisse ; idque apud Segestanos ejus imperatoris nomine positum , ac dedicatum fuisse : hoc Verrem demoliendum , & asportandum , nomenque omnino P. Scipionis delendum , tollendumque curasse : orant te , atque obsecrant , ut sibi religionem , generi tuo laudem gloriamque restituas , ut , quod ex urbe hostium per P. Africanum recuperarint , id per te ex prædonis domo conservare possint.

XXXVII. Quid aut his respondere honestè potes ? aut illi facere , nisi ut te , ac fidem tuam implorent ? adsunt , & implorant : potes domesticæ laudis amplitudinem , Scipio , tueri : potes omnia in te sunt , quæ aut fortuna hominibus , aut natura largitur : non præcæpo fructum

officiū tui ; non alienam mihi laudem appeto : non est pudoris mei , P. Scipione , florentissimo adolescente , vivo & incolūni , me propugnatorem monumentorum P. Scipionis , defensoremque profiteri.

81. Quam ob rem si fuscipis domesticæ laudis patrociniū , me non solum silere de vestris monumentis oportebit , sed etiam lætari , P. Africani ejusmodi esse fortunas mortui , ut ejus honos ab iis , qui ex eadem familia sunt , defendatur , neque ullum adventitium requiratur auxilium. Sin istius amicitia te impedit : si hoc , quod abs te postulo , minus ad officiū tuum pertinere arbitrare : succedam ego vicarius tuo muneri ; fuscipiam partes , quas alienas esse arbitrabar ; ne ista præclara nobilitas desinat queri , populum Romanum hominibus novis , atque industriis libenter honores mandare , semperque mandasse. Non est querendum , in ea civitate , quæ propter virtutem omnibus nationibus imperat , virtutem plurimum posse. Sit apud alios imago P. Africani : ornentur alii mortui virtute , ac nomine : talis ille vir fuit , ita de populo Romano meritis est , ut non uni familiæ , sed universæ civitati commendatus esse debeat. Est aliqua mea pars virilis , quod ejus civitatis sum , quam ille amplam , illustrem , claramque reddidit : præcipue quod in his artibus pro-

mea parte verſor, quarum ille princeps fuit, æquitate, induſtriâ, temperantiâ, defenſione miſerorum, odio improborum: quæ cognatio ſtudiorum, & artium; propemodum non minùs eſt conjuncta, quàm iſta, quâ vos delectamini, generis, & nominis.

XXXVIII. Repeto abs te, Verres; monumentum P. Africani: cauſam Siculorum, quam ſuſcepi, relinquo: iudicium de pecuniis repetundis ne ſit hoc tempore: Segeſtanorum injuriæ negligantur: baſis P. Africani reſtituatur: nomen invictiſſimi imperatoris incidatur: ſignum pulcherrimum Carthagine captum reponatur. Hæc abs te non Siculorum defenſor, non tuus accuſator, non Segeſtani poſtulant; ſed is, qui laudem, gloriamque P. Africani tuendam, conſervandamque ſuſcepit. Non vereor, ne hoc officium meum P. Servilio iudici non probem; qui quum res maximas geſſerit, monumentaque ſuarum rerum quum maximè conſtituat, atque in his elaboret; profeſſò volet hæc non ſolùm ſuis poſteris, verùm etiam omnibus viris fortibus, & bonis civibus defendenda, non ſpolianda improbis tradere. Non vereor, ne tibi, Q. Catulle, diſpliceat, cujus ampliſſimum in orbe terrarum, clariffimumque monumentum eſt, quàm plurimos eſſe cuſtodes monu-

mentorū , & putare omnes bonos alienæ gloriæ defensionem ad officium suum pertinere.

83. Et quidem ceteris istius furtis , atque flagitiis ita moveor , ut ea reprehendenda tantum putem : hîc verò tanto dolore afficior , ut nihil mihi indignius , nihil minùs ferendum videatur. Verres Africani monumentis domum suam , plenam stupri , plenam flagitii , plenam dedecoris , ornabit ? Verres temperatissimi , sanctissimi-que viri monumentum , Dianæ simulacrum virginis , in ea domo collocabit , in qua semper meretricum , lenonumque flagitia versantur ?

XXXIX. At hoc solum Africani monumentum violasti ? quid ? a Tyndaritanis non ejusdem Scipionis beneficio positum simulacrum Mercurii , pulcherrimè factum , sustulisti ? At quemadmodum , dii immortales ! quàm audacter ! quàm libidinosè ! quàm impudenter ! audistis nuper dicere legatos Tyndaritanos , homines honestissimos , ac principes civitatis , Mercurium , qui sacris anniversariis apud eos , ac summâ religione coleretur , quem P. Africanus , Carthagine captâ , Tyndaritanis non solum suæ victoriæ , sed etiam illorum fidei , societatisque monumentum , atque indicium dedisset , hujus vi , scelere , imperioque esse sublatum : qui ut primùm in

illud oppidum venit, statim, tamquam ita fieri non solum oporteret, sed etiam necesse esset; tamquam hoc senatus mandasset, populusque Romanus jussisset; ita continuo, signum ut demolirentur, & Messanam deportarent, imperavit.

85. Quod quum illis, qui aderant, indignum; qui audiebant, incredibile videretur: non est ab isto, primo illo adventu, perseveratum: discedens mandat proagoro Sopatro, cujus verba audistis, ut demoliat: quum recusaret, vehementer minatur: ita tum ex illo oppido proficiscitur. Proagorus refert rem ad senatum: vehementer undique reclamatur: ne multa: iterum iste aliquantò post ad illos venit; quærit continuo de signo: respondetur ei senatum non permittere: poenam capitis constitutam, si injussu senatus quicquam attigisset: simul religio commemoratur. Tum iste, Quam mihi religionem narras? quam poenam? quem senatum? vivum te non relinquam: mori virgis, nisi signum traditur. Sopater iterum flens ad senatum refert: istius cupiditatem, minasque demonstrat. Senatus Sopatro responsum nullum dat, sed commotus, perturbatusque discedit. Ille prætoris arcessitus nuntio, rem demonstrat: negat ullo modo fieri posse.

XL. Atque hæc (nihil enim præter-



mittendum de istius impudentia videtur) agebantur in conventu palam, de sella, ac de loco superiore. Erat hiems summa; tempestas, ut ipsum Sopatrum dicere audistis, perfrigida; imber maximus: quum iste imperat lictoribus, ut Sopatrum de porticu, in qua ipse sedebat, præcipitem in forum dejiciant, nudumque constituent. Vix erat hoc planè etiam imperatum, quum illum spoliatum, stipatumque lictoribus videres. Omnes ideo putabant, ut miser, atque innocens virgis caderetur: fefellit hæc homines opinio: virgis iste caderet sine causa socium populi Romani, atque amicum? non est usque eò improbus: non omnia sunt in eo uno vitia: numquam fuit crudelis: leniter hominem, clementerque accepit. Equestres sunt medio in foro Marcellorum statuae, sicuti ferè ceteris in oppidis Siciliae: ex quibus iste C. Marcelli statuam delegit; cujus officia in illa civitate, totaque provincia recentissima erant, & maxima: in ea Sopatrum, hominem tum domi nobilem, tum summo magistratu præditum, divaricari, ac deligari jubet.

87. Quo cruciatu sit affectus, venire in mentem necesse est omnibus, quum esset vinctus nudus in ære, in imbri, in frigore: neque tamen finis huic injuriæ, crudelitæque fiebat, donec populus, atque

universa multitudo, atrocitate rei, misericordiâque commota, senatum clamore coëgit, ut ei simulacrum illud Mercurii polliceretur: clamabant fore, ut ipsi sese dii immortales ulciscerentur: hominem interea perire innocentem non oportere. Tum frequens senatus ad istum venit: pollicetur signum. Ita Sopater de statua C. Marcelli, quum jam pene obriguisset, vix vivus aufertur.

XLI. Non possum dispositè istum accusare, si cupiam: opus est non solum ingenio, verum etiam artificio quodam singulari. Unum hoc crimen videtur esse, & a me pro uno ponitur, de Mercurio Tyndaritano: plura sunt: sed ea quo pacto distinguere, ac separare possim, nescio: est pecuniarum captarum, quodd signum a sociis pecuniæ magnæ sustulit: est peculatus, quodd publicè populi Romani signum, de præda hostium captum, positum imperatoris nostri nomine, non dubitavit auferre: est majestatis, quodd imperii nostri gloriæ, rerumque gestarum monumenta evertere, atque asportare ausus est: est sceleris, quodd religiones maximas violavit: est crudelitatis, quodd in hominem innocentem, in socium nostrum, atque amicum, novum, ac singulare supplicii genus excogitavit.

89. Illud verò quid sit, jam non queo

dicere : quo nomine appellem , nescio : quòd in C. Marcelli statua. Quid est hoc ? patronusne quòd erat ? quid tum ? quòd id spectat ? utrùm ea res ad opem , an ad calamitatem clientium , atque hospitem valere debebat ? an ut hoc ostenderes , contra vim tuam in patronis præsidiū nihil esse ? quis hoc non intelligeret , in improbi præsentiis imperio maiorem esse vim , quàm in bonorum absentium patrocinio ? an verò ex hoc illa tua singularis significatur insolentia , superbia , contumacia ? detrahare videlicet aliquid te de amplitudine Marcellorum putasti : itaque nunc Siculorum Marcelli non sunt patroni : Verres in eorum locum substitutus est.

90. Quam in te tantam virtutem esse , aut dignitatem arbitratus es , ut conarere clientelam tam illustrem , tam splendidæ provinciæ transducere ad te , auferre a certissimis , antiquissimisque patronis ? Tu istâ stultitiâ , nequitiâ , inertiâ , non modò totius Siciliæ , sed unius tenuissimi Siculi clientelam tueri potes ? tibi Marcelli statua pro patibulo in clientes Marcellorum fuit ? tu ex illius honore in eos ipsos , qui honorem illi habuerant , supplicia quærebās ? Quid postea ? quid tandem tuis statuis fore arbitrabare ? an verò id , quod accidit ? Nam Tyndaritani statuam istius , quam sibi propter Marcellos , altiore etiam

basi poni jusserat, deturbarunt, simul ac successum isti audierunt.

XLII. Dedit igitur tibi fortuna Siculorum C. Marcellum judicem, ut, cujus ad statuam Siculi, te prætor, alligabantur, ejus religioni te eundem vinctum adstrictumque dedamus. Ac primò, Judices, hoc signum Mercurii dicebat iste Tyndaritanos C. Marcello huic Æternino vendidisse; atque hoc suâ causâ etiam Marcellum ipsum sperabat esse dicturum: quod mihi numquam verisimile visum est, adolescentem illo loco natum, patronum Siciliæ, nomen suum isti ad translationem criminis commodaturum. Verumtamen ita res mihi tota prævisa, atque præcauta est, uti, si maximè esset inventus, qui in se suscipere istius culpam, crimenque cuperet, tamen is proficere nihil posset: eos enim testes deduxi, & eas litteras deportavi, ut de istius facto dubium nemini esse posset.

92. Publicæ litteræ sunt, deportatum esse Mercurium Messanam sumptu publico: dicunt, quanti: præfuisse huic negotio publicè legatum Poleam: quid? is ubi est? præstò est: testis est. *Proagori Sopatri jussu*: quis est hic? qui ad statuam adstrictus est: quid? is ubi est? testis est: vidistis hominem, & verba ejus audistis. Demolendum curavit Democritus gymnasiarchus, quòd is eo loco præerat: quid? hoc nos

dicimus ? immo verò ipse præfens : Romæ nuper ipsum esse pollicitum , sese id signum legatis esse redditurum , si ejus rei testificatio tolleretur , cautumque esset eos testimonium non esse dicturos. Dixit hoc apud vos Zosippus , & Hismenias , homines nobilissimi , & principes Tyndaritanæ civitatis.

XLIII. Quid ? Agrigento nonne ejusdem P. Scipionis monumentum , signum Apollinis pulcherrimum , cujus in femine , litterulis minutis argenteis , nomen Myronis erat inscriptum , ex Æsculapii religiosissimo fano sustulisti ? quod quidem , Judices , quum iste clam fecisset : quum ad suum scelus illud , furtumque , nefarios quosdam homines improbos , duces , atque adjutores adhibuisset , vehementer commota civitas est. Uno eodem tempore Agrigentini beneficium Africani , religionem domesticam , ornamentum urbis , indicium victoriæ , testimonium societatis , requirebant. Itaque ab illis , qui principes in ea civitate erant , præcipitur , & negotium datur quæstoribus , & ædilibus , ut noctu vigilias agerent ad ædes sacras : etenim iste Agrigenti ( credo propter multitudinem illorum hominum , atque virtutem , & quòd cives Romani , viri fortes , ac strenui , & honesti permulti in illo oppido , conjunctissimo animo , cum ipsis

Agrigentinis vivunt , ac negotiantur ) non audebat palam tollere , aut poscere , quæ placebant.

94. Herculis templum est apud Agrigentinos , non longè a foro , sanè sanctum apud illos , & religiosum : ibi est ex ære simulacrum ipsius Herculis , quo non faciliè quidquam dixerim me vidisse pulchrius ( tametsi non tam multum in istis rebus intelligo , quàm multa vidi ) usque eò , Judices , ut rictum ejus , ac mentum paulò sit attritius , quòd in precibus , & gratulationibus non solùm id venerari , verùm etiam osculari solent. Ad hoc templum , quum esset iste Agrigenti , duce Timarchide , repentè , nocte intempestâ , servorum armatorum fit concursus , atque impetus. Clamor a vigilibus , fanique custodibus tollitur ; qui primò quum obsistere , ac defendere conarentur , malè mulcati , clavis ac fustibus repelluntur : postea convulsis repagulis , effractisque valvis , demoliri signum , ac vectibus labefactare conantur. Interea ex clamore fama totâ urbe percrebuit , expugnari deos patrios , non hostium adventu nec opinato , neque repentino prædonum impetu , sed ex domo , atque cohorte prætoria , manum fugitivorum instructam , armatamque venisse.

95. Nemo Agrigenti , neque ætate tam affectâ ,

affectâ , neque viribus tam infirmis fuit , qui non illâ nocte , eo nuntio , excitatus surrexerit , telumque , quod cuique fors offerebat , arripuerit. Itaque brevi tempore ad fanum ex urbe tota concurritur. Horâ amplius jam in demoliendo signo permulti homines moliebantur : illud interea nulla lababat ex parte ; quum alii vectibus subjectis conarentur commovere , alii deligatum omnibus membris rapere ad se funibus. Repentè Agrigentini concurrunt : fit magna lapidatio : dant sese in fugam istius præclari imperatoris nocturni milites : duo tamen sigilla perparvula tollunt , ne omnino inanes ad istum prædonem religionum reverterentur. Numquam tam malè est Siculis , quin aliquid facetè , & commodè dicant ; velut in hac re : aiebant in labores Herculis non minùs hunc immanissimum Verrem , quàm illum aprum Erymanthium , referri oportere.

XLIV. Hanc virtutem Agrigentinorum imitati sunt Assorini postea , viri fortes , & fideles , sed nequaquam ex tam ampla , neque tam ex nobili civitate. Chrysas est amnis , qui per Assorinorum agros fluit ; is apud illos habetur deus , & religione maximâ colitur : fanum ejus est in agro propter ipsam viam , quâ Assoro itur Ennam ; in eo Chrysæ est si-

mulacrum, præclarè factum e marmore: id iste poscere Assorinos propter singularem ejus fani religionem non ausus est. Tlepolemo dat, Hieronique negotium: illi noctu, factâ manu, armatâque veniunt: fores ædis effringunt: æditui, custodesque maturè sentiunt: signum, quod erat notum vicinitati, buccinâ datur: homines ex agris concurrunt: ejicitur, fugaturque Tlepolemus; neque quidquam ex fano Chrysæ, præter unum perparvulum signum ex ære, desideratum est.

97. Matris magnæ fanum apud Enguinus est: jam enim mihi non modò breviter de unoquoque dicendum, sed etiam prætereunda videntur esse permulta, ut ad majora istius, & illustriora in hoc genere furta, & scelera veniamus. In hoc fano loricas, galeasque æneas, cælatas opere Corinthio, hydriasque grandes, simili in genere, atque eâdem arte perfectas, idem ille P. Scipio, vir omnibus rebus præcellentissimus, posuerat, & suum nomen inscripserat. Quid jam de isto plura dicam, aut querar? omnia illa, Judices, abstulit: nihil in religiosissimo fano, præter vestigia violatæ religionis, nomenque P. Scipionis, reliquit: hostium spolia, monumenta imperatorum, decora, atque ornamenta fanorum posthac, his præclaris nominibus amissis, in instrumento,



ac supellectili C. Verris numerabuntur.

98. Tu videlicet solus vasis Corinthiis delectaris? tu illius æris temperationem, tu operum lineamenta solertissimè perspicis? hæc Scipio ille non intelligebat, homo doctissimus, atque humanissimus? tu sine ulla bona arte, sine humanitate, sine ingenio, sine litteris, intelligis, & judicas? vide, ne ille non solum temperantiâ, sed etiam intelligentiâ te, atque istos, qui se elegantes dici volunt, vicerit: nam quia, quàm pulchra essent, intelligebat, idcirco existimabat, ea non ad hominum luxuriam, sed ad ornatum fanorum, atque oppidorum esse facta, ut posteris nostris monumenta religiosa esse videantur.

XLV. Audite etiam singularem ejus, Judices, cupiditatem, audaciam, amentiam, in his præsertim sacris polluendis, quæ non modò manibus attingi, sed ne cogitatione quidem violari fas fuit. Sacrarium Cereris est apud Catinenses, eâdem religione, quâ Romæ, quâ in ceteris locis, quâ propè in toto orbe terrarum. In eo sacrario intimo fuit signum Cereris perantiquum; quod viri, non modò cujuscumque esset, sed ne esse quidem sciebant: aditus enim in id sacrarium non est viris: sacra per mulieres, ac virgines confici solent: hoc signum noctu clam istius servi

ex illo religiosissimo , atque antiquissimo fano sustulerunt : postridie sacerdotes Cereris , atque illius fani antistitæ , majores natu , probatæ , ac nobiles mulieres , rem ad magistratus suos deferunt : omnibus acerbum , indignum , luctuosum denique videbatur.

100. Tum iste permotus illâ atrocitate negotii , ut ab se sceleris istius suspicio removeretur , dat hospiti suo cuidam negotium , ut aliquem reperiret , quem ea fecisse insimularet ; daretque operam , ut is eo crimine damnaretur , ne ipse esset in crimine. Res non procrastinatur : nam quum iste Catinâ profectus esset , servi cujusdam nomen defertur : is accusatur : ficti testes in eum dantur : rem cunctus senatus Catinensium legibus judicat : sacerdotes vocantur : ex his quæritur secretò in curia , quid esse factum arbitrarentur ; quemadmodum signum esse ablatum : respondent illæ , prætoris in eo loco servos esse visos : res , quæ esset jam antea non obscura , sacerdotum testimonio perspicua esse cœpit : itur in consilium : servus ille innocens omnibus sententiis absolvitur , quò faciliùs vos hunc omnibus sententiis condemnare possetis.

101. Quid enim postulas , Verres ? quid speras ? quid spectas ? quem tibi aut deorum , aut hominum auxilio putas futurum ?

eône tu servos ad spoliandum fanum immittere ausus es , quò liberos adire , ne orandi quidem causâ , fas erat ? hisne rebus manus afferre non dubitasti , a quibus etiam oculos cohibere te religionum jura cogeant ? tametsi ne oculis quidem captus in hanc fraudem tam sceleratam , ac tam nefariam decidisti : nam id concupisti , quod numquam videras ; id , inquam , adamasti , quod antea non aspexeras : auribus tu tantam cupiditatem concepisti , ut eam non metus , non religio , non deorum vis , non hominum existimatio contineret.

102. At ex viro bono audieras , credo , & bono auctore. Quì id potest , qui nè ex viro quidem audire potueris ? Audisti igitur ex muliere ; quoniam id viri neque vidisse , neque nosse poterant. Qualem porrò illam feminam fuisse putatis , Judices ? quàm pudicam , quæ cum Verre loqueretur ? quàm religiosam , quæ sacrarii spoliandi ostenderet rationem ? At minimè mirum , quæ sacra per summam castimoniam virginum , ac mulierum fiant ; eadem per istius stuprum , ac flagitium esse violata.

XLVI. Quid ergo ? hoc solum auditione expetere cœpit , quum id ipse non vidisset ? immo verò alia complura : ex quibus eligam spoliationem nobilissimi,

atque antiquissimi fani ; de qua priore actione testes dicere audistis : nunc eadem illa , quæso , audite , & diligenter , sicut adhuc fecistis , attendite.

103. Insula est Melita , Iudices , fatis lato ab Sicilia mari , periculosoque disjuncta ; in qua est eodem nomine oppidum , quod iste numquam accessit : quod tamen isti textrinum per triennium ad muliebrem vestem conficiendam fuit. Ab eo oppido non longè , in promontorio , fanum est Junonis antiquum ; quod tantâ religione semper fuit , ut non modò illis Punicis bellis , quæ in his ferè locis navali copiâ gesta , atque versata sunt : sed etiam in hac prædonum multitudine semper inviolatum , sanctumque fuerit. Quin etiam hoc memoriae proditum est , classe quondam Masinissæ regis ad eum locum appulsâ , præfectum regium dentes eburneos , incredibili magnitudine , e fano sustulisse , & eos in Africam portasse , Masinissæque donasse. Regem quidem primò delectatum esse munere : post , ubi , audisset , unde essent , statim certos homines in quinquerei misisse , qui eos dentes reportarent : itaque in his inscriptum litteris Punicis fuit : *Regem Masinissam imprudentem accepisse : recognitâ , reponendos , restituendosque curasse.* Erat præterea magna vis eboris , multa ornamenta , in quibus eburneæ Victoriæ ,

antiquo opere , ac summâ arte perfectâ.  
Hæc iste omnia , ne multis morer , uno  
impetu , atque uno nuntio per servos Ve-  
nerios , quos ejus rei causâ miserat , tol-  
lenda , atque asportanda curavit.

XLVII. Proh dii immortales ! quem  
ego hominem accuso ? quem legibus , ac  
judiciali jure persequor ? de quo vos sen-  
tentiam per tabellam feretis ? dicunt le-  
gati Melitenses publicè , spoliatum tem-  
plum esse Junonis ; nihil istum in religio-  
sissimo fano reliquisse : quem in locum  
classes hostium sæpe accesserint ; ubi pi-  
ratæ ferè quotannis hiemare soleant ; quod  
neque prædo violarit antea , neque um-  
quam hostis attigerit , id ab uno isto sic  
spoliatum esse , ut nihil omnino sit relic-  
tum. Hic nunc aut iste reus , aut ego ac-  
cusator , aut hoc judicium appellabitur ?  
criminibus enim coarguitur , haud suspi-  
cionibus in judicium vocatur : dii ablati ,  
fana vexata , nudatæ urbes reperiuntur ;  
earum autem rerum nullam sibi iste , ne-  
que inficiandi rationem , neque defenden-  
di facultatem reliquit : omnibus in rebus  
coarguitur a me , convincitur a testibus ,  
urgetur confessione suâ , manifestis in ma-  
leficiis tenetur ; & manet etiam , ac taci-  
tus facta mecum sua recognoscit.

105. Nimiùm mihi diu videor in uno  
genere versari criminum. Sentio , Judices ,

occurrendum esse satietati aurium , animorumque vestrorum. Quam ob rem multa prætermittam : ad ea autem , quæ dicturus sum , reficite vos , quæso , Judices , per deos immortales ! per eos ipsos , de quorum religione jamdiu dicimus , dum id ejus facinus commemoro , & profero , quo provincia tota commota est : de quo si paulò altiùs ordiri , ac repetere memoriam religionis videbor , ignoscite. Rei magnitudo me breviter perstringere atrocitatem criminis non sinit.

XLVIII. Vetus est hæc opinio , Judices , quæ constat ex antiquissimis Græcorum litteris , atque monumentis , insulam Siciliam totam esse Cereri , & Liberæ consecratam : hoc quum ceteræ gentes sic arbitrantur , tum ipsis Siculis tam persuasum est , ut animis eorum insitum , atque innatum esse videatur : nam & natas esse has in his locis deas , & fruges in ea terra primùm repertas arbitrantur : & raptam esse Liberam , quam eandem Proserpinam vocant , ex Ennensium nemore ; qui locus , quòd in media est insula situs , umbilicus Siciliæ nominatur : quam quum investigare , & conquirere Ceres vellet , dicitur inflammasse tædas iis ignibus , qui ex Ætnæ vertice erumpunt ; quas sibi quum ipsa præferret , orbem omnium peragrasse terrarum.

107. Enna autem , ubi ea , quæ dico , gesta esse memorantur , est loco præcelso , atque edito ; quo in summo est æquata agri planities , & aquæ perennes : tota verò ab omni aditu circuncisa , atque dirempta est : quam circa lacus , lucique sunt plurimi , & lætissimi flores omni tempore anni ; locus ut ipse raptum illum virginis , quem jam a pueris accepimus , declarare videatur. Etenim propter est spelunca quædam , conversa ad aquilonem , infinita altitudine , quâ Ditem patrem ferunt repentè cum curru exstitisse , abreptamque ex eo loco virginem fecum asportasse , & subitò non longè a Syracusis penetrasse sub terras , lacumque in eo loco repentè exstitisse ; ubi usque ad hoc tempus Syracusani festos dies anniversarios agunt , celeberrimo virorum , mulierumque conventu.

XLIX. Propter hujus opinionis vetustatem , quòd eorum in his locis vestigia , ac propè incunabula reperiuntur deorum , mira quædam totâ Siciliâ privatim , ac publicè religio est Cereris Ennensis. Etenim multa sæpe prodigia vim ejus , numenque declarant : multis sæpe in difficilissimis rebus præsens auxilium ejus oblatum est : ut hæc insula ab ea non solum diligì , sed etiam incolì , custodiri que videatur.

108. Nec solum Siculi, verum etiam ceteræ gentes, nationesque, Ennensem Cererem maximè colunt. Etenim, si Atheniensium sacra summâ cupiditate expetuntur, ad quos Ceres in illo errore venisse dicitur, frugesque attulisse: quantam esse religionem convenit eorum, apud quos eam natam esse, & fruges invenisse constat? Itaque apud patres nostros, atroci ac difficili reipublicæ tempore, quum, Tib. Graccho occiso, magnorum periculorum metus ex ostentis portenderetur, P. Mucio, L. Calpurnio consulibus, aditum est ad libros Sibyllinos; in quibus inventum est, *Cererem antiquissimam placari oportere*. Tum ex amplissimo collegio decemvirali sacerdotes populi Romani, quum esset in urbe nostra Cereris pulcherrimum, & magnificentissimum templum, tamen usque Ennam profecti sunt: tanta enim erat auctoritas, & vetustas illius religionis, ut, quum illuc irent, non ad ædem Cereris, sed ad ipsam Cererem proficisci viderentur.

109. Non obtundam diutius: etenim jamdudum vereor, ne oratio mea, aliena ab judiciorum ratione, & quotidiana dicendi consuetudine esse videatur: hoc dico, hanc ipsam Cererem, antiquissimam, religiosissimam, principem omnium factorum, quæ apud omnes gentes, na-



tionesque fiunt, a C. Verre ex suis templis, ac sedibus esse sublatam. Qui accessistis Ennam, vidistis simulacrum Cereris e marmore, & in altero templo, Liberæ: sunt ea perampla, atque præclara, sed non ita antiqua. Ex ære fuit quoddam modicâ amplitudine, ac singulari opere, cum facibus, perantiquum, omnium illorum, quæ sunt in eo fano, multò antiquissimum: id sustulit; ac tamen eo contentus non fuit. Ante ædem Cereris, in aperto, ac propatulo loco signa duo sunt, Cereris unum, alterum Triptolemi, & pulcherrima; & perampla: his pulchritudo periculo, amplitudo salutis fuit, quoddam eorum demolitio, atque asportatio perdifficilis videbatur: insistebat in manu Cereris dextra simulacrum pulcherrimè factum Victoriæ: hoc iste e signo Cereris avellendum, asportandumque curavit.

L. Qui tandem istius animus est nunc in recognitione scelerum suorum, quum ego ipse in commemoratione eorum non solum animo commovear, verum etiam corpore perhorrescam? venit enim mihi fani, loci, religionis illius in mentem: versantur ante oculos omnia: dies ille, quo ego Ennam quum venissem, præfido mihi sacerdotes Cereris cum infulis, ac verbenis fuerunt: concio, conventusque civium: in quo ego quum loquerer,

tanti fletus , gemitusque fiebant , ut acerbissimus totâ urbe luctus versari videretur.

111. Non illi decumarum imperia , non bonorum direptiones , non iniqua judicia , non importunissimas istius libidines , non vim , non contumelias , quibus operti , oppressique erant , conquerebantur : Cereris numen , sacrorum vetustatem , fani religionem , istius sceleratissimi , atque audacissimi supplicio expiari volebant : omnia se cetera pati , ac negligere dicebant. Hic dolor erat tantus , ut Verres , alter Orcus , venisse Ennam , & non Proserpinam asportasse , sed ipsam abripuisse Cererem videretur. Etenim urbs illa non urbs videtur , sed fanum Cereris esse : habitare apud sese Cererem Ennenses arbitrantur ; ut mihi non cives illius civitatis , sed omnes sacerdotes , omnes accolæ , atque antistites Cereris esse videantur.

112. Ennæ tu simulacrum Cereris tollere audebas ? Ennæ tu de manu Cereris Victoriâ deripere , & deam deâ detrâhere conatus es ? quorum nihil violare , nihil attingere ausi sunt , in quibus erant omnia , quæ sceleri propiora sunt , quàm religioni : tenuerunt enim P. Popilio , P. Rupilio consulibus , illum locum servi , fugitivi , barbari , hostes : sed neque tam servi illi dominorum , quàm tu libidinum : neque tam fugitivi illi a dominis , quàm

tu a jure , & a legibus : neque tam barbari linguâ , & natione illi , quàm tu naturâ , & moribus : neque illi tam hostes hominibus , quàm tu diis immortalibus. Quæ deprecatio est igitur ei reliqua , qui indignitate servos , temeritate fugitivos , scelere barbaros , crudelitate hostes vicerit ?

LI. Audistis Theodorum , & Numinium , & Nicasionem , legatos Ennenses , publicè dicere , sese a suis civibus hæc habere mandata , ut ad Verrem adirent , & eum simulacrum Cereris , & Victoriæ reposcerent : id si impetrassent , tum ut morem veterem Ennensium conservarent ; publicè in eum , tametsi vexasset Siciliam , tamen , quoniam hæc a majoribus constituta accepissent , testimonium ne quod dicerent : sin autem ea non reddidisset , tum ut iudicio adessent , tum uti de ejus injuriis iudices docerent , sed multò maximè de religione quererentur : quas illorum querimonias nolite , per deos immortales , aspernari ; nolite contemnere , ac negligere , Iudices. Aguntur injuriæ sociorum : agitur vis legum : agitur existimatio , veritasque judiciorum ; quæ sunt omnia permagna : verum illud maximum : tantâ religione obstricta tota provincia est : tanta superstitio ex istius facti mentes omnium Siculorum occupavit , ut , quæcumque accidunt publicè , vel privatim incommoda ,

propter eam causam scelere istius evenire videantur.

114. Audistis, Centuripinos, Agyrinenses, Catinenfes, Herbitenses, Ennenses, complures alios, publicè dicere, quæ solitudo esset in agris, quæ vastitas, quæ fuga aratorum, quàm desertata, quàm inculta, quàm relicta omnia. Ea tametsi istius multis & variis injuriis acciderunt: tamen hæc una causa in opinione Siculorum plurimum valet, quòd, Cerere violatâ, omnes cultus, fructusque Cereris in his locis interiisse arbitrantur. Medemini religioni sociorum, Judices; conservate vestram: neque enim hæc externa vobis est religio, neque aliena: quòd si esset, si suscipere eam nolletis: tamen in eo, qui violasset, sancire vos velle oporteret. Nunc verò in communi omnium gentium religione, inque his sacris, quæ majores nostri ab exteris nationibus adscita, atque arcessita coluerunt; quæ sacra, ut erant re verâ, sic appellari Græca voluerunt; negligentes, ac dissoluti si cupiamus esse, quì possumus?

LII. Unius etiam urbis, omnium pulcherrimæ, atque ornatissimæ, Syracusarum direptionem commemorabo, & in medium proferam, Judices; ut aliquando totam hujus generis orationem concludam, ac definiam. Nemo ferè vestrum

*ACTIONIS II. L. IV. 231*

est, quin, quemadmodum captæ sint a M. Marcello Syracusæ, sæpe audierit, nonnumquam etiam in annalibus legerit: conferte hanc pacem cum illo bello: hujus prætoris adventum, cum illius imperatoris victoria: hujus cohortem impuram, cum illius exercitu invicto: hujus libidines, cum illius continentia: ab illo, qui cepit, conditas; ab hoc, qui constitutas accepit, captas dicetis Syracusas.

116. Ac jam illa omitto, quæ dispersæ a me multis locis dicentur, ac dicta sunt: forum Syracusanorum, quod introitu Marcelli purum a cæde servatum est, id adventu Verris Siculorum innocentium sanguine redundasse: portum Syracusanorum, qui tum & nostris classibus, & Carthaginiensium clausus fuisset, eum, isto prætore, Cilicum myoparoni, prædonibusque patuisse. Mitto adhibitam vim ingenuis, matresfamiliâs violatas; quæ tum, urbe captâ, commissæ non sunt, neque odio hostili, neque licentiâ militari, neque more belli, neque jure victoriæ: mitto, inquam, hæc omnia, quæ ab isto per triennium perfectæ sunt: ea, quæ conjuncta cum illis rebus sunt, de quibus antea dixi, cognoscite.

117. Urbem Syracusas maximam esse Græcarum urbium, pulcherrimamque omnium, sæpe audistis. Est, Judices, ita,

ut dicitur; nam & situ est quum munito, tum ex omni aditu, vel terrâ, vel mari, præclaro ad adspectum: & portus habet propè in ædificatione, adspectuque urbis inclusos; qui quum diversos inter se aditus habeant, in exitu conjunguntur, & confluunt. Eorum conjunctione pars oppidi, quæ appellatur insula, mari disjuncta angusto, ponte rursus adjungitur, & continetur.

LIII. Ea tanta est urbs, ut ex quatuor urbibus maximis constare dicatur; quarum una est ea, quam dixi, insula: quæ duobus portibus cincta, in utriusque portus ostium, aditumque projecta est; in qua domus est, quæ regis Hieronis fuit, quâ prætores uti solent: in ea sunt ædes sacræ complures; sed duæ, quæ longè ceteris antecellunt: Dianæ una; & altera, quæ fuit ante istius adventum ornatissima, Minervæ. In hac insula extrema est fons aquæ dulcis, cui nomen Arethusa est, incredibili magnitudine, plenissimus piscium; qui fluctu totus operiretur, nisi munitione, ac mole lapidum a mari disjunctus esset.

119. Altera autem est urbs Syracusis, cui nomen Acradina est; in qua forum maximum, pulcherrimæ porticus, ornatissimum prytaneum, amplissima est curia, templumque egregium Jovis Olym-

pü, ceteræque urbis partes unâ latâ viâ perpetuâ, multisque transversis divisæ, privatis ædificiis continentur. Tertia est urbs, quæ, quòd in ea parte Fortunæ fanum antiquum fuit, Tycha nominata est; in qua & gymnasium amplissimum est; & complures ædes sacrae: coliturque ea pars, & habitatur frequentissimè. Quarta autem est urbs, quæ quia postrema ædificata est, Neapolis nominatur; quam ad summam theatrum est maximum: præterea duo templa sunt egregia, Cereris unum, alterum Liberæ; signumque Apollinis, qui Temenites vocatur, pulcherrium, & maximum: quod iste si portare potuisset, non dubitasset auferre.

LIV. Nunc ad Marcellum revertar, ne hæc a me sine causa commemorata esse videantur: qui quum tam præclaram urbem vi, copiisque cepisset, non putavit ad laudem populi Romani hoc pertinere, hanc pulchritudinem, ex qua præsertim nihil periculi ostenderetur, delere, & extinguere: itaque ædificiis omnibus, publicis & privatis, sacris & profanis, sic pepercit, quasi ad ea defendenda cum exercitu, non expugnanda venisset: in ornatu urbis habuit victoriæ rationem, habuit humanitatis: victoriæ putabat esse, multa Romam deportare, quæ ornamento urbi esse possent; humanitatis, non planè

spoliare urbem, præsertim quam conservare voluisset.

121. In hac partitione ornatûs, non plus victoria Marcelli populo Romano appetivit, quàm humanitas Syracusanis reservavit. Romam quæ asportata sunt, ad ædem Honoris, atque Virtutis, itemque aliis in locis videmus: nihil in ædibus, nihil in hortis posuit, nihil in suburbano: putavit, si urbis ornamenta domum suam non contulisset, domum suam ornameto urbi futuram. Syracusis autem permulta, atque egregia reliquit: deum verò nullum violavit, nullum attigit. Conferte Verrem; non ut hominem cum homine comparetis, ne qua tali viro mortuo fiat injuria: sed ut pacem cum bello; leges cum vi; forum & jurisdictionem cum ferro & armis; adventum & comitatum cum exercitu & victoriâ conferatis.

L V. Ædes Minervæ est in insula, de qua antè dixi; quam Marcellus non attigit: quam plenam, atque ornatam reliquit: quæ ab isto sic spoliata, atque direpta est, non ut ab hoste aliquo, qui tamen in bello, religionum & consuetudinis jura retineret, sed ut a barbaris prædonibus vexata esse videatur. Pugna erat equestris Agathoclis regis in tabulis picta præclare: his autem tabulis interiores templi parietes vestiebantur: nihil



*ACTIONIS II. L. IV. 235*

erat eâ picturâ nobilius : nihil Syracusis , quod magis visendum putaretur : has tabulas M. Marcellus , quum omnia illa victoriâ suâ profana fecisset , tamen religione impeditus non attigit : iste , quum illa jam , propter diuturnam pacem , fidelitatemque populi Syracusani , sacra , religiosaque accepisset , omnes eas tabulas abstulit : parietes , quorum ornatus tot secula manserat , tot bella effugerat , nudos , ac deformatos reliquit.

123. Et Marcellus , qui , si Syracusas cepisset , duo templa se Romæ dedicaturum voverat , id , quod erat ædificaturus , his rebus ornare , quas ceperat , noluit : Verres , qui non Honori , neque Virtuti , ut ille , sed Veneri , & Cupidini vota deberet , is Minervæ templum spoliare conatus est : ille deos deorum spoliis ornare noluit ; hic ornamenta Minervæ virginis in meretriciam domum transtulit. Viginti & septem præterea tabulas pulcherrimè pictas , ex eadem æde sustulit : in quibus erant imagines Siciliæ regum , ac tyrannorum , quæ non solum pictorum artificio delectabant , sed etiam commemoratione hominum , & cognitione formarum. Ac videte , quantò tetrior hic tyrannus Syracusanus fuerit , quàm quisquam superiorum ; quum illi tamen ornarint templa deorum immortalium ; hic

etiam deorum monumenta , atque ornamenta sustulerit.

LVI. Jam verò quid ego de valvis illius templi commemorem ? vereor , ne hæc qui non viderunt , omnia me nimis augere , atque ornare arbitrentur : quod tamen nemo suspicari debet , tam esse me cupidum , ut tot viros primarios velim , præsertim ex judicum numero , qui Syracusis fuerint , qui hæc viderint , esse temeritati , & mendacio meo conscios. Confirmare hoc liquidò , Judices , possum , valvas magnificentiores , ex auro , atque ebore perfectiores nullas umquam ullo templo fuisse : incredibile dictu est , quàm multi Græci de valvarum harum pulchritudine scriptum reliquerint : nimium forsitan hæc illi mirentur , atque efferant : esto ; verumtamen honestius est reipublicæ nostræ , Judices , ea , quæ illis pulchra esse videantur , imperatorem nostrum in bello reliquisse , quàm prætorem in pace abstulisse. Ex ebore diligentissimè perfecta argumenta erant in valvis : ea detrahenda curavit omnia. Gorgonis os pulcherrimum , crinitum anguibus , revellit , atque abstulit : & tamen indicavit , se non solum artificio , sed etiam pretio , quæstutque duci : nam bullas aureas omnes ex his valvis , quæ erant & multæ , & graves , non dubitavit auferre ; quarum iste

*ACTIONIS II. L. IV. 237*

non opere delectabatur, sed pondere. Itaque ejusmodi valvas reliquit, ut quæ olim ad ornandum templum erant maximè, nunc tantùm ad claudendum factæ esse videantur.

125. Etiamne gramineas hastas? vidi enim vos in hoc non minimè, quum testes dicerent, commoveri, quòd erant hujusmodi, ut semel vidisse fatis esset: in quibus neque manu factum quidquam, neque pulchritudo erat ulla, sed tantùm magnitudo incredibilis, de qua vel audire fatis esset; nimium, videre plus quàm semel: etiamne id concupisti?

L VII. Nam Sappho, quæ sublata de Prytaneo est, dat tibi justam excusationem, propè ut concedendum, atque ignoscendum esse videatur. Silanionis opus tam perfectum, tam elegans, tam elaboratum, quisquam non modo privatus, sed populus potius haberet, quàm homo elegantissimus, atque eruditissimus Verres! nimirum contrà dici nihil potest: nostrum enim unusquisque, qui tam beati quàm iste est, non sumus, tam delicati esse non possumus: si quando aliquid istiusmodi videre volet, eat ad ædem Felicitatis, ad monumentum Catuli, in porticum Metelli: det operam; ut admittatur in alicujus istorum Tusculanum: spectet forum ornatum, si quid iste suorum ædilibus accom-

modavit : Verres hæc habeat domi ? Verres ornamentis fanorum , atque oppidorum habeat plenam domum , villas referatas ? etiamne hujus operarii studia , ac delicias , Judices , perferetis ? qui ita natus est , ita educatus , ita factus & animo , & corpore , ut multò appositior ad deferenda , quàm ad auferenda signa esse videatur.

127. Atque hæc Sappho sublata quantum desiderium sui reliquerit , dici vix potest : nam quum ipsa fuit egregiè facta , tum epigramma Græcum pernobile incisum habuit in basi , quod iste eruditus homo , & Græculus , qui hæc subtiliter judicat , qui solus intelligit , si unam litteram Græcam scisset , certè non sustulisset : nunc enim quod inscriptum est inani in basi , declarat , quid fuerit , & id ablatum indicat.

128. Quid ? sigum Pæanis ex æde Æsculapii , præclarè factum , sacrum , & religiosum , non sustulisti ? quod omnes propter pulchritudinem visere , propter religionem colere solebant. Quid ? ex æde Liberi simulacrum Aristei non tuo imperio palam ablatum est ? Quid ? ex æde Jovis , religiosissimum simulacrum Jovis Imperatoris , quem Græci Urion nominant , pulcherrimè factum , nonne abstulisti ? Quid ? ex æde Liberæ Parinum illud caput

pulcherrimum, quod visere solebamus, num dubitasti tollere? Atque ille Pæan sacrificiis anniversariis simul cum Æsculapio apud illos colebatur. Aristeus, qui, ut Græci ferunt, Liberi filius, inventor olei esse dicitur, unà cum Libero patre apud illos eodem erat in templo consecratus.

LVIII. Jovem autem Imperatorem quanto honore in suo templo fuisse arbitramini? hinc colligere potestis, si recordari volueritis, quantâ religione fuerit eâdem specie, atque formâ signum illud, quod ex Macedonia captum in Capitolio posuerat Flamininus. Etenim tria ferebantur in orbe terrarum signa Jovis Imperatoris uno in genere pulcherrimè facta: unum illud Macedonicum, quod in Capitolio videmus; alterum, in Ponti ore & angustis; tertium, quod Syracusis ante Verrem prætorem fuit. Illud Flamininus ita ex æde sua sustulit, ut in Capitolio, hoc est, in terrestri domicilio Jovis poneret.

130. Quod autem est ad introitum Ponti; id, quum tam multa ex illo mari bella emerferint, tam multa porro in Pontum invecta sint, usque ad hanc diem integrum, inviolatumque servatum est. Hoc tertium, quod erat Syracusis, quod M. Marcellus, armatus & victor, viderat: quod religioni concesserat: quod cives, atque incolæ

Syracusani colere , advenæ non solum vivere , verum etiam venerari solebant : id Verres ex templo Jovis sustulit.

131. Ut sæpius ad M. Marcellum revertar , Judices , sic habetote : plures esse a Syracusanis istius adventu deos , quàm victoriâ Marcelli homines desideratos. Etenim ille requisisse dicitur etiam Archimēdem illum , summo ingenio hominem , ac disciplinâ , eumque quum audisset interfectum , permolestè tulisse. Iste omnia , quæ requisivit , non ut servaret , verum ut asportaret , requisivit.

LIX. Jam illa , quia leviora videbuntur , si hoc loco dicerentur , ideo præteribo ; quod iste mensas Delphicas e marmore , crateras ex ære pulcherrimas , vim maximam vasorum Corinthiorum , ex omnibus ædibus sacris Syracusis abstulit. Itaque , Judices , hi , qui hospites ad ea , quæ visenda sunt , ducere solent , & unumquidque ostendere , quos illi mystagogos vocant , conversam jam habent demonstrationem suam : nam , ut antè demonstrabant , quid ubique esset : ita nunc , quid undique ablatum sit , ostendunt. Quid tum ? mediocrine tandem dolore eos affectos esse arbitramini ? non ita est , Judices : primum , quod omnes religione moventur ; & deos patrios , quos a majoribus acceperunt , colendos sibi diligenter , & retinendos esse arbitrantur :

arbitrantur : deinde hic ornatus , hæc opera , atque artificia , signa , tabulæ pictæ , Græcos homines nimio opere delectant. Itaque ex illorum querimoniis intelligere possumus , hæc illis acerbissima videri , quæ forsitan nobis levia , & contemnenda esse videantur : mihi credite , Iudices ( tametsi vosmetipsos hæc eadem audire certò scio ) quum multas acceperint per hosce annos focii , atque exteræ nationes calamitates & injurias , nullas Græci homines gravius tulerunt , nec ferunt , quàm hujusmodi spoliationes fanorum , atque oppidorum.

133. Licet iste dicat emisisse se , sicuti solet dicere : credite hoc mihi , Iudices : nulla umquam civitas totâ Asiâ , & Græciâ , signum ullum , tabulam pictam , ullum denique ornamentum urbis , suâ voluntate cuiquam vendidit : nisi fortè existimatis , posteaquam judicia severa Romæ fieri desierint , Græcos homines hæc venditare cœpisse , quæ tum non modò non vendebant , quum judicia fiebant , verùm etiam cœmebant : aut nisi arbitramini , L. Crasso , Q. Scævola , C. Claudio , potentissimis hominibus , quorum ædilitates ornatissimas vidimus , commercium istarum rerum cum Græcis hominibus non fuisse ; iis , qui post judiciorum

dissolutiones ædiles facti sunt, fuisse.

LX. Acerbiorem etiam scitote esse civitatibus falsam istam, & simulatam emptionem, quàm si quis clam furripiat, aut eripiat palam atque auferat: nam turpitudinem summam esse arbitrantur, referri in litteras publicas, pretio adductam civitatem, & pretio parvo, ea, quæ accepisset a majoribus, vendidisse, atque alienasse: etenim mirandum in modum Græci rebus istis, quas nos contemnimus, delectantur. Itaque majores nostri facile patiebantur, hæc esse quamplurima apud socios, ut imperio nostro quàm ornatissimi, florentissimique essent: apud eos autem, quos vectigales, aut stipendiarios fecerant, tamen hæc relinquebant, ut illi, quibus ea jucunda sunt, quæ nobis levia videbantur, haberent hæc oblectamenta, & solatia servitutis.

135. Quid arbitramini Rheginos, qui jam cives Romani sunt, merere velle, ut ab eis marmorea Venus illa auferatur? quid Tarentinos, ut Europam in tauro amittant? ut Satyrum, qui apud illos in æde Vestæ est? ut cetera? quid Thespenses, ut Cupidinis signum, propter quod unum visuntur Thespiæ? quid Cnidios, ut Venerem marmoream? quid, ut pictam, Coos? quid Ephesios, ut Alexandrum?



*ACTIONIS II. L. IV. 243*

quid Cyzicenos , ut Ajacem , aut Medeam ? quid Rhodios , ut Jalysum ? quid Athenienses , ut ex marmore Iacchum , aut Paralum pictum , aut ex ære Myronis buculam ? Longum est , & non necessarium , commemorare , quæ apud quosque visenda sunt totâ Asiâ & Graciâ : verum illud est , quamobrem hæc commemorarim , quodd existimare vos hoc volo , mirum quemdam dolorem accipere eos , ex quorum urbibus hæc auferantur.

LXI. Atque , ut ceteros omittamus , de ipsis Syracusanis cognoscite : ad quos ego quum venissem , sic primò existimabam , ut Romæ ex istius amicis acceperam , civitatem Syracusanam propter Heraclii hereditatem , non minùs esse istam amicam , quàm Mamertinam propter prædarum , ac furtorum omnium societatem : simul & verebar , ne mulierum nobilium , & formosarum gratiâ , quarum iste arbitrio præturam per triennium gesserat , virorumque , quibuscum illæ nuptæ erant , nimiâ in istum non modò lentitudine , sed etiam liberalitate oppugnarer , si quid ex litteris Syracusanorum conquirerem.

137. Itaque Syracusis cum civibus Romanis eram : eorum tabulas exquirebam ; injurias cognoscebam : quum diutius in negotio , curaque fueram , ut requiescerem ,

curamque animi remitterem , ad Carpinatii præclaras tabulas revertēbar : ubi cum equitibus Romanis ex illo conventu honestissimis , illos Verrutios , de quibus antè dixi , explicabam : a Syracusanis prorsus nihil adjumenti neque publicè , neque privatim exspectabam ; neque erat in animo postulare. Quum hæc agerem , repente ad me venit Heraclius is , qui tum magistratum Syracusis habebat , homo nobilis , qui sacerdos Jovis fuisset ; qui honos apud Syracusanos est amplissimus : agit mecum , & cum L. fratre meo , ut , si nobis videretur , adiremus ad eorum senatum : frequentes esse in curia : se jussu senatûs a nobis petere , ut veniremus. Primò nobis fuit dubium , quid ageremus : deinde citò venit in mentem , non esse vitandum nobis illum conventum & locum.

LXII. Itaque in curiam venimus. Honorificè sanè confurgitur : nos rogatu magistratûs assedimus. Incipit is loqui , qui & auctoritate , & ætate , & , ut mihi visum est , usu rerum antecedeat , Diodorus Timarchides ; cujus omnis oratio hanc habuit primò sententiam : Senatûm , populumque Syracusanum molestè graviterque ferre , quòd ego , quum in ceteris Siciliae civitatibus , senatum populumque docuif-

*ACTIONIS II. L. IV. 245*

fem , quid eis utilitatis , quid salutis afferrem , & quum ab omnibus mandata , legatos , litteras , testimoniaque sumpsissem , in illa civitate nihil ejusmodi facerem. Respondi , neque Romæ in conventu Siculo- rum , quum a me auxilium communi om- nium legationum consilio petebatur , cau- saque totius ad me Siciliae deferebatur , legatos Syracusanorum affuisse : neque me postulare , ut quidquam contra C. Ver- rem decerneretur in ea curia , in qua inauratam C. Verris statuam viderem.

139. Quod posteaquam dixi , tantus est gemitus factus adspectu statuæ , & com- memoratione , ut illud in curia positum monumentum scelerum , non beneficio- rum videretur. Tum pro se quisque , quan- tum dicendo assequi poterat , docere me cœpit , ea , quæ paulò antè commemora- vi : spoliata urbem , fana direpta : ex He- raclii hereditate , quam palæstritis conces- sisset , multò maximam partem ipsum abs- tulisse : neque postulandum fuisse , ut ille palæstritas diligeret , qui etiam invento- rem olei deum sustulisset : neque illam sta- tuam esse ex pecunia publica , neque pu- blicè datam : sed eos , qui hereditatis di- ripiendæ participes fuissent , faciendam , statuendamque curasse : eosdem Romæ fuisse legatos , illius adjutores improbita-

tis, socios furtorum, conscios flagitiorum : eò minùs mirari me oportere, si illi communi legatorum voluntati, & salutì Siciliæ defuissent.

LXIII. Ubi eorum dolorem ex illius injuriis, non modò non minorem, sed propè majorem, quàm ceterorum Siculorum esse cognovi : tum meum animum in illos, tum mei consilii, negotiique totius suscepti causam, rationemque proposui : tum eos hortatus sum, ut causæ communi, salutique ne deessent ; ut illam laudationem, quam se vi, ac metu coactos, paucis illis diebus, decreisse dicebant, tollerent. Itaque, Judices, Syracusani hæc faciunt, istius clientes, atque amici : primum mihi litteras publicas, quas in ærario sanctiore conditas habebant, proferunt ; in quibus ostendunt omnia, quæ dixi ablata esse, perscripta, & plura etiam, quàm ego potui dicere : perscripta autem hoc modo, *Quòd ex æde Minervæ hoc & illud abesset : quòd ex æde Jovis, quòd ex æde Liberi* : ut quisque eis rebus tuendis, conservandisque præfuerat, ita perscriptum erat, quum rationem ex lege redderet, & quæ acceperat, deberet tradere ; petisse, ut sibi, quòd hæ res abessent, ignosceretur : itaque omnes liberatos discessisse, & esse ignotum omnibus : quas ego litte-

ras obsignandas publico signo, deportandasque curavi.

141. De laudatione autem ratio sic redita est: primum, quum a Verre litteræ aliquantò ante adventum meum, de laudatione venissent, nihil esse decretum: deinde, quum quidam ex illius amicis commonerent, oportere decerni; maximo esse clamore & convicio repudiatos: posteaquam meus adventus appropinquarit, imperasse eum, qui summam potestatem haberet, ut decernerent: decretum ita esse, ut multò plus illa laudatio mali, quàm boni possit afferre. Id adeo, Iudices, ut mihi ab illis demonstratum est, sic vos ex me cognoscite.

LXIV. Mos est Syracusis, ut, si qua de re ad senatum referatur, dicat sententiam, qui velit: nominatim nemo rogatur: & tamen, ut quisque honore, & ætate antecedit, ita primus solet suâ sponte dicere; idque a ceteris ei conceditur: si quando taceant omnes, tunc fortitò coguntur dicere. Quum hic mos esset, refertur ad senatum de laudatione Verris: in quo primum ut aliquid esset moræ, multi interpellant: de Sex. Peducæo, qui de illa civitate, totaque provincia optimè meritus esset, sese antea, quum audissent ei negotium facessitum, quumque eum

publicè pro plurimis ejus, & maximis meritis laudare cuperent, a C. Verre prohibitos esse: iniquum esse, tametsi Peducæus eorum laudatione jam non uteretur, tamen non id priùs decernere, quod aliquando voluissent, quàm quod tum cogerentur.

143. Conclamant omnes, & approbant ita fieri oportere. Refertur de Peducæo: ut quisque ætate, & honore antecederet, ita sententiam dixit ex ordine. Id adeo ex ipso senatusconsulto cognoscite: nam principum sententiæ perscribi solent. Recita. *QUOD verba facta sunt de Sex. Peducæo.* Dicit, qui primi suaserint: decernitur. Refertur deinde de Verre: dic, quæso, quomodo? *QUOD verba facta sunt de C. Verre.* Quid postea scriptum est? *Quum surgeret nemo, neque sententiam diceret.* Quid hoc est? *Sors ducitur.* Quamobrem? nemo erat voluntarius laudator præturæ tuæ, defensor periculorum tuorum, præsertim quum inire a prætore gratiam posset? nemo: ipsi illi tui convivæ, consiliarii, conscii, focii, verbum facere non audebant: in qua curia statua tua stabat, & nuda in ea filii, nemo fuit, quem ne nudus quidem filius in nuda provincia commoveret.

144. Atque etiam hoc me docent, ejusmodi senatusconsulto sese fecisse laudationem, ut omnes intelligere possent, non

laudationem, sed. potius irrisiōem esse illam, quæ commonefaceret istius turpem, calamitosamque præturam. Etenim scriptum esse ita, *Quod iste virgis neminem cecidisset*; a quo cognoscitis, nobilissimos homines, atque innocentissimos securi esse percussos: *Quod vigilanter provinciam administrasset*; cuius omnes vigilias in stupris constat, adulteriisque esse consumptas: hoc autem scriptum etiam, quod proferre non auderet reus, accusator recitare non desineret, *Quod prædones procul ab insula Sicilia prohibuisset Verres*; quos etiam intra Syracusanam insulam recepisset. Quæ posteaquam ex illis cognovi, discessi cum fratre e curia, ut, nobis absentibus, si quid vellent, decernerent.

LXV. Decernunt statim: primum, *Ut cum L. fratre hospitium publicè fieret*, quod is eandem voluntatem erga Syracusanos suscepisset, quam ego semper habuissem: id non modò tum scripserunt, verum etiam in ære incisum nobis tradiderunt. Valde hercle te Syracusani tui, quos cæbrò commemorare soles, diligunt; qui cum accusatore tuo satis justam causam conjungendæ necessitudinis putant, quod te accusaturus sit, & quod ad inquirendum in te venerit. Postea decernitur, ac non variè, sed propè conjunctis sententiis, *Ut lauda-*

*tio, quæ C. Verri decreta esset, tolleretur.*

146. At verò quum jam non solum discessio facta esset, sed etiam perscriptum, atque in tabulas relatum, prætor appellatur. At quis appellat? magistratus aliquis? nemo. Senator? ne id quidem. Syracusanorum aliquis? minimè. Quis igitur prætorem appellat? qui quæstor istius fuerat, Cæsetius. O rem ridiculam! ô desertum hominem! ô desperatum, ac relictum a magistratu Siculo! Ne senatusconsultum Siculi homines facere possent, ne suum jus suis moribus, suis legibus obtinere possent, non amicus istius, non hospes, non denique aliquis Siculo, sed quæstor prætorem appellat. Quis hoc vidit? aut quis audivit? Prætor æquus & sapiens, dimitti jubet senatum; concurrunt ad me maxima multitudo: primum senatores clamare, eripi sibi jus, eripi libertatem: populus senatum laudare, gratias agere: cives Romani a me nusquam discedere: quo quidem die nihil ægrius factum est, multo labore meo, quàm ut manus ab illo appellatore abstergerentur. Quum ad prætorem in jus adissemus, excogitat sanè diligenter, & cautè, quid decernat: nam antè quàm verbum facerem, de sella surrexit, atque abiit. Itaque tum de foro, quum jam advesperasceret, discessimus.



LXVI. Postridie manè ab eo postulo, ut Syracusanis liceret senatusconsultum, quod pridie fecissent, mihi reddere. Ille enimverò negat : & ait, indignum facinus esse, quod ego in senatu Græco verba fecissem : quod quidem apud Græcos Græcè locutus essem, id ferri nullo modo posse. Respondi homini, ut potui, ut volui, ut debui : tum multa, tum etiam hoc me memini dicere, facile esse perspicuum, quantum inter hunc, & illum Numidicum, verum & germanum Metellum, interesset : illum noluisse suâ laudatione juvare L. Lucullum, sororis virum, quicum optimè convenisset : hunc homini alienissimo a civitatibus laudationes per vim, & metum comparare.

148. Quod ubi intellexi, multum apud illum recentes nuntios, multum tabulas non commendatitias, sed tributarias valuisse ; admonitu ipsorum Syracusanorum impetum in eas tabulas facio, in quibus singula perscripta erant. Ecce autem nova turba, atque rixa : ne tamen istum omnino Syracusis sine amicis, sine hospitibus, planè nudum esse, ac desertum putetis ; retinere cœpit tabulas Theomnastus quidam, homo ridiculè insanus, quem Syracusani Theoraetum vocant : qui illic ejusmodi est, ut eum pueri sectentur ; ut om-

nes quum loqui cœperit, irrideant. Hujus tamen infania, quæ ridicula est aliis, mihi tum molesta sanè fuit: nam quum spumas ageret in ore, arderent oculi, voce maximâ vim me sibi afferre clamaret; copulati in jus pervenimus.

149. Hic ego postulare cœpi, ut mihi tabulas obsignare, ac deportare liceret. Ille contrà dicere: negare esse illud senatusconsultum, in quo prætor appellatus esset; negare id mihi tradi oportere: ego legem recitare, omnium mihi tabularum, & litterarum fieri potestatem oportere. Contrà, ille furiosus urgere, nihil ad se nostras leges pertinere. Prætor intelligens, negare sibi placere, quod senatusconsultum ratum esse non deberet, id me Romam deportare. Quid multa? nisi vehementius homini minatus essem: nisi legum sanctionem, pœnamque recitassem: tabularum mihi potestas facta non esset. Ille autem insanus, qui pro isto contra me vehementissimè declamasset, postquam non impetravit; credo, ut in gratiam mecum rediret, libellum mihi dat, in quo istius furta Syracusana perscripta erant; quæ ego antea jam ab aliis cognoram, & acceperam.

LXVII. Laudent te sanè jam Mamertini, qui ex tanta provincia soli sunt, qui

tè saluum velint : ita tamen laudent , ut Hejus , qui ejus princeps legationis est , adsit : ita laudent , ut ad ea , quæ rogati erunt , mihi parati sint respondere. Ac ne subitò a me opprimantur , hæc sum rogaturus : *Navem populo Romano debeantne ? fatebuntur. Præbuerintne , prætor C. Verre ? negabunt. Edificaverintne navem onerariam maximam publicè , quam Verri dederunt ? negare non poterunt. Frumentumne ab his sumpserit Verres , quod populo Romano mitteret , sicuti superiores ? negabunt. Quid militum , aut nautarum per triennium dederint ? nullum datum dicenti.* Fuisse Messanam omnium istius furtorum , ac prædarum receptricem , negare non poterunt : permulta multis navibus illinc exportata : hanc navem denique maximam a Mamertinis datam , onustam , cum isto prætor profectam fatebuntur.

151. Quamobrem tibi habe sanè istam laudationem Mamertinam : Syracusanam quidem civitatem , ut abs te affecta est , ita in te esse animatam videmus ; apud quos etiam Verrea illa flagitiosa sublata sunt : etenim minimè conveniebat , ei deorum honores haberi , qui simulacra deorum sustulisset. Etiam mehercule illud in Syracusanis meritò reprehenderetur , si , quum diem festum ludorum de fastis suis

254 *IN VER. ACT. II. L. IV.*

sustulissent celeberrimum, & sanctissimum, quòd eo ipso die Syracusæ a Marcello captæ esse dicuntur, iidem diem festum Verris nomine agerent; quum iste Syracusanis, quæ ille calamitosus dies reliquerit, ademisset. At videte hominis impudentiam, atque arrogantiam, Iudices, qui non solum Verrea hæc turpia, ac ridicula ex Heraclii pecunia constituerit, verum etiam Marcellea tolli imperarit, ut ei sacra facerent quotannis, cujus operâ omnium annorum sacra, deosque patrios amiserant; ejus autem familiæ dies festos tollerent, per quam ceteros quoque festos dies recuperarant.





ACTIONIS SECUNDÆ  
IN VERREM  
LIBER QUINTUS.  
DE SUPPLICIIS.  
ORATIO DECIMA.

*De Suppliciis hæc oratio inscribitur ;  
eaque quadripartita est. Fingit Tul-  
lius ab Hortensio Verris defensio-  
nem sic constitui , ut contendat eum  
imperatorem esse bonum & felicem ,  
atque ad dubia reipublicæ tempora  
reservandum. At primò nulla virtus  
ejus enituit in bello fugitivorum ,  
ex reliquiis Spartaci conflato : quod  
neque fuit ullum , nec esse potuit in  
Sicilia , nec ab isto provisum est ,  
ne quod esset. Deinde verò nihil ille  
bellicæ laudis adeptus est in bello*

*maritimo, adversus piratas & prædones, in quo bello negligenter, libidinosè, avarè versatus est. Tertia pars est de crudelitate Verris in navarchos, quorum sanguine avaritiæ suæ crimina exstinguere conatus est. Quarta de Suppliciis civium Romanorum, unde & huic libro nomen a veteribus inditum est. Concludit orator precatatione ad deos, quorum sacra a Verre violata sunt, ut dignus eum tot criminibus exitus consequatur.*

**N**EMINI video dubium esse, Judices; quin apertissimè C. Verres in Sicilia, sacra, profanaque omnia, & privatim, & publicè spoliavit, versatusque sit sine ulla non modò religione, verùm etiam dissimulatione in omni genere furandi, atque prædandi: sed quædam mihi magnifica, & præclara ejus defensio ostenditur; cui quemadmodum resistam, multò mihi antè est, Judices, providendum. Ita enim causa constituitur, provinciam Siciliam virtute ejus, & vigilantia singulari, dubiis, formidolosisque temporibus, a fugitivis, at-

que a belli periculis tutam esse servatam.

2. Quid agam, Judices? quò accusationis meæ rationem conferam? quò me vertam? ad omnes enim meos impetus, quasi murus quidam, boni nomen imperatoris opponitur. Novi locum: video, ubi se jactaturus sit Hortensius: belli pericula, tempora reipublicæ, imperatorum penuriam commemorabit: tum deprecabitur a vobis, tum etiam pro suo jure contendet, ne patiamini, talem imperatorem populo Romano Siculorum testimoniis eripi; neve obteri laudem imperatoriam criminibus avaritiæ velitis.

3. Non possum dissimulare, Judices: timeo, ne C. Verres propter hanc virtutem eximiam in re militari, omnia, quæ fecit, impunè fecerit: venit enim mihi in mentem, in judicio M'. Aquilii quantum auctoritatis, quantum momenti oratio M. Antonii habuisse existimata sit: qui, ut erat in dicendo non solum sapiens, sed etiam fortis, causâ propè peroratâ, ipse arripuit M'. Aquilium, constituitque in conspectu omnium, tunicamque ejus a pectore abscidit, ut cicatrices populus Romanus, judicesque adspicerent, adverso corpore exceptas: simul & de illo vulnere, quod ille in capite ab hostium duce acceperat, multa dixit: eoque adduxit eos, qui erant judicaturi, vehementer ut

vererentur , ne , quem virum fortuna ex hostium telis eripuisset , quum sibi ipse non pepercisset , hic non ad populi Romani laudem , sed ad judicium crudelitatem videretur esse servatus. Hæc eadem nunc ab illis defensionis ratio , viaque tentatur : idem quaeritur. Sit fur , sit sacrilegus , sit flagitiorum omnium , vitiorumque princeps : at est bonus imperator , & felix , & ad dubia reipublicæ tempora reservandus.

II. Non agam summo jure tecum : non dicam id , quod debeam forsitan obtinere ; quum judicium certâ lege sit constitutum , non quid in re militari fortiter feceris , sed , quemadmodum manus ab alienis pecuniis abstinueris , abs te doceri oportere : non , inquam , sic agam , sed ita quæram , quemadmodum te velle intelligo , quæ tua opera , & quanta fuerit in bello.

5. Quid dices ? an bello fugitivorum Siciliam virtute tuâ liberatam ? magna laus , honesta oratio : sed tamen quo bello ? nos enim post id bellum , quod M'. Aquilius confecit , sic accepimus , nullum in Sicilia fugitivorum bellum fuisse. At in Italia fuit : fateor , & magnum quidem , ac vehemens : num igitur ex eo bello partem aliquam laudis appetere conaris ? num tibi illius victoriæ gloriam cum M. Crasso , aut Cn. Pompeio communicandam putas ? non arbitror



hoc etiam deesse tuæ impudentiæ, ut quidquam ejusmodi dicere audeas. Obstitisti videlicet, ne ex Italia transire in Siciliam fugitivorum copiæ possent: ubi? quando? qua ex parte? quum aut navibus, aut ratibus conarentur accedere? nos enim nihil umquam prorsus audivimus: & illud audivimus, M. Crassi, fortissimi viri, virtute, consilioque factum, ne ratibus conjunctis, freto fugitivi ad Messanam transire possent: a quo illi conatu non tantopere prohibendi fuissent, si ulla in Sicilia præsidia ad illorum adventum opposita putarentur.

III. At quum esset in Italia bellum tam propè a Sicilia, tamen in Sicilia non fuit? quid mirum? ne quum in Sicilia quidem fuit, eodem intervallo, pars ejus belli in Italiam ulla pervasit. Etenim propinquitas locorum ad utram partem hoc loco profertur? utrùm aditum facilem hostibus, an contagionem imitandi ejus belli periculofam fuisse? Aditus omnis hominibus sine ulla facultate navium non modò disjunctus, sed etiam clausus fuit: ut illis, quibus Siciliam propinquam fuisse dicis, facilius fuerit ad oceanum pervenire, quàm ad Peloridem accedere.

7. Contagio autem ista servilis belli, cur abs te potiùs, quàm ab iis omnibus, qui ceteras provincias obtinuerunt, præ-

dicatur ? an quòd in Sicilia jam antè bella fugitivorum fuerunt ? At ea ipsa causa est , cur ipsa provincia minimo in periculo sit , & fuerit. Nam posteaquam illinc M'. Aquilius decessit , omnium instituta , atque edicta prætorem fuerunt ejusmodi , ut ne quis cum telo servus esset. Vetus est quod dicam , & propter severitatem exempli nemini fortasse vestrùm inauditum : L. Domitium prætorem in Sicilia , quum aper ingens ad eum allatus esset , admiratum requisisse , quis eum percussisset : quum audisset , pastorem cujusdam fuisse , eum ad se vocari jussisse : illum cupidè ad prætorem , quasi ad laudem , atque ad præmium accurrisse : quæsisse Domitium , quì tantam bestiam percussisset : illum respondisse , venabulo : statim deinde jussu prætoris in crucem esse sublatum. Durum hoc fortasse videatur : neque ego ullam in partem disputo : tantum intelligo , maluisse Domitium crudelem in animadvertendo , quàm in prætermittendo dissolutum videri.

IV. Ergo his institutis provinciæ , jam tum , quum bello fugitivorum tota Italia arderet , homo non acerrimus , nec fortissimus C. Norbanus , in summo otio fuit : perfacile enim sese Sicilia tuebatur , ne quod in ipsa bellum posset exsistere : etenim quum nihil tam conjunctum sit , quàm negotiatores nostri cum Siculis , usu , re ,

ratione, concordia; & quum ipsi Siculi res suas ita constitutas habeant, ut his pacem expediat esse: imperium autem populi Romani sic diligant, ut id imminui, aut commutari minimè velint: quumque hæc ab servorum bello pericula, & prætorum institutis, & dominorum disciplinâ, provisâ sint: nullum malum est domesticum, quod ex ipsa provincia nasci possit.

9. Quid igitur? nulline motus in Sicilia servorum, Verre prætor? nullane consensiones factæ esse dicuntur? nihil sanè, quod ad senatum, populumque Romanum pervenerit: nihil, quod iste Romam publicè conscripserit: & tamen cœptum esse in Sicilia moveri aliquot locis servitium suspicor: id adeo non tam ex re, quàm ex istius factis, decretisque cognosco. Ac videte, quàm non inimico animo sim acturus: ego ipse hæc, quæ ille quærit, quæ adhuc numquam audistis, commemorabo, & proferam. In Tricalino, quem locum fugitivi jam antè tenuerunt, Leonidæ cujusdam Siculi familia in suspicionem vocata est conjurationis: res delata ad istum: statim, ut par fuit, jussu ejus homines, qui nominati erant, comprehensi sunt, adductique Lilybæum: domino denuntiatum est: causâ dictâ damnati sunt.

V. Quid deinde? quid censetis? furtum fortasse, aut prædam expectatis aliquam.

Nolite usquequaque eadem quærere. In metu belli, furandi qui locus potest esse? etiam si qua fuit in hac re occasio, prætermiſſa eſt. Tum potuit a Leonida nummorum aliquid auferre, quum denuntiavit, ut adeſſet: fuit nundinatio aliqua, & iſti non nova, ne cauſam diceret: etiam alter locus, ut abſolverentur: damnatis quidem ſervis, quæ prædandi poteſt eſſe ratio? produci ad ſupplicium neceſſe eſt: teſtes enim ſunt, qui in conſilio fuerunt: teſtes, publicæ tabulæ: teſtis, ſplendidiffima civitas Lilybætana: teſtis, honeſtiſſimus, maximuſque conventus civium Romanorum; nihil poteſt: producendi ſunt: itaque producuntur, & ad palum alligantur.

11. Etiam nunc mihi exſpectare vide-mini, Iudices; quid deinde factum ſit, quòd iſte nihil umquam fecit ſine aliquo quæſtu, atque præda. Quid in ejuſmodi re fieri potuit? quod commodum eſt? Exſpectate facinus, quàm vultis improbum: vincam tamen exſpectationem omnium. Nomine ſcleris, conjurationiſque damnati, ad ſupplicium traditi, ad palum alligati, repente, multis millibus hominum inſpectantibus, ſoluti ſunt, & Leonidæ illi domino redditæ. Quid hoc loco potes dicere, homo amentiffime? niſi id, quod ego non quæro: quod denique in re tam

nefaria, tametsi dubitari non potest, tamen, ne, si dubitetur quidem, quæri oporteat; quid, aut quantum, aut quomodo acceperis: remitto tibi hoc totum, atque istâ te curâ libero; neque enim metuo, ne hoc cuiquam persuadeatur, ut, ad quod facinus nemo, præter te, ullâ pecuniâ adduci potuerit, id tu gratis suscipere conatus sis: verum de istâ furandi, prædandique ratione nihil dico: de hac imperatoria jam tua laude disputo.

VI. Quid ais, bone custos, defensorque provinciæ? tu, quos servos arma capere, ac bellum facere in Sicilia voluisse cognoras, & de consilii sententia iudicaras; hos ad supplicium jam more majorum traditos, & ad palum alligatos, ex media morte eripere, ac liberare ausus es? ut, quam damnatis servis crucem fixeras, hanc indemnatis civibus Romanis reservares? Perditæ civitates, desperatis omnibus rebus, hos solent exitus exitiales habere, ut damnati in integrum restituantur, vincti solvantur, exfules reducantur, res iudicatæ rescindantur: quæ quum accidunt, nemo est, quin intelligat ruere illam rempublicam: hæc ubi eveniunt, nemo est, qui ullam spem salutis reliquam esse arbitretur.

13. Atque hæc sicubi facta sunt, facta sunt, ut homines populares, aut nobiles

supplicio, aut exsilio levarentur; at non ab his ipsis, qui judicassent; at non statim; at non eorum facinorum damnati, quæ ad vitam, & omnium fortunas pertinerent. Hoc verò novum, & ejusmodi est, ut magis propter reum, quàm propter rem ipsam credibile videatur, ut homines servos; ut ipse, qui judicarat; ut statim e medio supplicio dimiserit; ut ejus facinoris damnatos servos, quod ad omnium liberorum caput, & sanguinem pertineret.

14. O præclarum imperatorem, nec jam cum M'. Aquilio, fortissimo viro, sed verò cum Paulis, Scipionibus, Mariis conferendum! Tantumne vidisse in metu, periculoque provinciæ? quum servitiorum animos in Sicilia suspensos propter bellum Italiæ fugitivorum videret: ne quis se commovere auderet, quantum terroris injecit? Comprehendi jussit: quis non pertimescat? causam dicere dominos: quid servis tam formidolosum? *Fecisse videri* pronuntiavit: exortam videtur flammam paucorum dolore, ac morte restinxisse. Quid deinde sequitur? verbera, atque ignes, & illa extrema ad supplicium damnatorum, metum ceterorum, cruciatus, & crux: hisce omnibus suppliciis sunt liberati. Quis dubitet, quin servorum animos summâ formidine oppresserit, quum  
viderent

viderent eâ facilitate prætorem , ut ab eo , sceleris conjurationisque damnatorum vita , vel ipso carnifice internuntio , redimeretur ? Quid ? hoc in Apolloniensi Aristodamo ? quid ? in Leonida Imacharensi non idem fecisti ?

VII. Quid ? iste motus servorum , bellicque subita suspicio , utrùm tibi tandem diligentiam custodiendæ provinciæ , an novam rationem improbissimi quæstus attulit ? Haliciensis Eumenidæ , nobilis hominis , & honesti , magnæ pecuniæ villicus , quum impulsu tuo insimulatus esset , H-S LX a domino accepisti : quod nuper ipse juratus docuit , quemadmodum gestum esset. Ab equite Romano , C. Matrino absente , quum is esset Romæ , quòd ejus villicos , pastoresque tibi in suspicionem venisse dixeras , H-S centum abstulisti : dixit hoc L. Flavius , qui tibi eam pecuniam numeravit , procurator C. Matrinii : dixit ipse C. Matrinus : dicet vir clarissimus Cn. Lentulus censor , qui Matrinii honoris causâ , recenti negotio ad te litteras misit , mittendasque curavit.

16. Quid ? de Apollonio , Diocli filio , Panormitano , cui Geminus cognomen est , præteriri potest ? ecquid hoc totâ Siciliâ clarius ? ecquid indignius , ecquid manifestius proferri potest ? quem is , uti Panormum venit , ad se vocari , & de tribu-

nali citari jussit, concursu magno, frequentiaque conventus. Homines statim loqui : mirari, quod Apollonius, homo pecuniosus, tamdiu ab isto maneret integer : exco-gitavit : nescio quid attulit : profecto homo dives repente a Verre non sine causa citatur : expectatio summa omnium, quidnam id esset ; quum exanimatus subito ipse accurrit cum adolescente filio : nam pater, grandis natu, jam diu lecto tenebatur.

17. Nominat iste servum, quem magistrum pecoris esse diceret : eum dicit conjurasse, & alias familias concitasse : is omnino servus in familia non erat : eum statim exhibere jubet. Apollonius affirmare ; servum se omnino illo nomine habere neminem. Iste hominem abripi a tribunali, & in carcerem conjici jubet : clamare ille, quum raperetur, nihil se miserum fecisse, nihil commisisse : pecuniam sibi esse in nominibus ; numeratam in praesentia non habere. Haec quum maxime summam hominum frequentiam testificaretur, ut quivis intelligere posset, eum, quod pecuniam non dedisset, idcirco illam tam acerbam injuriam affici : quum maxime, ut dico, hoc de pecunia clamaret, in vincla conjectus est.

VIII. Videte constantiam praetoris, & ejus praetoris, qui nunc reus non ita defendatur, ut mediocris praetor ; sed ita laudetur, ut optimus imperator. Quum



servorum bellum metueretur, quo supplicio dominos indemnatos afficiebat, hoc servos damnatos liberabat. Apollonium, locupletissimum hominem, qui, si fugitivi bellum in Sicilia facerent, amplissimas fortunas amitteret, belli fugitivorum nomine, indictâ causâ, in vincla conjecit: servos, quos ipse cum consilio, belli faciendi causâ consensisse judicavit, eos sine consilii sententia, suâ sponte, omni supplicio liberavit.

19. Quid? si ab Apollonio aliquid commissum est, quamobrem jure in eum animadverteretur; tamenne hanc rem sic agemus, ut crimini, aut invidiæ reo putemus esse oportere, si quo de homine severius judicavit? Non agam tam acerbè: non utar istâ accusatoriâ consuetudine, si quid est factum clementer, ut dissolutè factum criminer; si quid vindicatum severè est, ut ex eo crudelitatis invidiam colligam: non agam istâ ratione: tua sequar judicia: tuam defendam auctoritatem, quoad tu voles: simul ac tute coeperis tua judicia rescindere, mihi succensere desinito: meo enim jure contendam, eum, qui suo judicio condemnatus sit, juratorum judicium sententiis damnari oportere.

20. Non defendam Apollonii causam; amici, atque hospitis mei; ne tuum judicium videar rescindere: nihil de hominis

frugalitate, virtute, diligentia dicam: praetermittam illud etiam, de quo antea dixi, fortunas ejus ita constitutas fuisse, familia, pecore, villis, pecuniis creditis, ut nemini minus expediret, ullum in Sicilia tumultum, aut bellum commoveri: non dicam ne illud quidem, si maxime in culpa fuerit Apollonius, tamen in hominem honestissimum, civitatis honestissimae, tam graviter animadverti, causam indictam, non oportuisse.

21. Nullam invidiam in te, ne ex illis quidem rebus concitabo, quum esset talis vir in carcere, in tenebris, in squalore, in sordibus, tyrannicis interdictis tuis, patri exactam aetate, & adolescenti filio, adeundi ad illum miserum potestatem numquam esse factam: etiam illud praeteribo, quotiescumque Panormum veneris illo anno, & sex mensibus (nam tamdiu fuit in carcere Apollonius) toties ad te senatum Panormitanum adisse supplicem cum magistratibus, sacerdotibusque publicis, orantem, atque obsecrantem, ut aliquando ille miser, atque innocens calamitate illa liberaretur: relinquam haec omnia, quae si velim persequi, facile ostendam, tuam crudelitatem in alios, omnes tibi aditus misericordiae judicum jampridem esse praecclusos.

IX. Omnia igitur ista concedam, & remittam: praevideo enim, quid sit defen-

furus Hortensius : fatebitur , apud istum neque senectutem patris , neque adolescentiam filii , neque lacrymas utriusque plus valuisse , quàm utilitatem , salutemque provinciæ : dicet , rempublicam administrari sine metu , ac severitate non posse : quæret , quamobrem fasces prætoribus præferantur , cur secures datæ , cur carcer ædificatus , cur tot supplicia sint in improbos more majorum constituta ? quæ quum omnia graviter , severèque dixerit : quæram , cur hunc eundem Apollonium Verres idem , repentè , nullâ novâ re allatâ , nullâ defensione , sine causa de carcere emitti jusserit ? tantumque in hoc crimine suspicionis esse affirmabo , ut jam ipsis iudicibus sine mea argumentatione conjecturam facere permittam , quod hoc genus prædandi , quàm improbum , quàm indignum , quàmque ad magnitudinem quæstûs immensum , infinitumque esse videatur.

23. Nam quæ iste in Apollonio fecit , ea primùm breviter cognoscite , quot & quanta sint : deinde hæc expendite , atque æstimate pecuniâ : reperietis , idcirco hæc in uno homine pecunioso tot constituta , ut ceteris formidines similium incommodorum , atque exempla periculorum proponerentur. Primùm insimulatio est repentina , capitalis , atque invidiosi criminis.

Statuite , quanti hoc putetis , & quàm multos redemisse. Deinde crimen sine accusatore , sententia sine consilio , damnatio sine defensione. Æstimate harum rerum omnium pretia ; & cogitate , in his iniquitatibus unum hæsisse Apollonium : ceteros profectò multos ex his incommodis pecuniâ se liberasse. Postremò tenebræ , vincula , carcer , inclusum supplicium , atque a conspectu parentum , ac liberûm , denique a libero spiritu , & communi luce seclusum.

24. Hæc verò , quæ vel vitâ redimi rectè possunt , æstimare pecuniâ non queo : hæc omnia ferò redemit Apollonius , jam mœrore , ac miseriis perditus : sed tamen ceteros docuit , antè istius avaritiæ , ac sceleris occurrere. Nisi verò existimatis , hominem pecuniosissimum sine aliqua causa quæstûs electum ad tam incredibile crimen , aut sine eadem causa repentè e carcere emissum , aut hoc prædandi genus ab isto in illò uno adhibitum , ac tentatum , & non per illum omnibus pecuniosis Siculis metum propositum , & injectum.

X. Cupio mihi , Iudices , ab illo subijci , quoniam de militari ejus gloria dico , si quid fortè prætereo. Nam mihi videor de omnibus jam rebus ejus gestis dixisse , quæ quidem ad belli fugitivorum pertinerent suspicionem : certè nihil sciens præ-

termisi. Habetis hominis consilia, diligentiam, vigilantiam, custodiam, defensionemque provinciæ. Summa illuc pertinet, ut sciatis, quoniam plura genera sunt imperatorum, ex quo genere iste sit. Ne diutius in tanta penuria virorum fortium talem imperatorem ignorare possitis: non ad Q. Maximi sapientiam, neque ad illius superioris Africani in re gerenda celeritatem, neque ad hujus, qui postea fuit, singulare consilium, neque ad Pauli rationem, ac disciplinam, neque ad C. Marii vim, atque virtutem; sed aliud genus imperatoris sanè diligenter retinendum, & conservandum, quæso, cognoscite.

26. Itinerum primum laborem, qui vel maximus est in re militari, Judices, & in Sicilia maxime necessarius, accipite, quam facilem sibi iste, & jucundum, ratione, consilioque reddiderit. Primum temporibus hibernis, ad magnitudinem frigorum, & ad tempestatum vim ac fluminum, præclarum sibi hoc remedium compararat; urbem Syracusas elegerat; cujus hic situs, atque hæc natura esse loci, cœlique dicitur, ut nullus umquam dies tam magnâ, turbulentâque tempestate fuerit, quin aliquo tempore ejus diei solem homines viderent: hic ita vivebat iste bonus imperator hibernis mensibus, ut eum non facile, non modò extra tectum, sed ne

extra lectum quidem quisquam videret : ita diei brevitās , convivii ; noctis longitudo , stupris , & flagitiis conterebatur. Quum autem ver esse cœperat , cujus initium iste non a Favonio , neque ab aliquo astro notabat ; sed , quum rosam viderat , tunc incipere ver arbitrabatur ; dabat se labori , atque itineribus , in quibus usque eò se præbebat patientem , atque impigrum , ut eum nemo umquam in equo sedentem videret.

XI. Nam , ut mos fuit Bithyniæ regibus , lecticâ octophoro ferebatur ; in qua pulvinus erat perlucidus , Melitensi rosâ farctus : ipse autem coronam habebat unam in capite , alteram in collo , reticulumque ad nares sibi admovebat , tenuissimo lino , minutis maculis , plenum rosæ. Sic confecto itinere , quum ad aliquod oppidum venerat , eâdem lecticâ usque in cubiculum deferrebat : eò veniebant Siculorum magistratus , veniebant equites Romani ; id quod ex multis juratis audistis : controversiæ secretò deferrebantur : paulò post palam decreta auferebantur : deinde , ubi paulisper in cubiculo , pretio , non æquitate jura descripserat ; Veneri jam , & Libero reliquum tempus deberi arbitrabatur.

28. Quo loco mihi non prætermittenda videtur præclari imperatoris egregia , ac

singularis diligentia. Nam scitote esse oppidum in Sicilia nullum ex iis oppidis, in quibus consistere prætores, & conventum agere solent, quo in oppido non isti ex aliqua familia, non ignobili, delecta ad libidinem mulier esset. Itaque nonnullæ ex eo numero in convivium adhibebantur palam: si quæ castiores erant, ad tempus veniebant; lucem, conventumque vitabant: erant autem convivia, non illo silentio prætorum, atque imperatorum, neque eo pudore, qui in magistratum conviviis versari solet, sed cum maximo clamore, atque convicio: nonnumquam etiam res ad manus, atque ad pugnam veniebat. Iste enim prætor severus, ac diligens, qui populi Romani legibus numquam paruisset; illis diligenter legibus, quæ in poculis ponebantur, obtemperabat. Itaque erant exitus ejusmodi, ut alius inter manus e convivio, tamquam e prælio, auferretur; alius, tamquam occisus, relinqueretur: plerique fusi sine mente, ac sine ullo sensu jacerent, quivis ut, quum adspexisset, non se prætoris convivium, sed ut Cannensem pugnam nequitiae videre arbitraretur.

XII. Quum verò æstas summa esse jam cœperat, quod tempus omnes Siciliæ semper prætores in itineribus consumere consueverunt, propterea quòd tum putant

obeundam esse maximè provinciam , quum in areis frumenta sunt , quòd & familiæ congregantur , & magnitudo servitii perspicitur , & labor operis maximè offenditur , & frumenti copia commonet , tempus anni non impedit : tum , inquam , quum concursant ceteri prætores , iste novo quodam ex genere imperator , pulcherrimo Syracusarum luco stativa sibi castra faciebat.

30. Nam in ipso aditu , atque ore portûs , ubi primùm ex alto sinus ad urbem ab littore inflectitur , tabernacula carbaseis intenta velis collocabat : huc ex illa domo prætoria , quæ regis Hieronis fuit , sic emigrabat , ut per eos dies nemo istum extra illum lucum videre posset : in eum autem ipsum lucum aditus erat nemini , nisi qui aut socius , aut minister libidinis esse posset. Huc omnes mulieres , quibuscum iste consueverat , conveniebant ; quarum incredibile est , quanta multitudo fuerit Syracusis : huc homines digni istius amicitia , digni vitâ illâ , conviviiisque veniebant. Inter ejusmodi viros , ac mulieres , adultâ ætate filius versabatur ; ut eum , etiamsi natura a parentis similitudine abriperet , consuetudo tamen , ac disciplina patri similem esse cogeret. Huc Tertia illa perducta per dolum , atque insidias ab Rhodio tibicine , maximas in istius castris effecisse turbas dicitur , quum indignè



pateretur uxor Cleomenis Syracusani, nobilis mulier, itemque Æschionis, honesto loco nata, in conventum suum mimi Isidori filiam venisse: iste autem Annibal, qui in suis castris virtute putaret oportere, non genere certari, sic hanc Tertiam dilexit, ut eam secum ex provincia deportaret.

XIII. Ac per eos dies, quum iste cum pallio purpureo, talarique tunicâ versaretur in conviviis muliebribus, non offende-  
bantur homines in eo; neque molestè ferebant, abesse a foro magistratum, non jus dici, non judicia fieri: locum illum littoris percrepare totum mulierum vocibus, cantuque symphonix: in foro silentium esse summum causarum, atque juris: non ferebant homines molestè: non enim jus abesse videbatur a foro, neque judicia; sed vis, & crudelitas, & bonorum acerba, atque indigna direptio.

32. Hunc tu igitur imperatorem esse defendis, Hortensi? hujus furta, rapinas, cupiditatem, crudelitatem, superbiam, scelus, audaciam, rerum gestarum magnitudine, atque imperatoris laudibus tegere conaris? Hic scilicet est metuendum, ne, ad exitum defensionis tuæ, vetus illa Antoniana dicendi ratio, atque auctoritas proferatur: ne excitetur Verres, ne denudetur a pectore, ne cicatrices populus Ro-

manus adspiciat , ex mulierum morsu , vestigia libidinis , atque nequitiae.

33. Dii faciant , ut rei militaris , ut belli mentionem facere audeas : cognoscantur enim omnia istius æra illa vetera , ut , non solum in imperio , verum etiam in stipendiis qualis fuerit , intelligatis : renovabitur prima illa militia , quum iste e foro abduci , non , ut ipse prædicat , perducere solebat : aleatoris Placentini castra commemorabuntur ; in quibus quum frequens fuisset , tamen ære dirutus est : multa ejus in stipendiis damna proferentur ; quæ ab isto , ætatis fructu dissoluta , & compensata sunt.

34. Jam verò , quum in ejusmodi patientia turpitudinis , alienâ , non suâ satietate obduruisset ; qui vir fuerit , quot præsidia , quàm munita , pudoris , & pudicitiae , vi & audaciâ ceperit , quid me attinet dicere , aut conjungere cum istius flagitio , cujusquam præterea dedecus ? non faciam , Judices : omnia vetera prætermittam : duo sola recentia Sine cujusquam infamia ponam ; ex quibus conjecturam facere de omnibus possitis : unum illud , quod ita fuit illustre , notumque omnibus , ut nemo tam rusticanus homo , L. Lucullo , & M. Cotta consulibus , Romam ex ullo municipio vadimonii causâ venerit , quin sciret , jura omnia prætoris urbani ,

nutu, atque arbitrio Chelidonis meretriculæ gubernari: alterum, quod, quum paludatus exisset, votaue pro imperio suo, communique populi Romani nuncupasset, noctu, stupri causâ, lecticâ in urbem introferri solitus est ad mulierem, nuptam uni, propositam omnibus, contra fas, contra auspicia, contra omnes divinas, atque humanas religiones.

XIV. O dii immortales! quid interest inter mentes hominum, & cogitationes? Ita mihi meam voluntatem, spemque reliquæ vitæ vestra, populique Romani existimatio comprobet, ut ego, quos adhuc mihi magistratus populus Romanus mandavit, sic eos accepi, ut me omnium officiorum obstringi religione arbitrarer. Ita quæstor sum factus, ut mihi honorem illum non solum datum, sed etiam creditum, ac commissum putarem. Sic obtinui quæsturam in provincia Sicilia, ut omnium oculos in me unum coniectos arbitrarer: ut me, quæsturamque meam quasi in aliquo orbis terræ theatro versari existimarem: ut omnia semper, quæ jucunda videntur esse, non modò his extraordinariis cupiditatibus, sed etiam ipsi naturæ, ac necessitati, denegarem.

36. Nunc sum designatus ædilis: habeo rationem, quid a populo Romano acceperim: mihi ludos sanctissimos maxima

cum cæremonia Cereri, Libero, Liberæque faciundos: mihi Floram matrem populo, plebique Romanæ ludorum celebritate placandam: mihi ludos antiquissimos, qui primi Romani sunt nominati, maxima cum dignitate, ac religione Jovi, Junoni, Minervæque esse faciundos: mihi sacrarum ædium procurationem, mihi totam urbem tuendam esse commissam: ob earum rerum laborem & sollicitudinem fructus illos datos, antiquiorem in senatu sententiæ dicendæ locum, togam prætextam, sellam curulem, jus imaginis ad memoriam, posteritatemque, prodendæ.

37. Ex his ego rebus omnibus, Iudices, ita mihi deos omnes propitios esse velim, ut, tametsi mihi jucundissimus est honos populi, tamen nequaquam tantum capio voluptatis, quantum sollicitudinis, & laboris, ut hæc ipsa ædilitas, non, quia necesse fuerit, alicui candidato data, sed quia sic oportuerit, rectè collocata, & iudicio populi in loco posita esse videatur.

XV. Tu quum esses prætor renunciatus quoquo modo (mitto enim, & prætereo, quid tum sit actum) sed quum esses renunciatus, ut dixi, non ipsâ præconis voce excitatus es, qui te toties *seniorum, juniorumque centuriis illo honore affici pronuntiavit*, ut hoc putares, aliquam reipu-

blicæ partem tibi creditam ? annum tibi illum unum domo carendum esse meretricis ? Quum tibi forte obtigisset , ut jus diceres ; quantum negotii , quid oneris haberes , numquam cogitasti : neque illud rationis habuisti , si fortè expergefaceri te posses , eam provinciam , quam tueri singulari sapientiâ , atque integritate difficile esset , ad summam stultitiam , nequitiamque venisse. Itaque non modò domo tuâ Chelidonem in prætura extrudere noluisti , sed in Chelidonis domum præturam tuam totam detulisti.

39. Secuta provincia est ; in qua tibi numquam venit in mentem , non tibi idcirco fascēs , & secures , & tantam imperii vim , tantamque ornamentorum omnium dignitatem datam ; ut earum rerum vi , & auctoritate omnia repagula juris , pudoris , & officii perfringeres : ut omnium bona , prædam tuam duceres : nullius res tuta , nullius domus clausa , nullius vita septa , nullius pudicitia munita contra tuam cupiditatem , & audaciam posset esse : in qua tu te ita gessisti , ut , quum omnibus tenere rebus , ad bellum fugitivorum confugas ; ex quo jam intelligis , non modò tibi nullam defensionem , sed maximam vim criminum exortam : nisi fortè Italici belli fugitivorum reliquias , atque illud Temsanum incommodum proferes ; ad

quod recens quum te peropportunè fortuna obtulisset, si quid in te virtutis, atque industriæ fuisset; idem, qui semper fueras, inventus es.

XVI. Quum ad te Valentini venissent, & pro his homo disertus & nobilis, M. Marius, loqueretur, ut negotium susciperes, ut, quum penes te prætorium imperium, ac nomen esset, ad illam parvam manum extinguendam, ducem te, principemque præberes: non modò id refugisti, sed eo ipso tempore, quum esses in littore, Tertia illa tua, quam tecum deportabas, erat in omnium conspectu: ipsis autem Valentinis ex tam illustri, nobilique municipio, tantis de rebus responsum nullum dedisti, quum esses cum tunica pulla, & pallio. Quid hunc proficiscentem, quid in ipsa provincia fecisse existimatis, qui quum jam ex provincia, non ad triumphum, sed ad iudicium decederet, ne illam quidem infamiam fugerit, quam sine ulla voluptate capiebat?

41. O divina senatûs frequentis in æde Bellonæ admurmuratio! Memoria tenetis, Iudices, quum advesperasceret, & paulò antè esset de hoc Tensano incommodò nuntiatum, quum inveniretur nemo, qui in illa loca cum imperio mitteretur, dixisse quemdam; Verrem esse non longè a Tensa; quàm valde universi admurmura-

rint, quàm palam principes contrà dixerint. Et is tot criminibus, testimoniisque convictus, in eorum tabellis spem sibi aliquam ponit, quorum omnium palam, causâ incognitâ, voce damnatus est?

XVII. Esto: nihil ex fugitivorum bello, aut suspitione belli laudis adeptus est, quodd neque bellum ejusmodi, neque belli periculum fuit in Sicilia, neque ab isto provisum est, ne quod esset: at verò contra bellum prædonum classem habuit ornata, diligentiamque adhibuit in eo singularem: itaque, isto prætore, præclare defensa provincia est. Sic de bello prædonum, sic de classe Siciliensi, Judices, dicam, ut hoc jam antè confirmem, in hoc uno genere omnes inesse culpas istius maximas, avaritiæ, majestatis, dementiæ, libidinis, crudelitatis. Hæc dum breviter expono, quæso, ut fecistis adhuc, diligenter attendite.

43. Rem navalem primùm ita dico esse administratam, non uti provincia defenderetur, sed ut classis nomine pecunia quæreretur. Superiorum prætorum consuetudo quum hæc fuisset, ut naves civitatibus, certusque numerus nautarum, militumque imperaretur, maximæ, & locupletissimæ civitati Mamertinæ nihil horum imperavisti: ob quam rem quid tibi Mamertini clam dederint pecuniæ, post vide-

bitur : ex ipsorum litteris , & testibus quæremus.

44. Navem verò Cybeam maximam , triremis instar , pulcherrimam , atque ornatissimam , palam ædificatam sumptu publico , sciente totâ Siciliâ , per magistratum , senatumque Mamertinum , tibi datam , donatamque esse dico : hæc navis onusta prædâ Siciliensi , quum ipsa quoque esset ex præda , simul quum iste decederet , appulsa Veliam est , cum plurimis rebus , & iis , quas antè Romam mittere cum ceteris furtis noluit , quòd erant carissimæ , maximæque eum delectabant. Eam navem nuper egomet vidi Velix , multique alii viderunt , pulcherrimam , atque ornatissimam , Judices : quæ quidem omnibus , qui eam adspexerant , prospectare jam exsilium , atque explorare fugam domini videbatur.

XVIII. Quid mihi hoc loco respondebis ? nisi fortè id , quod tametsi probari nullo modo potest , tamen dici quidem in iudicio de pecuniis repetundis necesse est , de tua pecunia ædificatam esse eam navem. Aude hoc saltem dicere , quod necesse est : noli metuere , Hortensi , ne quæram , quæ licuerit ædificare navem senatori : antiquæ sunt istæ leges , & mortuæ , quemadmodum tu soles dicere , quæ vetant. Fuit ista respublica quondam , fuit ista severitas



in judiciis , ut istam rem accusator in magnis criminibus objiendam putaret. Quid enim tibi nave opus fuit ? cui , si quò publicè proficisceris , & præsidii , & vecturæ causâ , sumptu publico navigia præberentur : privatim autem nec proficisci quóquam potes , nec arcessere res transmarinas ex iis locis , in quibus tibi habere , mercari nihil licet.

46. Deinde cur quidquam contra leges parasti ? Valeret hoc crimen in illa veteri severitate , ac dignitate reipublicæ. Nunc non modò te hoc crimine non arguo : sed ne illà quidem communi vituperatione reprehendo. Postremò tu tibi hoc numquam turpe , numquam criminofum , numquam invidiosum fore putasti , celeberrimo loco palam tibi ædificari onerariam navem in ea provincia , quam tu cum imperio obtinebas ? Quid eos loqui , qui videbant ? quid existimare eos , qui audiebant , arbitrabare ? inanem te navem esse in Italiam deducturum ? naviculariam te , quum Romam venisses , esse facturum ? Ne illud quidem quisquam poterat suspicari , te habere in Italia maritimum fundum , & ad fructus deportandos onerariam navem comparare. Ejusmodi de te voluisti sermonem esse omnium , palam ut loquerentur , te illam navem parare , quæ prædam ex Sicilia deportaret , & quæ ad ea furta , quæ reliquisses , commearet.

47. Verum hæc omnia , si doces , navem de tua pecunia ædificatam , remitto , atque concedo : sed hoc , homo amentissime , non intelligis priore actione ab ipsis istis tuis Mamertinis laudatoribus esse sublatum ? Nam dixit Hejus , princeps civitatis , princeps istius legationis , quæ ad tuam laudationem missa est , navem tibi operis publicis Mamertinorum esse ædificatam , eique faciendæ senatorem Mamertinum publicè præfuisse. Reliqua est materies : hanc Rheginis , ut ipsi dicunt ( tametsi tu negare non potes ) publicè , quod Mamertini materiem non habent , imperavisti.

XIX. Si & ex quo fit navis , & qui faciunt , imperio tibi tuo , non pretio , præstò fuerunt ; ubi tandem istuc latet , quod tu de tua pecunia dicis impensum ? At Mamertini in tabulis nihil habent. Primum video potuisse fieri , ut ex ærario nihil darent : etenim vel Capitolium , sicut apud majores nostros factum est , publicè coactis fabris , operisque imperatis , gratis exædificari , atque effici potuit : deinde id quoque perspicio ( quod & ostendam , quum istos produxero ) ipsorum ex litteris , multas pecunias isti erogatas , in operum locationes falsas , atque inanes esse perscriptas. Jam illud minimè mirum est , Mamertinos , a quo summum beneficium

acceperant, quem sibi amiciolem, quàm populo Romano esse cognoverant, ejus capiti litteris suis pepercisse: sed si argumento est, Mamertinos pecunias tibi non dedisse, quia scriptum non habent; sit argumento, tibi gratis constare navem, quia, quid emeris, aut quid locaveris, scriptum proferre non potes.

49. At enim idcirco navem Mamertinis non imperasti, quòd sunt fœderati. Dii approbent: habemus hominem in Fetialium manibus educatum; unum, præter ceteros, in publicis religionibus fœderum sanctum, & diligentem: omnes, qui ante te prætores fuerunt, dedantur Mamertinis, quòd iis navem contra pactionem fœderis imperarint. Sed tamen tu, sancte homo, ac religiose, cur Taurominitanis item fœderatis navem imperasti? an hoc probabis, in æqua causa populorum sine pretio varium jus, & disparem conditionem fuisse?

50. Quid, si ejusmodi esse hæc duo fœdera duorum populorum, Judices, doceo, ut Taurominitanis nominatim cautum, & exceptum sit fœdere, *Ne navem dare debeant*: Mamertinis in ipso fœdere sanctum, atque perscriptum sit, *Uti navem dare necesse sit*: istum autem contra fœdus, & Taurominitanis imperasse, & Mamertinis remisisse? num cui dubium poterit?

esse, quin, Verre prætore, plus Mamertinis Cybea, quàm Taurominitanis fœdus opitulatum sit? Recitentur fœdera. **MAMERTINORUM, ET TAUROMINITANORUM CUM POPULO ROMANO FœDERA.**

XX. Isto igitur tuo, quemadmodum ipse prædicas, beneficio; ut res indicat, pretio, atque mercede, minuisti majestatem reipublicæ, minuisti auxilia populi Romani, minuisti copias, majorum virtute, ac sapientiâ comparatas: sustulisti jus imperii, conditionem sociorum, memoriam fœderis. Qui ex fœdere ipso navem, vel usque ad oceanum, si imperassemus, sumptu, periculoque suo armatam, atque ornatam, mittere debuerunt; hi, ne in freto ante sua tecta, & domos navigarent; ne sua mœnia, portusque defenderent, pretio abs te jus fœderis, & imperii conditionem emerunt.

§ 1. Quid censetis in hoc fœdere faciundo voluisse Mamertinos impendere laboris, operæ, pecuniæ, ne hæc biremis adscriberetur, si id ullo modo possent a nostris majoribus impetrare? nam, quum hoc munus imperaretur tam grave civitati, inerat nescio quo modo in illo fœdere societatis, quasi quædam nota servitutis. Quod tum recentibus suis officiis, integrâ re, nullis populi Romani difficultatibus, a majoribus nostris fœdere assequi non

potuerunt : id nunc nullo novo officio suo , tot annis post , jure imperii nostri quotannis usurpatum , ac semper retentum , summa in difficultate navium , a C. Verre pretio affecuti sunt. At non hoc solum sunt affecuti , ne navem darent : ecquem nautam , ecquem militem , qui aut in classe , aut in præsidio esset , te prætor , per triennium Mamertini dederunt ?

XXI. Denique quum ex senatusconsulto , itemque ex lege Terentia & Cassia , frumentum æquabiliter emi ab omnibus Siciliae civitatibus oporteret ; id quoque munus leve , atque commune , Mamertinis remisisti. Dices , frumentum Mamertinos non debere. Quomodo , non debere ? an , ut ne venderent ? non enim erat hoc genus frumenti ex eo genere , quod exigeretur , sed ex eo , quod emeretur. Te igitur auctore & interprete , ne foro quidem , & commeatu , Mamertini populum Romanum juvare debuerunt.

53. Quæ tandem civitas fuit , quæ deberet ? Qui publicos agros arant , certum est , quid ex lege censoria dare debeant : cur iis quidquam præterea ex alio genere imperavisti ? Quid ? decumani num quid præter singulas decumas ex lege Hieronica debent ? cur iis quoque statuisti , quantum ex hoc genere frumenti empti darent ? Qui sunt immunes , ii certè nihil debent :

at his non modò imperasti : verùm etiam ; quò plus darent , quàm poterant , hæc sexagena millia modium , quæ Mamertinis remiseras , addidisti. Neque hoc dico : ceteris non rectè imperatum esse : Mamertinis , qui erant in eadem causa , quibus superiores omnes prætores item , ut ceteris , imperarant , pecuniamque ex senatusconsulto , & ex lege dissolverant , his dico non rectè remissum. Et , ut hoc beneficium , quemadmodum dicitur , trabali clavo figeret , cum consilio causam Mamertinorum cognoscit , & de consilii sententia Mamertinis se frumentum non imperare pronuntiat.

54. Audite decretum mercenarii prætoris ex ipsius commentario ; & cognoscite , quanta in scribendo gravitas , quanta in constituendo jure sit auctoritas. Recita commentarium. **DECRETUM EX COMMENTARIO.** *Libenter* ait se *facere* : itaque perscribit. Quid , si hoc verbo non esses usus , *libenter* ? nos videlicet invitum te quæstum facere putaremus ? *ac de consilii sententia.* Præclarum recitari consilium , Judices , audistis : utrùm vobis consilium recitari tandem prætoris videbatur , quum audiebatis nomina , an prædonis improbissimi societas , atque comitatus ?

55. En foederum interpretes , societatis pactores , religionis auctores : numquam  
in

in Sicilia frumentum publicè est emptum , quin Mamertinis pro portione imperaretur , antè quàm hoc delectum , præclarumque consilium iste dedit , ut ab his nummos acciperet , ac sui similis esset. Itaque tantum valuit istius decreti auctoritas , quantum debuit ejus hominis ; qui , a quibus frumentum emere debuisset , iis decretum vendidisset. Nam statim L. Metellus , ut isti successit , ex C. Sacerdotis , & Sex. Peducaei instituto , ac litteris , frumentum Mamertinis imperavit.

XXII. Tum illi intellexerunt , se id , quod a malo auctore emissent , diutius obtinere non posse. Age porro , tu , qui te tam religiosum existimari voluisti interpretem foederum , cur Taurominitanis frumentum , cur Netinis imperasti ? quarum civitatum utraque foederata est. Ac Netini quidem sibi non defuerunt : nam simul ac pronuntiasti , libenter te Mamertinis quiddam remittere ; te adierunt , & eandem suam causam foederis esse docuerunt : tu aliter decernere in eadem causa non potuisti. Pronuntias , Netinos frumentum dare non oportere : & ab his tamen exigis. Cedo mihi ejusdem prætoris litteras , & rerum decretarum , & frumenti imperati , & tritici empti. **LITTERÆ PRÆTORIS RERUM DECRETARUM , FRUMENTI IMPERATI , ET TRITICI EMPTI.**

Quid potius in hac tanta, ac tam turpi inconstantia suspicari possumus, Iudices, quàm id, quod necesse est, aut isti a Nectinis pecuniam, quum posceret, non datam; aut id esse actum, ut intelligerent Mamertini, bene se apud istum tam multa pretia, ac munera collocasse, quum idem alii juris ex eadem causa non obtinerent?

57. Hic mihi etiam audebit mentionem facere Mamertinæ laudationis? in qua quàm multa sint vulnera, quis est vestrum, Iudices, quin intelligat? Primum, in judiciis, qui decem laudatores dare non potest, honestius est ei nullum dare, quàm illum quasi legitimum numerum consuetudinis non explere: tot in Sicilia civitates sunt, quibus tu per triennium præfuisi: arguunt ceteræ: paucæ, & parvæ, metu repressæ, silent: una laudat. Hoc quid est, nisi intelligere, quid habeat utilitatis vera laudatio: sed tamen ita provinciæ præfuisse, ut hac utilitate necessariò sit carendum?

58. Deinde, id quod alio loco antè dixi, quæ est ista tandem laudatio, cujus laudationis legati principes, & publicè tibi navem ædificatam, & privatim se ipsos abs te spoliatos, expilatosque esse dixerunt? Postremò, quid aliud isti faciunt, quum te soli ex Sicilia laudant, nisi testimonio nobis sunt, te omnia sibi esse largitum, quæ tu de republica nostra detraxeris?



*ACTIONIS II. L. V. 291*

Quæ colonia est in Italia tam bono jure, quod tam immune municipium, quod per hosce annos tam commodâ vacatione sit usum omnium rerum, quàm Mamertina civitas per triennium? soli ex fœdere quod debuerunt, non dederunt: soli, isto præ-tore, omnium rerum immunes fuerunt: soli in istius imperio eâ conditione vitæ fuerunt, ut populo Romano nihil darent, Verri nihil denegarent.

XXIII. Verum, ut ad classem, quo ex loco sum digressus, revertar; accepisti a Mamertinis navem contra leges; remisisti contra fœdera: ita in una civitate bis improbus fuisti; quum & remisisti, quod non oportebat; & accepisti, quod non licebat. Exigere te oportuit navem, quæ contra prædones; non, quæ cum præda navigaret: quæ defenderet, ne provincia spoliaretur; non quæ provinciæ spolia portaret. Mamertini tibi & urbem, quod furta undique deportares, & navem, quâ exportares, præbuerunt: illud tibi oppidum receptaculum prædæ fuit: illi homines, testes, custodesque furtorum: illi tibi & locum furtis, & furtorum vehiculum comparaverunt. Itaque ne tum quidem, quum classem avaritiâ, ac nequitiâ tuâ perdidisti, navem Mamertinis imperare ausus es: quo tempore in tanta inopia navium, tantaque calamitate provinciæ, etiam si

precariò essent rogandi, tamen ab his impetraretur: reprimebat enim tibi & imperandi vim, & rogandi conatum præclara illa, non populo Romano reddita biremis, sed prætori donata Cybea: ea fuit merces imperii, auxilii, juris, consuetudinis, fœderis.

60. Habetis unius civitatis firmum auxilium amissum, ac venditum pretio: cognoscite nunc novam prædandi rationem, ab hoc primùm excogitatam.

XXIV. Sumptum omnem in classem frumento, stipendio, ceterisque rebus navarcho suo quæque civitas semper dare solebat: is neque ut accusaretur a nautis, committere audebat; & civibus suis rationem referre debebat: in illo omni negotio, non modò labore, sed etiam periculo suo versabatur. Erat hoc, ut dico, factitatum semper, nec solùm in Sicilia, sed in omnibus provinciis; etiam in sociorum, & Latinorum stipendio ac sumptu, tum quum illorum auxiliis uti solebamus. Verres post imperium constitutum primus imperavit, ut ea pecunia omnis a civitatibus sibi adnumeraretur; ut is pecuniam tractaret, quem ipse præfecisset.

61. Cui potest esse dubium, quamobrem & omnium consuetudinem veterem primus immutaris, & tantam utilitatem per alios tractandæ pecuniæ neglexeris, & tantam difficultatem cum crimine, molestiam cum

suspicionem susceperis? Deinde alii quæstus instituuntur, ex uno genere navali, videte quàm multi: accipere a civitatibus pecunias, ne nautas darent: pretio certo missos facere nautas: missorum omne stipendium lucrari: reliquis, quod deberet, non dare. Hæc omnia ex civitatum testimoniis cognoscite. Recita. TESTIMONIA CIVITATUM.

XXV. Huncine hominem? huncine impudentiam, Judices? huncine audaciam? civitatibus, pro numero militum, pecuniarum summas describere? certum pretium, sexcentenos nummos, nautarum missioni constituere? quos qui dederat, commeatum totius ætatis abstulerat: iste, quod ejus nautæ nomine pro stipendio, frumentoque acceperat, lucrabatur. Itaque quæstus duplex unius missione fiebat. Atque hæc homo amentissimus in tanto prædonum impetu, tantoque periculo provinciae, sic palam faciebat, ut & ipsi prædones scirent, & tota provincia testis esset.

63. Quum propter istius hanc tantam avaritiam, nomine classis esset in Sicilia, re quidem verâ naves inanes, quæ prædam prætori, non quæ prædonibus metum afferrent: tamen, quum P. Cæsetius, & P. Tadius decem navibus his semiplenis navigarent, navem quamdam piratarum prædâ refertam non ceperunt, sed abduxerunt, onere suo planè captam, at-

que depressam : erat ea navis plena juven-  
tutis formosissimæ , plena argenti facti ,  
atque signati , multa cum stragula veste.  
Hæc una navis a classe nostra non capta  
est , sed inventa ad Megaridem , qui lo-  
cus est non longè a Syracusis : quod ubi  
isti nuntiatum est ; tametsi in acta cum  
mulierculis jacebat ebrius , erexit se ta-  
men , & statim quæstori , legatoque suo  
custodes misit complures , ut omnia sibi  
integra quàm primùm exhiberentur.

64. Appellitur navis Syracusas : exspec-  
tatur ab omnibus : supplicium sumi de cap-  
tivis putatur : iste , quasi prædâ sibi ad-  
vectâ , non prædonibus captis ; si qui se-  
nes , aut deformes erant , eos in hostium  
numero ducit : qui aliquid formæ , ætatis ,  
artificiique habebant , abducit omnes :  
nonnullos scribis suis , filio , cohortique  
distribuit : symphonicos homines sex cui-  
dam amico suo Romam muneri misit : nox  
illa tota exinaniendâ navi consumitur. Ar-  
chipiratam ipsum videt nemo , de quo sup-  
plicium sumi oportuit : hodieque omnes  
sic habent ( quid ejus sit , vos conjecturâ  
quoque assequi debetis ) istum clam a pi-  
ratis ob hunc archipiratam , pecuniam ac-  
cepisse.

XXVI. Conjectura bona est. Judex esse  
bonus nemo potest , qui suspitione certâ  
non movetur : hominem nostis ; consuetu-

dinem omnium tenetis : qui ducem prædonum , aut hostium ceperit , quàm libenter eum palam ante oculos omnium esse patiatur. Hominem in tanto conventu Syracusis vidi neminem , Iudices , qui archipiratam captum vidisse se diceret ; quum omnes , ut mos est , ut solet fieri , concurrerent , quærerent , videre cuperent. Quid accidit , cur tantopere iste homo occultaretur , ut eum ne casu quidem quisquam adspicere posset ? Homines maritimi Syracusis , qui sæpe istius ducis nomen audissent , quum eum sæpe timuissent , quum ejus cruciatu , atque supplicio pascere oculos , animumque exsaturare vellet : potestas adspiciendi nemini facta est.

66. Unus plures prædonum duces vivos cepit P. Servilius , quàm omnes antea. Ecquando igitur isto fructu quisquam caruit , ut videre piratam captum non liceret ? At contrà , quacumque iter fecit , hoc jucundissimum spectaculum omnibus victorum , captorumque hostium præbebat. Itaque ei concursus undique fiebant , ut non modò ex his oppidis , quà ducebantur , sed etiam ex finitimis , visendi causâ , convenirent. Ipse autem triumphus quamobrem omnium triumphorum gratissimus populo Romano fuit , atque jucundissimus ? quia nihil est victoriâ dulcius : nullum est autem testimonium victoriæ certius , quàm , quos sæ-

pe metueris, eos te victos ad supplicium duci videre.

67. Hoc tu quamobrem non fecisti? quamobrem ita iste pirata celatus est, quasi eum adspicere nefas esset? quamobrem supplicium non sumpsisti? quam ob causam hominem reservasti? ecquem audisti in Sicilia antea captum archipiratam, qui non securi percussus sit? unum cedo auctorem tui facti: unius profer exemplum. Vivum tu archipiratam servabas, quem per triumphum, credo, quem ante currum tuum duceres. Neque enim quidquam erat jam reliquum, nisi ut, classe populi Romani pulcherrimâ amissâ, provinciâque laceratâ, triumphus navalis tibi decerneretur.

XXVII. Age porrò, custodiri ducem prædonum novo more, quàm securi ferri omnium exemplo, magis placuit: quæ sunt istæ custodiæ? apud quos homines? quemadmodum est asservatus? Lautumias Syracusanas omnes audistis; plerique notis: opus est ingens, magnificum, regum, ac tyrannorum: totum est ex saxo in mirandam altitudinem depresso, & multorum operis penitus exciso: nihil tam clausum ad exitus, nihil tam septum undique, nihil tam tutum ad custodias, nec fieri, nec cogitari potest. In has lautumias, si qui publicè custodiendi sunt, etiam ex

ceteris oppidis Siciliae deduci imperantur.

69. Eò quòd multos captivos cives Romanos conjecerat, & quòd eòdem ceteros piratas contrudi imperarat; intellexit, si hunc subdititium archipiratam in eamdem custodiam dedisset, fore, ut a multis illis in lautumiis verus ille dux quæreretur. Itaque hominem huic optimæ, tutissimæque custodiæ non audet committere: denique Syracusas totas timet: amandat hominem. Quò? Lilybæum fortasse. Video: tamen homines maritimos non planè reformidat. Minimè, Judices. Panormum igitur? Audio: quamquam Syracusis, quoniam in Syracusano captus erat, maximè, si minùs supplicio affici, at custodiri oportebat. Ne Panormum quidem.

70. Quid igitur? quò putatis? Ad homines a piratarum metu, & suspicione alienissimos; a navigando, rebusque maritimis remotissimos; ad Centuripinos, homines maximè mediterraneos, summos aratores: qui nomen numquam timuissent maritimi prædonis: unum, te prætore, horruissent Apronium, terrestrem archipiratam. Et, ut quivis facilè perspiceret, id ab isto actum esse, ut ille suppositus, facilè & libenter se illum, qui non erat, esse simularer; imperat Centuripinis, ut is victu, ceterisque rebus quàm liberalissimè, commodissimèque habeatur.

N v

XXVIII. Interea Syracusani, homines periti & humani, qui non modò ea, quæ perspicua essent, videre, verùm etiam occulta suspicari possent; habebant rationem omnes quotidie piratarum, qui securi ferirentur: quàm multos esse oporteret, ex ipso navigio, quod erat captum, & ex remorum numero conjiciebant. Iste, quòd omnes, qui artificii aliquid habuerant, aut formæ, removerat, atque abduxerat, reliquos si, ut consuetudo est, universos ad palum alligasset, clamorem populi fore suspicabatur, quum tantò plures abducti essent, quàm relictì: propter hanc causam quum instituisset alios alio tempore producere; tamen in tanto conventu nemo erat, quin rationem, numerumque haberet, & reliquos non desideraret solum, sed etiam posceret, & flagitaret.

72. Quum maximus numerus deesset, tum iste homo nefarius in eorum locum, quos domum suam de piratis abduxerat, substituere, & supponere cœpit cives Romanos, quos in carcerem antea conjece-  
rat: quorum alios, Sertorianos milites fuisse insimulabat, & ex Hispania fugientes ad Siciliam appulso esse dicebat: alios, qui a prædonibus erant capti, quum mercaturas facerent, aut aliquam aliam ob causam navigarent, suâ voluntate cum piratis fuisse arguebat. Itaque alii cives Romani



ne cognoscerentur , capitibus obvolutis e carcere ad palum , atque ad necem rapiabantur : alii quum a multis civibus Romanis recognoscerentur , ab omnibus defenderentur , securi feriebantur. Quorum ego de acerbissima morte , crudelissimoque cruciatu dicam , quum eum locum tractare cœpero : & ita dicam , ut , si me in ea querimonia , quam sum habiturus de istius crudelitate , & de civium Romanorum indignissima morte , non modò vires , verum etiam vita deficiat , id mihi præclarum , & jucundum putem. Hæc igitur est gesta res , hæc victoria præclara : myoparone piratico capto , dux liberatus , symphoniaci Romam missi : formosi homines , & adolescentes , & artifices domum abducti : in eorum locum , & ad eorum numerum cives Romani hostilem in modum cruciati , & necati : omnis vestis ablata : omne aurum & argentum ablatum , & aversum.

XXIX. At quemadmodum ipse sese induit priore actione ? qui tot dies tacuisset , repentè in M. Annii , hominis splendidissimi , testimonio , quum is cives Romanos dixisset , & archipiratam negasset securi esse percussum , exsiluit ; conscientia sceleris , & furore ex maleficiis concepto excitatus : dixit , se , quòd sciret sibi crimini datum iri , pecuniam accepisse , neque de vero

archipirata fumpsisse supplicium; ideo securi non percussisse : domi esse apud sese archipiratas dixit duos.

74. O clementiam populi Romani, seu potius patientiam miram, ac singularem! Civem Romanum securi esse percussum Annius, eques Romanus, dicit : taces. Archipiratam negat : fateris. Fit in eo gemitus omnium, & clamor; quum tamen a præsentis supplicio tuo se continuit populus Romanus, & repressit, & salutis suæ rationem judicum severitati reservavit. Quî sciebas tibi crimini datum iri? quamobrem sciebas? quamobrem etiam suspicabare? inimicum habebas neminem: si haberes, tamen non ita vixeras, ut metum judicii propositum habere deberes. An te, id quod fieri solet, conscientia timidum, suspiciosumque faciebat? Qui igitur, quum esses cum imperio, jam tum judicium, & crimen horrebas; reus quum tot testibus coarguare, potes de damnatione dubitare?

75. Verum, si crimen hoc metuebas, ne quis abs te suppositum esse diceret, qui pro archipirata securi feriretur: utrum tandem tibi ad defensionem firmitus foreputasti, in judicio, coactu, atque efflagitatu meo, producere ad ignotos tantò post eum, quem archipiratam esse dice-  
res; an recenti re, Syracusis, apud notos,

inspectante Siciliâ pene totâ, securi ferire? vide quid intersit, utrum faciendum fuerit. In illo reprehensio nulla esse potuit: hîc defensio nulla est. Itaque illud semper omnes fecerunt: hoc quis ante te, quis præter te fecerit, quæro. Piratam vivum tenuisti. Quem ad finem? dum cum imperio fuisti. Quamobrem? quam ob causam? quo exemplo? cur tamdiu? cur, inquam, civibus Romanis, quos piratæ ceperant, securi statim percussis, ipsis piratis lucis usuram tam diuturnam dedisti?

76. Verùm esto: sit tibi illud liberum omne tempus, quod cum imperio fuisti: etiamne privatus? etiamne reus? etiamne pene damnatus, hostium duces privata in domo retinuisti? unum, alterum mensem, prope annum denique, domi tuæ piratæ, a quo tempore capti sunt, quoad per melicitum est, fuerunt; hoc est, quoad per M'. Acilium Glabrionem licitum est: qui, postulante me, produci, atque in carcerem condi imperavit.

XXX. Quod est hujusce rei jus? quæ consuetudo? quod exemplum? Hostem acerrimum, atque infestissimum populi Romani, seu potius communem hostem gentium, nationumque omnium, quisquam omnium mortalium privatus intra mœnia domi suæ retinere poterit?

77. Quid si pridie, quàm a me tu coactus es confiteri, civibus Romanis securi percussis, prædonum ducem vivere, apud te habitare : si, inquam, pridie domo tuâ profugisset, si aliquam manum contra populum Romanum facere potuisset, quid diceres? Apud me habitavit : mecum fuit : ego illum ad iudicium meum, quò facilius crimen inimicorum diluere possem, vivum, atque incolumem reservavi. Itane verò? tu tua pericula communi periculo defendes? tu supplicia, quæ debentur hostibus victis, ad tuum, non ad populi Romani tempus conferes? populi Romani hostis privatis custodiis asservabitur? At etiam qui triumphant, eoque diutius vivos hostium duces servant, ut, his per triumphum ductis, pulcherrimum spectaculum, fructumque victoriæ populus Romanus percipere possit : tamen quum de foro in Capitolium currum flectere incipiunt, illos duci in carcerem jubent ; idemque dies & victoribus imperii, & victis vitæ finem facit.

78. Et nunc cuiquam credo esse dubium, quin tu id commissurus non fueris ( præsertim quum statuisses, ut ais, tibi causam esse dicendam ) ut ille archipirata non potius securi feriretur, quàm, quod erat ante oculos positum, tuo periculo viveret. Si enim esset mortuus, tu, qui crimen ais te

metuisse, quæro, cui probares? quum constaret, istum Syracusis ab nullo visum esse archipiratam, ab omnibus desideratum: quum dubitaret nemo, quin abs te pecuniâ liberatus esset: quum vulgò loquerentur, suppositum in ejus locum, quem pro illo probare velles: quum tute factus esses, te id crimen tantò antè metuuisse: si eum diceres esse mortuum, quis te audiret? nunc, quum vivum istum nescio quem producis, tamen te derideri vides.

79. Quid, si aufugisset? si vincla rupisset, ita, ut Nico ille nobilissimus pirata fecit, quem P. Servilius, quâ felicitate ceperat, eâdem recuperavit? quid diceres? Verùm hoc erat: si ille semel verus archipirata securi percussus esset; pecuniam illam non haberes: si hic falsus esset mortuus, aut profugisset; non esset difficile alium in suppositi locum supponere. Plura dixi, quàm volui, de illo archipirata: & tamen ea, quæ certissima sunt hujus criminis argumenta, prætermisi. Volo enim mihi totum esse crimen hoc integrum: est certus locus, certa lex, certum tribunal, quò hoc reservetur.

XXXI. Hac tantâ prædâ auctus, mancipiis, argento, veste locupletatus, nihilò diligentior ad classem ornandam, milites revocandos, alendosque esse cœpit; quum

ea res non solum provinciæ salutis, verum etiam ipsi prædæ esse posset. Nam æstate summâ, quo tempore ceteri prætores obire provinciam, & concurrare consueverunt, aut etiam in tanto prædonum metu & periculo ipsi navigare: eo tempore ad luxuriam, libidinesque suas, domo suâ regiâ, quæ regis Hieronis fuit, quâ prætores uti solent, contentus non fuit: tabernacula, quemadmodum consueverat temporibus æstivis, quod antea jam demonstravi, carbaseis intenta velis, collocari iussit in littore: quod est littus in insula Syracusis post Arethusæ fontem; propter ipsum introitum, atque ostium portûs, amœno sanè, & ab arbitris remoto loco.

81. Hic dies æstivos sexaginta prætor populi Romani, custos, defensorque provinciæ sic vixit, ut muliebria quotidie convivium essent; vir accumberet nemo, præter ipsum, & prætextatum filium: tametsi rectè sine exceptione dixeram, virum; quum isti essent, neminem fuisse. Nonnumquam etiam libertus Timarchides adhibebatur: mulieres autem nuptæ nobiles, præter unam mimi Isidori filiam, quam iste, propter amorem, ab Rhodio tibicine abduxerat: Pippa quædam, uxor Æschrionis Syracusani, de qua muliere plurimi versus, qui in istius cupiditatem

facti sunt, totâ Siciliâ percelebrantur.

82. Erat & Nice, facie eximiâ, ut prædicatur, uxor Cleomenis Syracusani: hanc Cleomenes vir amabat: verumtamen hujus libidini adversari nec poterat, nec audebat, & simul ab isto donis, beneficiisque plurimis devinciebatur. Illo autem tempore iste, tametsi ea est hominis impudentia, quam nostis, ipse tamen, quum vir esset Syracusis, uxorem ejus parum poterat animo soluto ac libero tot in acta dies secum habere. Itaque excogitat rem singularem: naves, quibus legatus præfuerat, Cleomeni tradit: classi populi Romani Cleomenem Syracusanum præesse jubet, atque imperare. Hoc eò facit, ut ille non solum abesset a domo, quum navigaret, sed etiam libenter, quum magno honore, beneficioque abesset: ipse autem, remoto, atque ablegato viro, non liberius, quàm antè (quis enim umquam istius libidini obstitit) sed paulò solutior tamen animo secum illam haberet, si non tamquam virum, at tamquam æmulum removisset. Accipit navem sociorum, atque amicorum Cleomenes Syracusanus.

XXXII. Quid primùm aut accusem, aut querar, Judices? Siculone homini, legati, quæstoris, prætoris denique potestatem, honorem, auctoritatem dari?

Si te impediēbat ista conviviorum, mulierumque occupatio: ubi quæstores? ubi legati? ubi ternis denariis æstimatum frumentum? ubi muli? ubi tabernacula? ubi tot, tantaque ornamenta magistratibus, & legatis, a senatu, populoque Romano permissa, & data? denique ubi præfecti, & tribuni tui? Si civis Romanus dignus isto negotio nemo fuit, quid civitates, quæ in amicitia, fideque populi Romani perpetuò manserant? ubi Segestana? ubi Centuripina civitas, quæ tum officiis, fide; vetustate, tum etiam cognatione populi Romani nomen attingunt?

84. O dii immortales! quid, si harum ipsarum civitatum militibus, navibus, navarchis, Syracusanus Cleomenes iussus est imperare? non omnis honos ab isto dignitatis, æquitatis, officiique sublatus est? Ecquod in Sicilia bellum gessimus, quin Centuripinis sociis, Syracusanis hostibus uteremur? atque hæc omnia ad memoriam vetustatis, non ad contumeliam civitatis referri volo. Itaque ille vir clarissimus, summusque imperator, M. Marcellus, cujus virtute captæ, misericordiâ conservatæ sunt Syracusæ, habitare in ea parte urbis, quæ insula est, Syracusanum neminem voluit. Hodie, inquam, Syracusanum in ea parte habitare non licet: est enim locus, quem vel pauci possunt



defendere. Committere igitur eum non fidelissimis hominibus noluit : simul quòd ab illa parte urbis navibus aditus ex alto est. Quamobrem qui nostros exercitus sæpe excluderant , iis claustra loci committenda non existimavit.

85. Vide quid intersit inter tuam libidinem , majorumque auctoritatem : inter amorem , furoremque tuum , & illorum consilium , atque prudentiam. Illi aditum littoris Syracusanis ademerunt ; tu maritimum imperium concessisti : illi habitare in eo loco Syracusanum , quò naves accedere possent , noluerunt ; tu classi , & navibus Syracusanum præesse voluisti : quibus illi urbis suæ partem ademerunt , iis tu nostri imperii partem dedisti ; & , quorum sociorum operâ Syracusani nobis dicto audientes sunt , eos Syracusanis dicto audientes esse jussisti.

XXXIII. Egreditur Centuripinâ quadriremi Cleomenes e portu : sequitur Segestana navis , Tyndaritana , Herbitensis , Heracliensis , Apolloniensis , Haluntina : præclara classis in speciem : sed inops & infirma , propter dimissionem propugnatorum , atque remigum. Tamdiu in imperio suo classem iste prætor diligens vidit , quamdiu convivium ejus flagitiosissimum prætervecta est : ipse autem , qui visus multis diebus non esset , tum se tamen in

conspectum nautis paulisper dedit. Stetit soleatus prætor populi Romani cum pallio purpureo, tunicaque talari, mulierculâ nixus in littore. Jam hoc ipso istum vestitu Siculi, civesque Romani permulti sæpe viderunt.

87. Posteaquam paulum provecta classis est, & Pachynum quinto die denique ap-  
pulsâ est: nautæ fame coacti, radices palmarum agrestium, quarum erat in his locis, sicut in magna parte Siciliæ, multitudo, colligebant, & his miseri, perditique alebantur. Cleomenes autem, qui alterum se Verrem quum luxuriâ, atque nequitiâ, tum etiam imperio, putaret; similiter totos dies, in littore, tabernaculo posito, perpotabat.

XXXIV. Ecce autem repente, ebrio Cleomene, esurientibus ceteris, nuntiatur piratarum naves esse in portu Odyssæ; nam ita is locus nominatur: nostra autem classis erat in portu Pachyni. Cleomenes autem, quodd erat terrestre præsidium non re, sed nomine, sperabat, iis militibus, quos ex eo loco deduxisset, explere se numerum nautarum, & remigum posse. Reperta est eadem istius hominis avarissimi ratio in præsidiis, quæ in classibus: nam erant perpauci reliqui, ceterique dimissi.

88. Princeps Cleomenes in quadriremi Centuripina malum erigi, vela fieri, præ-

cidi anchoras imperavit ; & simul , ut se ceteri sequerentur , signum dari jussit. Hæc Centuripina navis erat incredibili celeritate velis : nam scire , isto prætore , nemo poterat , quid quæque navis remis facere posset : etsi in hac quadriremi , propter honorem & gratiam Cleomenis , minimè multi remiges & milites deerant. Evolarat jam e conspectu ferè fugiens quadriremis , quum etiam tunc ceteræ naves suo in loco moliebantur.

89. Erat animus in reliquis : quamquam erant pauci , quoquo modo sese res habebat , pugnare tamen se velle clamabant ; & , quod reliquum vitæ , viriumque fames fecerat , id ferro potissimùm reddere volebant. Quòd si Cleomenes non tantò antè fugisset , aliqua tamen ad resistendum ratio fuisset : erat enim sola illa navis constrata , & ita magna , ut propugnaculo ceteris posset esse : quæ , si in prædonum pugna versaretur , urbis instar habere inter illos piraticos myoparones videretur : sed tunc inopes relictì a duce , præfectoque classis , eundem necessariò cursum tenere cœperunt.

90. Elorum versùs , ut ipse Cleomenes , ita ceteri navigabant : neque hi tamen tam prædonum fugiebant impetum , quàm imperatorem sequebantur. Tum ut quisque in fuga postremus , ita periculo princeps erat :

postremam enim quamque navem piratæ primam adoriebantur : ita prima Haluntinorum navis capitur , cui præerat Haluntinus , homo nobilis , Philarchus : quem ab illis prædonibus Locrenses postea publicè redemerunt : ex quo vos priore actione jurato rem omnem , causamque cognostis. Deinde Apolloniensis navis capitur , & ejus præfectus Anthropinus occiditur.

XXXV. Hæc dum aguntur , interea Cleomenes jam ad Elori littus pervenerat : jam sese in terram e navi ejecerat , quadrirememque in salo fluctuantem reliquerat. Reliqui præfecti navium , quum in terram imperator exisset , quum ipsi neque repugnare , neque mari effugere ullo modo possent , appulsis ad Elorum navibus , Cleomenem persecuti sunt. Tunc prædonum dux Heracleo , repente , præter spem , non suâ virtute ; sed istius avaritiâ nequitiâque victor , classem pulcherrimam populi Romani in littus expulsam , & ejectam , quum primum advesperâsceret , inflammari , incendique jussit.

92. O tempus miserum , atque acerbum provinciæ Siciliæ ! ô casum illum multis innocentibus calamitosum , atque funestum ! ô istius nequitiam , ac turpitudinem singularem ! Una , atque eadem nox erat , quâ prætor amoris turpissimi flammâ , ac classis populi Romani prædonum incendio con-

flagrabat. Affertur nocte intempestâ gravis hujusce mali nuntius Syracusas : curritur ad prætorium ; quò istum e convivio illo præclaro reducerant paulò antè mulieres cum cantu, atque symphoniâ. Cleomenes, quamquam nox erat, tamen in publico esse non audet : includit se domi : neque aderat uxor, quæ consolari hominem in malis posset.

93. Hujus autem præclari imperatoris ita erat severa domi disciplina, ut in re tanta, in tam gravi nuntio nemomitteretur : nemo esset, qui auderet aut dormientem excitare, aut interpellare vigilantem. Jam verò, re ab omnibus cognitâ, concursabat urbe totâ maxima multitudo : non enim, sicut antea consuetudo erat, prædonum adventum significabat ignis e specula sublatus, aut tumultus ; sed flamma ex ipso incendio navium, & calamitatem acceptam, & periculum reliquum nuntiabat.

XXXVI. Quum prætor quæreretur ; & constaret, ei neminem nuntiasse : fit ad domum ejus cum clamore concursus, atque impetus. Tum iste excitatus audit rem omnem ex Timarchide : sagum sumit. Lucebat jam ferè : procedit in medium, vini, somni, stupri plenus. Excipitur ab omnibus ejusmodi clamore, ut ei Lampfaceni periculi similitudo versaretur

ante oculos : hòc etiam majus hoc videbatur quòd in odio simili multitudo hominum hæc erat maxima. Tum istius acta commemorabatur : tum flagitiosa illa convivia : tum appellabantur a multitudine mulieres nominatim : tum quærebat ex ipso palam , tot dies continuos , per quos numquam visus esset , ubi fuisset , quid egisset ? tum imperator ab isto præpositus Cleomenes flagitabatur : neque quidquam propiùs est factum , quàm ut illud Uticense exemplum de Adriano transferretur Syracusas , ut duo sepulcra duorum prætorum improborum , duabusque in provinciis constituerentur : verùm habita est a multitudine ratio temporis , habita est tumultus , habita etiam dignitatis , existimationisque communis , quòd is est conventus Syracusis civium Romanorum , ut non modò illâ provinciâ , verum etiam hac republica dignissimus existimetur.

95. Confirmant ipsi se , quum is etiam tum semisomnis stuperet : arma capiunt : totum forum atque insulam , quæ est urbis magna pars , complent. Unam illam solam noctem prædones ad Elorum commorati , quum fumantes etiam nostras naves reliquissent , accedere incipiunt ad Syracusas. Qui videlicet sæpe audissent , nihil esse pulchrius , quàm Syracusarum mœnia , ac portus , statuerant , sese , si ea Verre præ-  
tore

tore non vidissent, numquam esse visuros.

XXXVII. Ac primò ad illa æstiva prætoris accedunt, ipsam illam ad partem littoris, ubi iste per eos dies, tabernaculis positis, castra luxuriæ collocarat: quem posteaquam inanem locum offenderunt, & prætorem commovisse ex eo loco castra senferunt; statim sine ullo metu in portum ipsum penetrare cœperunt. Quum in portum dico, Judices (explanandum est enim diligentius, eorum causâ, qui locum ignorant) in urbem dico, atque in urbis intimam partem venisse piratas: non enim portu illud oppidum clauditur, sed urbe portus ipse cingitur, & concluditur; non ut alluantur a mari mœnia extrema, sed ipse influat in urbis sinum portus.

97. Hic, te prætore, Heracleo archipirata cum quatuor myoparonibus parvis ad arbitrium suum navigavit. Proh dii immortales! piraticus myoparo, quum imperium populi Romani, nomen, ac fasces essent Syracusis, usque ad forum, & ad omnes urbis crepidines accessit: quò neque Carthaginensium gloriosissimæ classes, quum mari plurimum poterant, multis bellis sæpe conatæ, umquam adspirare potuerunt; neque populi Romani invicta ante te prætorem gloria illa navalis, umquam tot Punicis, Siciliensibusque bellis penetrare potuit: qui locus ejusmodi est, ut

antè Syracusani in mœnibus suis , in urbe , in foro hostem armatum , ac victorem , quàm in portu ullam hostium navem viderent.

98. Hic , te prætorè , prædonum naviculæ pervagatæ sunt , quò Atheniensium classis sola , post hominum memoriam , CCC navibus , vi , ac multitudine invasit : quæ in eo ipso portu , loci ipsius , portûsque naturâ , victa , atque superata est. Hic primùm opes illius civitatis victæ , comminutæ , depressæque sunt : in hoc portu , Atheniensium nobilitatis , imperii , gloriæ naufragium factum existimatur.

XXXVIII. Eône pirata penetravit , quò simul atque adisset , non modò a latere , sed etiam a tergo magnam partem urbis relinqueret ? Insulam totam prætervectus est : quæ est urbs Syracusis suo nomine , ac mœnibus : quo in loco majores , ut antè dixi , Syracusanum quemquam habitare vetuerunt ; quòd , qui illam partem urbis tenerent , in eorum potestatem portum futurum intelligebant.

99. At quemadmodum est pervagatus ? radices palmarum agrestium , quas in nostris navibus invenerant , jaciebant , ut omnes istius improbitatem , & calamitatem Siciliæ possent cognoscere. Siculosne milites ? aratorumne liberos ? quorum patres tantum labore suo frumenti exara-



bant, ut populo Romano, totique Italiae suppeditare possent? eosne in insula Cere-  
ris natos, ubi primum fruges inventae esse  
dicuntur, eo cibo esse usos, a quo ma-  
jores eorum ceteros quoque, frugibus in-  
ventis, removerunt? Te praetore, Siculi  
milites palmarum stirpibus, praedones Si-  
culo frumento alebantur.

100. O spectaculum miserum, atque  
acerbum! ludibrio esse urbis gloriam, &  
populi Romani nomen; hominum con-  
ventu, atque multitudine; piratico myo-  
parone, in portu Syracusano de classe po-  
puli Romani triumphum agere piratam;  
quum praetoris nequissimi, inertissimique  
oculos praedonum remi respergerent? Post-  
eaquam e portu piratae non metu aliquo  
affecti, sed satietate exierant: tum coepe-  
runt quaerere homines causam illius tantae  
calamitatis: dicere omnes, & palam dis-  
putare, minimè esse mirandum, si, mili-  
tibus, remigibusque dimissis, reliquis eges-  
tate & fame perditis, praetore tot dies  
cum mulierculis perpotante, tanta igno-  
minia & calamitas esset accepta. Haec au-  
tem istius vituperatio; atque infamia con-  
firmabatur eorum sermone, qui a suis ci-  
vitatibus illis navibus praepositi fuerant:  
qui ex illo numero reliqui Syracusas, classe  
amissâ, refugerant. Dicebant, quos ex  
sua quisque navi missos sciret esse. Res

erat clara : neque solum argumentis , sed etiam certis testibus istius avaritia tenebatur.

- XXXIX. Homo certior fit , agi nihil in foro , & conventu totâ die , nisi hoc quæri a navarchis , quemadmodum classis esset amissa : illos respondere , & docere unumquemque , missione remigum , fame reliquorum , Cleomenis timore , & fugâ. Quod posteaquam iste cognovit , hanc rationem habere cœpit : causam sibi dicendam esse statuerat jam antè , quàm hoc usu veniret , ita ut ipsum priore actione dicere audistis : videbat , illis navarchis testibus , tantum hoc crimen sustinere se nullo modo posse : consilium capit primò stultum , verumtamen clemens.

- 102. Cleomenem , & navarchos ad se vocari jubet : veniunt : accusat eos , quòd hujusmodi de se sermones habuerint : rogat , ut id facere desistant , & in sua quisque navi dicat se tantum habuisse nautarum , quantum oportuerit , neque quemquam esse dimissum : illi enimverò se ostendunt , quod vellet , esse facturos. Iste non procrastinat : advocat amicos statim : quærit ex his singillatim , quot quisque nautas habuerit : respondit unusquisque , ut erat præceptum. Iste in tabulas refert : obsignat signis amicorum , providens homo : ut contra hoc crimen , si quando :

opus esset, hac videlicet testificatione  
uteretur.

103. Derisum credo esse hominem  
amentem a suis consiliariis; & admoni-  
tum, hasce ei tabulas nihil profuturas:  
etiam plus ex nimia prætoris diligentia  
suspicionis in eo crimine futurum. Jam iste  
erat hac stultitiâ multis in rebus usus, ut  
publicè quoque, quæ vellet, in civitatum  
litteris & tolli, & referri juberet: quæ  
omnia nunc intelligit sibi nihil prodesse,  
posteaquam certis litteris, testibus, aucto-  
ritatibusque convincitur.

XL. Ubi hoc videt, tabulas sibi nullo  
adjumento futuras: init consilium, non  
improbi prætoris (nam id quidem esset  
ferendum) sed importuni, atque amentis  
tyranni: statuit, si hoc crimen extenuare  
vellet (nam omnino tolli posse non arbi-  
trabatur) navarchos omnes, testes sui sce-  
leris; vitâ esse privandos. Occurrebat illa  
ratio: Quid Cleomene fiet? poterone ani-  
madvertere in eos, quos dicto audientes  
esse jussi; missum facere eum, cui impe-  
rium, potestatemque permisi? poterone  
eos afficere supplicio, qui Cleomenem  
secuti sunt; ignoscere Cleomeni, qui se-  
cum fugere, & se consequi jussit? pote-  
rone in eos esse vehemens, qui naves  
inanes non modò habuerunt, sed etiam  
apertas; in eum dissolutus, qui solus ha-

buerit constratam navem, & minùs exinanitam? Pereat Cleomenes unà. Ubi fides? ubi execrationes? ubi dextræ, complexusque? ubi illud contubernium muliebris militiæ in illo delicatissimo littore? Fieri nullo modo poterat, quin Cleomeni parceretur.

105. Cleomenem vocat: dicit ei, se statuisse animadvertere in omnes navarchos: ita sui periculi rationes ferre, ac postulare. Tibi uni parcam, & totius istius culpæ crimen, vituperationemque inconstantiae potius suscipiam, quàm aut in te sim crudelis, aut tot tam graves testes vivos, incolumesque esse patiar. Agit gratias Cleomenes, approbat consilium: dicit, ita fieri oportere: admonet tamen illud, quod istum fugerat, in Phalargum, Centuripinum navarchum, non posse animadverti; propterea quòd secum fuisset unà in Centuripina quadriremi. Quid ergo? iste homo ex ejusmodi civitate, adolescens nobilissimus, testis relinquetur? In præsentia, inquit Cleomenes, quoniam ita necesse est: sed post aliquid videbimus, ne iste nobis obstare possit.

XLI. Hæc posteaquam acta, & constituta sunt, procedit iste repentè e prætorio, inflammatus scelere, furore, crudelitate: in forum venit: navarchos vocari jubet. Qui nihil metuerent, nihil suspica-

rentur, statim accurrunt. Iste hominibus miseris, innocentibusque injici catenas imperat. Implorare illi fidem prætoris, & quare id faceret, rogare. Tunc iste hoc causæ dicit, quodd classem prædonibus prodidissent. Fit clamor, & admiratio populi, tantam esse in homine impudentiam, atque audaciam, ut aliis causam calamitatis attribueret, quæ omnis propter avaritiam ipsius accidisset: aut, quum ipse prædonum socius putaretur, aliis prodicionis crimen inferret: deinde, hoc quintodecimo die crimen esse natum, postquam classis esset amissa.

107. Quum hæc fierent, quærebatur, ubi esset Cleomenes? non quò illum ipsum, cujusmodi esset, quisquam supplicio, propter illud incommodum, dignum putaret: nam quid Cleomenes facere potuit? (non enim possum quemquam insimulare falsò) quid, inquam, magnopere Cleomenes facere potuit, istius avaritiæ navibus exinanitis? atque eum vident sedere ad latus prætoris, & ad aurem familiariter, ut solitus erat insufurrare. Tum verò omnibus indignissimum visum est, homines honestissimos, electos ex suis civitatibus, in ferrum, atque in vincula conjectos: Cleomenem propter flagitiorum, ac turpitudinis societatem, familiarissimum esse prætoris. Apponitur his tamen accusator Næ-

vius Turpio quidam, qui, C. Sacerdote prætore, injuriarum damnatus est, homo bene appositus ad istius audaciam: quem iste in decumis, in rebus capitalibus, in omni calumnia, præcursores habere solebat, & emissarium.

XLII. Veniunt Syracusas parentes, propinque miserorum adolescentium, hoc repentino calamitatis suæ commoti nuntio: vinctos adspiciunt catenis liberos suos, quum istius avaritiæ pœnam collo, & cervicibus suis sustinerent: adsunt, defendunt, proclamant: fidem tuam, quæ nusquam erat, nec umquam fuit, implo-rant. Pater aderat Dexio Tyndaritanus, homo nobilissimus, hospes tuus, cujus tu domi fueras, quem hospitem appellaras: eum quum illâ auctoritate, & miseriâ videres præditum, non te ejus lacrymæ, non senectus, non hospitii jus, atque nomen a scelere aliquam ad partem humanitatis revocare potuit.

109. Sed quid ego hospitii jura in hac tam immani bellua commemoro? qui Sthenium Thermitanum, hospitem suum, cujus domum per hospitium exhausit, & exinani-vit, absentem in reos retulerit, causâ indictâ, capite damnarit: ab eo nunc hospitiorum jura, atque officia quæramus? cum homine enim crudeli nobis res est, an cum fera, atque immani bellua? Te

patris lacrymæ de innocentis filii periculo non movebant? quum patrem domi reliquisses: filium tecum haberes: te neque præsens filius de liberorum caritate, neque absens pater de indulgentia patria commonebat?

110. Catenas habebat hospes tuus Aristeus, Dexionis filius. Quid ita? prodiderat classem. Quod ob præmium? deseruerat exercitum. Quid Cleomenes? ignavus fuerat. At eum tu ob virtutem coronâ aureâ donaras. Dimiserat nautas: tu ab omnibus mercedem missionis acceperas. Alter parens ex altera parte erat Herbitensis Eubulida, homo domi suæ clarus & nobilis: qui, quia Cleomenem in defendendo filio læserat, nudus pene est destitutus. Quid erat autem, quod quisquam diceret, aut defenderet? Cleomenem nominare non licet. At causa cogit. Morieret, si appellaris: numquam enim iste est cuiquam mediocriter minatus. At remiges non erant. Prætorem tu accusas? frange cervicem. Si neque prætorem, neque prætoris æmulum appellare licebit, quum in his duobus tota causa sit: quid futurum est?

XLIII. Dicit etiam causam Heraclius Segestanus, homo domi suæ summo loco natus. Audite, ut vestra humanitas postulat, Iudices: audietis enim de magnis in-

commodis , injuriisque sociorum. Hunc scitote fuisse Heraclium in ea causa , qui propter gravem morbum oculorum tum non navigavit , & jussu ejus , qui potestatem habuit , cum commeatu , Syracusis remanserit. Iste certè neque prodidit classem , neque metu perterritus fugit , neque exercitum deferuit : etenim tunc esset hoc animadversum , quum classis Syracusis proficiscebatur. Is tamen in eadem causa fuit , quasi esset in aliquo manifesto scelere prehensus ; in quem ne falsò quidem causa conferri criminis potuit.

112. Fuit in illis navarchis Heracliensis quidam Furius ( nam habent illi nonnulla hujuscemodi Latina nomina ) homo , quamdiu vixit , non domi suæ solùm , post mortem totâ Siciliâ clarus , & nobilis : in quo homine tantum animi fuit , non solùm ut istum liberè læderet ; nam id quidem , quoniam moriendum videbat , sine periculo se facere intelligebat : verùm , morte propositâ , quum lacrymans in carcere mater noctes , diesque assideret , defensionem causæ suæ scripsit ; quam nunc nemo est in Sicilia , quin habeat ; quin legat , quin tui sceleris & crudelitatis ex illa oratione commonefiat : in qua docet , quot a civitate sua nautas acceperit : quot & quanti quemque dimiserit : quot secum habuerit : item de ceteris navibus dixit : quæ quum apud te diceret ,



virgis oculi verberabantur. Ille morte propositâ, facilè dolorem corporis patiebatur : clamabat, id quod scriptum reliquit, *Facinus esse indignum, plus impudicissimæ mulieris apud te de Cleomenis salute, quàm de sua vita lacrymas matris valere.*

113. Deinde etiam illud video esse dictum, quod, si rectè vos populus Romanus cognovit, non falsò ille jam in ipsa morte de vobis prædicavit : *Non posse Verrem, testes interficiendo, crimina sua extinguere : graviolem apud sapientes iudices se fore ab inferis testem, quàm si vivus in iudicium produceretur : tum, avaritiæ solùm, si viveret ; nunc, quum ita esset necatus, sceleris, audaciæ, crudelitatis testem fore.* Jam illa præclara : *Non testium modò catervas, quum tua res ageretur, sed a diis Manibus innocentium pœnas, sceleratorumque furias in tuum iudicium esse venturas : sese ideo leviolem casum suum fingere, quòd jam antè aciem securium tuarum, Sestiiq̃ue, tuî carnificis, vultum & manum vidisset, quum in conventu civium Romanorum iussu tuo securi cives Romani ferirentur.* Ne multa, Iudices ; libertate, quam vos focis dedistis, hac ille in acerbissimo supplicio miserimæ servitutis abusus est.

XLIV. Condemnat omnes de consilii sententia : tamen neque iste in tanta re, tot hominum, totque civium causa, P. Vet-

tium ad se arcessit, quæstorem suum, cuius consilio uteretur: neque P. Cervium, talem virum, legatum, qui, quia legatus, isto prætore, in Sicilia fuit, primus ab isto iudex rejectus est: sed de latronum, hoc est, de comitum suorum sententia condemnatus omnes.

115. Hic cuncti Siculi, fidelissimi, atque antiquissimi socii, plurimis affecti beneficiis a majoribus nostris, graviter commoventur, & de suis periculis, fortunisque omnibus pertimescunt. Illam clementiam, mansuetudinemque nostri imperii in tantam crudelitatem, inhumanitatemque esse conversam! condemnari tot homines uno tempore nullo crimine! defensionem suorum furtorum prætorem improbum ex indignissima morte innocentium quærere! Nihil addi jam videtur, Iudices, ad hanc improbitatem, amentiam, crudelitatemque posse: & rectè nihil videtur: nam si cum aliorum improbitate certet, longè omnes, multumque superabit.

116. Sed secum ipse certat: id agit, ut semper superius suum facinus novo scelere vincat. Phalargum Centuripinum dixeram exceptum esse a Cleomene, quòd in ejus quadriremi Cleomenes vectus esset: tamen, quia pertimuerat adolescens, quòd eandem suam causam videbat esse, quam illorum, qui innocentes peribant; ad ho-

minem accedit Timarchides : a securi negat ei esse periculum : virgis ne caderetur , monet ut caveat. Ne multa , ipsum dicere adolescentem audistis , se ob hunc virgarum metum pecuniam Timarchidi numerasse.

117. Levia sunt hæc in hoc reo crimina : metum virgarum navarchus nobilissimæ civitatis pretio redemit ; humanum : alius , ne condemnaretur , pecuniam dedit ; usitatum est : non vult populus Romanus obsoletis criminibus accusari Verrem : nova postulat , inaudita desiderat : non de prætore Siciliae , sed de crudelissimo tyranno fieri iudicium arbitratur.

XLV. Includuntur in carcerem condemnati : supplicium constituitur in illos : fumitur de miseris parentibus navarchorum : prohibentur adire ad filios : prohibentur liberis suis cibum , vestitumque ferre. Patres hi , quos videtis , jacebant in limine , matresque miserae pernoctabant ad ostium carceris , ab extremo complexu liberum exclusæ : quæ nihil aliud orabant , nisi ut filiorum extremum spiritum ore excipere sibi liceret. Aderat janitor carceris , carnifex prætoris , mors , terrorque sociorum & civium , licitor Sestius ; cui ex omni gemitu , doloreque certa merces comparabatur : Ut adeas , tantum dabis : ut cibum tibi intrò ferre liceat , tantum : nemo

recusabat. Quid ? ut uno ictu securis afferam mortem filio tuo , quid dabis ? ne diu crucietur ? ne sæpius feriat ? ne cum sensu doloris aliquo , aut cruciatu spiritus auferatur ? Etiam ob hanc causam pecunia lictori dabatur.

119. O magnum , atque intolerandum dolorem ! ô gravem , acerbamque fortunam ! non vitam liberum , sed mortis celeritatem pretio redimere cgebantur parentes. Atque ipsi etiam adolescentes cum Sestio de eadem plaga , & de uno illo ictu loquebantur : idque postremum parentes suos liberi orabant , ut levandi cruciatûs sui gratiâ lictori pecunia daretur. Multi & graves dolores inventi parentibus , & propinquis ; multi : verumtamen mors sit extrema : non erit. Estne aliquid ultrâ , quod progredi crudelitas possit ? reperietur : nam , illorum liberi quum erunt securi percussi , ac necati , corpora feris objicientur : hoc si luctuosum est parenti , redimat pretio sepeliendi potestatem.

120. Onasum Segestanum , hominem nobilem , dicere audistis , se ob sepulturam Heraclii navarchi pecuniam Timarchidi dinumerasse. Hoc ( ne possis dicere : *patres enim veniunt , amissis filiis , irati* ) vir primarius , homo nobilissimus , dicit : neque de filio dicit. Jam hoc , quis tum fuit Syracusis , quin audierit , quin sciat ,

has per Timarchidem pactiones sepulturæ cum vivis etiam illis esse factas ? non palam cum Timarchide loquebantur ? non omnes omnium propinqui adhibebantur ? non palam vivorum funera locabantur ? Quibus rebus omnibus actis, atque decisis, producuntur e carcere, & deligantur ad palum.

XLVI. Quis tam fuit illo tempore durus & ferreus, quis tam inhumanus, præter unum te, qui non illorum ætate, nobilitate, miseriam commoveretur ? ecquis fuit, quin lacrymaretur ? quin ita calamitatem putaret illorum, ut fortunam tamen non alienam, periculum autem commune agi arbitraretur ? Feriuntur securi : lætaris tu in omnium gemitu, & triumphas : testes avaritiæ tuæ gaudes esse sublatos. Errabas, Verres, & vehementer errabas, quum te maculas furtorum, & flagitiorum tuorum, fociorum innocentium sanguine eluere arbitrabare : præceps amentiam ferebare, qui te existimares avaritiæ vulnera crudelitatis remediis posse sanare. Etenim quamquam illi sunt mortui sceleris tui testes, tamen eorum propinqui neque tibi, neque illis defunt : tamen ex illo ipso numero navarchorum aliqui vivunt, & adsunt : quos, ut mihi videtur, ab illorum innocentium poenâ fortuna ad hanc causam reservavit.

122. Adest Philargus Haluntinus, qui,

quia cum Cleomene non fugit, oppressus a prædonibus, & captus est: cui calamitas salutis fuit: qui, nisi captus a piratis esset, in hunc prædonem sociorum incidisset. Dicit is pro testimonio, de missione nautarum, de fame, de Cleomenis fuga. Adest Centuripinus Phalargus, in amplissima civitate, amplissimo loco natus. Eadem dicit: nulla in re discrepat.

123. Per deos immortales! Judices, quo tandem animo sedetis? aut quemadmodum auditis? Utrum ego desipio, & plus quam satis est, doleo in tanta calamitate, miseriaque sociorum? an vos quoque hic acerbissimus innocentium cruciatus, & mœror pari sensu doloris afficit? Ego enim quum Herbitensem, quum Heracliensem securi esse percussum dico, versatur mihi ante oculos indignitas calamitatis.

XLVII. Eorumne populorum cives, eorumne agrorum alumnos, ex quibus maxima vis frumenti quotannis plebi Romanæ, illorum operis, ac laboribus quæritur; qui a parentibus, spe nostri imperii, nostræque æquitatis, suscepti, educatique sunt, ad C. Verris nefariam immanitatem, & ad ejus securem funestam esse servatos? Quum mihi Tyndaritani illius venit in mentem, quum Segestani, tum jura simul civitatum, atque officia considero: quas urbes P. Africanus etiam or-

nandas esse spoliis hostium arbitratus est, eas C. Verres non solum illis ornamentis, sed etiam viris nobilissimis nefario scelere privavit. En quod Tyndaritani libenter prædicent : *Nos in septemdecim populis Siciliae non eramus : nos semper in omnibus Punicis, Siciliensibusque bellis amicitiam, fidemque populi Romani secuti sumus : a nobis omnia populo Romano semper, & belli adjumenta, & pacis ornamenta ministrata sunt.* Multum verò hæc his jura profuerunt in istius imperio, ac potestate.

125. Vestros quondam nautas contra Carthaginem Scipio duxit : at nunc naves contra prædones pene inanes Cleomenes ducit. Vobiscum Africanus hostium spolia ; & præmia laudis communicavit : at nunc per me spoliati, nave a prædonibus abductâ, ipsi in hostium numero, locoque ducemini. Quid verò ? illa Segestanorum non solum litteris tradita, neque commemorata verbis, sed multis officiis illorum usurpata, & comprobata cognatio, quos tandem fructus hujusce necessitudinis in istius imperio tulit ? Nempe hoc fuit iure, Judices, ut ex sinu patris nobilissimus adolescens, & e complexu matris ereptus innocens filius, istius carnifici Sestio dederetur. Cui civitati majores nostri maximos agros, atque optimos concesserunt : quam immunem esse voluerunt ; hæc tantâ

apud te cognationis, fidelitatis, vetustatis auctoritate, ne hoc quidem juris obtinuit, ut unius honestissimi, atque innocentissimi civis mortem, & sanguinem deprecaretur.

XLVIII. Quò confugient focii? quem implorabunt? quâ spe denique, ut vivere velint, tenebuntur, si vos eos deseritis? Ad senatum devenient, qui de Verre supplicium sumat? non est usitatum, non senatorium. Ad populum Romanum confugient? facilis est causa populi: legem enim se sociorum causâ jussisse, & vos ei legi custodes, ac vindices præposuisse dicet. Hic locus est igitur unus, quò perfugiant: hic portus, hæc arx, hæc ara sociorum: quò quidem nunc non ita confugiunt, ut antea in suis repetendis rebus solebant: non argentum, non aurum, non vestem, non mancipia repetunt: non ornamenta, quæ ex urbibus, fanisque erepta sunt: metuunt homines imperiti, ne jam hæc populus Romanus concedat, & jam fieri velit. Patimur enim jam multos annos, & silemus, quum videamus, ad paucos homines omnes omnium nationum pecunias pervenisse: quod eò magis ferre æquo animo, atque concedere videmur, quia nemo istorum dissimulat: nemo laborat, ut obscura sua cupiditas esse videatur.

127. In urbe nostra pulcherrima, at-



que ornatissima, quod signum, quæ tabula picta est, quæ non ab hostibus victis capta, atque apportata sit? At istorum villæ, sociorum fidelissimorum & plurimis, & pulcherrimis spoliis ornatae, refertæque sunt. Ubi pecunias exterarum nationum esse arbitramini, quibus nunc omnes egent, quum Athenas, Pergamum, Cyzicum, Miletum, Chium, Samum, totam denique Asiam, Achaiam, Græciam, Siciliam, jam in paucis villis inclusas esse videatis? Sed hæc, ut dico, omnia jam focii vestri relinquunt, & negligunt, Judices. Ne publicè a populo Romano spoliarentur, officiis, ac fide providerunt. Paucorum cupiditati tum, quum obsistere non poterant, tamen sufficere aliquo modo poterant: nunc verò jam adempta est non modò resistendi, verum etiam supeditandi facultas: itaque res suas negligunt: pecunias, quo nomine judicium hoc appellatur, non repetunt: relinquunt, & negligunt. Hoc jam ornatu ad vos confugiunt: adspicite, adspicite, Judices, squalorem, fordesque sociorum.

XLIX. Sthenius hic Thermitanus cum hoc capillo atque veste, domo suâ totâ expilatâ, mentionem tuorum furtorum non facit: sese ipsum abs te repetit, nihil amplius: totum enim tuâ libidine, & scelere ex sua patria (in qua multis virtuti-

bus, & beneficiis floruit princeps) sustulisti. Dexio hic, quem videtis, non quæ publicè Tyndari, non quæ privatim sibi eripuisti, sed unicum miser abs te filium optimum, atque innocentissimum flagitat: non ex litibus æstimatis tuis pecuniam domum, sed ex tua calamitate, cineri, atque ossibus filii sui solatium vult aliquod reportare. Hic tam grandis natu Ebulida, hoc tantum, exactâ ætate, laboris, itinerisque suscepit, non ut aliquid ex suis bonis recuperaret; sed ut, quibus oculis cruentas cervices filii sui viderat, iisdem te condemnatum videret.

129. Si per L. Metellum licitum esset, Judices, matres illorum, uxores, sororesque veniebant: quarum una, quum ego ad Heracliam noctu accederem, cum omnibus matronis ejus civitatis, & cum multis facibus mihi obviam venit, & ita me suam salutem appellans, te suum carnificem nominans, filii nomen implorans, mihi ad pedes misera jacuit, quasi ego excitare filium ejus ab inferis possem. Faciebant hoc idem in ceteris civitatibus grandes natu matres, & item parvuli liberi miserorum: quorum utrorumque ætas laborem, & industriam meam, fidem, & misericordiam vestram requirebat.

130. Itaque ad me, Judices, præter ceteras hanc querimoniam Sicilia detulit:

lacrymis ego ad hoc, non gloriâ inductus accessi: ne falsa damnatio, ne carcer, ne catenæ, ne verbæ, ne secures, ne cruciatus sociorum, ne sanguis innocentium, ne denique etiam ex sanguine corpora mortuorum, ne mœror parentum, ac propinquorum, magistratibus nostris quæstui posset esse. Hunc ego si metum Siciliæ, damnatione istius, per vestram fidem, & severitatem deiecero, Iudices; satis officio meo, satis illorum voluntati, qui a me hoc petiverunt, factum esse arbitror.

L. Quapropter si quem fortè inveneris, qui hoc navale crimen conetur defendere, is ita defendat: illa communia, quæ ad causam nihil pertinent, prætermittat; me culpam fortunæ assignare, calamitatem crimini dare: me amissionem classis objicere; quum multi viri fortes in communi, incertoque periculo bellî, & terrâ, & mari sæpe offenderint. Nullam tibi obijcio fortunam: nihil est, quod ceterorum res minùs commodè gestas proferas: nihil est, quod multorum naufragia fortunæ colligas. Ego naves inanes fuisse dico: remigès, nautasque dimissos: reliquos stirpibus vixisse palmarum: præfuisse classi populi Romani Siculum; perpetuò sociis, atque amicis, Syracusanum: te illo tempore ipso, superioribusque diebus omnibus in littore cum mulierculis perpotasse dico:

harum rerum omnium auctores, testesque produco.

132. Num tibi insultare in calamitate, num intercludere perfugium fortunæ, num casus bellicos exprobrare, aut obicere videor? tametsi solent hi fortunam sibi obijci nolle, qui se fortunæ commiserunt, qui in ejus periculis sunt, ac varietate versati: istius quidem calamitatis tuæ fortuna particeps non fuit: homines enim in præliis, non in conviviiis, belli fortunam tentare, ac periclitari solent: in illa autem calamitate non Martem fuisse communem, sed Venerem possumus dicere. Quòd si fortunam obijci tibi non oportet, cur tu fortunæ illorum innocentium veniam, ac locum non dedisti?

133. Etiam illud præcidas licet, te, quòd supplicium more majorum sumpseris, securique percusseris, idcirco a me in crimen, & invidiam vocari. Non in supplicio crimen meum vertitur: non ego securi nego quemquam feriri debere: non ego metum ex re militari, non severitatem imperii, non pœnam flagitii, tolli dico oportere: fateor non modò in focios, sed etiam in cives, militesque nostros, persæpe esse severè, ac vehementer vindicatum. Quare hæc quoque prætermittas licet.

LI. Ego culpam non in navarchis, sed in te fuisse demonstro: te pretio milites,

remigesque dimisisse arguo : hoc navarchi reliqui dicunt : hoc Netinorum fœderata civitas publicè dicit : hoc Herbienteses , hoc Ameſtratini , hoc Ennenſes , hoc Agyrinenſes , Tyndaritani publicè dicunt : tuus denique teſtis , tuus imperator , tuus hoſpes Cleomenes hoc dicit , ſeſe in terram eſſe egreſſum , uti Pachyno , e terreſtri præſidio , milites colligeret , quos in navibus collocaret : quod certè non feciſſet , ſi ſuum numerum naves haberent : ea eſt enim ratio inſtructarum , ornatarumque navium , ut non modò plures , ſed ne ſinguli quidem poſſint accedere.

134. Dico præterea , illos ipſos reliquos nautas fame , atque inopiâ rerum omnium confectos fuiſſe , ac perditos : dico , aut omnes extra culpam fuiſſe ; aut , ſi uni attribuenda culpa ſit , in eo maximam fuiſſe , qui optimam navem , plurimos nautas haberet , ſummum imperium obtineret ; aut , ſi omnes in culpa fuerint , non oportuiſſe Cleomenem conſtitui ſpectatorem illorum mortis , atque cruciatûs ; dico etiam , in illo ſupplicio mercedem lacrymarum , mercedem vulneris , atque plagæ , mercedem funeris , ac ſepulturæ conſtitui nefas fuiſſe.

135. Quapropter ſi mihi reſpondere voles , hæc dicito : claſſem inſtructam , atque

ornatam fuisse, nullum propugnatorem abfuisse, nullum vacuum transtrum fuisse, remigi rem frumentariam esse suppeditatam, mentiri navarchos, mentiri tot, & tam graves civitates, mentiri etiam Siciliam totam: proditum te esse a Cleomene, qui se dixerit exisse in terram, ut Pachyno deduceret milites: animum illis, non copias defuisse: Cleomenem acerrimè pugnantiem, ab his relictum esse, atque desertum: nummum ob sepulturam datum nemini: quæ si dices, tenebere: sin alia dices; quæ a me dicta sunt, non refutabis.

LII. Hic tu etiam dicere audebis, *Est in iudiciis ille familiaris meus, est pater-nus amicus ille?* non, ut quisque maximè est, quicum tibi aliquid sit, ita tui huiusmodi criminis maximè eum pudet? Paternus amicus est. Ipse pater si iudicaret, per deos immortales! quid facere posset, quum tibi hæc diceret? Tu in provincia populi Romani prætor, quum tibi maritimum bellum esset administrandum, Mamertinis, ex fœdere quam deberent navem, per triennium remisisti: tibi apud eosdem privatim navis oneraria maxima publicè est ædificata: tu a civitatibus pecunias classis nomine coëgisti: tu pretio remiges dimisisti: tu, quum navis esset a quæstore, & ab legato capta prædonum, archipiratam ab omnium oculis removisti:  
tu,

tu, qui cives Romani esse dicerentur, qui a multis cognoscerentur, securi ferire potuisti: tu tuam domum piratas adducere, in iudicium archipiratam domo producere ausus es.

137. Tu in provincia tam splendida, apud socios fidelissimos, cives Romanos honestissimos, in metu, periculoque provinciae, dies continuos complures in litore, conviviisque jacuisti: te per eos dies nemo domi tuae convenire, nemo in foro videre potuit: tu sociorum, atque amicorum ad ea convivia matresfamilias adhibuisti: tu inter ejusmodi mulieres prætexitatum tuum filium, nepotem meum, collocavisti, ut ætati maximè lubricæ, atque incertæ, exempla nequitiae parentis vita præberet: tu prætor in provincia cum tunica, pallioque purpureo visus es: tu propter amorem, libidinemque tuam, imperium navium legato populi Romani ademisti, Syracusano tradidisti: tui milites in provincia Sicilia frugibus, frumentoque caruere: tuâ luxuriâ, atque avaritiâ classis populi Romani a prædonibus capta, & incensa est.

138. Post Syracusas conditas, quem in portum numquam hostis accesserat, in eo, te prætore, primùm piratæ navigaverunt: neque hæc tot, tantaque dedecora dissimulatione tuâ, neque oblivione hominum, ac taciturnitate tegere voluisti; sed etiam navium præfectos, sine ulla causa, de

complexu parentum suorum , hospitum tuorum , ad mortem , cruciatumque rapuisti : neque in parentum luctu , atque lacrymis , te mei nominis commemoratio mitigavit : tibi hominum innocentium sanguis non modò voluptati , sed etiam quæstui fuit.

LIII. Hæc si tibi tuus parens diceret , posses ab eo veniam petere ? posses , ut tibi ignosceret , postulare ? Satis est factum Siculis , satis officio , ac necessitudini , Judices , satis promisso muneri , ac recepto. Reliqua est ea causa , Judices , quæ non jam recepta , sed innata ; neque delata ad me , sed in anima , sensuque meo penitus affixa , atque insita est : quæ non ad fortiorum salutem , sed ad civium Romanorum , hoc est , ad uniuscujusque nostrum vitam , & sanguinem pertinet. In qua nolite a me , quasi dubium sit aliquid , argumenta , Judices , exspectare : omnia , quæ dicam de supplicio civium Romanorum , sic erunt clara , & illustria , ut ad ea probanda totam Siciliam testem adhibere possim. Furor enim quidam , sceleris , & audaciæ comes , istius effrenatum animum , importunamque naturam , tantâ oppressit amentia , ut numquam dubitaret in conventu palam supplicia , quæ in convictos maleficii servos constituta sunt , ea in cives Romanos expromere. Virgis quàm



multos ceciderit, quid ego commemorem? Tantum brevissimè dico, Judices: nullum fuit omnino, isto prætore, in hoc genere discrimen. Itaque jam consuetudine ad corpora civium Romanorum, etiam sine istius nutu, ferebatur manus ipsa lictoris.

LIV. Num potes hoc negare, Verres, in foro Lilybæi, maximo conventu, C. Servilium, civem Romanum, in conventu Panormitano veterem negotiatorem, ad tribunal, ante pedes tuos, ad terram, virgis, & verberibus abjectum? aude hoc primum negare, si potes: nemo Lilybæi fuit, quin viderit: nemo in Sicilia, quin audierit. Plagis confectum dico a lictoribus tuis civem Romanum, ante oculos tuos concidisse.

141. Ob quam causam? dii immortales! tametsi injuriam facio communi causæ, & juri civitatis: quasi enim possit esse ullâ causa, cur hoc cuiquam civi Romano jure accidat, ita quæro, quæ in Servilio causa fuerit. Ignoscite in hoc uno, Judices: in ceteris enim non magnopere causas requiram. Locutus erat liberius de istius improbitate, atque nequitia. Quod isti simulac renuntiatum est; hominem jubet Lilybæum vadimonium Venerio servo promittere. Promittit. Lilybæum venit: cogere eum cœpit, quum ageret nemo,

nemo postulare, H-S duobus millibus sponsonem facere cum lictore suo, *Ni furtis quæstum faceret*. Recuperatores de cohorte sua dicit daturum. Servilius & recusare, & deprecari, ne iniquis iudicibus, nullo adversario, iudicium capitis in se constitueretur.

142. Hæc quum maximè loqueretur, sex lictores eum circumsistunt valentissimi, & ad pulsandos, verberandosque homines exercitatissimi: cædunt acerrimè virgis: denique proximus lictor (de quo sæpe jam dixi) Sestius, converso bacillo, oculos misero tundere vehementissimè cœpit. Itaque illi quum sanguis os, oculosque compleisset, concidit; quum illi nihilò minùs jacenti latera tunderentur, ut aliquando spondere se diceret. Sic ille affectus, illinc tum pro mortuo sublatus, brevi postea est mortuus: iste autem homo Venerius, & affluens omni lepore & venustate, de bonis illius in æde Veneris argenteum Cupidinem posuit. Sic etiam fortunis hominum abutebatur ad nocturna vota cupiditatum suarum.

LV. Nam quid ego de ceteris civium Romanorum supplicius singillatim potius, quàm generatim, atque universè loquar? Carcer ille, qui est a crudelissimo tyranno Dionysio factus Syracusis, quæ lautumiæ vocantur, in istius imperio domicilium

civium Romanorum fuit : ut quisque istius animum , aut oculos offenderat , in lautumias statim conjiciebatur. Indignum hoc video videri omnibus , Judices ; & id jam priore actione , quum hæc testes dicerent , intellexi : retineri enim putatis oportere jura libertatis non modò hic , ubi tribuni plebis sunt , ubi ceteri magistratus , ubi plenum forum judiciorum , ubi senatûs auctoritas , ubi existimatio populi Romani , & frequentia ; sed , ubicumque terrarum , & gentium violatum jus civium Romanorum sit , statuitis id pertinere ad communem causam libertatis , & dignitatis.

144. In externorum hominum , & maleficorum , sceleratorumque , in prædonum , hostiumque custodias tu tantum numerum civium Romanorum includere ausus es ? numquamne tibi judicii , numquam concionis , numquam hujus tantæ frequentiae , quæ nunc animo te iniquissimo , infestissimoque intuetur , venit in mentem ? numquam tibi populi Romani absentis dignitas , numquam species ipsa hujuscemodi multitudinis , in oculis , animoque versata est ? numquam te in horum conspectum rediturum , numquam in forum populi Romani venturum , numquam sub legum & judiciorum potestatem casurum esse putasti ?

LVI. At quæ erat ista libido crudelitatis exercendæ? quæ tot scelerum suscipiendorum causa? nulla, Judices, præter prædandi novam, singularemque rationem. Nam ut illi, quos a poetis accepimus, sinus quosdam obsedisse maritimos, aut aliqua promontoria, aut prærupta saxa tenuisse dicuntur, ut eos, qui essent appulsi navigiis, interficere possent; sic iste in omnia maria infestus ex omnibus Siciliae partibus imminebat. Quæcumque navis ex Asia, quæ ex Syria, quæ Tyro, quæ Alexandriâ venerat, statim certis indicibus, & custodibus tenebatur: vectores omnes in lautumias conjiciebantur: onera, atque merces in prætoriam domum deferiebantur: versabatur in Sicilia longo intervallo alter, non Dionysius ille, nec Phalaris (tulit enim illa quondam insula multos, & crudeles tyrannos) sed quoddam novum monstrum ex vetere illa immanitate, quæ in iisdem locis versata esse dicitur. Non enim Charybdim tam infestam, neque Scyllam nautis, quàm istum in eodem freto fuisse arbitror: hoc etiam iste infestior, quòd multò se pluribus, & majoribus canibus succinxerat. Cyclops alter, multò importunior: hic enim totam insulam obtinebat; ille Ætnam solam, & eam Siciliae partem tenuisse dicitur.

146. At quæ causa tum subijciebatur ab

ipso, Judices, hujus tam nefariæ crudelitatis? eadem, quæ nunc in defensione commemorabitur. Quicumque accesserant ad Siciliam paulò pleniores, eos Sertorianos milites esse, atque a Dianio fugere dicebat. Illi ad deprecandum periculum proferebant, alii purpuram Tyriam; thus alii, atque odores, vestemque linteam; gemmas alii, & margaritas; vina nonnulli Græca, venalesque Asiaticos: ut intelligeretur ex mercibus, quibus ex locis navigarent. Non providerant, eas ipsas sibi causas esse periculi, quibus adjumentis se ad salutem uti arbitrabantur. Iste enim hæc eos ex piratarum societate adeptos esse dicebat: ipsos in lautumias abduci imperabat: naves eorum, atque onera diligenter asservanda curabat.

LVII. His institutis quum completus jam mercatorum carcer esset, tum illa fiebant, quæ L. Suetium, equitem Romanum, lectissimum virum dicere audistis, & quæ ceteros audietis. Cervices in carcere frangebantur indignissimè civium Romanorum, ut jam illa vox, & illa imploratio, CIVIS ROMANUS SUM, quæ sæpe multis, in ultimis terris, opem inter barbaros, & salutem tulit, ea mortem illis acerbior, & supplicium maturius ferret. Quid est, Verres? quid ad hæc cogitas respondere? num mentiri me? num fin-

gere aliquid? num augere crimen? num quid horum dicere istis defensoribus tuis audes? Cedo mihi, quæso, ex ipsius sinu litteras Syracusanorum, quas iste ad arbitrium suum confectas esse arbitratur: cedo rationem carceris, quæ diligentissimè conficitur, quo quisque die datus in custodiam, quo mortuus, quo necatus sit.

LITTERÆ SYRACUSANORUM.

148. Videtis cives Romanos gregatim coniectos in lautumias: videtis indignissimo in loco coacervatam multitudinem vestrorum civium. Quærite nunc vestigia, quibus exitus illorum ex illo loco compareant: nulla sunt. Omnesne mortui? Si ita posset defendere, tamen fides huic defensioni non haberetur. Sed scriptum exstat in iisdem litteris, quod iste homo barbarus, ac dissolutus, neque attendere unquam, neque intelligere potuit: ΕΔΙΚΟΘΗΣΑΝ, inquit, ut Siculi loquuntur, hoc est, supplicio affecti, ac necati sunt.

LVIII. Si quis rex, si qua civitas exterarum gentium, si qua natio fecisset aliquid in civem Romanum ejusmodi, nonne publicè vindicaremus? non bello persequeremur? possemus hanc injuriam, ignominiamque nominis Romani inultam, impunitamque dimittere? Quot bella majores nostros, & quantâ suscepisse arbitramini, quòd cives Romani injuriâ affecti,

quòd navicularii retenti, quòd mercatores spoliati dicerentur? At ego retentos non queror: spoliatos ferendum puto: navibus, mancipiis, mercibus ademptis, in vincula coniectos esse mercatores, & in vinculis cives Romanos necatos esse arguo.

150. Si hæc apud Scytas dicerem, non hic in tanta multitudine civium Romanorum, non apud senatores lectissimos civitatis, non in foro populi Romani, de tot & tam acerbis suppliciis civium Romanorum: tamen animos etiam barbarorum hominum permoverem. Tanta enim hujus imperii amplitudo, tanta nominis Romani dignitas est apud omnes nationes, ut ista in nostros homines crudelitas nemini concessa videatur. Num ergo tibi ullam salutem, ullum perfugium putem, quum te implicatum severitate judicum, circumretitum frequentia populi Romani esse videam?

151. Si mehercules, id quod fieri non posse intelligo, ex his laqueis te exsueris, ac te aliquà viâ, ac ratione explicaris: in illas tibi majores plagas incidendum est, in quibus te ab eodem me, superiore ex loco confici, & concidi necesse est. Cui si etiam id, quod defendit, velim concedere: tamen illa ipsa defensio non minus esse ei perniciofa, quàm mea vera accusatio debeat. Quid enim defendit? ex Hispania fugientes se excepisse, & supplicio

affecisse dicit. Quis tibi id permisit? quo id jure fecisti? quis idem fecit? qui tibi id facere licuit?

152. Forum plenum, & basilicas istorum hominum videmus, & animo æquo videmus. Civilis enim dissensionis, & sive amentiae, sive fati, seu calamitatis, non est iste molestus exitus, in quo reliquos saltem cives incolumes licet conservare. Verres, ille vetus proditor consulis, translator quaesturae, averfor pecuniae publicae, tantum sibi auctoritatis in republica suscepit, ut quibus hominibus per senatum, per populum Romanum, per omnes magistratus, in foro, in suffragiis, in hac urbe, in republica versari liceret, iis omnibus mortem acerbam, crudelemque proponeret, si fortuna eos ad aliquam partem Siciliae detulisset.

153. Ad Cn. Pompeium, clarissimum virum, & fortissimum, permulti, occiso Perpennâ, ex illo Sertoriano numero militum confugerunt: quem non ille summo cum studio salvum, incolumemque servavit? cui civi supplici non illa dextera invicta & fidem porrexit, & spem salutis ostendit? Itane verò? quibus fuit portus apud eum, contra quem arma tulerant; iis apud te, cujus nullum in republica umquam monumentum fuit, mors, & cruciatus erat constitutus? Vide, quàm



commodam defensionem excogitaris.

LIX. Malo, malo mehercule, id, quod tu defendis, his iudicibus, populoque Romano, quàm id, quod ego insimulo, probari: malo, inquam, te isti generi hominum, quàm mercatoribus, & naviculariis inimicum, atque infestum putari: meum enim crimen avaritiæ te nimis coarguit; tua defensio furoris cuiusdam, & immanitatis, & inauditæ crudelitatis, & pene novæ proscriptionis.

154. Sed non licet me isto tanto bono, Iudices, uti; non licet: adsunt enim Puteoli toti: frequentissimi venerunt ad hoc iudicium mercatores, homines locupletes, atque honesti, qui partim socios suos, partim liberos ab isto spoliatos, in vincula coniectos: partim in vinculis necatos, partim securi percussos esse dicent. Hic vide quàm me sis usurus æquo. Quum ego P. Granium testem produxero, qui suos liberos a te securi percussos esse dicat, qui a te navem suam, mercesque repetat: refellito, si poteris: meum testem deseram, tibi favebo: te, inquam, adjuvabo: ostendito, illos cum Sertorio fuisse, a Dianio fugientes ad Siciliam esse delatos. Nihil est, quod te malim probare: nullum enim facinus, quod maiore supplicio dignum sit, reperiri, neque proferri potest.

155. Reducam iterum equitem Roma-

P. vj.

num, L. Flavium, si voles: quoniam priore actione, ut patroni tui dictitant, novâ quâdam sapientiâ; ut omnes intelligunt, conscientiâ tuâ, atque auctoritate meorum testium, testem nullum interrogasti. Interrogetur Flavius, si voles, quinam fuerit L. Herennius, is, quem ille argentariam Lepti fecisse dicit: qui quum amplius centum cives Romanos haberet ex conventu Syracusano, qui eum non solum cognoscerent, sed etiam lacrymantibus, ac te implorantes defenderent; tamen a te, inspectantibus omnibus Syracusanis, securi percussus est: hunc quoque testem meum refelli; & illum Herennium Sertorianum fuisse abs te demonstrari, & probari volo.

LX. Quid de illa multitudine dicemus eorum, qui, capitibus involutis, in piratarum, captivorumque numero producebantur, ut securi ferirentur? quæ ista nova diligentia? quam ob causam abs te cogitata? an te L. Flavii, ceterorumque de L. Herennio vociferatio commovebat? an M. Annii, gravissimi, atque honestissimi viri, summa auctoritas paulò te diligentior, timidiorque fecerat? qui nuper pro testimonio, non advenam nescio quem, nec alienum, sed eum civem Romanum, qui omnibus in illo conventu notus, qui Syracusis natus esset, a te securi percussum esse dixit.

157. Post hanc illorum vociferationem , post hanc communem famam , atque querimoniam , non mitior in supplicio , sed diligentior esse cœpit. Capitibus involutis cives Romanos ad necem producere instituit : quos tamen idcirco necabat palam , quòd homines in conventu , id quod antea diximus , nimium diligenter prædonum numerum requirebant. Hæccine plebi Romanæ , te prætore , est constituta conditio ? hæc negotii gerendi spes ? hoc capitis , vitæque discrimen ? Parumne multa mercatoribus sunt necessario pericula subeunda fortunæ , nisi etiam hæc formidines ab nostris magistratibus , atque in nostris provinciis impendebunt ? ad eamne rem fuit hæc suburbana , ac fidelis provincia Sicilia , plena optimorum sociorum , honestissimorumque civium , quæ cives Romanos omnes suis ipsa sedibus libentissimè semper accepit , ut , qui usque ex ultima Syria , atque Ægypto navigarent ; qui apud barbaros , propter togæ nomen , in honore aliquo fuissent ; qui ex prædonum insidiis , qui ex tempestatum periculis profuissent ; in Sicilia securi ferirentur , quum se jam domum venisse arbitrarentur ?

LXI. Nam quid ego de P. Gavio Cæsano municepe dicam , Judices ? aut quâ vi vocis , quâ gravitate verborum , quo dolore animi dicam ? tametsi dolor me non

deficit : ut cetera mihi in dicendo digna re , digna dolore meo suppetant , magis elaborandum est : quod crimen ejusmodi est , ut , quum primùm ad me delatum est , usurum me illo non putarem. Tametsi enim verissimum esse intelligebam ; tamen credibile fore non arbitrabar. Coactus lacrymis omnium civium Romanorum , qui in Sicilia negotiantur , adductus Valentiorum , hominum honestissimorum , omniumque Rheginorum , multorumque equitum Romanorum , qui casu tum Messanæ fuerunt , testimoniis , dedi tantum priore actione testium , res ut nemini dubia esse posset.

159. Quid nunc agam ? quum jam tot horas de uno genere , ac de istius nefaria crudelitate dicam : quum propè omnem vim verborum ejusmodi , quæ scelere istius digna sunt , ~~ais~~ in rebus consumpserim , neque hoc providerim , ut varietate criminum vos attentos tenerem ; quemadmodum de tanta re dicam ? Opinor , unus modus , atque una ratio est. Rem in medio ponam ; quæ tantum habet ipsa gravitatis , ut neque mea , quæ nulla est , neque cujusquam , ad inflammandos vestros animos , eloquentia requiratur.

160. Gavins hic , quem dico , Cosanus , quum illo in numero ab isto in vincula conjectus esset , & nescio quâ ratione clam

e lautumiis profugisset, Messanamque venisset : qui propè jam Italiam, & mœnia Rheginorum videret, & ex illo metu mortis ac tenebris, quasi luce libertatis, & odore aliquo legum recreatus, revixisset; loqui Messanæ cœpit, & queri, se civem Romanum in vincula esse conjectum : sibi rectà iter esse Romam : Verri se præstò advenienti futurum.

LXII. Non intelligebat miser, nihil interesse utrùm hæc Messanæ, an apud ipsum in prætorio loqueretur. Nam, ut antè vos docui, hanc sibi iste urbem delegerat, quam haberet adjutricem scelerum, furtorum receptricem, flagitiorum omnium sociam. Itaque ad magistratum Mamertinum statim deducitur Gavius; eo-que ipso die casu Messanam venit Verres. Res ad eum defertur, esse civem Romanum, qui se Syracusis in lautumiis fuisse quereretur : quem jam ingredientem navem, & Verri nimis atrociter minitantem, a se retractum esse, & asservatum; ut ipse in eum statueret, quod videretur.

161. Agit hominibus gratias, & eorum erga se benevolentiam, diligentiamque collaudat. Ipse inflammatus scelere & furore, in forum venit. Ardebant oculi : toto ex ore crudelitas eminebat. Expectabant omnes, quò tandem progressurus, aut quidnam acturus esset : quum repente

hominem proripi, atque in foro medio nudari, ac deligari, & virgas expediri jubet. Clamabat ille miser, se civem esse Romanum, municipem Cosanum: meruisse se cum L. Pretio, splendidissimo equite Romano, qui Panormi negotiaretur, ex quo hæc Verres scire posset. Tum iste se comperisse ait, eum speculandi causâ in Siciliam ab ducibus fugitivorum esse missum; cujus rei neque index, neque vestigium aliquod, neque suspicio cuiquam esset ulla: deinde jubet undique hominem proripi, vehementissimèque verberari.

- 162. Cædebatur virgis in medio foro Messanæ civis Romanus, Judices; quum interea nullus gemitus, nulla vox alia istius miseri, inter dolorem, crepitumque plagarum audiebatur, nisi hæc, **CIVIS ROMANUS SUM.** Hac se commemoratione civitatis omnia verbera depulsurum, cruciatumque a corpore dejecturum arbitrabatur. Is non modò hoc non perfecit, ut virgarum vim deprecaretur: sed, quum imploraret sæpius, usurparetque nomen civitatis; crux, crux, inquam, infelici & ærumnoso, qui nunquam istam potestatem viderat, comparabatur.

**LXIII.** O nomen dulce libertatis! ô jus eximium nostræ civitatis! ô lex Porcia, legesque Sempronie! ô graviter desiderata, & aliquando reddita plebi Ro-

manæ tribunitia potestas ! Huccine tandem omnia reciderunt , ut civis Romanus in provincia populi Romani , in oppido fœderatorum , ab eo , qui beneficio populi Romani , fasces & secures haberet , deligatus in foro virgis cæderetur ? Quid , quum ignes , ardentisque laminæ , ceterique cruciatus admovebantur ? Si te illius acerba imploratio , & vox miserabilis non inhibebat , ne civium quidem Romanorum , qui tum aderant , fletu , & gemitu maximo commovebare ? In crucem tu agere ausus es quemquam , qui se civem Romanum esse diceret ? Nolui tam vehementer agere hoc primâ actione , Iudices : nolui. Vidistis enim , ut animi multitudinis in istum dolore , & odio , & communis periculi metu , concitarentur. Statui egomet mihi tum modum orationi meæ , & C. Numitorio , equiti Romano , primo homini , tēsti meo : & Glabronem , id quod sapientissimè fecit , facere lætatus sum , ut repentè , consilio in medio , testem dimitteret. Etenim verebatur , ne populus Romanus ab isto eas pœnas vi repetisse videretur , quas veritus esset , ne iste legibus , & vestro iudicio non esset persoluturus.

164. Nunc , quoniam jam exploratum est omnibus , quo loco causa tua sit , & , quid de te futurum sit : sic tecum agam.

Gavium istum, quem repentinum speculatorem fuisse dicis, ostendam, in lautumias Syracusis a te esse conjectum: neque id solum ex litteris ostendam Syracusanorum; ne possis dicere, me, quia sit aliquis in litteris Gavius, hoc fingere, & eligere nomen, ut hunc illum esse possim dicere: sed secundum arbitrium tuum testes dabo, qui istum ipsum Syracusis abs te in lautumias conjectum esse dicant: producam etiam Cosanos, municipales illius, ac necessarios, qui te nunc serò doceant, iudices non serò, illum P. Gavium, quem tu in crucem egisti, civem Romanum, & municipem Cosanum, non speculatorem fugitivorum fuisse.

LXIV. Quum hæc omnia, quæ polliceor, cumulatè tuis proximis plana fecero: tum istuc ipsum tenebo, quod abs te mihi datur: eo contentum me esse dicam. Quid enim nuper tu ipse, quum populi Romani clamore, atque impetu perturbatus exsiluisti, quid, inquam, locutus es? Illum, quòd moram supplicio quæreretur, ideo clamatasse, se esse civem Romanum; sed speculatorem fuisse. Jam mei testes veri sunt. Quid enim dicit aliud C. Numitorius? quid M. & P. Cottii, nobilissimi homines, ex agro Taurominitano? quid Q. Lucceius, qui argentariam Rhegii maximam fecit? quid ceteri? Adhuc enim testes ex eo ge-



nere a me sunt dati, non qui novisse Gavium, sed qui se vidisse dicerent, quum is, qui se civem Romanum esse clamaret, in crucem ageretur. Hoc tu, Verres, idem dicis: hoc tu confiteris illum clamitasse, se civem esse Romanum: apud te nomen civitatis ne tantum quidem valuisse, ut dubitationem aliquam, ut crudelissimi, teterimique supplicii aliquam parvam moram saltem posset afferre.

166. Hoc teneo, hîc hæreo, Judices, hoc sum contentus uno: omitto, ac negligo cetera: suâ confessione induatur, ac juguletur, necesse est. Qui esset, ignorabas? speculatorem esse suspicabare? non quæro, quâ suspitione: tuâ te accuso oratione. Civem Romanum se esse dicebat. Si tu apud Persas, aut in extrema India deprehensus, Verres, ad supplicium ducere; quid aliud clamitares, nisi te civem esse Romanum? &, si tibi ignoto apud ignotos, apud barbaros, apud homines in extremis, atque ultimis gentibus positos, nobile, & illustre apud omnes nomen tuæ civitatis profuisset: ille, quisquis erat, quem tu in crucem rapiebas, qui tibi esset ignotus, quum civem se Romanum esse diceret; apud te prætorem si non effugium, ne moram quidem mortis, mentione, atque usurpatione civitatis, assequi potuit?

LXV. Homines tenues, obscuro loco nati, navigant : adeunt ad ea loca, quæ numquam antea viderunt : ubi neque noti esse iis, quò venerunt, neque semper cum cognitoribus esse possunt. Hac unâ tamen fiducia civitatis, non modò apud nostros magistratus, qui & legum, & existimationis periculo continentur, neque apud cives solum Romanos, qui & sermonis, & juris, & multarum rerum societate juncti sunt, fore se tutos arbitrantur : sed, quocumque venerint, hanc sibi rem præsidio sperant futurum.

168. Tolle hanc spem, tolle hoc præsidium civibus Romanis : constitue nihil esse opis in hac voce, **CIVIS ROMANUS SUM** : posse impunè prætorem, aut alium quemlibet, supplicium, quod velit, in eum constituere, qui se civem Romanum esse dicat ; quod quis ignoret : jam omnes provincias, jam omnia regna, jam omnes liberas civitates, jam omnem orbem terrarum, qui semper nostris hominibus maximè patuit, civibus Romanis istâ defensione præcluseris. Quid, si L. Pretium, equitem Romanum, qui tum in Sicilia, nominabat ? etiamne id magnum fuit, Panormum litteras mittere ? asservasse hominem ? custodiis Mamertinorum tuorum vinctum, clausum habuisse, dum Panormo Pretius veniret ? cognosceret homi-

nem : aliquid de summo supplicio remitteres : si ignoraret : tum si ita tibi videretur , hoc juris in omnes constitueres , ut , qui neque tibi notus esset , neque cognitorem locupletem daret ; quamvis civis Romanus esset , in crucem tolleretur.

LXVI. Sed quid ego plura de Gavio ? quasi tu Gavio tum fueris infestus , ac non nomini , generi , juri civium hostis : non illi , inquam , homini , sed causæ communi libertatis inimicus fuisti. Quid enim attinuit , quum Mamertini , more atque instituto suo , crucem fixissent post urbem , in via Pompeia ; te jubere in ea parte figere , quæ ad fretum spectaret : & hoc addere , quod negare nullo modo potes , quod , omnibus audientibus , dixisti palam , te idcirco illum locum deligere , ut ille , qui se civem Romanum esse diceret , ex cruce Italiam cernere , ac domum suam prospicere posset ? Itaque illa crux sola , Indices , post conditam Messanam illo in loco fixa est. Italiæ conspectus ad eam rem ab isto delectus est , ut ille in dolore , cruciatuque moriens , perangusto fretu divisa servitutis , ac libertatis jura cognosceret ; Italia autem alumnum suum servitutis extremo , summoque supplicio affixum videret.

170. Facinus est , vinciri civem Romanum.  
*Tomus IV.*

num ; scelus , verberari ; propè parricidium , necari : quid dicam in crucem tollere ? verbo satis digno tam nefaria res appellari nullo modo potest. Non fuit his omnibus iste contentus. Spectet , inquit , patriam : in conspectu legum , libertatisque moriatur. Non in hoc loco Gavium , non unum hominem , nescio quem , civem Romanum , sed communem libertatis & civitatis causam , in illum cruciatum , & crucem egisti. Jam verò videte hominis audaciam. Nonne eum graviter tulisse arbitramini , quòd illam civibus Romanis crucem non posset in foro , non in comitio , non in rostris defigere ? quod enim his locis in provincia sua , celebritate similimum , regione proximum potuit , elegit : monumentum sceleris , audaciæque suæ voluit esse in conspectu Italiae , vestibulo Siciliae , prætervectione omnium , qui ultro , citroque navigarent.

LXVII. Si hæc non ad cives Romanos , non ad aliquos amicos nostræ civitatis , non ad eos , quæ populi Romani nomen audissent ; denique , si non ad homines , verum ad bestias ; aut etiam , ut longius progrediar , si in aliqua desertissima solitudine , ad saxa , & ad scopulos hæc conqueri , & deplorare vellem : tamen omnia muta atque inanima , tantâ , & tam indignâ rerum atrocitate commove-

ferentur. Nunc verò quum loquar apud senatores populi Romani, legum, judiciorumque, & juris auctores, timere non debeo, ne non unus iste civis Romanus illâ cruce dignus, ceteri omnes simili periculo indignissimi judicentur.

172. Paulò antè, Judices, lacrymas in morte misera atque indignissima navarchorum non tenebamus; & rectè, ac meritò fociorum innocentium miseriam commovebamur: quid nunc in nostro sanguine tandem facere debemus? nam civium Romanorum sanguis conjunctus existimandus est; quoniam id & salutis omnium ratio, & veritas postulat: omnes hoc loco cives Romani, & qui adsunt, & qui ubicunque sunt, vestram severitatem desiderant, vestram fidem implorant, vestrum auxilium requirunt: omnia sua jura, commoda, auxilia, totam denique libertatem in vestris sententiis versari arbitrantur.

173. A me, tametsi satis habent, tamen si res aliter acciderit, plus habebunt fortasse, quàm postulant: nam & si quis istum de vestra severitate eripuerit, id quod neque metuo, Judices, neque ullo modo fieri posse video: sed si in hoc me ratio fefellerit, Siculi causam suam perisse querentur, & mecum pariter molestè ferent: populus quidem Romanus brevi, quoniam mihi potestatem apud se agendi

dedit , jus suum , me agente , suis suffragiis ante Kal. Februarias recuperabit. Ac ; si de mea gloria , & amplitudine quæritis , Judices ; non est alienum meis rationibus istum mihi ex hoc judicio ereptum , ad illud populi Romani judicium reservari. Splendida est illa causa : probabilis mihi , & facilis : populo grata , atque jucunda. Denique , si videor hîc , id quod ego non quæsivi , de uno isto voluisse crescere : isto absoluto , quod sine multorum scelere fieri non potest , de multis mihi crescere licebit.

LXVIII. Sed mehercules , vestrâ , reique publicæ causâ , Judices , nolo in hoc delecto consilio tantum flagitium esse commissum : nolo eos judices , quos ego probarim , atque delegerim , sic in hac urbe notatos , isto absoluto , ambulare , ut non cerâ , sed cœno obliti esse videantur. Quamobrem te quoque , Hortensi , si qui monendi locus est , ex hoc loco moneo : videas etiam atque etiam , & consideres , quid agas , quò progrediare : quem hominem , & quâ ratione defendas : neque de illo quidquam tibi præfinio , quò minùs ingenio mecum , atque omni dicendi facultate contendas : cetera , si qua putas te occultius extra judicium , quæ ad judicium pertinent , facere posse : si quid artificio , consilio , potentiâ , gratiâ , copiis  
istius

istius moliri cogitas : magnopere censeo desistas ; & illa , quæ tentata jam , & cœpta ab isto sunt , a me autem peruestigata , & cognita , moneo ut exstinguas , & longius progredi ne sinas : magno tuo periculo peccabitur in hoc judicio ; majore , quàm putas.

175. Quòd enim te liberatum jam existimationis metu , defunctum honoribus , designatum consulem cogites : mihi crede , ornamenta ista , & beneficia populi Romani non minore negotio retinentur , quàm comparantur. Tulit hæc civitas , quoad potuit , quoad necesse fuit , regiam istam vestram dominationem in judiciis , & in omni republica ; tulit : sed quo die populo Romano tribuni plebis restituti sunt , omnia ista vobis ( si fortè nondum intelligitis ) adempta , atque erepta sunt : omnium nunc oculi coniecti sunt hoc ipso tempore in unumquemque nostrum , quâ fide ego accusem , quâ religione hi judicent , quâ tu ratione defendas.

176. De omnibus nobis , si quis tantulum de recta regione deflexerit , non illa tacita existimatio , quam antea contemnere solebatis , sed vehemens , ac liberum populi Romani judicium consequetur. Nulla tibi , Quinte , cum isto cognatio est , nulla

necessitudo : quibus excusationibus antea nimium in aliquo iudicio studium tuum defendere solebas , earum habere in hoc homine nullam potes : quæ iste in provincia palam dictitabat , quum ea , quæ faciebat , tuâ se fiduciâ facere dicebat , ea ne vera putentur , tibi maximè est providendum.

LXIX. Ego mei jam rationem officii confido esse omnibus iniquissimis meis persolutam : nam istum paucis horis primæ actionis , omnium mortalium sententiis , condemnavi. Reliquum iudicium non jam de mea fide , quæ perspecta est , neque de istius vita , quæ damnata est ; sed de iudicibus , & , verè ut dicam , de te futurum est. At quo tempore futurum est ? nam id maximè providendum est : etenim quum omnibus in rebus , tum in republica permagni momenti est , ratio , atque inclinatio temporum : nempe eo , quum populus Romanus aliud genus hominum , atque alium ordinem ad res iudicandas requirit : nempe eâ lege de iudiciis , iudicibusque novis promulgatâ , quam non is promulgavit , cuius nomine proscriptum videris ; sed hic reus : hic , inquam , suâ spe , atque opinione , quam de vobis habet , legem illam scribendam , promulgandamque curavit.



*ACTIONIS II. L. V. 363*

178. Itaque quum primò agere cœpi-  
mus, lex non erat promulgata: quum iste,  
vestrâ severitate permotus, multa signa  
dederat, quamobrem responsurus non vi-  
deretur, mentio de lege nulla fiebat. Post-  
eaquam iste recreari, & confirmari visus  
est; lex statim promulgata est: cui legi  
quum vestra dignitas vehementer adver-  
setur, istius spes falsa, & insignis impu-  
dentia maximè suffragatur. Hic si quid erit  
commissum a quoquam vestrûm, quod re-  
prehendatur: aut populus Romanus judica-  
bit de eo homine, quem jam antea judiciis  
indignum putavit; aut ii, qui propter offen-  
sionem judiciorum, de veteribus iudicibus  
lege novâ novi iudices erunt constituti.

LXX. Mihi porrò, ut ego non dicam;  
quis omnium mortalium non intelligit,  
quàm longè progredi sit necesse? Potero  
silere, Hortensi? potero dissimulare,  
quum tantum respublica vulnus accepe-  
rit, ut expilatæ provinciæ, vexati focii,  
dû immortales spoliati, cives Romani cru-  
ciati, & necati impunè, me actore, esse  
videantur? potero hoc ego onus tantum,  
aut in hoc iudicio deponere, aut diutius  
tacitus sustinere? non agitanda res erit?  
non in medium proferenda? non populi  
Romani fides imploranda? non omnes,  
qui tanto se scelere obstrinxerint, ut aut

Q ij

fidem suam corrumpi paterentur , aut iudicium corrumpere , in discrimen , ac iudicium vocandi ?

180. Quæret aliquis fortasse , Tantumne igitur laborem , tantas inimicitias , tot hominum , suscepturus es ? Non studio quidem hercule ullo , neque voluntate : sed non idem mihi licet , quod iis qui nobili genere nati sunt ; quibus omnia populi Romani beneficia dormientibus deferuntur : longè aliâ mihi lege in hac civitate , & conditione vivendum est. Venit enim mihi in mentem M. Catonis , hominis sapientissimi ; qui quum se virtute , non genere , populo Romano commendari putaret , quum ipse sui generis initium , ac nominis , ab se gigni , & propagari vellet ; hominum potentissimorum suscepit inimicitias , & maximis in laboribus , usque ad summam senectutem , summa cum gloria vixit.

181. Postea Q. Pompeius , humili , atque obscuro loco natus , nonne plurimis inimiciis , maximisque suis periculis , ac laboribus amplissimos honores est adeptus ? Modò C. Fimbriam , C. Marium , C. Coelium vidimus , non mediocribus inimiciis ac laboribus contendere , ut ad istos honores pervenirent , ad quos vos per ludum , & per negligentiam perve-

nistis. Hæc eadem est nostræ rationis regio, & via: horum nos hominum sectam, atque instituta persequimur.

LXXI. Videmus, quanta sit in invidia, quantoque in odio apud quosdam homines nobiles novorum hominum virtus & industria: si tantulum oculos dejecerimus, præstò esse insidias: si ullum locum aperuerimus suspicioni, aut crimini, accipiendum esse statim vulnus: esse nobis semper vigilandum, semper laborandum videmus.

182. Inimicitia sunt? subeantur: labores? suscipiantur. Etenim tacitæ magis, & occultæ inimicitia timendæ sunt, quàm indictæ, & apertæ. Hominum nobilium non ferè quisquam nostræ industriæ favet: nullis nostris officiis benevolentiam illorum allicere possumus: quasi naturâ, & genere disjuncti sint, ita dissident a nobis animo, ac voluntate. Quare quid habent eorum inimicitia periculi, quorum animos jam antè habueris inimicos, & invidos, quàm ulla inimicitias susceperis?

183. Quamobrem mihi, Judices, optandum est illud, in hoc reo finem accusandi facere; quum & populo Romano satisfactum, & receptum officium Siculis, necessariis meis, erit persolutum. Deliberatum autem est, si res opinionem meam,

quam de vobis habeo , fefellerit , non modò eos persequi , ad quos maximè culpa corrupti iudicii , sed etiam illos , ad quos conscientiae contagio pertinebit. Proinde si qui sunt , qui in hoc reo aut potentes , aut audaces , aut artifices ad corrumpendum iudicium velint esse , ita sint parati , ut , disceptante populo Romano , mecum sibi rem videant futuram : & , si me in hoc reo , quem mihi inimicum Siculi dederunt , satis vehementem , satis perseverantem , satis vigilantem esse cognorunt ; existiment , in his hominibus , quorum ego inimicitias , populi Romani salutis causâ , suscepero , multò graviolem , atque acriorem futurum.

LXXII. Nunc te , Jupiter Optime , Maxime , cujus iste donum regale , dignum tuo pulcherrimo templo , dignum Capitolio , atque istâ arce omnium nationum , dignum regio munere , tibi factum ab regibus , tibi dicatum , atque promissum , per nefarium scelus de regiis manibus extorsit ; cujusque sanctissimum , & pulcherrimum simulacrum Syracusis sustulit : teque , Juno regina , cujus duo fana duabus in insulis posita sociorum , Melitæ , & Sami , sanctissima , & antiquissima , simili scelere idem iste omnibus donis , ornamentisque nudavit : teque , Mi-

nerva , quam item iste duobus in clarissimis , & religiosissimis templis expilavit ; Athenis , quum auri grande pondus ; Syracusis , quum omnia , præter tectum , & parietes , abstulit :

185. Teque , Latona , & Apollo , & Diana , quorum iste Deli non fanum , sed ut hominum opinio , & religio fert , sedem antiquam , divinumque domicilium , nocturno latrocinio , atque impetu compilavit : etiam te , Apollo , quem iste Chio sustulit : teque etiam atque etiam , Diana , quam Pergæ spoliavit ; cujus simulacrum sanctissimum Segestæ , bis apud Segestanos consecratum , semel ipsorum religione , iterum P. Africani victoriâ , tollendum , asportandumque curavit : teque , Mercuri , quem Verres in villa , & in privata aliqua palæstra posuit , P. Africanus in urbe fociorum , & in gymnasio Tyndaritanorum , juventutis illorum custodem , ac præsidem voluit esse :

186. Teque , Hercules , quem iste Agrigenti , nocte intempestâ , servorum instructâ & comparatâ manu , convellere ex suis sedibus , atque auferre conatus est : teque , sanctissima mater Idæa , quam apud Enguinos augustissimo , & religiosissimo in templo sic spoliata reliquit , ut nunc nomen modò Africani , & vestigia violatæ

religionis maneant ; monumenta victoriæ , fanique ornamenta non exstent : vosque , omnium rerum forensium , consiliorum maximorum , legum , judiciorumque arbitri & testes , celeberrimo in loco prætorii locati ; Castor , & Pollux , quorum e templo quæstum sibi iste , & prædam maximam improbissimè comparavit : omnesque dii , qui vehiculis thesaurum solennes cœtus ludorum initis , quorum iter iste ad suum quæstum , non ad religionum dignitatem , faciendum , exigendumque curavit :

187. Teque , Ceres & Libera , quarum sacra , sicut opiniones hominum , ac religiones ferunt , longè maximis , atque occultissimis cæremoniis continentur ; a quibus initia vitæ , atque victûs , legum , morum , mansuetudinis , humanitatis exempla hominibus , & civitatibus data , ac dispersita esse dicuntur ; quarum sacra populus Romanus a Græcis adscita , & accepta , tantâ religione , & publicè , & privatim tuetur , non ut ab aliis huc allata , sed ut ceteris hinc tradita esse videantur ; quæ ab isto uno sic polluta , & violata sunt , ut simulacrum Cereris unum , quod a viro non modò tangi , sed ne adspici quidem fas fuit , e sacrario Catinæ convellendum , auferendumque curaverit ; alterum autem Eanæ ex sua sede , ac domo sustulerit ,

quod erat tale , ut homines , quum viderent , aut ipsam videre se Cererem , aut effigiem Cereris , non humanâ manu factam , sed cœlo delapsam , arbitrarentur :

188. Vos etiam atque etiam imploro & appello , sanctissimæ Deæ , quæ illos Ennenses lacus , lucosque colitis , cunctæque Siciliæ , quæ mihi defendenda tradita est , præsidetis ; a quibus , inventis frugibus , & in orbem terrarum distributis , omnes gentes , ac nationes vestri religione numinis continentur : ceteros item deos , deasque omnes imploro , atque obtestor , quorum templis , & religionibus iste nefario quodam furore , & audaciâ instinctus , bellum sacrilegum semper , impiumque habuit indictum , ut , si in hoc reo , atque in hac causa , omnia mea consilia ad salutem sociorum , dignitatem populi Romani , fidem meam spectaverunt : si nullam ad rem , nisi ad officium , & veritatem omnes meæ curæ , vigiliæ , cogitationesque elaborarunt : quæ mea mens in suscipienda causa fuit , fides in agenda , eadem vestra in judicanda sit.

189. Denique uti C. Verrem , si ejus omnia sunt inaudita , & singularia facinoræ sceleris , audaciæ , perfidiæ , libidinis , avaritiæ , crudelitatis , dignus exitus ejusmodi vitâ , atque factis , vestro judicio

370 *IN VER. ACT. II. L. V.*

consequatur : utque respublica , meaque  
fides unâ hac accusatione meâ contenta  
sit ; mihique posthac bonos potius defen-  
dere liceat , quàm improbos accusare ne-  
cesse sit.







## PRO M. FONTEIO.

### ORATIO UNDECIMA.

*M. sive , ut censet Ursinus , M'. Fontei-  
us Galliâ per triennium post præ-  
turam administratâ , Romam rever-  
sus , repetundarum reus factus est a  
Gallis , quodd eo prætore oppressa ære  
alieno provincia fuisset ; quæstum  
ipse ex viarum munitione fecisset ;  
& portorium vini instituisse. Accu-  
sator fuit M. Platorius , subscriptore  
M. Fabio. Conjicit Manutius hanc  
orationem habitam anno urbis 684.  
Hortensio & Metello coss. quum ip-  
se Cicero ædilis curulis esset ; &  
ex lege Aurelia equites & tribuni  
ærarii cum senatoribus judicarent.*  
*FABRICIUS. Qvj*

*Defunt permulta.*

¶ ¶

1. *Q*uod c prætore, oppressam esse ære alieno Galliam. A quibus versuras tantarum pecuniarum factas esse dicunt? a Gallis? nihil minùs. A quibus igitur? a civibus Romanis, qui negotiantur in Gallia. Cur eorum verba non audimus? cur eorum tabulæ nullæ proferuntur? Insector ultro, atque insto accusatori, Judices: insector, inquam, & flagito testes. Plus ego in hac causa laboris, & operæ consumo in poscendis testibus, quàm ceteri defensores in refutandis. Audaciter hoc dico, Judices: non temerè confirmo. Referta Gallia negotiatorum est, plena civium Romanorum: nemo Gallorum sine cive Romano quidquam negotii gerit: nummus in Gallia nullus sine civium Romanorum tabulis commovetur.

2. Videte quò descendam, Judices: quàm longè videar ab consuetudine mea, & cautione, ac diligentia discedere. Unæ tabulæ proferantur, in quibus vestigium sit aliquod, quod significet, pecuniam Fonteio datam; unum ex toto negotiatorum, colonorum, publicanorum, aratorum, pecuariorum numero testem producant; verè accusatum esse concedam.

Proh dii immortales ! quæ est hæc causa ? quæ defensio ? Provinciæ Galliæ M. Fonteius præfuit , quæ constat ex iis generibus hominum & civitatum , qui , ut vetera mittam , partim nostrâ memoriâ bella cum populo Romano acerba , ac diuturna gesserunt ; partim modò ab nostris imperatoribus subacti , modò bello domiti , modò triumphis , ac monumentis notati , modò ab senatu agris , urbibusque multati sunt : partim , qui cum ipso M. Fonteio ferrum , ac manus contulerunt , multoque ejus sudore , ac labore , sub populi Romani imperium , ditionemque ceciderunt. Est in eadem provincia Narbo Marcius , colonia nostrorum civium , specula populi Romani , ac propugnaculum , istis ipsis nationibus oppositum , & objectum : est item urbs Massilia , de qua antè dixi , fortissimorum , fidelissimorumque sociorum , qui Gallicorum bellorum pericula , populo Romano copiis , armisque compensarunt : est præterea numerus civium Romanorum , atque hominum honestissimorum.

II. Huic provinciæ , quæ ex hac gentium varietate constaret , M. Fonteius , ut dixi , præfuit : qui erant hostes , subegit : qui proximè fuerant , eos ex iis agris , quibus erant multati , decedere coëgit :

ceteris , qui idcirco magnis sæpe erant bellis superati , ut semper populo Romano parerent , magnos equitatus ad ea bella , quæ tum in toto orbe terrarum a populo Romano gerebantur , magnas pecunias , ad eorum stipendium , maximum frumenti numerum , ad Hispaniense bellum tolerandum , imperavit.

4. Is qui gessit , in iudicium vocatur : vos , qui in re non interfuistis , causam unà cum populo Romano cognoscitis. Dicunt contrà , quibus invitissimis imperatum est : dicunt , qui ex agris ex M. Fonteii decreto decedere sunt coacti : dicunt , qui ex bello , cæde , & fuga nunc primùm audent contra M. Fonteium inermem consistere. Quid coloni Narbonenses ? quid volunt ? quid existimant ? Hunc per vos volunt ; se per hunc incolumes existimant esse. Quid Massiliensium civitas ? hunc præsentem iis affecit honoribus , quos habuit amplissimos : vos autem absens orat , atque obsecrat , ut sua religio , laudatio , auctoritas , aliquid apud vestros animos momenti habuisse videatur. Quid ? civium Romanorum quæ voluntas est ? nemo est ex tanto numero , quin hunc optimè de provincia , de imperio , de focis , & civibus meritum esse arbitretur.

III. Quoniam igitur videtis , qui oppu-

gnatum M. Fonteium ; cognoscitis , qui defensum velint : statuite nunc , quid vestra æquitas , quid populi Romani dignitas postulet ; utrùm colonis vestris , negotiatoribus vestris , amicissimis , atque antiquissimis fociis , & credere , & consulere malitis ; an iis , quibus neque , propter iracundiam , fidem , neque , propter infidelitatem , honorem habere debetis.

6. Quid , si maiorem hominum etiam honestissimorum copiam affero , qui hujus virtuti , atque innocentiae testimonio possint esse ? tamenne plus Gallorum consensio valebit , quàm summæ auctoritatis hominum ? Quum Galliae Fonteius præesset ; scitis , Judices , maximos populi Romani exercitus in duabus Hispaniis , clarissimosque imperatores fuisse. Quàm multi equites Romani , quàm multi tribuni militum , quales , & quot , & quoties legati ad eos ? Exercitus præterea Cn. Pompeii maximus , atque ornatissimus , hiemavit in Gallia , M. Fonteio imperante. Satisne vobis multos , satis idoneos testes , & conscios videtur ipsa fortuna esse voluisse earum rerum , quæ M. Fonteio prætoris gererentur in Gallia ? Quem ex tanto hominum numero testem in hac causa producere potestis ? quis est ex eo numero , qui vobis auctor placeat ? eo nos jam laudatore , & teste utemur.

7. Dubitabitis etiam diutius, *Judices*; quin illud, quod initio vobis proposui, verissimum sit, aliud per hoc judicium nihil agi, nisi ut, *M. Fonteio* oppresso testimoniis eorum, quibus multa reipublicæ causâ invitissimis imperata sunt, se-gniores posthac ad imperandum ceteri sint, quum videant eos oppugnari, quibus oppressis, populi Romani imperium incolume esse non possit?

IV. Objectum est etiam, quæstum *M. Fonteium* ex viarum munitione fecisse; ut aut ne cogeret munire, aut id, quod munitum esset, ne improbaret. Si & coacti sunt munire omnes, & multorum opera improbata sunt; certè utrumque falsum est, & ob vacationem pretium datum, quum immunis nemo fuerit; & ob probationem, quum multa improbata sint.

8. Quid, si hoc crimen optimis nominibus delegare possimus, & ita, ut non culpam in alios transferamus, sed uti doceamus, eos isti munitioni præfuisse, qui facile officium suum, & præstare, & probare possunt? tamenne vos omnia in *M. Fonteium*, iratis testibus freti, confertis? Quum majoribus reipublicæ negotiis *M. Fonteius* impediretur, & quum ad rempublicam pertineret, viam *Domitiam* munire, legatis suis, primariis viris,

C. Annio Bellieno , & C. Fonteio negotium dedit. Itaque præfuerunt : imperaverunt pro dignitate sua , quod visum est , & probaverunt : quod vos , si nulla alia ex re , ex litteris quidem nostris , quas exscripsistis , & missis , & allatis , certè scire potuistis : quas si antea non legistis , nunc ex nobis , quid de iis rebus Fonteius ad legatos suos scripserit , quid ad eum illi rescripserint , cognoscite. LITTERÆ AD C. ANNIUM LEG. AD C. FONTEIUM LEG. LITTERÆ A C. ANNIO LEG. A C. FONTEIO LEG. Satis opinor esse perspicuum , Iudices , hanc rationem munitionis , neque ad M. Fonteium pertinere , & ab iis esse tractatam , quos nemo possit reprehendere.

V. Cognoscite nunc de crimine vinario , quod illi invidiosissimum , & maximum esse voluerunt. Crimen a Plætório , Iudices , ita constitutum est : Fonteio non in Gallia primùm venisse in mentem , ut portorium vini institueret , sed hac in Italia propositâ ratione , Româ profectum. Itaque Titurium Tolosæ quaternos denarios in singulas vini amphoras portorii nomine exegisse : Croduni Porcium , & Numium ternos victoriatos : Vulchalone Servæum binos H-S , & victoriatos mille. Atque in his locis Croduni , & Vulchalone ab his portorium esse exactum , si qui Cobiama-

cho , qui vicus inter Tolosam , & Narbonem est , deverterentur , neque Tolosam ire vellent : quum Elesiodolus tantum senos denarios ab his , qui ad hostem portarent , exegisset.

10. Video , Judices , esse crimen , & genere ipso magnum : vestigal enim esse impositum fructibus nostris dicitur ; & pecuniam permagnam istâ ratione cogi potuisse confiteor , & invidiam : vel maximè enim inimici hanc rem sermonibus divulgare voluerunt. Sed ego ita existimo , quò majus crimen sit id , quod ostendatur esse falsum , hòc majorem ab eo injuriam fieri , qui id confingat : vult enim magnitudine rei sic occupare animos eorum , qui audiunt , ut difficilis aditus veritati relinquatur. \*\*

*Omnia de crimine vinario , de bello Vocontiorum , & de dispositione hibernorum desiderantur.*

VI. At hoc Galli negant. At ratio rerum , & vis argumentorum coarguit. Potest igitur testibus judex non credere ? Cupidis , & iratis , & conjuratis , & ab religione remotis , non solum potest , sed etiam debet. Etenim si , quia Galli dicunt , idcirco M. Fonteius nocens existimandus est : quid mihi opus est sapiente judice ? quid



æquo quæsitore ? quid oratore non stulto ? Dicunt enim Galli : negare non possumus. Hic si ingeniosi , & periti , & æqui judicis has partes esse existimatis , ut , quoniam quidem testes dicunt , sine ulla dubitatione credendum sit ; Salus ipsa virorum fortium innocentiam tueri non potest : sin autem in rebus judicandis , non minimam partem ad unamquamque rem æstimandam , momentoque suo ponderandam , sapientia judicis tenet ; videte ne multò vestræ majores , gravioresque partes sint ad cogitandum , quàm ad dicendum meæ.

12. Mihi enim semper unaquaque de re testis non solum semel , verum etiam breviter interrogandus , & sæpe etiam non interrogandus ; ne aut irato facultas ad dicendum data , aut cupido auctoritas attributa esse videatur : vos & sæpius eandem rem animis agitare , & diutius uno de teste cogitare potestis : & , si quem nos interrogare noluimus , quæ causa tacendi fuerit , existimare debetis. Quamobrem , si hoc judici præscriptum lege , aut officio putatis , testibus credere ; nihil est , cur alius alio judice melior , aut sapientior existimetur : unum est enim , & simplex aurium judicium , & promiscuè , & communiter stultis , ac sapientibus ab natura datum.

13. Quid est igitur, ubi elucere possit prudentia? ubi discerni stultus auditor, & credulus, ab religioso, & sapienti iudice? nimirum illud, in quo ea, quæ dicuntur ab testibus, conjecturæ, & cogitationi traduntur, quantâ auctoritate, quantâ animi æquitate, quanto pudore, quantâ fide, quantâ religione, quanto studio existimationis bonæ, quantâ curâ, quanto timore dicantur.

VII. An verò vos id in testimoniis hominum barbarorum dubitabitis, quod persæpe & nostrâ, & patrum memoriâ, sapientissimi iudices de clarissimis nostræ civitatis viris dubitandum non putaverunt? qui Cn. & Q. Cæpionibus, L. & Q. Metellis testibus in Q. Pompeium, hominem novum, non crediderunt: quorum virtuti, generi, rebus gestis, fidem & auctoritatem in testimonio, cupiditatis atque inimicitiarum suspicio derogavit.

14. Ecquem hominem vidimus, ecquem verè commemorare possumus parem consilio, gravitate, constantiâ, ceteris virtutibus, honoris, ingenii, rerum gestarum ornamentis, M. Æmilio Scauro fuisse? tamen hujus, cujus injurati nutu propè terrarum orbis regebatur, jurati testimonio, neque in C. Fimbriam, neque in C. Memmium creditum est. Noluerunt ii, qui judicabant, hanc patere inimicitis

viam, quem quisque odisset, ut eum testimonio posset tollere. Quantus in L. Crasso pudor fuerit, quod ingenium, quanta auctoritas, quis ignorat? tamen is, cujus etiam sermo testimonii auctoritatem habebat, testimonio ipso, quæ in M. Marcellum inimico animo dixit, probare non potuit.

15. Fuit, fuit illis iudicibus divinum; ac singulare, Iudices; consilium, qui se non solum de reo, sed etiam de accusatore, de teste judicare arbitrabantur, quid fictum, quid a fortuna, ac tempore allatum, quid pretio corruptum, quid spe, aut metu depravatum, quid a cupiditate aliqua, aut inimicitias profectum videretur. Quæ si iudex non amplectetur omnia consilio; non animo, ac mente circumspiciet: si, ut quidque ex illo loco dicetur, ex oraculo aliquo dici arbitrabitur; profectò satis erit, id quod dixi antea, non surdum iudicem huic muneri, atque officio præesse: nihil erit, quamobrem ille nescio quis sapiens homo, ac multarum rerum peritus, ad res iudicandas requiratur.

VIII. An verò illi equites Romani, quos nos vidimus, qui nuper in republica, iudiciisque maximis floruerunt, habuerunt tantum animi, tantum roboris, ut M. Scauro testi non crederent: vos Vol-

carum, atque Allobrogum testimoniis non credere timetis? Si inimico testi credi non oportuit, inimicior Marcello Crassus, aut Fimbriæ Scaurus ex civilibus studiis, atque obtrectatione domestica, quàm huic Galli? quorum, qui optima in causa sunt, equites, frumentum, pecuniam semel atque iterum, ac sæpiùs invitissimi, dare coacti sunt: ceteri, partim ex veteribus bellis, agro multati, partim ab hoc ipso, bello superati, & oppressi.

17. Si, qui ob aliquod emolumentum suum cupidius aliquid dicere videntur, iis credi non convenit: credo majus emolumentum Cæpionibus, & Metellis propositum fuisse ex Q. Pompeii damnatione, quum studiorum suorum obtrectatorem sustulissent, quàm cunctæ Galliæ ex M. Fonteii calamitate; in qua illa provincia propè suam immunitatem, ac libertatem positam esse arbitratur. An, si homines ipsos spectare convenit (id quod in teste profectò valere plurimùm debet) non modò cum summis civitatis nostræ viris, sed cum infimo cive Romano quisquam amplissimus Galliæ comparandus est? Scit Induciomarus, quid sit testimonium dicere? movetur eo timore, quo nostrum unusquisque, quum in eum locum productus est?

IX. Recordamini, Judices, quantopere laborare soleatis, non modò quid dicatis pro testimonio, sed etiam, quibus verbis utamini, ne quod minùs moderatè positum, ne quod ab aliqua cupiditate prolapsum verbum esse videatur. Vultu denique laboratis, ne qua significari possit suspicio cupiditatis: ut &, quum proditis, existimatio sit quædam tacita de vobis pudoris, ac religionis; &, quum disceditis, ea diligenter conservata, ac retenta videatur.

19. Credo hæc eadem Induciomarum in testimonio timuisse, aut cogitasse: qui primùm illud verbum consideratissimum nostræ consuetudinis, *Arbitror*, quo nos etiam tunc utimur, quum ea dicimus jurati, quæ comperta habemus, quæ ipsi vidimus, ex toto testimonio suo sustulit, atque omnia se *scire* dixit. Verebatur enim videlicet, ne quid apud vos, populumque Romanum de existimatione sua deperderet: ne qua fama consequeretur ejusmodi, Induciomarum, talem virum, tam cupidè, tam temerè dixisse: non intelligebat, se in testimonio nihil præter vocem, & os, & audaciam neque civibus suis, neque accusatoribus nostris præstare debere.

20. An verò istas nationes, religionè jurisjurandi, ac metu deorum immorta-

lium in testimoniis dicendis commoveri arbitramini? quæ tantum a ceterarum gentium more, ac naturâ dissentiunt, quòd ceteræ pro religionibus suis bella suscipiunt, istæ contra omnium religiones: illæ in bellis gerendis ab diis immortalibus pacem, ac veniam petunt; istæ cum ipsis diis immortalibus bella gesserunt.

X. Hæ sunt nationes, quæ quondam tam longè ab suis sedibus, Delphos usque, ad Apollinem Pythium, atque ad oraculum orbis terræ vexandum, ac spoliandum profectæ sunt. Ab iisdem gentibus sanctis, & in testimonio religiosis, obsessum Capitolium est, atque ille Jupiter, cujus numine majores nostri sanctam testimoniorum fidem esse voluerunt.

21. Postremò his quidquam sanctum, ac religiosum videri potest; qui etiam si quando aliquo metu adducti, deos placandos esse arbitrantur, humanis hostiis eorum aras, ac templa funestant? ut ne religionem quidem colere possint, nisi eam ipsam priùs scelere violarint. Quis enim ignorat, eos usque ad hanc diem retinere illam immanem, ac barbaram consuetudinem hominum immolandorum? Quamobrem, quali fide, quali pietate existimatis esse eos, qui etiam deos immortales arbitrentur hominum scelere, & sanguine

guine facillimè posse placari? cum his vos testibus vestram religionem conjungetis? ab his quidquam sanctè, aut moderatè dictum putabitis?

22. Hoc vestræ mentes, tam castæ, tam integræ, sibi suscipient, ut, quum omnes legati nostri, qui illo triennio in Galliam venerunt, omnes equites Romani, qui in illa provincia fuerunt, omnes negotiatores ejus provinciæ; denique omnes, in Gallia qui sunt, socii populi Romani, atque amici, M. Fonteium incolumem esse cupiant; jurati privatim, & publicè laudent; vos tamen Gallis credere malitis? Quid ut secuti esse videamini? voluntatemne hominum? gravior igitur vobis erit hostium voluntas, quàm civium? An dignitatem testium? potestis igitur ignotos notis, iniquos æquis, alienigenas domesticis, cupidos moderatis, mercenarios gratuitis, impios religiosis, inimicissimos huic imperio, ac nomini, bonis, ac fidelibus & sociis, & civibus anteferre?

XI. An verò dubitatis, Judices, quin insitas inimicitias istæ gentes omnes & habeant, & gerant cum populi Romani nomine? sic existimatis eos hîc sagatos, brachatosque versari, animo demisso, atque humili, ut solent ii, qui affecti injuriis ad opem judicum supplices, inferioresque confugiunt? Nihil verò minus. Hi contrà va-

gantur læti atque erecti passim toto foro , cum quibusdam minis , & barbaro , atque immani terrore verborum : quod ego profectò non crederem , nisi aliquoties ex ipsis accusatoribus vobiscum simul , Judices , audissem ; quum præciperent , ut cavere-  
tis , ne , hoc absoluto , novum aliquod bel-  
lum Gallicum concitaretur.

24. Si M. Fonteium , Judices , in causa deficerent omnia : si turpi adolescentiâ , vitâ infami , magistratibus , quos ante oculos vestros gessit , convictus virorum bonorum testimoniis , legationibus flagitiosè obitis , invisus suis omnibus , in iudicium vocaretur : si in eo iudicio colonorum populi Romani Narbonensium , fidelissimorum sociorum Massiliensium , civium Romanorum omnium testimoniis , tabulisque premeretur : tamen esset vobis magnopere providendum , ne , quos ita afflictos a vestris patribus , majoribusque accepissetis , ut contemnendi essent , eos pertimuisse , & eorum minis , & terrore commoti esse videremini.

25. Nunc verò , quum lædat nemo bonus , laudent omnes vestri cives , atque focii ; oppugnent ii , qui sæpissime hanc urbem , & hoc imperium oppugnarunt : quumque inimici M. Fontei vobis , ac populo Romano minentur ; amici , ac propinqui supplicent vobis : dubitabitis non



modò vestris civibus, qui maximè gloriâ, ac laude ducuntur, verùm etiam exteris nationibus, ac gentibus ostendere, vos in sententiis ferendis civi parcere, quàm hosti cedere, maluisse?

XII. Magna mehercule causa, Judices, absolutionis cum ceteris causis hæc est, ne qua insignis huic imperio macula, atque ignominia suscipiatur, si hoc ita perlatum erit in Galliam, senatores, equitesque populi Romani, non testimoniis Gallorum, sed minis commotos, rem ad illorum libidinem judicasse. Ita verò, si illi bellum facere conabuntur, excitandus nobis erit ab inferis C. Marius, qui Induciomaro isti, minaci, atque arroganti, par in belligerando esse possit: excitandus Cn. Domitius, & Q. Maximus, qui nationem Allobrogum, & reliquas suis iterum armis conficiat, atque opprimat: aut, quoniam id quidem non potest, orandus erit nobis amicus meus, M. Plætorius, ut suos novos clientes a bello faciendo deterreat, ut eorum iratos animos, atque horribiles impetus deprecetur: aut, si non poterit, M. Fabium subscriptorem ejus rogabimus, ut Allobrogum animos mitiget, quoniam apud illos Fabiorum nomen est amplissimum: ut velint isti aut quiescere, id quod victi, ac subacti solent; aut, quum minantur, intelligere, se populo Romano

non metum belli, sed spem triumphī ostendere.

27. Quòd si in turpi reo patiendum non esset, ut quidquam isti se minis profecisse arbitrarentur: quid faciendum vobis in M. Fonteio arbitramini? de quo homine, Judices (jam enim mihi videor hoc, prope causâ duabus actionibus peroratâ, debere dicere) de quo vos homine, Judices, ne ab inimicis quidem ullum fictum probrosum non modò crimen, sed ne maledictum quidem audistis. Ecquis umquam reus, præsertim in hac vitæ ratione versatus, in honoribus petendis, in potestatibus, in imperiis gerendis, sic accusatus est, ut nullum probrum, nullum facinus, nulla turpitudine, quæ a libidine, aut a petulantia, aut ab audacia nata esset, ab accusatore objiceretur, si non vera, attamen ficta cum aliquâ ratione, ac suspitione?

XIII. M. Æmiliū Scaurum, summum nostræ civitatis virum, scimus accusatum a M. Bruto: exstant orationes; ex quibus intelligi potest, multa in illum ipsum Scaurum esse dicta: falsò, quis negat? verumtamen ab inimico dicta, & objecta. Quàm multa M'. Aquilius audivit in suo judicio? quàm multa L. Cotta? denique P. Rutilius, qui, etsi damnatus est, mihi videtur tamen inter viros optimos, atque innocentissimos esse numerandus.

Ille igitur ipse homo sanctissimus, ac temperantissimus, multa audivit in sua causa, quæ ad suspicionem stuprorum, ac libidinem pertinerent.

29. Exstat oratio hominis, ut opinio mea fert, nostrorum hominum longè ingeniosissimi, atque eloquentissimi, C. Gracchi; qua in oratione permulta in L. Pisonem turpia, ac flagitiosa dicuntur. At in quem virum? qui tantâ virtute, atque integritate fuit, ut etiam illis optimis temporibus, quum hominem invenire nequam neminem posses, solus tamen Frugi nominaretur: quem quum in concionem Gracchus vocari juberet, & viator quæreretur, quem Pisonem? quòd erant plures: *Cogis me*, inquit, *dicere inimicum meum, Frugi*. Is igitur vir, quem ne inimicus quidem satis in appellando significare poterat, nisi antè laudasset: qui uno cognomine delectabatur, non modò quis esset, sed etiam qualis esset: tamen in falsam, atque iniquam probrorum insimulationem vocabatur. M. Fonteius ita duabus actionibus accusatus est, ut objectum nihil sit, quo significari vestigium libidinis, petulantiae, crudelitatis, audaciæ possit: non modò nullum facinus hujus protulerunt, sed ne dictum quidem aliquod reprehenderunt.

XIV. Quòd si, aut quantam voluntatem habent ad hunc opprimendum, aut

quantam ad maledicendum licentiam , tantum haberent , aut ad ementiendum , animi , aut ad fingendum , ingenii : non meliore fortunâ ad probra non audienda Fontei , quàm illi , de quibus antea commemoravi , fuisset. Frugi igitur hominem , Judices , frugi , inquam , & in omnibus vitæ partibus moderatum , ac temperantem , plenum pudoris , plenum officii , plenum religionis , videtis positum in vestra fide , ac potestate ; atque ita , ut commissus sit fidei , permissus potestati.

31. Videte igitur , utrùm sit æquius , hominem honestissimum , virum fortissimum , civem optimum , dedi inimicissimis , atque immanissimis nationibus , an reddi amicis ; præsertim quum tot res sint , quæ vestris animis pro hujus innocentis salute supplicent : primum generis antiquitas , quam Tusculo ex clarissimo municipio profectam , in monumentis rerum gestarum incisam , ac notatam videmus : tum autem continuæ præturæ , quæ & ceteris ornamentis , & existimatione innocentiae maximè floruerunt : deinde recens memoria parentis , cujus sanguine non solum Asculanorum manus , a qua interfectus est , sed totum illud sociale bellum maculâ sceleris imbutum est : postremò ipse quum in omnibus vitæ partibus honestus , atque integer , tum in re militari quum summi

consilii, & maximi animi, tum verò usu quoque bellorum gerendorum in primis eorum hominum, qui nunc sunt, exercitatus.

XV. Quare, si etiam monendi estis a me, Judices, quod non estis, videor hoc leviter pro mea auctoritate vobis præcipere posse, ut ex eo genere homines, quorum cognita virtus, industria, felicitas in re militari sit, diligenter vobis retinendos existimetis. Fuit enim major talium virorum in hac republica copia; quæ quum esset, tamen eorum non modò saluti, sed etiam honori consulebatur. Quid nunc vobis faciendum est, studiis militaribus apud juventutem obsoletis; claris autem hominibus, ac summis ducibus partim ætate, partim civitatis discordiis, ac reipublicæ calamitate consumptis? quum tot bella aut a nobis necessariò suscipiantur, aut subito, atque improvisa nascantur? nonne & hominem ipsum ad dubia reipublicæ tempora reservandum, & ceteros studio laudis, ac virtutis inflammandos putatis?

33. Recordamini, quos legatos nuper in bello L. Julius, quos P. Rutilius, quos L. Cato, quos Cn. Pompeius habuerit: scietis fuisse tum M. Cornutum, L. Cinnam; L. Sullam, prætorios homines, bellici gerendi peritissimos: præterea C. Marium, T. Didium, Q. Catulum, P. Gras-

sum , non litteris homines , ad rei militaris scientiam , sed rebus gestis , ac victoriis eruditos. Age verò , nunc inserite oculos in curiam , introspicite penitus in omnes reipublicæ partes : utrùm videtis nihil posse accidere , ut tales viri desiderandi sint ? an , si acciderit , eorum hominum copiâ populum Romanum abundare ? Quæ si diligenter attendetis , profectò , Judices , virum ad labores belli impigrum ; ad pericula fortem ; ad usum ac disciplinam peritum ; ad consilia prudentem ; ad casum , fortunamque , felicem , domi vobis , ac liberis vestris retinere , quàm inimicissimis populi Romani nationibus , & crudelissimis tradere , & condonare maletis.

XVI. At infestis propè signis , inferuntur Galli in Fonteium ; & instant , atque urgent summo cum studio , summa cum audacia. Nos verò , Judices , non & multis , & firmis præsiidiis , vobis adjutoribus , isti immani , atque intolerandæ barbariæ resistemus ? Primùm objicitur contra istorum impetus Macedonia , fidelis , & amica populo Romano provincia : quæ quum se , ac suas urbes non solum consilio , sed etiam manu Fonteii conservatam esse dicat ; ut illa per hunc a Thracum adventu , ac depopulatione defensa fuit , sic ab hujus nunc capite Gallorum impetus , terroresque depellit.

35. Constituitur ex altera parte ulterior Hispania, quæ profectò non modò religione suâ resistere istorum cupiditati potest, sed etiam sceleratorum hominum perjuria testimoniis, ac laudationibus suis refutare. Atque ex ipsa etiam Gallia fidelissima, & gravissima auxilia sumuntur. Venit huic subsidio, misero, atque innocenti, Massiliensium cuncta civitas, quæ non solum ob eam causam laborat, ut huic, a quo ipsa servata est, parem gratiam referre videatur; sed etiam, quòd eâ conditione, atque eo fato se in his terris collocatam esse arbitratur, ne quid nostris hominibus illæ gentes nocere possint.

36. Pugnat pariter pro salute M. Fonteii Narbonensis colonia, quæ per hunc ipsa nuper obsidione hostium liberata, nunc ejusdem miseriis, ac periculis commovetur. Denique, ut oportet bello Gallico, ut majorum jura, moresque præscribunt, nemo est civis Romanus, qui sibi ullâ excusatione utendum putet: omnes illius provinciæ publicani, agricolæ, pecuarii, ceteri negotiatores, uno animo M. Fonteium, atque unâ voce defendunt.

XVII. Quòd si tantas auxiliorum nostrorum copias Induciomarus ipse desperaverit, dux Allobrogum, ceterorumque

Gallorum : num etiam de matris hunc complexu , lectissimæ , miserrimæque feminæ , vobis inspectantibus , avellet , atque abstrahet ? præsertim quum virgo Vestalis ex altera parte germanum fratrem complexa teneat , vestramque , Judices , ac populi Romani fidem imploret : quæ pro vobis , liberisque vestris tot annos in diis immortalibus placandis occupata est , ut ea nunc , pro salute sua , fratrisque sui , animos vestros placare possit.

37. Cui miseræ quod præsidium , quod solatium reliquum est , hoc amisso ? nam ceteræ feminæ gignere ipsæ sibi præsidia , & habere domi fortunarum omnium socium , participemque possunt : huic verò virgini , quid est , præter fratrem , quod aut jucundum , aut carum esse possit ? Nolite pati , Judices , aras deorum immortalium , Vestæque matris , quotidianis virginis lamentationibus , de vestro iudicio commoveri : prospicite , ne ille ignis æternus , nocturnis Fonteiaë laboribus , vigiliisque servatus , sacerdotis vestræ lacrymis extinctus esse dicatur. Tendit ad vos virgo Vestalis manus supplices , easdem , quas pro vobis diis immortalibus tendere consuevit : cavete , ne periculofum , superbumque sit , ejus vos obsecrationem repudiare , cujus preces si dii aspernarentur , hæc salva esse non possent.



38. Videtisne subito, Iudices, virum fortissimum, M. Fonteium, parentis & sororis commemoratione lacrymas profudisse? Qui numquam in acie pertimuerit, qui se armatus sæpe in hostium manum, multitudinemque immiserit, quum in ejusmodi periculis eadem se solatia suis relinquere arbitraretur, quæ suus pater sibi reliquisset: idem nunc perturbato animo pertimescit, ne non modò ornamento, & adjumento non sit suis, sed etiam cum acerbissimo luctu dedecus æternum miseris, atque ignominiam relinquat.

39. O fortunam longè disparem, M. Fonteius, si deligere potuisses, ut potius telis tibi Gallorum, quàm perjuriis intereundum esset! tum enim vitæ socia virtus, mortis comes gloriæ fuisset. Nunc verò qui est dolor, victoriæ, te, atque imperii pœnas ad eorum arbitrium sufferre, qui aut victi armis sunt, aut invitissimi paruerunt? A quo periculo defendite, Iudices, civem fortem, atque innocentem: curate, ut nostris testibus plus quàm alienigenis credidisse videamini: plus saluti civium, quàm hostium libidini consuluisse: graviolem duxisse ejus obsecrationem, quæ vestris sacris præsit, quàm eorum audaciam, quæ

396 *ORAT. PRO M. FONT.*

cum omnium sacris , delubrisque bella  
gesserunt : postremò prospicite , Judices ,  
id quod ad dignitatem populi Romani  
maximè pertinet , ut plus apud vos pre-  
ces virginis Vestalis , quàm minæ Gallo-  
rum valuisse videantur.





## PRO A. CÆCINA.

### ORATIO DUODECIMA.

*Hujus orationis tempus incertum, argumentum autem tale est. M. Fulcinius Tarquiniensis Cæsenniae uxori moriens usumfructum bonorum suorum legavit; ut frueretur unâ cum filio herede instituto. Filio mortuo; & auctione bonorum constitutâ, Cæsennia fundum ex iis bonis emere de sententia amicorum constituit; idque negotium Sex. Æbutio dedit, cui fundus pecuniâ Cæsenniae emptus fuit addictus. Cæsennia quum non longè post A. Cæcinæ nupsisset, eumque heredem fecisset, decessit. Tum Æbutius fundum illum, quem mandatu Cæsenniae emerat, suum esse dixit. I taque constitutum fuit, quâ die in rem præsentem veniretur, ut,*

quum Cæcina de fundo esset dejectus, interdictum a prætore postularet. Verum Æbutius fundo occupato, Cæcinam in eum ingredi conantem, coactis armatisque hominibus, per vim aditu ingressuque prohibuit. Repulsus Cæcina interdictum de armatis hominibus a Dolabella prætore impetravit, ut unde dejectus esset, ed restitueretur. Æbutius restituisse se dixit, in eamque rem sponsio facta est, de qua recuperatores a prætore dati cognoverunt.

*Tota quæstio definitionis est, an interdicto de vi teneatur etiam is, qui non dejecit de fundo, sed ab ejus ingressu prohibuit: de qua re Cicero in Oratore 102. Tota mihi causa pro Cæcina de verbis interdicti fuit: res involutas definiendo explicavimus, jus civile laudavimus, verba ambigua distinximus. FABRICIUS.*

**S**i, quantum in agro; locisque desertis audacia potest, tantum in foro, atque in

judiciis impudentia valeret ; non minùs nunc in causa cederet A. Cæcina Sex. Æbutii impudentiæ , quàm tum in vi faciendâ cessit audaciæ. Verùm & illud considerati hominis esse putavit , quare jure decertari oporteret , armis non contendere ; & hoc constantis , quicum vi & armis certare noluisse , eum jure , judicioque superare.

2. Ac mihi quidem quum audax præcipuè fuisse videtur Æbutius in convocandis hominibus , & armandis , tum impudens in judicio ; non solum quòd in judicium venire ausus est ( nam id quidem , tametsi improbè fit in aperta re , tamen malitiâ est jam usitatum ) sed quòd non dubitavit id ipsum , quod arguitur , confiteri ; nisi fortè hoc rationis habuit , quoniam , si facta vis esset moribus , superior in possessione retinenda non fuisset ; quia contra jus , moremque facta sit , A Cæcinam cum amicis metu perterritum profugisse ; nunc quoque in judicio , si causa more , institutoque omnium defendatur , nos inferiores in agendo non futuros : sin a consuetudine recedatur , se , quò impudentius egerit , hòc superiorem discessurum : quasi verò aut in judicio possit idem improbitas , quod in vi confidentia ; aut non eò libentiùs tum audaciæ cesserimus , quò nunc impudentiæ faciliùs obsisteremus.

3. Itaque longè aliâ ratione , Recupera-  
tores , ad agendam causam hac actione  
venio , atque initio veneram. Tum enim  
nostræ causæ spes erat posita in defensione  
mea , nunc in confessione adversarii :  
tum in nostris , nunc verò in illorum testi-  
bus : de quibus ego antea laborabam , ne ,  
si improbi essent , falsi aliquid dicerent ;  
si probi existimarentur , quod dixissent ,  
probarent ; nunc sum animo æquissimo.  
Si enim sunt viri boni , me adjuvant ,  
quum id jurati dicunt , quod ego injuratus  
insimulo : sin autem minus idonei ; me non  
lædunt ; quum , iis sive creditur , creditur  
hoc ipsum quod nos arguimus ; sive fides  
non habetur , de adversarii testium fide de-  
rogatur.

II. Verumtamen quum illorum causæ  
actionem considero ; non video , quid  
impudentius dici possit : quum autem ves-  
tram in judicando dubitationem ; vereor ,  
ne id , quod videntur impudenter fecisse ;  
astutè & callidè fecerint. Nam , si negas-  
sent vim hominibus armatis esse factam ,  
facile honestissimis testibus in re perspi-  
cua tenerentur : sin confessi essent , & id ,  
quod nullo tempore jure fieri potest , tum  
ab se jure factum esse defenderent ; spe-  
rarunt , id quod assecuti sunt , se injectu-  
ros vobis causam deliberandi , & judicandi  
justam moram , ac religionem : simul illud ,

quod indignissimum est , futurum arbitrati sunt , ut in hac causa non de improbitate Sex. Æbutii , sed de jure civili judicium fieri videretur.

5. Qua in re , si mihi esset unius A. Cæcinæ causa agenda , profiterer satis idoneum esse me defensorem , propterea quòd fidem meam , diligentiamque præstarem : quæ quum sunt in actore causæ , nihil est , in re præsertim aperta ac simplici , quòd excellens ingenium requiratur. Sed quum de eo jure mihi dicendum sit , quod pertineat ad omnes , quod constitutum sit a majoribus , conservatum usque ad hoc tempus , quo sublato non solum pars aliqua juris deminuta , sed etiam vis ea , quæ juri maximè est adversaria , judicio confirmata esse videatur : video summi ingenii causam esse ; non uti demonstretur quod ante oculos est , sed ne , si quis vobis error in tanta re sit objectus , omnes potius me arbitrentur causæ , quàm vos religioni vestræ defuisse.

6. Quamquam ego mihi sic persuadeo , Recuperatores , non vos tam propter juris obscuram , dubiamque rationem , bis jam de eadem causa dubitasse , quàm , quòd videtur ad summam illius existimationem hoc judicium pertinere , moram ad condemnandum acquisisse , simul & illi spatium ad sese colligendum dedisse. Quod quo-

niam jam in consuetudinem venit , & id viri boni , vestri similes , in judicando faciunt , reprehendendum fortasse minus , querendum verò magis etiam videtur : ideo quod omnia judicia , aut distrahendarum controversiarum , aut puniendorum malefactorum causâ reperta sunt : quorum alterum levius est , propterea quòd & minus lædit , & persæpe disceptatore domestico dijudicatur ; alterum est vehementissimum , quòd & ad graviores res pertinet , & non honorariam operam amici , sed severitatem judicis , ac vim requirit.

7. Quod est gravius , & cujus rei causâ maximè judicia constituta sunt , id jam malâ consuetudine dissolutum est : nam ut quæque res est turpissima ; sic maximè & maturissimè judicanda est : at ea , in qua existimationis periculum est , tardissimè judicatur.

III. Quî igitur convenit , quæ causa fuerit ad constituendum judicium , eamdem moram esse ad judicandum ? Si quis , quod spondit , qua in re verbo se uno obligavit , id non facit , maturo judicio , sine ulla religione judicis condemnatur : qui per tutelam , aut societatem , aut rem mandatam , aut fiduciæ rationem , fraudavit quempiam , in eo , quòd delictum majus est , eò poena est tardior. Est enim



turpe iudicium : & facto quidem turpe. Videte igitur quàm iniquè accidat, quia res indigna sit, ideo turpem existimationem sequi ; quia turpis existimatio sequatur, ideo rem indignam non iudicari.

8. At si quis mihi hoc iudex, recuperatorve dicat : *Potuisti enim leviori actione configere : potuisti ad tuum jus faciliore, & commodiore iudicio pervenire : quare aut muta actionem, aut noli mihi instare, ut iudicem* : tamen is aut timidior videatur quàm fortis, aut cupidior quàm sapientem iudicem esse æquum est, si aut mihi præscribat, quemadmodum meum jus persequar, aut ipse id, quod ad se delatum sit, non audeat iudicare. Etenim si prætor is, qui iudicia dat, numquam petitori præstituit, quâ actione illum uti velit : videte quàm iniquum sit, constitutâ jam re, iudicem, quid agi potuerit, aut quid possit, non quid actum sit, quærere.

9. Verumtamen nimis vestræ benignitati pareremus, si aliâ ratione jus nostrum recuperare possemus. Nunc verò quis est, qui aut vim armatis hominibus factam relinqui putet oportere, aut ejus rei leniorem actionem nobis aliquam demonstrare possit ? Ex quo genere peccati, ut illi clamitant, vel injuriarum, vel capitis iudicia constituta sunt, in eo potestis atrocitatem nostram reprehende-

re , quum videatis nihil aliud actum , nisi possessionem per interdictum esse repetitam ?

IV. Verum sive vos existimationis illius periculum , sive juris dubitatio tardiores fecit adhuc ad judicandum : alterius rei causam vosmetipsi jam vobis , sæpiùs prolato iudicio , sustulistis ; alterius ego vobis hodierno die causam profectò auferam , ne diutius de controversia nostra , ac de communi jure dubitetis. Et , si fortè videbor altiùs initium rei demonstrandæ petisse , quàm me ratio juris ejus , de quo iudicium est , & natura causæ coëgerit , quæso ut ignoscatis : non enim minùs laborat A. Cæcina , ne summo jure egisse , quàm ne certum jus non obtinuisse videatur.

II. M. Fulcinius fuit , Recuperatores , e municipio Tarquiniensi , qui & domi suæ cum primis honestus existimatus est ; & Romæ argentariam non ignobilem fecit. Is habuit in matrimonio Cæsenniam , eodem e municipio , summo loco natam , & probatissimam feminam , sicut & vivus multis ipse rebus ostendit , & in morte sua testamento declaravit. Huic Cæsenniæ fundum in agro Tarquiniensi vendidit temporibus illis difficillimis solutionis. Quum uteretur dote uxoris numeratâ ; quò mulieri esset res cautior , curavit , ut in eo fundo dos collocaretur. Aliquanto pòst , jam argentariâ dif-

solutâ , Fulcinus huic fundo uxoris continentia quædam prædia , atque adjuncta mercatur. Moritur Fulcinus ( multa enim , quæ sunt in re , quia remota sunt a causa , prætermittam ) testamento facit heredem , quem habebat e Cæsennia filium : usumfructum omnium bonorum suorum Cæsenniae legat , ut fruëretur unâ cum filio.

12. Magnus honos viri , jucundus mulieri fuisset , si diuturnum esse licuisset : fruëretur enim bonis cum eo , quem suis bonis heredem esse cupiebat , & ex quo maximum fructum ipsa capiebat. Sed hunc fructum maturè fortuna ademit : nam brevi tempore M. Fulcinus adolescens mortuus est : heredem P. Cæsennium fecit : uxori grande pondus argenti , matrique partem bonorum majorem legavit. Itaque in partem mulieres vocatæ sunt.

V. Quum esset hæc auctio hereditaria constituta ; Æbutius iste , qui jamdiu Cæsenniae viduitate , ac solitudine aleretur , ac se ejus in familiaritatem insinuasset hac ratione , ut cum aliquo suo compendio negotia mulieris , si qua acciderent , controversiasque susciperet ; versabatur quoque eo tempore in his rationibus auctio- nis , & partitionis : atque etiam se ipse inferebat , & intrudebat ; & in eam opinionem Cæsenniam adducebat , ut mulier

imperita nihil putaret agi callidè posse, ubi non adesset Æbutius.

14. Quam personam jam ex quotidiana cognoscitis vita, Recuperatores, mulierum assentatoris, cognitoris viduarum, defensoris nimium litigiosi, conciti ad rixam, inepti ac stulti inter viros, inter mulieres periti juris & callidi; hanc personam imponite Æbutio: is enim Cæsenniae fuit Æbutius. Ne fortè quærat, num propinquus? nihil alienius: amicus aut a patre, aut a viro traditus? nihil minus. Quis igitur? ille, quem suprà deformavi: voluntarius amicus mulieris, non necessitudine aliquâ, sed ficto officio, simulatâque sedulitate conjunctus: magis opportunâ operâ nonnumquam, quàm aliquando fidei.

15. Quum esset, ut dicere institueram, constituta auctio Romæ, suadebant amici, cognatique Cæsenniae, id quod ipsi quoque mulieri in mentem veniebat, quoniam potestas esset emendi fundum illum Fulcianum, qui fundo ejus antiquo continens esset, nullam esse rationem amittere ejusmodi occasionem; quum præsertim pecunia ex partitione deberetur: nusquam eam posse melius collocari: itaque mulier facere constituit: mandat ut fundum sibi emat. Cui tandem? cui putatis? an non in mentem venit omnibus, hominis illius

esse hoc munus ad omnia mulieris negotia parati, sine quo nihil satis cautè, nihil satis callidè agi posset? Rectè attenditis.

VI. *Æbutio negotium datur.* Adest ad tabulam: licetur *Æbutius*: deterrentur emptores multi, partim gratiâ *Cæsenniae*, partim etiam pretio: fundus addicitur *Æbutio*: pecuniam argentario promittit *Æbutius*: quo testimonio nunc vir optimus utitur, sibi emptum esse: quasi verò aut nos ei negemus addictum, aut tum quisquam fuerit, qui dubitarit, quin emeretur *Cæsenniae*, quum id plerique scirent; omnes ferè audissent; hi conjecturâ assequi possent, quum pecunia *Cæsenniae* ex illa hereditate deberetur; eam porrò in prædiis collocari maximè expediret: essent autem prædia, quæ mulieri maximè convenirent: ea venirent: liceretur is, quem *Cæsenniae* dare operam nemo miraretur: sibi emere nemo posset suspicari.

17. Hac emptione factâ, pecunia solvitur a *Cæsennia*: cujus rei putat iste rationem reddi non posse, quòd ipse tabulas averterit; se autem habere argentarii tabulas, in quibus sibi expensa pecunia lata sit, acceptaque relata: quasi id aliter fieri oportuerit. Quum omnia ita facta essent, quemadmodum nos defendimus, *Cæsennia* fundum possedit, locavitque: neque ita multò post *A. Cæcinæ* nupsit.

Ut in pauca conferam , testamento facto mulier moritur : facit heredem ex deunce , & semuncia Cæcinam : ex duabus sextulis M. Fulcinium , libertum superioris viri : Æbutio sextulam aspergit. Hanc sextulam illa mercedem isti esse voluit assiduitatis , & molestiæ , si quam susceperat. Iste autem hac sextulâ se ansam retinere omnium controversiarum putat.

VII. Jam principio ausus est dicere , non posse heredem esse Cæsenniae Cæcinam ; quod is deteriore jure esset , quàm ceteri cives , propter incommodum Volaterranorum , calamitatemque civilem. Itaque homo timidus , imperitusque , qui neque animi , neque consilii satis haberet , non putavit esse tanti hereditatem , ut de civitate in dubium veniret : concessit , credo , Æbutio , quantum vellet , de Cæsenniae bonis ut haberet : immo , ut viro forti , ac sapienti dignum fuit , ita calumniam , stultitiamque obtrivit , ac condudit.

19. In possessione bonorum quum esset , & quum ipse sextulam suam nimium exaggeraret , nomine heredis arbitrum familiaris erciscundæ postulavit : atque illis paucis diebus , posteaquam videt nihil se ab A. Cæcina posse , litium terrore , abraderet ; homini Romæ in foro denuntiat , fundum illum , de quo antè dixi , cujus istum emptorem

emptorem demonstravi fuisse, mandatu Cæsenniae, suum esse, seque sibi emis-  
 se. Quid ais? Istius ille fundus est, quem sine  
 ulla controversia quadriennium, hoc est,  
 ex quo tempore fundus venit, quoad vi-  
 xit, possedit Cæsennia? Usus enim, inquit,  
 ejus, & fructus fundi, testamento viri,  
 fuerat Cæsenniae.

20. Quum hoc novæ litis genus tam ma-  
 litiosè intenderet, placuit Cæcinæ, de ami-  
 corum sententia constituere, quo die in  
 rem præsentem veniretur, & de fundo  
 Cæcina moribus deduceretur. Colloquun-  
 tur: dies ex utriusque commodo sumitur.  
 Cæcina cum amicis ad diem venit in cas-  
 tellum Axiam; ex quo loco fundus is,  
 de quo agitur, non longè abest. Ibi cer-  
 tior fit a pluribus, homines permultos,  
 liberos, atque servos, coëgis- & armasse  
 Æbutium. Quum id partim mirarentur,  
 partim non crederent; ecce ipse Æbutius  
 in castellum venit; denuntiat Cæcinæ se  
 armatos habere: abiturum eum non esse,  
 si accessisset. Cæcinæ placuit, & amicis,  
 quoad videretur salvo capite fieri posse,  
 experiri. Tum de castello descendunt: in  
 fundum proficiscuntur: videtur temerè  
 commissum: verum, ut opinor, hoc fuit  
 causæ: tam temerè istum re commissu-  
 rum, quàm verbis nuntiabatur, nemo pu-  
 tavit.

VIII. Atque iste ad omnes introitus ; quà adiri poterat non modò in eum fundum , de quo controversia fuerat , sed etiam in illum proximum , de quo nihil ambigebatur , armatos homines opponit. Itaque primò quum in antiquum fundum ingredi vellet , quòd eà proximè accedi poterat ; frequentes armati obstiterunt.

22. Quo loco depulsus Cæcina , tamen , quà potuit , ad eum fundum profectus est , e quo ex conventu vim fieri oportebat : ejus autem fundi extremam partem oleæ directo ordine definiunt. Ad eas quum accederetur , iste cum omnibus copiis præstò fuit , servumque suum , nomine Antiochum , ad se vocavit , & clarâ voce imperavit , ut eum , qui illum olearum ordinem intrasset , occideret. Homo , meâ sententiâ , prudentissimus Cæcina , tamen in hac re plus mihi animi , quàm consilii videtur habuisse : nam quum & armatorum multitudinem videret , & eam vocem Æbutii , quam commemoravi , audisset ; tamen accessit propiùs , & jam ingrediens intra finem ejus loci , quem oleæ terminabant , impetum armati Antiochi , ceterorumque tela , atque incurfus refugit. Eodem tempore se in fugam conferunt unâ amici , advocatique ejus , metu perterriti , quemadmodum illorum testem dicere audistis. His rebus ita gestis , P. Do-



labella prætor interdixit, ut est consuetudo, *De vi hominibus armatis*, sine ulla exceptione, tantum, ut, unde dejecisset, restitueret. Restituisse se dixit: sponsio facta est: hac de sponsione vobis judicandum est.

IX. Maximè fuit optandum Cæcinæ, Recuperatores, ut controversiæ nihil haberet: secundo loco, ut ne cum tam improbo homine: tertio, ut cum tam stulto haberet: etenim non minùs nos stultitia illius sublevat, quàm lædit improbitas: improbus fuit, quòd homines coëgit, armavit: coactis, armatisque vim fecit: læsit in eo Cæcinam: sublevavit ibidem: nam in eas ipsas res, quas improbissimè fecit, testimonia sumpsit, & eis in causa testimoniis utitur.

24. Itaque mihi certum est, Recuperatores, antequam ad meam defensionem, meosque testes venio, illius uti confessione & testimoniis. Quid confitetur, atque ita libenter confitetur, ut non solum fateri, sed etiam profiteri videatur, Recuperatores? Convocavi homines: coëgi: armavi: terrore mortis, ac periculo capitis, ne accederes, obstiti: ferro, inquit, ferro, & hoc dicit in iudicio, te rejeci, atque perterrui. Quid? testes quid aiunt? P. Vetilius, propinquus Æbutii, se Æbutio cum armatis servis venisse ad-

vocatum. Quid præterea ? fuisse complures armatos. Quid aliud ? minatum esse Æbutium Cæcinæ. Quid ego de hoc teste dicam , nisi hoc , Recuperatores , ut idcirco non minùs ei credatis , quòd homo minùs idoneus habetur : sed ideo credatis , quòd ex illa parte id dicit , quod illi causæ maximè est alienum ?

25. A. Terentius , alter testis , non modò Æbutium , sed etiam seipsum arguit : in Æbutium hoc dicit , armatos homines fuisse : de se autem hoc prædicat , Antiocho , Æbutii servo , imperasse , ut in Cæcinam advenientem cum ferro invaderet. Quid loquar ampliùs hoc de homine ? in quem ego dicere , quum rogarer a Cæcina , numquam volui , ne arguere illum rei capitalis viderer : de eo dubito nunc , quomodo aut loquar , aut taceam , quum ipse hoc de se juratus prædicet. Deinde L. Cælius non solùm Æbutium cum armatis dixit fuisse compluribus , verùm etiam cum advocatis perpaucais eò venisse Cæcinam. De hoc ego teste detraham ; cui æquè , atque meo testi , ut credatis , postulo ?

26. P. Memmius secutus est , qui suum non parvum beneficium commemoravit in amicos Cæcinæ , quibus sese viam per fratris sui fundum dedisse dixit , quà effugere possent , quum essent metu omnes perterriti. Huic ego testi gratias agam , quòd &

in re misericordem se præbuit, & in testimonio religiosum.

X. A. Atilius, & ejus filius L. Atilius, & armatos ibi fuisse, & se servos armatos adduxisse dixerunt: etiam hoc amplius: quum Æbutius Cæcinæ malum minaretur, ibi tum Cæcinam postulasse, ut moribus deductio fieret. Hoc idem P. Rutilius dixit, & eò libentiùs dixit, ut aliquo in judicio ejus testimonio creditum putaretur. Duo præterea testes nihil de vi, sed de re ipsa, atque emptione fundi dixerunt: P. Cæsennius, auctor fundi, non tam auctoritate gravi, quàm corpore, & argentarius Sex. Clodius, cui nomen est Phormio, nec minùs niger, nec minùs confidens, quàm ille Terentianus est Phormio, nihil de vi dixerunt; nihil præterea, quod ad vestrum judicium pertineret.

28. Decimo verò loco testis expectatus, & ad extremum reservatus, dixit, senator populi Romani, splendor ordinis, decus, atque ornamentum judiciorum, exemplar antiquæ religionis, Fidiculanus Falcula: qui quum ita vehemens, acerque venisset, ut non modò Cæcinam perjurio suo læderet, sed etiam mihi videretur irasci; ita eum placidum, mollemque reddidi, ut non auderet, sicut meministis, iterum dicere, quot millia fundus suus abesset

ab urbe : nam quum dixisset minùs abesse  
LIII , populus cum risu acclamavit , ipsa  
esse : meminerant enim omnes , quantum  
in Albiano iudicio accepisset.

29. In eum quid dicam , nisi id , quod  
negare non possit ? venisse in consilium  
publicæ quæstionis , quum ejus consilii  
iudex non esset : & in eo consilio , quum  
causam non audisset , & potestas esset am-  
pliandi , dixisse , *sibi liquere* : dum inco-  
gnitâ re judicare voluisset , maluisse con-  
demnare , quàm absolvere : quum , si uno  
minùs damnarent , condemnari reus non  
posset , non ad cognoscendam causam , sed  
ad explendam damnationem præstò fuisse.  
Utrùm gravius aliquid in quempiam dici  
potest , quàm ad hominem condemnan-  
dum , quem numquam vidisset , neque  
audisset , adductum pretio esse ? An cer-  
tius quidquam objici potest , quàm quod  
is , cui objicitur , ne nutu quidem infirma-  
re conatur ?

30. Verumtamen is testis , ut facilè in-  
telligeretis , eum non adfuisse animo ,  
quum ab illis causa ageretur , testesque  
dicerent ; sed tantisper de aliquo reo co-  
gitasse : quum omnes ante eum dixissent  
testes , armatos cum Æbutio fuisse com-  
plures ; solus dixit non fuisse. Visus est  
mihi primò veterator intelligere præclare ,  
quid causa optaret : & tantummodo erra-

re , quòd omnes testes infirmaret , qui ante eum dixissent ; quum subitò ecce idem , qui solet , suos solos servos armatos fuisse dixit.

XI. Quid huic tu homini facias ? nonne concedas interdum , ut excusatione summæ stultitiæ , summæ improbitatis odium deprecetur ? Utrùm , Recuperatores , his testibus non credidistis , quum , quid liqueret , non habuistis ? At controversia non erat , quin verum dicerent. An in coacta multitudine , in armis , in telis , in præsentī metu mortis , perspicuo periculo cædis , dubium vobis fuit , utrùm esse vis aliqua videretur , necne ? Quibus igitur in rebus vis intelligi potest , si in his non intelligetur ? An verò illa defensio vobis præclara visa est ? Non dejeci , sed obstiti : non enim te sum passus in fundum ingredi : sed armatos homines opposui ; ut intelligeres , si in fundo pedem posuisses , statim tibi esse pereundum. Quid ais ? is qui armis perterritus , fugatus , pulsus est , non videtur esse dejectus ?

32. Posterius de verbo videbimus : nunc rem ipsam ponamus ; quam illi non negant ; & ejus rei jus , actionemque quæramus. Est hæc res posita , quæ ab adversario non negatur : Cæcinam , quum ad constitutam diem , tempusque venisset ,

ut vis ac deductio moribus fieret, pulsus ; prohibitumque esse vi , coactis hominibus & armatis. Quum hoc constet , ego homo imperitus juris , ignarus negotiorum ac litium , hanc puto me habere actionem , ut per interdictum , meum jus teneam , atque injuriam tuam persequar. Fac in hoc errare me , nec ullo modo posse per hoc interdictum id assequi , quod velim : te uti in hac re magistro volo. Quæro , sitne aliqua hujus rei actio , an nulla. Convocari homines propter possessionis controversiam non oportet : armari multitudinem , juris retinendi causâ , non convenit : nec juris quidquam tam inimicum , quàm vis : nec æquitati quidquam tam infestum est , quàm convocati homines , & armati.

XII. Quod quum ita sit , resque ejusmodi sit , ut in primis a magistratibus animadvertenda esse videatur , iterum quæro , sitne ejus rei aliqua actio , an nulla : nullam esse dices ? audire cupio : qui in pace & otio , quum manum fecerit , copias pararit , multitudinem hominum coëgerit , armarit , instruxerit , homines inermes , qui ad constitutum experiendi juris gratiâ venirent , armis , viris , terrore , periculoque mortis repulerit , fugarit , averterit , hoc dicat :

34. Feci equidem , quæ dicis , omnia : & ea sunt & turbulenta , & temeraria , &

periculosa. Quid ergo est? impunè feci: nam quid agas mecum ex jure civili, ac prætorio, non habes. Itane verò, Recuperatores? hoc vos audietis? & apud vos dici patiemini sæpius? quum majores nostri tantâ diligentia, prudentiaque fuerint, ut omnia omnium non modò tantarum rerum, sed etiam tenuissimarum jura statuerint, persecutique sint; hoc genus unum, vel maximum prætermitterent: ut, si qui me exire domo meâ coëgissent armis, haberem actionem; si qui introire prohibuissent, non haberem? Nondum de Cæcinæ causa disputo, nondum de jure possessionis nostræ loquor: tantum de tua defensione, C. Piso, queror.

35. Quando ita dicis, & ita constituis, Si Cæcina, quum in fundo esset, inde dejectus esset, tum per hoc interdictum eum restitui oportuisse: nunc verò dejectum nullo modo esse inde, ubi non fuerit; hoc interdicto nihil nos affecutos esse: quæro, si te hodie domum tuam redeuntem coacti homines & armati, non modò limine, tectoque ædium tuarum, sed primo aditu, vestibuloque prohibuerint, quid acturus sis? Monet amicus meus te, L. Calpurnius, ut idem dicas, quod ipse antea dixit, injuriarum. Quid? ad causam possessionis: quid? ad restituendum eum, quem oportet restitui: quid denique? adi

jus civile , aut ad actoris notionem , & ad animadversionem , ages injuriarum ? Plus tibi ego largiar : non solum egeris , verum etiam condemnaris licet : numquid magis possidebis ? actio enim injuriarum non jus possessionis assequitur , sed dolorem imminutæ libertatis , judicio , pœnâque mitigat.

XIII. Prætor interea , Piso , tanta de re tacebit ? quemadmodum te restituat in ædes tuas , non habebit ? Qui dies totos aut vim fieri vetat , aut restitui factam jubet : qui de fossis , de cloacis , de minimis aquarum , itinerumque controversiis interdicat , is repente obmutescet ? in atrocissima re quid faciat , non habebit ? & , C. Pisone domo , tectisque suis prohibito , prohibito , inquam , per homines coactos , & armatos , prætor quemadmodum more & exemplo opitulari possit , non habebit ? Quid enim dicet ? aut quid tu , tam insigni acceptâ injuriâ , postulabis ? Unde vi prohibitus sis ? nemo umquam interdixit : novum est , non dico inusitatum , verum omnino inauditum. Unde dejectus ? quid proficies , quum illi hoc respondebunt tibi , quod tu nunc mihi : armatos se tibi obstitisse , ne in ædes accederes ; dejici porro nullo modo potuisse , qui non accesserit ?

37. Dejicior ego , inquis , si quis meo-



rum dejicitur. Omnino : jam benè agis : a verbis enim recedis , & æquitate uteris : nam verba ipsa si sequi volumus , quomodo tu dejiceris , quum servus tuus dejicitur ? Verùm ita est , uti dicis : te dejectum debeo intelligere , etiamsi tactus non fueris : nonne ? Age nunc , si ne tuorum quidem quisquam loco motus erit , atque omnes in ædibus adservati , ac retenti : tu solus prohibitus , & a tuis ædibus vi , atque armis perterritus : utrùm hanc actionem habebis , quâ nos usi sumus , an aliam quampiam , an omnino nullam ? nullam esse actionem dicere in re tam insigni , tamque atroci , neque prudentiæ , neque auctoritatis tuæ est : alia si qua fortè est , quæ nos fugerit , dic , quæ sit : cupio discere.

38. Hæc si est , quâ nos usi sumus : te judice vincamus necesse est : non enim vereor , ne hoc dicas , in eadem causa , eodem interdicto , te oportere restitui , Cæcinam non oportere. Etenim cui perspicuum non sit , ad incertum revocari bona , fortunas , possessiones omnium , si ulla ex parte sententia hujus interdicti diminuta , aut infirmata sit ? si auctoritate virorum talium , vis armatorum hominum , judicio approbata videatur : in quo judicio non de armis dubitatum , sed de verbis quæsitum esse dicatur ? Isne apud vos

obtinebit causam suam , qui se ita defenderit : Ejeci ego te armatis hominibus , non dejeci : ut tantum facinus non in æquitate defensionis , sed in una littera latuisse videatur ? Hujusce rei vos statuetis nullam esse actionem , nullum experiendi jus constitutum , quòd obstiterit armatis hominibus , qui multitudine coacti , non introitu , sed omnino aditu quempiam prohibuerit ?

XIV. Quid ergo ? hoc , quam habet vim ? ut illa res aliquid aliqua ex parte differre videatur , utrùm , pedem quàm intulero , atque in possessionem vestigium fecero , tum expellar , atque dejiciar : an eâdem vi , atque iisdem armis mihi antè occurratur , ne non modò intrare , verùm etiam adspicere , aut adspirare possim ? quì hoc ab illo differt ? ut ille cogatur restituere , qui ingressum expulerit : ille , qui ingredientem repulerit , non cogatur ?

40. Videte , per deos immortales ! quod jus nobis , quam conditionem vobismet ipsis , quam denique civitati legem constituere velitis. Hujusce generis una est actio per hoc interdictum , quo nos uti sumus , constituta : ea si nihil valet , aut si ad hanc rem non pertinet ; quid negligentius , aut quid stultius majoribus nostris dici potest , qui aut tantæ rei prætermiserint actionem ; aut eam constituerint , quæ nequaquam fa-

tis verbis causam , & rationem juris amplecteretur ? Periculosum est dissolvi hoc interdictum : est captiosum omnibus , rem ullam constitui ejusmodi , quæ , quum armis gesta sit , rescindi jure non possit : verumtamen est turpissimum illud , tantæ stultitiæ prudentissimos homines condemnari , ut vos judicetis , hujus rei interdictum , atque actionem in mentem majoribus nostris non venisse.

41. Queramur , inquit , licet : tamen hoc interdicto Æbutius non tenetur. Quid ita ? Quodd vis Cæcinæ facta non est. Dici in hac causa potest , ubi arma fuerint , ubi coacta hominum multitudo , ubi instructi , & certis locis cum ferro homines collocati , ubi minæ , pericula , terroresque mortis , ibi vim non fuisse ? Nemo , inquit , occisus est , neque faucius. Quid ais ? quum de possessionis controversia , & de privatorum hominum contentione juris loquamur , tu vim negabis esse factam , si cædes & occisio facta non erit ? Ego exercitus maximos , sæpe pulsos , & fugatos esse dico , terrore ipso , impetuque hostium , sine cujusquam non modo morte , verum etiam vulnere.

XV. Etenim , Recuperatores , non ea sola vis est , quæ ad corpus nostrum , vitamque pervenit , sed etiam multò major ea , quæ , periculo mortis injecto , formi-

dine animum perterritum, loco sæpe, & certo de statu demovet. Itaque faucii sæpe homines, quum corpore debilitantur, animo tamen non cedunt, neque eum relinquunt locum, quem statuerint defendere. At alii pelluntur integri, ut non dubium sit, quin major adhibita vis ei sit, cujus animus sit perterritus, quàm illi, cujus corpus vulneratum sit.

43. Quòd si vi pulsos dicimus exercitus esse eos, qui metu, ac tenui sæpe suspicionem periculi fugerunt: &, si non solum impulsu scutorum, neque conflictu corporum, neque ictu cominus, neque conjectione telorum; sed sæpe clamore ipso militum, aut instructione adspectuque signorum magnas copias pulsas esse, & vidimus, & audivimus: quæ vis in bello appellatur, ea in otio non appellabitur? &, quod vehemens in re militari putatur, id leve in jure civili judicabitur? &, quod exercitus armatos movet, id advocationem togatorum non videbitur movisse: & vulnus corporis magis istam vim, quàm terror animi declarabit? & fauciatio quæretur, quum fugam factam esse constabit?

44. Tuus enim testis hoc dixit, metu perterritis nostris advocatis, locum, quæ effugerent, demonstrasse. Qui non modò ut fugerent, sed etiam ipsius fugæ tutam

viam quæsierunt, his vis adhibita non videbitur? Quid igitur fugiebant? propter metum. Quid metuebant? vim videlicet. Potestis igitur principia negare, quum extrema conceditis? Fugisse perterritos confitemini: causam fugæ dicitis eandem, quam omnes intelligimus, arma, multitudinem hominum, incursionem, atque impetum armatorum: hæc ubi conceduntur esse facta, ibi vis facta negabitur?

XVI. At verò hoc quidem jam vetus est, & majorum exemplo multis in rebus usitatum: quum ad vim faciendam veniretur, si quos armatos, quamvis procul, conspexissent, ut statim testificati discederent, optimè sponsionem facere possent, *Ni adversus edictum prætoris vis facta esset.* Itane verò: scire esse armatos, satis est, ut vim factam probes: in manus eorum incidere, non est satis? adspectus armatorum ad vim probandam valebit: incursum, & impetus non valebit: qui abierit, facilius sibi vim factam probabit, quàm qui effugerit?

46. At ego hoc dico: si, ut primò in castello Cæcinæ dixit Æbutius, se homines coëgisse & armasse; neque illum, si eò accessisset, abiturum; statim Cæcina discessisset; dubitare vos non debuisse, quin Cæcinæ facta vis esset: si verò, simulac procul conspexit armatos, recessis-

set ; eò minùs dubitaretis : omnis enĩm vis est , quæ periculo aut decedere nos alicunde cogit , aut prohibet accedere. Quòd si aliter statuetis ; videte , ne hoc vos statuatis , qui vivus discesserit , ei vim non esse factam : ne hoc omnibus , in possessionum controversiis , præscribatis , ut configendum sibi , & armis decertandum putent : ne , quemadmodum in bello pœna ignavis ab imperatoribus constituitur , sic in judiciis deterior causa sit eorum , qui fugerint , quàm qui ad extremum usque contenderint.

47. Quum de jure , & legitimis hominum controversiis loquimur , & in his rebus vim nominamus , pertenuis vis intelligi debet. Vidi armatos , quamvis paucos ; magna vis est : decessi unius hominis telo perterritus : dejectus , detrususque sum. Hoc si ita statuetis : non modò non erit , cur depugnare quisquam posthac , possessionis causâ , velit ; sed ne illud quidem , cur repugnare. Sin autem vim sine cæde , sine vulneratione , sine sanguine nullam intelligetis : statuetis homines possessionis cupidiores , quàm vitæ esse oportere.

XVII. Age verò , de vi te ipsum habebō judicem , Æbuti : responde , si tibi videtur. In fandum Cæcina utrūm noluit tandem , an non potuit accedere ? quum te obstitisse , & repudiasse dicis , certè hunc

voluisse concedis. Potes igitur dicere, non ei vim fuisse impedimento, cui, quum cuperet, eoque consilio venisset, per homines coactos non sit licitum accedere? Si enim id, quod maximè voluit, nullo modo potuit; vis profectò quædam obstitit necesse est: aut tu dic, quamobrem, quum vellet accedere, non accesserit.

49. Jam vim factam negare non potes: dejectus quemadmodum sit, qui non accesserit, id quæritur: demoveri enim, & depelli de loco necesse est eum, qui deiciatur; id autem accidere ei quî potest, qui omnino in eo loco, unde se dejectum esse dicit, numquam fuit? Quòd si fuisset, & ex eo loco, metu permotus, fugisset, quum armatos vidisset; diceresne esse dejectum? Opinor. An tu, qui tam diligenter, & tam callidè verbis controversias, non æquitate, dijudicas; & jura non utilitate communi, sed litteris exprimis; poterisne dicere, dejectum esse eum, qui tactus non erit? Quid? detrufum dicēs? nam eo verbo antea prætores in hoc interdicto uti solebant. Quid ais? potestne detrudi quisquam, qui non attingitur? nonne, si verbum sequi volumus, hoc intelligamus necesse est, eum detrudi, cui manus afferantur? necesse est, inquam, si ad verbum rem volumus attingere, ne-

minem statu detrufum , qui non adhibitâ vi , manu demotus , & actus præceps intelligatur.

50. Dejectus verò quî potest effe quifquam , nifi in inferiorem locum de fupere motus ? potest pulfus , fugatus , ejetus denique : illud verò nullo modo potest , dejectus effe quifquam , non modò qui tactus non fit , fed ne æquo quidem , & plano loco. Quid ergo ? hoc interdictum putamus eorum effe causâ compositum , qui fe præcipitados ex locis fuperioribus dicerent ? eos enim verè possumus dicere effe dejectos.

XVIII. An non , quum voluntas , & consilium , & fententia interdicti intelligatur , impudentiam summam , aut stultitiam fingularem putabimus , in verborum errore verfari : rem , & causam , & utilitatem communem non relinquere solum , fed etiam prodere ? An hoc dubium est , quin neque verborum tanta copia fit , non modò in nostra lingua , quæ dicitur effe inops ; fed ne in alia quidem ulla , res ut omnes fuis certis , ac propriis vocabulis nominentur ? neque verò quidquam opus fit verbis , quum ea res , cujus causâ verba quæfita fint , intelligatur ? Quæ lex , quod fenatusconsultum , quod magistratûs edictum , quod fœdus , aut pãctio , quod , ut ad privatas res redeam , testamentum ,



quæ judicia , aut stipulationes , aut pacti & conventi formula non infirmari , aut convelli potest , si ad verba rem deflectere velimus : consilium autem eorum , qui scripserunt , & rationem , & auctoritatem relinquamus ?

52. Sermo mehercule & familiaris , & quotidianus non cohærebit , si verba inter nos aucupabimur : denique imperium domesticum nullum erit , si servulis hoc nostris concesserimus , ut ad verba nobis obediunt ; non ad id , quod ex verbis intelligi possit , obtemperent. Exemplis nunc uti videlicet mihi necesse est harum rerum omnium ? non occurrit unicuique vestrum aliud alii in omni genere exemplum , quod testimonio sit , non ex verbis aptum pendere jus , sed verba servire hominum consiliis & auctoritatibus ?

53. Ornate & copiose L. Crassus , homo longè eloquentissimus , paulò antè , quàm nos in forum venimus , iudicio centumvirali hanc sententiam defendit , & facile , quum contra eum prudentissimus homo , Q. Mucius , diceret , probavit omnibus , M'. Curium , qui heres institutus esset ita , *mortuo postumo filio* , quum filius non modò non mortuus , sed ne natus quidem esset , heredem esse oportere. Quid ? verbis satis hoc cautum erat ? minime. Quæ res igitur valuit ? voluntas :

quæ si tacitis nobis intelligi posset , verbis omnino non uteremur : quia non potest ; verba reperta sunt , non quæ impedirent , sed quæ indicarent voluntatem.

XIX. Lex usum auctoritatem fundi jubet esse biennium : at utimur eodem jure in ædibus , quæ in lege non appellantur. Si via sit immunita , jubet , quâ velit , agere jumentum : potest hoc ex verbis intelligi , licere , si via sit in Brutiis immunita , agere , si velit , jumentum per M. Scauri Tusculanum. Actio est in auctorem præsentem his verbis , *Quandoquidem te in jure conspicio* : hac actione Appius ille Cæcus uti non posset , si tam severe homines verba confectarentur , ut rem , cujus causâ verba sunt , non considerarent. Testamento si recitatus heres esset pupillus Cornelius , isque jam annos xx haberet ; vobis interpretibus amitteret hereditatem.

§ 5. Veniunt in mentem mihi permulta ; vobis plura , certò scio : verum , ne nimium multa complectamur , atque ab eo , quod propositum est , longius aberret oratio : hoc ipsum interdictum , de quo agitur , consideremus. Intelligitis enim in eo ipso , si in verbis jus constituamus , omnem utilitatem nos hujus interdicti , dum versuti , & callidi volumus esse , amissuros. *Unde tu , aut familia , aut procurator tuus.*

Si me villicus tuus solus dejecisset : non familia dejecisset , ut opinor , sed aliquis de familia. Rectè igitur diceres te restituisse ? quippe. Quid enim facilius est , quàm probari iis , qui Latinè sciant , in uno servulo familiæ nomen non valere ? Si verò ne habeas quidem servum , præter eum , qui me dejecerit : clames videlicet , Si habeo familiam , a familia mea fateor te esse dejectum. Neque dubium est , quin , si ad rem judicandam verbo ducimur , non re , familiam intelligamus , quæ constet ex servis pluribus ; quin unus homo , familia non sit : verbum certè , hoc non modò postulat , sed etiam cogit. At verò ratio juris , interdictique vis , & prætorum voluntas , & hominum prudentium consilium & auctoritas , respuat hanc defensionem , & pro nihilo putet.

XX. Quid ergo ? isti homines Latinè non loquuntur ? immo verò tantum loquuntur , quantum est satis ad intelligendam voluntatem : quum sibi hoc proposuerint , ut , sive me tu dejeceris , sive tuorum quispiam , sive servorum , sive amicorum , ut servos non numero distinguant , sed appellent uno familiæ nomine.

57. De liberis autem quisquis est , procuratoris nomine appelletur : non quò omnes sint , aut appellentur procuratores , qui

negotii nostri aliquid gerant ; sed quia in hac re , cognitâ sententiâ interdicti , verba subtiliter exquiri omnia noluerunt. Non enim alia causa est æquitatis in uno servo , & in pluribus : non alia ratio juris in hoc genere duntaxat , utrùm me tuus procurator dejecerit is , qui legitimè procurator dicitur omnium rerum ejus , qui in Italiâ non sit , absitve reipublicæ causâ , quasi quidam pene dominus , hoc est , alieni juris vicarius ; an tuus colonus , aut vicinus , aut cliens , aut libertus , aut quivis , qui illam vim , dejectionemque tuo rogatu , aut tuo nomine fecerit.

§8. Quare , si ad eum restituendum , qui vi dejectus est , eandem vim habet æquitatis ratio ; eâ intellectâ , certè nihil ad rem pertinet , quæ verborum vis sit , ac nominum. Tam restitues , si tuus me libertus dejecerit , nulli tuo præpositus negotio , quàm si procurator dejecerit : non quò omnes sint procuratores , qui aliquid nostri negotii gerunt ; sed quòd in hac re quæri nihil attinet. Tam restitues , si unus servulus , quàm si familia dejecerit universa : non quò idem sit servulus unus , quod familia ; verùm quia non , quibus verbis quidque dicatur , quæritur , sed quæ res agatur. Etiam ut jam longiùs a verbo recedamus , ab æquitate ne tantulum quidem ; si tuus servus nullus fuerit , sed om-

nes alieni ac mercenarii : tamen & ipsi tuæ familiæ genere , & nomine continebuntur.

XXI. Perge porrò hoc idem interdictum sequi : *Hominibus coactis*. Neminem coëgeris ; ipsi convenerint suâ sponte : certè cogit is , qui congregat homines , & convocat : coacti sunt ii , qui ab aliquo sunt unum in locum congregati. Si non modò convocati non sunt , sed ne convenerunt quidem ; sed ii modò fuerunt , qui etiam antea , non , vis ut fieret , verùm colendi , aut pascendi causâ , esse in agro consueverant ; defendes , homines coactos non fuisse : & verbo quidem superabis , me ipso iudice ; re autem , ne consistes quidem ullo iudice. Vim enim multitudinis restitui voluerunt , non solùm convocatæ multitudinis : sed , quia plerumque , ubi multitudine opus est , homines cogi solent , ideo de coactis compositum interdictum est : quod , etiam si verbo differre videbitur , re tamen erit unum , & omnibus in causis idem valebit , in quibus perspicitur una , atque eadem causa æquitatis.

60. *Armatifve*. Quid dicemus ? armatos , si Latine loqui volumus , quos appellare verè possumus ? opinor eos , qui scutis telisque parati , ornatique sunt. Quid igitur ? si glebis , aut saxis , aut fustibus ali-

quem de fundo præcipitem egeris ; jussusque sis , quem hominibus armatis dejeceris , restituere ; restituisse te dices ? Verba si valent : si causæ non ratione , sed vocibus ponderantur : me auctore dicito : vinces profectò , non fuisse armatos eos , qui saxa jacerent , quæ de terra ipsi tollerent : non esse arma cæspites , neque glebas : non fuisse armatos eos , qui prætereuntes ramum defringerent arboris : arma esse suis nominibus , alia ad tegendum , alia ad nocendum : quæ qui non habuerint , eos inermes fuisse vinces.

61. Verùm si quidem erit armorum judicium ; tum ista dicito : juris judicium quum erit , & æquitatis ; cave in ista tam frigida , tam jejuna calumnia delitescas : non enim reperies quemquam judicem , aut recuperatorem , qui , tamquam si arma militis inspicienda sint , ita probeb armatum : sed perinde valebit , quasi ornatissimi fuerint , si reperientur ita parati fuisse , ut vim vitæ , aut corpori potuerint afferre.

XXII. Atque , ut magis intelligas , quàm verba nihil valeant : Si tū solus , aut quisvis unus cum scuto , cum gladio impetum in me fecisses , atque ego ita dejectus essem ; auderesne dicere , interdictum esse de armatis hominibus : hîc autem hominem armatum unum fuisse ? Non , opinor ,  
tam

tam impudens esses. Atqui vide, ne multò nunc sis impudentior : nam tum quidem omnes mortales implorare posses, quòd homines in tuo negotio Latine loqui obliviſcerentur : quòd inermes armati judicaretur : quòd, quum interdictum eſſet de pluribus, commiſſa res eſſet ab uno ; unus homo plures eſſe homines judicaretur.

63. Verùm in his cauſis non verba veniunt in judicium, ſed ea res, cujus cauſa verba hæc in interdictum conjeſta ſunt. Vim, quæ ad caput & ad vitam pertinet, reſtitui ſine ulla exceptione voluerunt. Ea fit plerumque per homines coactos, armatoſque : quæ ſi alio conſilio, eodem periculo facta ſit ; eodem jure eſſe voluerunt. Non enim major eſt injuria, ſi tua familia, quàm ſi tuus villicus : non, ſi tui ſervi, quàm ſi alieni, ac mercenarii : non, ſi tuus procurator, quàm ſi vicinus, aut libertus tuus : non, ſi coactis hominibus, quàm ſi voluntariis, aut etiam aſſiduis ac domeſticis : non, ſi armatis, quàm ſi inermibus, qui vim haberent armatorum ad nocendum : non, ſi pluribus, quàm ſi uno armato. Quibus enim rebus plerumque viſ fit, ejuſmodi hæ res appellantur interdicto : ſi per alias res eadem facta viſ eſt ; ea, tametsi verbis interdicti non concluditur, tamen ſententiâ juris atque auctoritate retinetur.

XXIII. Venio nunc ad illud tuum : *Non dejeci, si non sivi accedere.* Puto te ipsum , Piso , perspicere , quantò ista sit angustior , iniquiorque defensio , quàm si illà uterere : *Non fuerunt armati : cum fustibus & saxis fuerunt.* Si mehercule mihi , non copioso homini ad dicendum , optio detur , utrùm malim defendere , non esse dejectum eum , cui vi & armis ingredienti sit occursum ; an , armatos non fuisse eos , qui sine scutis , ac sine ferro fuerint : omnino ad probandum utramque rem videam infirmam , nugatoriamque esse : ad dicendum autem , in altera videar mihi aliquid reperire posse , non fuisse armatos eos , qui neque ferri quidquam , neque scutum ullum habuerint : hìc verò hæream , si mihi defendendum sit , eum qui pulsus , fugatusque sit , non esse dejectum.

65. Atque illud in tota defensione tua mihi maximè mirum videbatur , te dicere , jurisconsultorum auctoritati obtemperari non oportere. Quod ego , tametsi non nunc primùm , neque in hac causa solùm audio , tamen admodum mirabar , abs te quam ob rem diceretur : nam ceteri tum ad istam hortationem decurrunt , quum se in causa putant habere æquum & bonum , quod defendant : si contra verbis & litteris , & , ut dici solet , summo jure contenditur ; solent ejusmodi iniquitati , &



boni, & æqui nomen, dignitatemque opponere. Tum illud, quod dicitur, *Sive, nive*, irident: tum aucupia verborum, & litterarum tendiculas in invidiam vocant: tum vociferantur, ex æquo & bono, non ex callido, versutoque jure rem judicari oportere: scriptum sequi, calumniatoris esse: boni judicis, voluntatem scriptoris, auctoritatemque defendere.

66. In ista verò causa, quum tu sis is, qui te verbo, litterâque defendas: quum tuæ sint hæ partes, Unde dejectus es? an inde, quò prohibitus es accedere? ejectus es, non dejectus. Quum tua sit hæ oratio, Fateor, me homines coëgisse: fateor, armasse: fateor, tibi mortem esse minitatum: fateor, hoc interdicto prætoris vindicari, si voluntas & æquitas valeat: sed ego invenio in interdicto verbum unum, ubi delitescam: non dejeci te ex eo loco, quem in locum prohibui ne venires.

XXIV. In ista defensione accusas eos, qui consuluntur, quòd æquitatis censeant rationem, non verbi, haberi oportere. Et hoc loco Scævola dixisti causam apud centumviros non tenuisse: quem ego antea commemoravi, quòd idem faceret, quod tu nunc (tametsi ille in aliqua causa faciebat, tu in nulla facis) tamen probasse nemini quod defendis, quia verbis oppugnare æquitatem videbatur. Quum id mi-

ror, te hoc in hac re, alieno tempore, & contrà, quàm ista causa postulasset, defendisse: tum illud vulgò in judiciis, & nonnumquam ab ingeniosis hominibus defendi, mihi mirum videri solet, nec jurisconsultis concedi, nec jus civile in causis semper valere oportere.

68. Nam qui hoc disputant, si id dicunt; non rectè aliquid statuere eos, qui consulantur; non hoc debent dicere, juri civili, sed hominibus stultis, obtemperari non oportere: sin' illos rectè respondere concedunt, & aliter judicari dicunt oportere; malè judicari oportere dicunt: neque enim fieri potest, ut aliud judicari de jure, aliud responderi oporteat; nec ut quisquam juris numeretur peritus, qui id statuatur esse jus, quod non oporteat judicari.

69. At est aliquando contrà judicatum. Primum utrùm rectè, an perperam? si rectè; id fuit jus, quod judicatum est: sin' aliter; non dubium est, utrùm judices, an jurisconsulti vituperandi sint. Deinde si de jure vario quippiam judicatum est; non potius contra jurisconsultos statuunt, si aliter pronuntiatum est, ac Mucio placuit, quàm ex eorum auctoritate, si, ut Manilius statuebat, sic est judicatum. Etenim ipse Crassus non ita causam apud centumviros egit, ut contra

jurisconsultos diceret : sed ut hoc doceret , illud , quod Scævola defendebat , non esse juris ; & in eam rem non solum rationes afferret , sed etiam Q. Mucio , socero suo , multisque peritissimis hominibus auctoribus uteretur.

XXV. Nam qui jus civile contemnendum putat , is vincula revellit non modò judiciorum , sed etiam utilitatis , vitæque communis : qui autem interpretes juris vituperat ; si imperitos juris esse dicit ; de hominibus , non de jure civili detrahit : sin peritis non putat esse obtemperandum ; non homines lædit , sed leges ac jura labefactat. Quod vobis venire in mentem profectò necesse est ; nihil esse in civitate tam diligenter , quàm jus civile , retinendum : etenim , hoc sublato , nihil est , quare exploratum cuiquam possit esse , quid suum , aut quid alienum sit : nihil est , quod æquabile inter omnes , atque unum omnibus esse possit.

71. Itaque in ceteris controversiis atque judiciis , quum quæritur , aliquid factum , necne sit ; verum , an falsum proferatur : & fictus testis subornari solet , & imponi falsæ tabulæ : nonnumquam , honesto ac probabili nomine , bono viro , judici , error objici : improbo facultas dari , ut , quum sciens perperam judicarit , testamentum , aut tabulas secutus esse videatur. In

jure nihil est ejusmodi, Recuperatores : non tabulæ falsæ, non testis improbus : denique nimia ista, quæ dominatur in civitate, potentia, in hoc solo genere quiescit : quid agat, quomodo aggrediatur judicem, quâ denique digitum proferat, non habet.

72. Illud enim potest dici judici ab aliquo non tam verecundo homine, quam gratioſo : Judica hoc factum esse, aut numquam esse factum, vel cogitatum : crede huic testi : has comproba tabulas. Hoc non potest : Cui filius agnatus sit, ejus testamentum non esse ruptum, judica : quod mulier sine tutore auctore promiserit, deberi : non est aditus ad hujusmodi res, neque potentiæ cujusquam, neque gratiæ : denique, quod majus hoc, sanctiusque videatur, ne pretio quidem corrumpi judex in ejusmodi causa potest. Iste vester testis, qui ausus est dicere, *Fecisse videri eum*, de quo ne cujus rei argueretur quidem, scire potuisset, ipse numquam auderet judicare, deberi viro dotem, quam mulier nullo auctore dixisset. O rem præclaram, vobisque ob hoc retinendam, Recuperatores !

XXVI. Quod enim est jus civile ? quod neque inflecti gratiâ, neque perfringi potentiâ, neque adulterari pecuniâ possit : quod si non modò oppressum, sed etiam

desertum , aut negligentius adservatum erit ; nihil est , quod quisquam sese habere certum , aut a patre accepturum , aut relicturum liberis arbitretur.

74. Quid enim refert , ædes , aut fundum relictum a patre , aut aliquâ ratione habere bene partum , si incertum sit , quæ quum omnia tua jure Mancipii sint , ea possisne retinere ? si parum sit communitum jus ? si civili ac publicâ lege contra alicujus gratiam teneri non potest ? Quid , inquam , prodest , fundum habere , si , quæ decentissimè descripta a majoribus jura finium , possessionum , aquarum , itinerumque sunt , hæc perturbari aliquâ ratione , commutarique possunt ? Mihi credite : major hereditas venit , unicuique vestrum in iisdem bonis , a jure , & a legibus , quàm ab iis , a quibus illa ipsa bona relicta sunt : nam , ut perveniat ad me fundus , testamento alicujus fieri potest ; ut retineam quod meum factum sit , sine jure civili non potest.

75. Fundus a patre relinqui potest : at usucapio fundi , hoc est , finis sollicitudinis , ac periculi litium , non a patre relinquitur , sed a legibus. Aquæ ductus , haustus , iter , actus , a patre : sed rata auctoritas harum rerum omnium a jure civili sumitur. Quapropter non minùs diligenter ea , quæ a majoribus accepistis , publica

patrimonia juris , quàm privatæ rei vestræ retinere debetis : non solum quòd hæc jure civili septa sunt ; sed etiam quòd patrimonium unius incommodo dimittitur ; jus amitti non potest sine magno incommodo civitatis :

XXVII. In hac ipsa causa , Recuperatores , si hoc nos non obtinebimus , vi , armatis hominibus , dejectum esse eum , quem vi , armatis hominibus , pulsum , fugatumque esse constet : Cæcina rem non amittet , quam ipsam animo forti , si tempus ita ferret , amitteret : in possessionem in præsentia non restituetur : nihil amplius : Populi Romani causa , civitatis jus , bona , fortunæ , possessionesque in dubium , incertumque revocabuntur : vestrâ auctoritate hoc constituetur , hoc præscribetur : quicum tu posthac de possessione contendes , eum , si ingressum modò dejeceris , in prædium restituas oportebit : sin autem ingredienti cum armata multitudine obvius fueris , & ita venientem repuleris , fugaris , averteris , non restitues : tum statueritis vim in cæde solum , non etiam in animo : nisi cruor apareat , vim non esse factam : in jure parum delectum esse , qui prohibitus sit : nisi ex eo loco , ubi vestigium impresserit , dejici neminem posse. Juris igitur retineri sententiam , & æquitatem plurimum valere oportere ; an verbo ac

litterâ jus omne torqueri ; vos statuite ,  
Recuperatores , utrum utilius esse videatur.

77. Hoc loco percommode accidit , quod  
non adest is , qui paulò antè affuit , &  
adesse nobis frequenter in hac causa solet ,  
vir ornatissimus , C. Aquilius : nam ipso  
præsente , de virtute ejus & prudentiâ timi-  
dius dicerem , quod & ipse pudore quodam  
afficeretur ex sua laude , & me similis ratio  
pudoris a præsents laude tardaret : cujus  
auctoritati dictum est ab illa causa concedi  
nimium non oportere. Non vereor , de tali  
viro ne plus dicam , quàm vos aut sentiat ,  
aut apud vos commemorari velitis.

78. Quapropter hoc dicam , numquam  
ejus auctoritatem nimium valere , cujus pru-  
dentiam populus Romanus in cavendo , non  
in decipiendo perspexerit : qui juris civilis  
rationem numquam ab æquitate sejunxerit :  
qui tot annos ingenium , laborem , fidem  
suam populo Romano promptam , exposi-  
tamque præbuerit : qui ita justus & bonus vir  
est , ut naturâ , non disciplinâ consultus esse  
videatur : ita peritus ac prudens , ut ex jure  
civili , non scientia solum quædam , verum  
etiam bonitas nata videatur : cujus tantum  
est ingenium , ita prompta fides , ut , quid-  
quid inde haurias , purum , liquidumque te  
haurire sentias.

79. Quare permagnam initis a nobis  
gratiam , quum eum auctorem nostræ de-

fensionis esse dicitis. Illud autem miror, cur vos aliquid contra me sentire dicatis, quum eum auctorem vos pro me appelletis; nostrum nominetis. Verumtamen quid ait iste noster auctor? Omnibus, quidquid verbis actum, pronuntiatumque sit, convenit.

XXVIII. Ego ex isto genere consultorum non nominem, ut opinor, istum ipsum, quo vos auctore rem istam agere, & defensionem causæ constituere vos dicitis: qui quum istam disputationem mecum ingressus esset, non posse probari quemquam esse dejectum, nisi ex eo loco, in quo fuisset; rem & sententiam interdicti mecum facere fatebatur; verbo me excludi dicebat: a verbo autem posse recedi non arbitrabatur.

80. Quum exemplis uterer multis, etiam illâ materiâ æquitatis, ab verbo & ab scripto, plurimis sæpe in rebus, jus, & æquibonique rationem esse sejunctam; semperque id valuisse plurimum, quod in se auctoritatis habuisset, æquitatisque plurimum: consolatus est me, & ostendit, in hac ipsa causa nihil esse, quod laborarem: nam verba ipsa sponsionis facere mecum, si vellem diligenter attendere. Quonam, inquam, modo? Quia certè, inquit, dejectus est Cæcina vi, hominibus armatis, aliquo ex loco: si non ex eo



loco, quem in locum venire voluit; at ex eo certè, unde fugit. Quid tum? Prætor, inquit, interdixit, ut, unde dejectus esset, eò restitueretur, hoc est, quicumque is locus esset, unde dejectus esset. Æbutius autem, qui fatetur, aliquo ex loco dejectum esse Cæcinam, is, quo modo se restituisse dixit, necesse est malè fecerit sponsionem.

81. Quid est, Piso? placet tibi pugnare verbis? placet causam juris, & æquitatis, & non nostræ possessionis, sed omnino possessionum omnium, constituere in verbo? Ego, quod mihi videretur, quod a majoribus factitatum, quod horum auctoritate, quibus judicandum est, dignum esset, ostendi, id verum, id æquum, id utile omnibus esse, spectari, quo consilio, & quâ sententiâ, non, quibus quidque verbis esset actum. Tu me ad verbum vocas? non antè venio, quàm recusaro: nego oportere, nego obtineri posse, nego ullam rem esse, quæ aut comprehendi satis, aut caveri, aut excipi possit, si aut præterito aliquo verbo, aut ambiguè posito, sententiâ, & re cognitâ, non id, quod intelligitur, sed id, quod dicitur, valebit.

XXIX. Quoniam satis recusavi: venio jam quò vocas. Quæro abs te, simne dejectus, non de Fulciniano fundo: neque enim prætor, si ex eo fundo essem de-

jectus, ita me restitui jussit; sed eò, unde dejectus essem: sum ex proximo vicini fundo dejectus, quà adibam ad istum fundum: sum de via: sum certè alicunde, sive de privato, sive de publico: eò restitui sum jussus: restituisse te dixisti: nego me ex decreto prætoris restitutum esse. Quid ad hæc dicimus? aut tuo, quemadmodum dicitur, gladio, aut nostro, defensio tua conficiatur, necesse est.

83. Si ad interdicti sententiam confugis, & de quo fundo actum sit tum, quum Æbutius restituere jubebatur, id quærendum esse dicis, neque æquitatem rei, verbi laqueo capi putas oportere: in meis castris, præsidiisque versaris: mea, mea est ista defensio: ego hæc vociferor: ego omnes homines, deosque testor, quum majores vim armatam nullâ juris defensione texerint, non vestigium ejus, qui dejectus sit, sed factum illius, qui dejecerit, in judicium venire: dejectum esse, qui fugatus sit: vim esse factam, cui periculum mortis sit injectum.

84. Istum locum fugis, & reformidas? & me ex hoc, ut ita dicam, campo æquitatis ad istas verborum angustias, & ad omnes litterarum angulos revocas? in iis ipsis intercludere insidiis, quas mihi conaris opponere. Non dejeci, sed ejeci. Peracutum hoc tibi videtur: hic est mæcro

defensionis tuæ. In eum ipsum causa tua incurrat, necesse est. Ego enim tibi refero: Si non sum ex eo loco dejectus, quò prohibitus sum accedere, at ex eo sum dejectus, quò accessi, unde fugi. Si prætor non distinxit locum, quò me restitui juberet, & restitui jussit: non sum ex decreto restitutus.

85. Velim, Recuperatores, hoc totum, si vobis versutius, quàm mea consuetudo defendendi fert, videbitur, sic existimetis: primùm alium, non me, excogitasse: deinde hujus rationis non modò non inventorem, sed ne probatorem quidem esse me: idque me non ad meam defensionem attulisse, sed illorum defensioni retulisse: me posse pro meo jure dicere, neque in hac re, quam ego protuli, quæri oportere, quibus verbis prætor interdixit, sed de quo loco sit actum, quum interdixit: neque in vi armatorum spectari oportere, in quo loco sit facta vis, verùm sitne facta: te verò nullo modo posse defendere, in qua re tu velis, verba spectari oportere; in qua re nolis, non oportere.

XXX. Verumtamen ecquid mihi respondetur ad illud, quod antea dixi, non solum re & sententiâ, sed verbis quoque hoc interdictum ita esse compositum, ut nihil commutandum videretur? Attendite diligenter, quæso, Recuperatores. Et

enim vestri ingenii, non meam, sed majorum prudentiam cognoscere : non enim sum id dicturus, quod ego invenerim, sed quod illos non fugerit. Quum de vi interdicatur, duo genera causarum esse intelligebant, ad quæ interdictum pertineret : unum, si qui ex loco, in quo esset ; alterum, si ab eo loco, quò veniret, vi dejectus esset : & horum utrumque, neque præterea quidquam, potest accidere, Recuperatores.

87. Id adeo, si placet, considerate. Si qui meam familiam de meo fundo dejecerit, ex eo me loco dejecerit : si qui mihi præstò fuerit cum armatis hominibus extra meum fundum, & me introire prohibuerit ; non ex eo, sed ab eo loco me dejecerit. Ad hæc duo genera rerum, unum verbum, quod satis declararet utraque res, invenerunt ; ut, sive ex fundo, sive a fundo dejectus essem, uno, atque eodem interdicto restituerer, *Unde tu.* Hoc verbum, *Unde*, utrumque declarat ; & ex quo loco, & a quo loco. Unde dejectus est Cinna ? ex urbe. Unde dejecisti ? ab urbe. Unde dejecti Galli ? a Capitolio. Unde qui cum Graccho fuerunt ? ex Capitolio.

88. Videtis igitur, hoc uno verbo significari res duas, & ex quo, & a quo loco. Quum autem eò restitui jubet, ita jubet :

ut, si Galli a majoribus nostris postularent, ut eò restituerentur, unde dejecti essent, & aliquâ vi hoc assequi possent; non, opinor, eos in cuniculum, quâ aggressi erant, sed in Capitolium restitui oporteret: hoc enim intelligitur. *Unde tu dejecisti*, sive ex quo loco, sive a quo loco, *eò restituas*. Hoc jam simplex est, in eum locum restituas: sive ex hoc loco dejecisti, restitue in hunc locum: sive ab hoc loco, restitue in eum locum, non ex quo, sed a quo dejectus est. Ut si qui ex alto, quum ad patriam accessisset, tempestate subitò reiectus optaret, ut, quum esset a patria dejectus, eò restitueretur; hoc, opinor, optaret, ut, a quo loco depulsus esset, in eum se fortuna restitueret, non in salum, sed in ipsam urbem, quam petebat: sic, quoniam vim verborum necessariò similitudine rerum aucupamur, qui postulat, ut, a quo loco dejectus est, hoc est, unde dejectus est, eò restituatur, hoc postulat, ut in eum ipsum locum restituatur.

XXXI. Quum verba nos eò ducunt, tum res ipsa hoc sentire, atque intelligere cogit. Etenim, Piso (redeo nunc ad illa principia defensionis meæ) si quis te ex ædibus tuis vi, hominibus armatis dejecerit, quid ageres? opinor, hoc interdicto, quo nos usi sumus, persequerere.

Quid? si quis jam de foro redeuntem; armatis hominibus domum tuam te introire prohibuerit, quid ageres? uterere eodem interdicto. Quum igitur prætor interdixerit, unde dejectus es, ut eò restituaris; tu hoc idem, quod ego dico, & quod perspicuum est, interpretabere: quum illud verbum, *unde*, in utramque rem valeat, eoque tu restitui sis iussus: tam te in ædes tuas restitui oportere, si e vestibulo, quàm si ex interiore ædium parte dejectus sis.

90. Ut verò jam, Recuperatores, nulla dubitatio sit, sive rem, sive verba spectare vultis, quin secundum nos judicetis; exoritur hic jam, obrutis rebus omnibus & perditis, illa defensio, eum dejici posse, qui tum possideat: qui non possideat, nullo modo posse: itaque, si ego sim a tuis ædibus dejectus, restitui non oportere; si ipse sis, oportere. Numera, quàm multa in ista defensione falsa sint, Piso: ac primùm illud attende, te jam ex illa ratione esse depulsum, quòd negabas quemquam dejici posse, nisi qui in eo loco fuerit: nunc, qui possideat, enim, etiam si non fuerit in eo loco, dejici posse concedis.

91. Cur ergo aut in illud quotidianum interdictum, *Unde ille me vi deiecit*, additur, *quum ego possiderem*; si dejici ne-

mo potest, qui non possidet: aut in hoc interdictum, *De hominibus armatis*, non additur, si oportet quæri, possederit, necne? Negas dejici, nisi qui possideat. Ostendo, si sine armatis coactisve hominibus dejectus quisquam sit, eum, qui fateatur se dejecisse, vincere sponsione, si ostendat, eum non possedisse. Negas dejici, nisi qui possideat. Ostendo ex hoc interdicto, *De armatis hominibus*, qui possit ostendere non possedisse eum, qui dejectus sit, condemnari tamen sponsionis necesse esse, si fateatur esse dejectum.

XXXII. Dupliciter homines dejiciuntur: aut sine coactis, armatisve hominibus, aut per ejusmodi rationem, & vim. Ad duas dissimiles res duo dejecta interdicta sunt. In illa vi quotidiana non satis est posse docere se dejectum, nisi ostendere possit, quum possideret, tum dejectum: ne id quidem satis est, nisi docet ita se possedisse, ut nec vi, nec clam, nec precario possederit. Itaque is, qui se restituisse dixit, magnâ voce sæpe confiteri solet, se vi dejecisse: verum illud addit, Non possidebat: vel etiam, quum hoc ipsum concessit, vincit tamen sponsione, si planum facit, ab se illum aut vi, aut clam, aut precario possedisse.

93. Videtisne, quot defensionibus eum, qui sine armis ac multitudine vim fecerit,

uti posse majores voluerunt? hunc verò , qui ab jure , officio , bonis moribus , ad ferrum , ad arma , ad cædem confugerit , nudum in causa , destitutumque videtis : ut , qui armatus de possessione contendisset , inermis planè de sponsione certaret. Ecquid igitur interest , Piso , inter hæc interdicta ? ecquid interest , utrùm hoc additum , Quum A. Cæcina possederit , necne ? ecquid te ratio juris , ecquid interdictorum dissimilitudo , ecquid auctoritas majorum commovet ? Si esset additum ; de eo quæri oporteret : additum non est ; tamen oportebit ?

94. Atque ego in hoc Cæcinam non defendo : possedit enim Cæcina , Recuperatores : & id , tametsi extra causam est , percurram tamen brevi , ut non minùs hominem ipsum , quàm jus commune defensum velitis. Cæsenniam possedisse per colonum non negas ; quia colonus habuit conductum de Cæsennia fundum ; quum idem ex eadem conductione fuerit in fundo. Dubium est , quin , si Cæsennia tum possidebat , quum erat colonus in fundo , post ejus mortem heres eodem jure possederit ? Deinde ipse Cæcina , quum circuiret prædia , venit in istum fundum : rationes a colono accepit : sunt in eam rem testimonia. Postea cur , Æbuti , de isto potius fundo , quàm de alio , si quem ha-



bes, Cæcinæ denuntiabas, si Cæcina non possidebat? Ipse porrò Cæcina cur se moribus deduci volebat; idque tibi de amicorum, etiam de ipsius C. Aquilii sententia responderat? At enim Sulla legem tulit.

XXXIII. Ut nihil de illo tempore, nihil de calamitate reipublicæ querar, hoc tibi respondeo: adscripsisse eundem Sullam in eandem legem, *Si quid jus non esset rogarier, ejus eâ lege nihilum rogatum.* Quid est, quod jus non sit? quod populus jubere, aut vetare non possit? Ut ne longius abeam, declarat ista adscriptio esse aliquid: nam, nisi esset, hoc in omnibus legibus non adscriberetur.

96. Sed quæro abs te, putescne, si populus jusserit, me, tuum, aut item, te; meum servum esse; id jussum, ratum, atque firmum futurum? Perspicias hoc nihil esse, & fateris, quæ inter... Primum illud concedis, non, quidquid populus jusserit, ratum esse oportere: deinde nihil rationis affers, quamobrem, si libertas adimi nullo modo possit, civitas possit: nam & eodem modo de utraque re traditum nobis est; &, si semel civitas adimi potest, retineri libertas non potest. Quî enim potest jure Quiritium liber esse is, qui in numero Quiritium non est?

97. Atque ego hanc adolescentulus cau-

ſam quum agerem contra hominem diſer-  
tiſſimum noſtræ civitatis Cottam , proba-  
vi. Quum Arretinæ mulieris libertatem de-  
fenderem , & Cotta decemviris religio-  
nem injeciſſet , non poſſe ſacramentum  
noſtrum juſtum judicari , quòd Arretini  
adempta civitas eſſet , & ego vehemen-  
tiùs contendiſſem , civitatem adimi non  
potuiſſe : decemviri primâ actione non  
judicaverunt : poſtea , re quæſitâ & de-  
liberatâ , ſacramentum noſtrum juſtum ju-  
dicaverunt. Atque hoc , & contrâ dicent  
Cottâ , & Sullâ vivo , judicatum eſt. Jam  
verò in ceteris , ut omnes , qui in eader  
cauſa ſunt , & lege agant , & ſuum ju-  
perſequantur , & omnes jure civili , ſin-  
cujusquam aut magiſtratûs , aut judicis  
aut periti hominis , aut imperiti dubitatio-  
ne , utantur , quid ego commemorem  
dubium nemini veſtrûm eſt. Certè quæ  
hoc ſolere me non præterit ( ut ex me ea  
quæ tibi in mentem non veniunt , audias  
quemadmodum , ſi civitas adimi non poſ-  
ſit , in colonias Latinas ſæpe noſtri cive  
profeſti ſint. Aut ſuâ voluntate , aut legi  
multâ profeſti ſunt : quam multam ſi ſuf-  
ferre voluiſſent , tum manere in civitat  
potuiſſent.

XXXIV. Quid ? quem pater patratu  
dedit , aut ſuus pater , populûſve ven-  
didit , quo is jure amittit civitatem ? U

religione civitas solvatur, civis Romanus traditur: qui quum est acceptus, est eorum, quibus est deditus: si non accipiunt, ut Mancinum Numantini, retinet integram causam, & jus civitatis. Si pater vendidit eum, quem in suam potestatem suscepit, ex potestate dimittit.

99. Jam populus quum eum vendidit, qui miles factus non est, non adimit ei libertatem; sed judicat, non esse eum liberum, qui, ut liber sit, adire periculum noluit: quum autem incensum vendit, hoc judicat; quum is, qui in servitute justa fuerit, censu liberetur, eum, qui, quum liber esset, censeretur noluerit, ipsum sibi libertatem abjudicasse. Quod si maxime iis rebus adimi libertas, aut civitas potest, non intelligunt qui hæc commemorant, si per has rationes adimi majores posse voluerunt; alio modo noluisse?

100. Nam, ut hæc ex jure civili protulerunt, sic afferant velim, quibus lege aut Romana civitas, aut libertas erepta sit. Nam quod ad exilium attinet, perspicue intelligi potest, quale sit. Exilium enim, non supplicium est, sed perfugium, portusque supplicii: nam qui volunt poenam aliquam subterfugere, aut calamitatem, eo solum vertunt; hoc est, sedem ac locum mutant. Itaque nulla in lege nostra reperietur, ut apud ceteras civitates, ma-

lesicium ullum exsilio esse multatum : sed quum homines vincula , necesse , ignominiasque vitant , quæ sunt legibus constitutæ ; confugiunt , quasi ad aram , in exsiliū : qui si in civitate legis vim subire vellent ; non prius civitatem , quàm vitam amitterent : quia nolunt ; non adimitur his civitas , sed ab his relinquitur , atque deponitur. Nam , quum ex nostro jure duarum civitatum nemo esse possit , tum amittitur hæc civitas denique , quum is , qui profugit , receptus est in exsiliū , hoc est , in aliam civitatem.

XXXV. Non me præterit , Recuperatores , tametsi de hoc jure multa prætereo , tamen me longius prolapsum esse , quàm ratio vestri judicii postularit. Verum id feci , non quòd vos in hac causa hanc defensionem desiderare arbitrarer , sed ut omnes intelligerent , nec ademptam cuiquam civitatem esse , nec adimi posse. Hoc quum eos scire volui , quibus Sulla voluit injuriam facere , tum omnes ceteros novos , veteresque cives : neque enim ratio asferri potest , cur , si cuiquam novo civi potuerit adimi civitas , non omnibus patriciis , omnibus antiquissimis civibus possit.

102. Nam ad hanc quidem causam nihil hoc pertinuisse , primum ex eo intelligi potest , quòd vos ea de re judicare non debetis : deinde quòd Sulla ipse ita tulit de

civitate, ut non sustulerit horum nexa, atque hereditates: jubet enim eodem jure esse, quo fuerint Ariminenses: quos quis ignorat duodecim coloniarum fuisse, & a populo Romano hereditates capere potuisse?

103. Quòd si adimi civitas A. Cæcinæ lege potuisset, magis illam rationem tamen omnes boni quæreremus, quemadmodum spectatissimum, prudentissimumque hominem, summo consilio, summâ virtute, summâ auctoritate domesticâ præditum, levatum injuriâ, civem retinere possemus, quàm uti nunc, quum de jure civitatis nihil potuerit deperdere, quisquam exsistat, nisi tui, Sexte, similis & stultitiâ, & impudentiâ, qui huic civitatem ademptam esse dicat. Qui quoniam, Recuperatores, suum jus non deseruit, neque quidquam illius audaciæ petulantiaque concessit; derelinquo jam communem causam, populi que Romani jus in vestra fide ac religione depono.

XXXVI. Is homo ita se probatum vobis, vestrique similibus semper voluit, ut id non minùs in hac causa laborarit: nec contenderit aliud, quàm ne jus suum dissolutè relinquere videretur: nec minùs vereretur, ne contemnere Æbutium, quàm ne de eo contemptus existimaretur. Quapropter si quid extra judicium est, quod homini tribuendum sit: habetis hominem singulari

456 *ORAT. PRO A. CÆC.*

pudore, virtute cognitâ, & spectatâ fide; amplissimum, Etruriæ nomine totius, in utraque fortuna cognitum multis signis & virtutis, & humanitatis. Si quid in contraria parte in homine offendendum sit: habetis eum, ut nihil dicam amplius, qui se homines coëgisse fateatur. Sin, hominibus remotis, de causa quæritis: quum iudicium de vi sit: is qui arguitur, vim se hominibus armatis fecisse fateatur: verbo se, non æquitate defendere conetur: id quoque ei verbum ipsum ereptum esse videatis: auctoritatem sapientissimorum hominum facere nobiscum: in iudicium non venire, utrùm Cæcina possederit, necne: tamen doceri possedisse: multò etiam minùs quæri, A. Cæcinæ fundus sit, necne: me tamen idipsum docuisse, fundum esse Cæcinæ: quum hæc ita sint, statuite quid vos tempora reipublicæ de armatis hominibus, quid illius confessio de vi, quid nostra decisio de æquitate, quid ratio interdicti de jure admoneant, ut judicetis.



PRO



P R O  
LEGE MANILIA,  
A D P O P U L U M.

ORATIO DECIMA TERTIA.

*M. Æmilio Lepido, L. Volcatio Tullo  
coff. C. Manilius tribunus plebis le-  
gem promulgavit, ut Pompeio, qui  
tum in Cilicia belli maritimi reliquias  
persequebatur, bellum Mithridati-  
cum, quod Lucullus jam annis sep-  
tem gesserat, extra ordinem commit-  
teretur, cum omni apparatu belli  
piratici, & copiis omnibus, quæ  
sub Lucullo meruerant. Hanc legem  
Q. Catulus & Q. Hortensius de more  
dissuasunt; Cicero prætor suasit  
hac oratione, quâ bellum Mithrida-  
ticum, & genere necessarium, & ma-  
gnitudine periculosum, Cn. Pom-  
Tomus IV. V.*

*peio , in quo summa esset scientia rei militaris , virtus , auctoritas , & felicitas , transmittendum esse contendit. Anno urbis 687. Cicero- nis 41.*

I. **Q**UAMQUAM mihi semper frequens conspectus vester multò jucundissimus ; hic autem locus , ad agendum amplissimus , ad dicendum ornatissimus est visus , Qui- rites : tamen hoc aditu laudis , qui sem- per optimo cuique maximè patuit , non mea me voluntas , sed meæ vitæ rationes ab ineunte ætate susceptæ , prohibuerunt. Nam , quum antea per ætatem nondum hujus auctoritatem loci attingere auderem ; statueremque , nihil huc , nisi perfectum ingenio , elaboratum industriâ , afferri oportere : omne meum tempus amicorum tem- poribus transmittendum putavi.

2. Ita neque hic locus vacuus umquam fuit ab iis , qui vestram causam defende- rent ; & meus labor in privatorum peri- culis castè integrèque versatus , ex vestro judicio fructum est amplissimum consecu- tus. Nam quum propter dilationem co- mitiorum ter prætor primus centuriis cunc- tis renuntiatus sum , facilè intellexi , Qui- rites , & quid de me judicaretis , & quic



aliis præscriberetis. Nunc quum & auctoritatis in me tantum sit, quantum vos honoribus mandandis esse voluistis; & ad agendum facultatis tantum, quantum homini vigilanti ex forensi usu propè quotidiana dicendi exercitatio potuit afferre: certè, & si quid auctoritatis in me est, eâ apud eos utar, qui eam mihi dederunt; & si quid etiam dicendo consequi possum, his ostendam potissimum, qui ei quoque rei fructum suo judicio tribuendum esse censuerunt.

3. Atque illud in primis mihi lætandum jure esse video, quòd in hac insolita mihi ex hoc loco ratione dicendi, causa talis oblata est, in qua oratio deesse nemini potest. Dicendum est enim de Cn. Pompeii singulari eximiaque virtute; hujus autem orationis difficilius est exitum, quàm principium invenire: ita mihi non tam copia, quàm modus in dicendo quærendus est.

II. Atque ut inde oratio mea proficiatur, unde hæc omnis causa ducitur: bellum grave & periculosum vestris vestigalibus atque fociis, a duobus potentissimis regibus infertur, Mithridate, & Tigraue: quorum alter relictus, alter lacessitus, occasionem sibi ad occupandam Asiam oblatam esse arbitratur. Equitibus Romanis, honestissimis viris, afferuntur ex Asia quo-

tidie litteræ , quorum magnæ res aguntur , in vestris vectigalibus exercendis occupatæ : qui ad me pro necessitudine , quæ mihi est cum illo ordine , causam reipublicæ , periculaque rerum suarum detulerunt :

5. Bithyniæ , quæ nunc vestra provincia est , vicos exustos esse complures : regnum Ariobarzanis , quod finitimum est vestris vectigalibus , totum esse in hostium potestate : Lucullum , magnis rebus gestis , ab eo bello discedere : huic qui successerit , non satis esse paratum ad tantum bellum administrandum : unum ab omnibus sociis & civibus ad id bellum imperatorem deposci , atque expeti : eundem hunc unum ab hostibus metui , prætereā neminem.

6. Causa quæ sit , videtis : nunc , quid agendum sit , considerate. Primum mihi videtur de genere belli , deinde de magnitudine , tum de imperatore deligendum esse dicendum. Genus est ejus belli , quod maximè vestros animos excitare , atque inflammare debet : in quo agitur populi Romani gloria , quæ vobis a majoribus quum magna in rebus omnibus , tum summa in re militari tradita est : agitur salus sociorum , atque amicorum , pro qua multa majores vestri magna & gravia bella gesserunt : aguntur certissima populi Ro-

*PRO LEGE MANILIA.* 461

mani vestigalia, & maxima; quibus amissis, & pacis ornamenta, & subsidia belli frustra requiretis: aguntur bona multorum civium, quibus est a vobis, & ipsorum, & reipublicæ causâ consulendum.

III. Et quoniam semper appetentes gloriæ præter ceteras gentes, atque avidi laudis fuistis, delenda vobis est illa macula, Mithridatico bello superiore suscepta; quæ penitus jam infedit, atque inveteravit in populi Romani nomine: quod is, qui uno die, totâ Asiâ, tot in civitatibus, uno nuntio, atque una litterarum significatione cives Romanos necandos trucidandosque denotavit, non modò adhuc pœnam nullam, suo dignam scelere suscepit, sed ab illo tempore annum jam tertium & vicesimum regnat: & ita regnat, ut se non Ponto, neque Cappadociæ latebris occultare velit, sed emergere e patrio regno, atque in vestris vestigalibus, hoc est, in Asiæ luce versari.

8. Etenim adhuc ita vestri cum illo rege contenderunt imperatores, ut ab illo insignia victoriæ, non victoriam reportarent. Triumphavit L. Sulla, triumphavit L. Murena de Mithridate, duo fortissimi viri, & summi imperatores: sed ita triumpharunt, ut ille pulsus superatusque regnaret. Verumtamen illis imperatoribus laus est tribuenda, quod egerunt: venia danda,

quod reliquerunt : propterea quòd ab eo bello Sullam in Italiam respublica , Murenam Sulla revocavit. :

IV. Mithridates autem omne reliquum tempus , non ad oblivionem veteris belli , sed ad comparisonem novi contulit : qui posteaquam maximas ædificasset ornassetque classes ; exercitusque permagnos , quibuscumque ex gentibus potuisset , comparasset , & se Bosporanis , finitimis suis , bellum inferre simulasset : usque in Hispaniam legatos Ecbatanis misit ad eos duces , quibuscum tum bellum gerebamus : ut , quum duobus in locis disjunctissimis , maximèque diversis , uno consilio , a binis hostium copiis bellum terrâ marique gereretur , vos ancipiti contentione districti , de imperio dimicaretis.

10. Sed tamen alterius partis periculum , Sertorianæ , atque Hispaniensis , quæ multò plus firmamenti ac roboris habebat , Cn. Pompeii divino consilio ac singulari virtute depulsum est : in altera parte ita res a L. Lucullo , summo viro , est administrata , ut initia illa gestarum rerum magna atque præclara , non felicitati ejus , sed virtuti ; hæc autem extrema , quæ nuper acciderunt , non culpæ , sed fortunæ tribuenda esse videantur. Sed de Lucullo dicam alio loco , & ita dicam , Quirites , ut neque vera laus ejus detracta oratione

nostrâ , neque falsa afficta esse videatur. De vestri imperii dignitate , atque gloriâ , quoniam is est exorsus orationis meæ , videte , quem vobis animum suscipiendum putetis.

V. Majores vestri sæpe , mercatoribus ac naviculatoribus injuriosius tractatis , bella gesserunt : vos tot civium Romanorum milibus , uno nuntio , atque uno tempore necatis , quo tandem animo esse debetis ? Legati quod erant appellati superbius , Corinthum patres vestri , totius Græciæ lumen , extinctum esse voluerunt : vos eum regem inultum esse patiimini , qui legatum populi Romani , consularem , vinculis ac verberibus , atque omni supplicio excruciatum necavit ? Illi libertatem civium Romanorum imminutam non tulerunt : vos vitam ereptam negligetis ? Jus legationis verbo violatum illi persecuti sunt : vos legatum populi Romani , omni supplicio interfectum , inultum relinquetis ? Videte , ne , ut illis pulcherrimum fuit , tantam vobis imperii gloriam relinquere ; sic vobis turpissimum sit , id , quod accepistis , tueri & conservare non posse.

12. Quid , quod salus sociorum summum in periculum ac discrimen vocatur ? Regno expulsus est Ariobarzanes , rex , socius populi Romani atque amicus ; imminent duo reges toti Asiæ , non solum vobis inimi-

cissimi , sed etiam vestris sociis atque amicis : civitates autem omnes , cuncta Asia atque Græcia vestrum auxilium expectare , propter periculi magnitudinem , coguntur : imperatorem a vobis certum deponere , quum præsertim vos alium miseritis , neque audent , neque id se facere summo sine periculo posse arbitrantur.

13. Vident & sentiunt hoc idem , quod vos , unum virum esse , in quo summa sint omnia , & eum propè esse ( quò etiam carent ægrius ) cujus adventu ipso atque nomine , tametsi ille ad maritimum bellum venerit , tamen impetus hostium repressos esse intelligunt ac retardatos. Hi vos , quoniam liberè loqui non licet , tacitè rogant , ut se quoque , sicut ceterarum provinciarum socios , dignos esse existimetis , quorum salutem tali viro commendetis. Atque hoc etiam magis , quàm ceteros ; quòd ejusmodi in provinciam homines cum imperio mittimus , ut , etiam si ab hoste defendant , tamen ipsorum adventus in urbes sociorum , non multum ab hostili expugnatione differant. Hunc audiebant antea , nunc præsentem vident , tantâ temperantiâ , tantâ mansuetudine , tantâ humanitate , ut ii beatissimi esse videantur , apud quos ille diutissime commoratur.

VI. Quare , si propter socios , nullâ ipsi injuriâ lacessiti , majores vestri cum

*PRO LEGE MANILIA.* 465

Antiocho , cum Philippo , cum Ætolis , cum Pœnis bella gesserunt : quanto vos studio convenit , injuriis provocatos , sociorum salutem unà cum imperii vestri dignitate defendere , præsertim quum de vestris maximis vectigalibus agatur ? Nam ceterarum provinciarum vectigalia , Quirites , tanta sunt , ut iis ad ipsas provincias tutandas vix contenti esse possimus : Asia verò tam opima est & fertilis , ut & ubertate agrorum , & varietate fructuum , & magnitudine pastionis , & multitudine earum rerum , quæ exportantur , facile omnibus terris antecellat. Itaque hæc vobis provincia , Quirites , si ad belli utilitatem , & pacis dignitatem retinere vultis , non modò a calamitate , sed etiam a metu calamitatis est defendenda.

15. Nam ceteris in rebus , quum venit calamitas , tum detrimentum accipitur : at in vectigalibus non solùm adventus mali , sed etiam metus ipse affert calamitatem : nam quum hostium copiarum non longè absunt , etiam si irruptio facta nulla sit , tamen pecora relinquuntur , agricultura deseritur , mercatorum navigatio conquiescit : ita neque ex portu , neque ex decumis , neque ex scriptura vectigal conservari potest. Quare sæpe totius anni fructus uno rumore periculi , atque uno belli terrore amittitur.

16. Quo tandem animo esse existimatis aut eos , qui vectigalia nobis pensitant , aut eos , qui exercent atque exigunt , quum duo reges cum maximis copiis propè adsint ? quum una excursio equitatûs per brevi tempore totius anni vectigal auferre possit ? quum publicani familias maximas , quas in salinis habent , quas in agris , quas in portubus atque custodiis , magno periculo se habere arbitrentur ? Putatisne vos illis rebus frui posse , nisi eos , qui vobis fructui sunt , conservaveritis , non solum , ut antea dixi , calamitate , sed etiam calamitatis formidine liberatos ?

VII. Ac ne illud quidem vobis negligendum est , quod mihi ego extremum proposueram , quum essem de belli genere dicturus , quod ad multorum bona civium Romanorum pertinet : quorum vobis , pro vestra sapientia , Quirites , habenda est ratio diligenter. Nam & publicani , homines & honestissimi & ornatissimi , suas rationes , & copias in illam provinciam contulerunt ; quorum ipsorum per se res & fortunæ curæ vobis esse debent : etenim si vectigalia , nervos esse reipublicæ semper duximus ; eum certè ordinem , qui exercet illa , firmamentum ceterorum ordinum rectè esse dicemus.

18. Deinde ceteris ex ordinibus homines gnavi & industrii partim ipsi in Asia



*PRO LEGE MANILIA.* 467

negotiantur, quibus vos absentibus consilere debetis: partim suas, & suorum in ea provincia pecunias magnas collocatas habent. Erit igitur humanitatis vestrae, magnum eorum civium numerum calamitate prohibere; sapientiae, videre, multorum civium calamitatem a republica sejunctam esse non posse. Etenim illud primum parvi refert, vos publicanis amissa vectigalia postea victoriâ recuperare: neque enim iisdem redimendi facultas erit, propter calamitatem, neque aliis voluntas, propter timorem.

19. Deinde, quod nos eadem Asia, atque idem iste Mithridates initio belli Asiatici docuit; id quidem certè calamitate docti memoriâ retinere debemus. Nam tum, quum in Asia res magnas permulti amiserunt, scimus Romæ, solutione impeditâ, fidem concidisse. Non enim possunt una in civitate multi rem atque fortunas amittere, ut non plures secum in eandem calamitatem trahant. A quo periculo prohibete rempublicam, & mihi credite, id quod ipsi videtis: hæc fides, atque hæc ratio pecuniarum, quæ Romæ, quæ in foro versatur, implicita est cum illis pecuniis Asiaticis, & cohæret: ruere illa non possunt, ut hæc non eodem labefactata motu concidant. Quare videte, num dubitandum vobis sit, omni stu-

dio ad id bellum incumbere , in quo gloria nominis vestri , salus sociorum , vestigalia maxima , fortunæ plurimorum civium cum republica defenduntur.

VIII. Quoniam de genere belli dixi , nunc de magnitudine pauca dicam. Potest enim hoc dici ; belli genus esse ita necessarium , ut sit gerendum : non esse ita magnum , ut sit pertimescendum. In quo maximè laborandum est , ne fortè a vobis quæ diligentissimè providenda sunt , contemnenda esse videantur. Atque , ut omnes intelligant , me L. Lucullo tantum impertiri laudis , quantum forti viro , & sapientissimo homini , & magno imperatori debeatur : dico , ejus adventu maximas Mithridatis copias omnibus rebus ornatas atque instructas fuisse ; urbemque Asiæ clarissimam , nobisque amicissimam , Cyzicenorum , obsessam esse ab ipso rege maximâ multitudine , & oppugnatam vehementissimè , quam L. Lucullus virtute , assiduitate , consilio , fummis obsidionis periculis liberavit :

21. Ab eodem imperatore classem magnam & ornatam , quæ ducibus Sertorianis ad Italiam studio inflammato raperetur , superatam esse , atque depressam : magnas hostium præterea copias multis præliis esse deletas ; patefactumque nostris legionibus esse Pontum , qui antè populo

*PRO LEGE MANILIA.* 469

Romano ex omni aditu clausus esset : Sinopen , atque Amisum , quibus in oppidis erant domicilia regis , omnibus rebus ornata atque referta , ceterasque urbes Ponti & Cappadociæ permultas , uno aditu atque adventu esse captas : regem spoliatum regno patrio atque avito , ad alios se reges , atque ad alias gentes supplicem contulisse : atque hæc omnia , salvis populi Romani sociis , atque integris vectigalibus , esse gesta. Satis opinor hoc esse laudis ; atque ita , Quirites , ut hoc vos intelligatis , a nullo istorum , qui huic obtreçant legi atque causæ , L. Lucillum similiter ex hoc loco esse laudatum.

IX. Requiretur fortasse nunc , quemadmodum , quum hæc ita sint , reliquum possit esse magnum bellum. Cognoscite , Quirites : non enim hoc sine causa quæri videtur. Primum ex suo regno sic Mithridates profugit , ut ex eodem Ponto Medea illa quondam profugisse dicitur ; quam prædicant in fuga , fratris sui membra in iis locis , quâ se parens persequeretur , dissipavisse , ut eorum collectio dispersa , mœrorque patrius , celeritatem persequendi retardaret. Sic Mithridates fugiens , maximam vim auri atque argenti , pulcherrimarumque rerum omnium , quas & a majoribus acceperat , & ipse bello superiore ex tota Asia direptas , in suum

regnum congefferat, in Ponto omnem reliquit. Hæc dum nostri colligunt omnia diligentius, rex ipse e manibus effugit: ita illum in persequendi studio mœror, hoc lætitia retardavit.

23. Hunc in illo timore & fuga Tigranes, rex Armenius, recepit; diffidentemque rebus suis confirmavit, & afflictum erexit, perditumque recreavit: cujus in regnum posteaquam L. Lucullus cum exercitu venit; plures etiam gentes contra imperatorem nostrum concitatae sunt. Erat enim metus injectus iis nationibus, quas numquam populus Romanus, neque lacerandas bello, neque tentandas putavit: erat etiam alia gravis atque vehemens opinio, quæ per animos gentium barbararum pervaserat, fani locupletissimi & religiosissimi diripiendi causâ in eas oras nostrum exercitum esse adductum. Ita nationes multæ atque magnæ novo quodam terrore ac metu concitabantur. Noster autem exercitus, etsi urbem ex Tigranis regno ceperat, & præliis usus erat secundis, tamen nimiam longinquitate locorum, ac desiderio suorum commovebatur.

24. Hic jam plura non dicam: fuit enim illud extremum, ut ex iis locis a militibus nostris reditus magis maturus, quam processio longior quæreretur. Mi-

thridates autem & suam manum jam confirmarat, & eorum, qui se ex ejus regno collegerant; & magnis auxiliis multorum regum & nationum juvabatur. Hoc jam ferè sic fieri solere accepimus, ut regum afflictæ fortunæ facilè multorum opes alligant ad misericordiam, maximèque eorum, qui aut reges sunt, aut vivunt in regno; quòd regale iis nomen magnum & sanctum esse videatur.

25. Itaque tantum victus efficere potuit, quantum incolumis numquam est ausus optare: nam quum se in regnum recepisset suum, non fuit eo contentus, quod ei præter spem acciderat, ut illam, posteaquam pulsus erat, terram umquam attingeret: sed in exercitum vestrum, clarum atque victorem, impetum fecit. Sinite hoc loco, Quirites (sicut poëtæ solent, qui res Romanas scribunt) præterire me nostram calamitatem; quæ tanta fuit, ut eam ad aures L. Luculli non ex proelio nuntius, sed ex sermone rumor afferret.

26. Hic in ipso illo malo, gravissimaque belli offensione, L. Lucullus, qui tamen aliqua ex parte iis incommodis mederi fortasse potuisset, vestro jussu coactus, quòd imperii diuturnitati modum statuendum veteri exemplo putavistis, partem militum, qui jam stipendiis confec-

tis erant, dimisit, partem Glabrioni tradidit. Multa prætereo consultò, sed ea vos conjecturâ perspicitis, quantum illud bellum factum putetis, quod jungant reges potentissimi, renouent agitatæ nationes, suscipiant integræ gentes, novus imperator vester accipiat, vetere pulso exercitu.

X. Satis mihi multa verba fecisse videor, quare hoc bellum esset, genere ipso necessarium, magnitudine periculosum: restat, ut de imperatore ad id bellum deligendo, ac tantis rebus præficiendo, dicendum esse videatur. Utinam, Quirites, virorum fortium atque innocentium copiam tantam haberetis, ut hæc vobis deliberatio difficilis esset, quemnam potissimum tantis rebus, ac tanto bello præficiendum putaretis! Nunc verò quum sit unus Cn. Pompeius, qui non modò eorum hominum, qui nunc sunt, gloriam, sed etiam antiquitatis memoriam virtute superarit; quæ res est, quæ cujuscumque animus in hac causa dubium facere possit?

28. Ego enim sic existimo, in summo imperatore quatuor has res inesse oportere, scientiam rei militaris, virtutem, auctoritatem, felicitatem. Quis igitur hoc homine scientior umquam aut fuit, aut esse debuit? qui e ludo atque pueritiæ disci-

*PRO LEGE MANILIA. 473*

plinâ , bello maximo , atque acerrimis hostibus , ad patris exercitum , atque in militiæ disciplinam profectus est ? qui extremâ pueritiâ miles fuit summi imperatoris ? ineunte adolescentiâ maximi ipse exercitûs imperator ? qui sæpius cum hoste confligit , quàm quisquam cum inimico concertavit ? plura bella gessit , quàm ceteri legerunt ? plures provincias confecit , quàm alii concupiverunt ? cujus adolescentia ad scientiam rei militaris non alienis præceptis , sed suis imperiis ; non offensionibus belli , sed victoriis ; non stipendiis , sed triumphis est erudita ? Quod denique genus belli esse potest , in quo illum non exercuerit fortuna reipublicæ ? Civile , Africanum , Transalpinum , Hispaniense , mistum ex civitatibus , atque ex bellicosissimis nationibus , servile , navale bellum , varia & diversa genera & bellorum , & hostium , non solum gesta ab hoc uno , sed etiam confecta , nullam rem esse declarant , in usu militari positam , quæ hujus viri scientiam fugere possit.

XI. Jam verò virtuti Cn. Pompeii , quæ potest par oratio inveniri ? quid est , quod quisquam aut dignum illo , aut vobis novum , aut cuiquam inauditum , possit afferre ? Neque enim illæ sunt solæ virtutes imperatoriæ , quæ vulgò existimantur , labor in negotio , fortitudo in pericu-

lis , industria in agendo , celeritas in conficiendo , consilium in providendo : quæ tanta sunt in hoc uno , quanta in omnibus reliquis imperatoribus , quos aut vidimus , aut audivimus , non fuerunt.

30. Testis est Italia , quam ille ipse victor , L. Sulla , hujus virtute & subsidio confessus est liberatam : testis est Sicilia , quam multis undique cinctam periculis , non terrore belli , sed celeritate consilii , explicavit : testis est Africa , quæ magnis oppressa hostium copiis , eorum ipsorum sanguine redundavit : testis est Gallia , per quam legionibus nostris in Hispaniam iter Gallorum internecione patefactum est : testis est Hispania , quæ sæpissime plurimos hostes ab hoc superatos prostratosque conspexit : testis est iterum & sæpius Italia , quæ quum servili bello tetro periculoque premeretur , ab hoc auxilium absente expetivit : quod bellum expectatione Pompeii attenuatum atque imminutum est ; adventu sublatum ac sepultum.

31. Testes verò jam omnes oræ , atque omnes exteræ gentes , ac nationes ; denique maria omnia , tum universa , tum in singulis omnes sinus , atque portus. Quis enim toto mari locus per hos annos , aut tam firmum habuit præsidium , ut tutus esset , aut tam fuit abditus , ut lateret ? Quis navigavit , qui non se aut mortis , aut



*PRO LEGE MANILIA. 475*

servitutis periculo committeret, quum aut hieme, aut referto prædonum mari navigaret? Hoc tantum bellum, tam turpe, tam vetus, tam latè divisum atque disperfum, quis umquam arbitraretur aut ab omnibus imperatoribus uno anno, aut omnibus annis ab uno imperatore confici posse? Quam provinciam tenuistis a prædonibus liberam per hosce annos? quod vectigal vobis tutum fuit? quem socium defendistis? cui præsidio, classibus vestris, fuistis? quàm multas existimatis insulas esse desertas? quàm multas aut metu relictas, aut a prædonibus captas urbes esse sociorum?

XII. Sed quid ego longinqua commemoro? Fuit hoc quondam, fuit proprium populi Romani longè a domo bellare, & propugnaculis imperii sociorum fortunas, non sua testa defendere. Sociis ego vestris mare clausum per hosce annos dicam fuisse, quum exercitus nostri Brundisio, numquam, nisi summâ hieme, transmiserint? qui ad vos ab exteris nationibus venirent, captos querar; quum legati populi Romani redempti sint? mercatoribus tutum mare non fuisse dicam, quum duodecim secures in prædonum potestatem pervenerint?

33. Cnidum, aut Colophonem, aut Samum, nobilissimas urbes, innumerabilesque alias, captas esse commemorem,

quum vestros portus , atque eos portus quibus vitam & spiritum ducitis , in prædonum fuisse potestatem sciatis ? An verò ignoratis , portum Cajetæ celeberrimum atque plenissimum navium , inspectante prætore , a prædonibus esse direptum ? ex Miseno autem , ejus ipsius liberos , quum prædonibus antea ibi bellum gesserat , a prædonibus esse sublato ? Nam quid ego Ostiense incommodum , atque illam labem atque ignominiam reipublica querar , quum , propè inspectantibus vobis , classis ea , cui consul populi Romani præpositus esset , a prædonibus capta atque oppressa est ? Proh dii immortales ! tantamne unius hominis incredibilis ac divina virtus tam brevi tempore lucem afferre reipublicæ potuit , ut vos , qui modò ante ostium Tiberinum classem hostium videbatis , ii nunc nullam intra Oceani ostium prædonum navem esse audiatis ?

34. Atque hæc quâ celeritate gesta sint , quamquam videtis , tamen a me in dicendo prætereunda non sunt. Quis enim umquam , aut obeundi negotii , aut consequendi quæstûs studio , tam brevi tempore tot loca adire , tantos cursus conficere potuit , quàm celeriter , Cn. Pompeio duce , belli impetus navigavit ? qui nondum tempestivo ad navigandum mari Siciliam adiit , Africam exploravit : inde

*PRO LEGE MANILIA.* 477

Sardiniam cum classe venit : atque hæc tria frumentaria subsidia reipublicæ firmissimis præsiidiis , classibusque munivit.

35. Inde , se quum in Italiam recepisset , duabus Hispaniis , & Galliâ Cispalinâ præsiidiis ac navibus confirmatâ , missis item in oram Illyrici maris , & in Achaiam , omnemque Græciam navibus , Italiæ duo maria maximis classibus , firmissimisque præsiidiis adornavit : ipse autem , ut a Brundisio profectus est , undequinquagesimo die totam ad imperium populi Romani Ciliciam adjunxit : omnes , qui ubique prædones fuerunt , partim capti interfectique sunt ; partim unius hujus imperio ac potestati se dediderunt. Idem Cretensibus , quum ad eum usque in Pamphyliam legatos deprecatoresque misissent , spem deditionis non ademit , obidesque imperavit. Ita tantum bellum , tam diuturnum , tam longè latèque dispersum , quo bello omnes gentes ac nationes premebantur , Cn. Pompeius extremâ hie-me apparavit , ineunte vere suscepit , mediâ æstate confecit.

- XIII. Est hæc divina atque incredibilis virtus imperatoris : quid ceteræ , quas paulò antè commemorare cœperam , quantæ , atque quàm multæ sunt ? non enim solum bellandi virtus in summo atque perfecto imperatore quærenda est ; sed multæ

sunt artes exiniæ , hujus administræ comitesque virtutis. Ac primùm quantâ innocentia debent esse imperatores ? quantâ deinde omnibus in rebus temperantiâ ? quantâ fide ? quantâ facilitate ? quanto ingenio quantâ humanitate ? Quæ breviter , quali sint in Cn. Pompeio , consideremus summa enim omnia sunt , Quirites : se ea magis ex aliorum contentione , quàm ipsa per sese cognosci atque intelligi possunt.

37. Quem enim possumus imperatores aliquo in numero putare , cujus in exercitu veneant centuriatus , atque venierint quid hunc hominem magnum , aut amplum de republica cogitare , qui pecunias ex ærario depromptam ad bellum administrandum , aut propter cupiditatem provinciarum magistratibus diviserit , aut propter avaritiam Romæ in quæstu reliquerit. Vestra admurmuratio facit , Quirites , agnoscere videamini , qui hæc fecerint ego autem neminem nomino : quare iras mihi nemo poterit , nisi qui antè deus voluerit confiteri. Itaque propter hanc avaritiam imperatorum , quantas calamitates , quocumque ventum sit , nostri exercitus ferant , quis ignorat ?

38. Itinera , quæ per hosce annos in Italia per agros atque oppida civium Romanorum nostri imperatores fecerunt , re

*PRO LEGE MANILIA.* 479

cordamini ; tum faciliùs statuetis , quid apud exteras nationes fieri existimetis. Utrùm plures arbitramini per hosce annos militum vestrorum armis , hostium urbes , an hibernis , sociorum civitates esse deletas ? Neque enim potest exercitum is continere imperator , qui se ipsum non continet ; neque severus esse in iudicando , qui alios in se severos esse iudices non vult.

39. Hic miramur , hunc hominem tantum excellere ceteris , cujus legiones sic in Asiam pervenerunt , ut non modò manus tanti exercitûs , sed ne vestigium quidem cuiquam pacato nocuisse dicatur ? Jam verò , quemadmodum milites hibernent , quotidie sermones ac litteræ perfectuntur : non modò , ut sumptum faciat in militem , nemini vis affertur ; sed ne cupienti quidem cuiquam permittitur. Hiemis enim , non avaritiæ , perfugium majores nostri in sociorum atque amicorum tectis esse voluerunt.

XIV. Age verò ceteris in rebus quali sit temperantiâ , considerate. Unde illam tantam celeritatem , & tam incredibilem cursum inventum putatis ? non enim illum eximia vis remigum , aut ars inaudita quædam gubernandi , aut venti aliqui novi , tam celeriter in ultimas terras pertulerunt : sed hæ res , quæ ceteros remorari solent ,

non retardarunt : non avaritia ab institut cursu ad prædam aliquam devocavit , non libido ad voluptatem , non amœnitas a delectationem , non nobilitas urbis ad cognitionem , non denique labor ipse a quietem : postremo signa , & tabulas ceteraque ornamenta Græcorum oppidorum , quæ ceteri tollenda esse arbitrantur , ea sibi ille ne visenda quidem existimavit.

41. Itaque omnes quidem nunc in his locis Cn. Pompeium , sicut aliquem nox ex hac urbe missum , sed de cœlo delapsum , intuentur : nunc denique incipiunt credere , fuisse homines Romanos haec quondam abstinentiâ ; quod jam nationibus exteris incredibile , ac falsò memori proditum videbatur. Nunc imperii nostri splendor illis gentibus lucet : nunc intelligunt , non sine causa majores suos tum quum hac temperantiâ magistratus habebamus , servire populo Romano , quàm imperare aliis , maluisse.

42. Jam verò ita faciles aditus ad eorum privatorum , ita liberæ querimoniæ de aliorum injuriis esse dicuntur ; ut is , qui dignitate principibus excellit , facilitate pauperum infimis esse videatur. Jam quantum consilio , quantum dicendi gravitate & copiâ valeat , in quo ipso inest quædam dignitas imperatoria , vos , Quirites , hoc ipso in loco

loco sæpe cognostis. Fidem verò ejus inter focios quantam existimari putatis, quam hostes omnium gentium sanctissimam judicarint? Humanitate jam tantâ est, ut difficile dictu sit, utrùm hostes magis virtutem ejus pugnantes timuerint, an mansuetudinem victi dilexerint. Et quisquam dubitabit, quin huic tantum bellum hoc transmittendum sit, qui ad omnia nostræ memoriæ bella conficienda, divino quodam consilio natus esse videatur?

XV. Et quoniam auctoritas multùm in bellis quoque administrandis, atque imperio militari valet; certè nemini dubium est, quin eâ re idem ille imperator plurimùm possit. Vehementer autem pertinere ad bella administranda, quid hostes, quid focii de imperatoribus vestris existiment, quis ignorat, quum sciamus, homines in tantis rebus, ut aut contemnant, aut metuant, aut oderint, aut ament, opinione non minùs famæ, quàm aliquâ certâ ratione commoveri? Quod igitur nomen umquam in orbe terrarum clarius fuit? cujus res gestæ pares? de quo homine vos (id quod maximè facit auctoritatem) tanta & tam præclara judicia fecistis?

44. An verò ullam usquam esse oram tam desertam putatis, quò non illius diei fama pervaserit, quum universus populus Romanus referto foro, repletisque omni-

bus templis , ex quibus hic locus conspic  
potest , unum sibi ad commune omnium  
gentium bellum Cn. Pompeium imperato  
rem depoposcit ? Itaque , ut plura non di  
cam , neque aliorum exemplis confirmem  
quantum hujus auctoritas valeat in bello  
ab eodem Cn. Pompeio omnium rerum  
egregiarum exempla sumantur ; qui qu  
die a vobis maritimo bello præpositus et  
imperator , tanta repentè vilitas annon  
ex summa inopia & caritate rei frumenta  
riæ consecuta est , unius hominis spe &  
nomine , quantam vix ex summa ubertate  
agrorum diuturna pax efficere potuisset.

45. Jam , acceptâ in Ponto calamitate  
ex eo prælio , de quo vos paulò antè in  
vitus admonui ; quum socii pertinuissent  
hostium opes animique crevissent ; quum  
satis firmum præsidium provincia non ha  
beret ; amisissetis Asiam , Quirites , nisi  
ad ipsum discrimen ejus temporis divinitus  
Cn. Pompeium ad eas regiones fortunæ  
populi Romani attulisset. Hujus adventus  
& Mithridatem insolitâ inflammatus vic  
toriâ continuit , & Tigranem magnis copi  
minitantem Asiæ retardavit. Et quisqua  
dubitabit , quid virtute perfecturus sit , qui  
tantum auctoritate perfecit ? aut quâ  
facile imperio atque exercitu socios & ve  
tigalia conservaturus sit , qui ipso nomine  
ac rumore defenderit.



XVI. Age verò, illa res quantam declarat ejusdem hominis apud hostes populi Romani auctoritatem, quòd ex locis tam longinquis, tamque diversis, tam brevi tempore omnes unà huic se dediderunt? quòd Cretensium legati, quum in eorum insula noster imperator exercitusque esset, ad Cn. Pompeium in ultimas propè terras venerunt, eique se omnes Cretensium civitates dedere velle dixerunt? Quid? idem iste Mithridates, nonne ad eundem Cn. Pompeium, legatum usque in Hispaniam misit, eum, quem Pompeius legatum semper judicavit, ii, quibus semper erat molestum, ad eum potissimum esse missum, speculatorem, quam legatum judicari maluerunt? Potestis igitur jam constituere, Quirites, hanc auctoritatem, multis postea rebus gestis, magnisque vestris judiciis amplificatam, quantum apud illos reges, quantum apud exterarum nationes valituram esse existimetis.

47. Reliquum est, ut de felicitate (quam præstare de se ipso nemo potest, meminisse & commemorare de altero possumus) sicut æquum est homini de potestate deorum, timidè & pauca dicamus. Ego enim sic existimo, Maximo, Marcello, Scipioni, Mario, & ceteris magnis imperatoribus, non solum propter virtutem, sed etiam propter fortunam, sæpius imperia

mandata , atque exercitus esse commissos : Fuit enim profectò quibusdam summis viris quædam ad amplitudinem & ad gloriam , & ad res magnas bene gerendas divinitus adjuncta fortuna : de hujus autem hominis felicitate , quo de nunc agimus , hac utar moderatione dicendi , non ut in illius potestate fortunam positam esse dicam , sed ut præterita meminisse , reliqua sperare videamur , ne aut invisâ diis immortalibus oratio nostra , aut ingrata esse videatur.

48. Itaque non sum prædicaturus , Quirites , quantas ille res domi militiæque , terrâ marique , quantâque felicitate gesserit : ut ejus semper voluntatibus non modò cives assenserint , socii obtemperarint , hostes obedierint ; sed etiam venti tempestatesque obsecundarint : hoc brevissimè dicam , neminem umquam tam impudentem fuisse , qui a diis immortalibus tot & tantas res tacitus auderet optare , quot & quantas dii immortales ad Cn. Pompeium detulerunt : quod ut illi proprium ac perpetuum sit , Quirites , quum communis salutis atque imperii , tum ipsius hominis causâ , sicuti facitis , velle & optare debetis.

49. Quare quum & bellum ita necessarium sit , ut negligi non possit ; ita magnum , ut accuratissimè sit administrandum : & quum ei imperatorem præficere possitis , in quo sit eximia belli scientia ,

*PRO LEGE MANILIA.* 485

singularis virtus , clarissima auctoritas , egregia fortuna : dubitabitis , Quirites , quin hoc tantum boni , quod vobis a diis immortalibus oblatum & datum est , in rempublicam conservandam atque amplificandam conferatis ?

XVII. Quòd si Romæ Cn. Pompeius privatus esset hoc tempore ; tamen ad tantum bellum is erat diligendus atque mittendus : nunc , quum ad ceteras summas utilitates hæc quoque opportunitas adjungatur , ut in iis ipsis locis adsit , ut habeat exercitum , ut ab iis , qui habent , accipere statim possit : quid exspectamus ? aut cur non , ducibus diis immortalibus , eidem , cui cetera summa cum salute reipublicæ commissa sunt , hoc quoque bellum regium committimus ?

§ 1. At enim vir clarissimus , amantissimus reipublicæ , vestris beneficiis amplissimis affectus , Q. Catulus ; itemque summis ornamentis honoris , fortunæ , virtutis , ingenii præditus , Q. Hortensius , ab hac ratione dissentiant : quorum ego auctoritatem apud vos multis locis plurimum valuisse , & valere oportere confiteor ; sed in hac causa , tametsi cognoscitis auctoritates contrarias virorum fortissimorum & clarissimorum , tamen omisis auctoritatibus , ipsâ re & ratione exquirere possumus veritatem : atque hoc

facilius, quòd ea omnia, quæ adhuc a me dicta sunt, iidem isti vera esse concedunt, & necessarium bellum esse, & magnum, & in uno Cn. Pompeio summa esse omnia.

52. Quid igitur ait Hortensius? Si uni omnia tribuenda sunt, unum dignissimum esse Pompeium: sed ad unum tamen omnia deferri non oportere. Obsolevit jam ista oratio, re multò magis, quàm verbis, refutata. Nam tu idem, Q. Hortensi, multa, pro tua summa copia ac singulari facultate dicendi, & in senatu contra virum fortem A. Gabinium, graviter ornatèque dixisti, quum is de uno imperatore contra prædones constituendæ legem promulgasset; & ex hoc ipso loco permulta item contra legem eam verba fecisti.

53. Quid? tum, per deos immortales si plus apud populum Romanum auctoritas tua, quàm ipsius populi Romani fatus, & vera causa valuisset, hodie hanc gloriam, atque hoc orbis terræ imperium teneremus? An tibi tum imperium esse hoc videbatur, quum populi Romani legati, prætores, quæstoresque capiebantur? quum ex omnibus provinciis com meatu & privato, & publico prohibebamur? quum ita clausa erant nobis omnia maria, ut neque privatam rem transma-

rinam, neque publicam jam obire possemus?

XVIII. Quæ civitas antea umquam fuit, non dico Atheniensium, quæ satis latè quondam mare tenuisse dicitur; non Carthaginiensium, qui permultum classe, maritimisque rebus valuerunt; non Rhodiorum, quorum usque ad nostram memoriam disciplina navalis & gloria remansit: quæ civitas umquam antea tam tenuis, quæ tam parva insula fuit, quæ non portus suos, & agros, & aliquam partem regionis, atque oræ maritimæ per se ipsa defenderet? At hercle aliquot annos continuos ante legem Gabiniam ille populus Romanus, cujus, usque ad nostram memoriam, nomen invictum in navalibus pugnis permanerat, magnâ, ac multò maximâ partē non modò utilitatis, sed dignitatis atque imperii caruit.

55. Nos, quorum majores Antiochum regem classe, Persenque superarunt, omnibusque navalibus pugnis Carthaginienses, homines in maritimis rebus exercitissimos paratissimosque vicerunt; ii nullo in loco jam prædonibus pares esse poteramus: nos quoque, qui antea non modò Italiam tutam habebamus, sed omnes socios in ultimis oris auctoritate nostri imperii salvos præstare poteramus; tum, quum insula Delos tam procul a nobis in

Ægeo mari posita , quò omnes undique cum mercibus atque oneribus commeabant , referta divitiis , parva , sine muro nihil timebat ; iidem non modò provinciis , atque oris Italiæ maritimis , ac portubus nostris , sed etiam Appiâ jam viâ carebamus : & his temporibus non pudebat magistratus populi Romani , in hunc ipsum locum descendere , quum eum vobis majores vestri exuviis nauticis , & classium spoliis ornatum reliquissent.

XIX. Bono te animo tum , Q. Hortensi , populus Romanus , & ceteros , qui erant in eadem sententia , dicere existimavit ea , quæ sentiebatis : sed tamen in salute communi idem populus Romanus dolori suo maluit , quàm auctoritati vestræ obtemperare. Itaque una lex , unus vir , unus annus , non modò nos illâ miseriâ ac turpitudine liberavit ; sed etiam effecit , ut aliquando verè videremur omnibus gentibus ac nationibus terrâ , marique imperare.

57. Quò mihi etiam indigniùs videtur obrectatum esse adhuc , Gabinio dicam , anne Pompeio , an utrique ? ( id quod est verius ) ne legaretur A. Gabinius Cn. Pompeio expetenti , ac postulanti. Utrùm ille , qui postulat legatum ad tantum bellum , quem velit , idoneus non est , qui impetret , quum ceteri ad expilandos so-

cios, diripiendaeque provincias, quos voluerunt, legatos eduxerint: an ipse, cujus lege salus ac dignitas populo Romano atque omnibus gentibus constituta est, expers esse debet gloriae ejus imperatoris, atque ejus exercitus, qui consilio ipsius atque periculo est constitutus?

58. An C. Falcidius, Q. Metellus, Q. Coelius Latiniensis, Cn. Lentulus, quos omnes honoris causâ nomino, quum tribuni plebis fuissent, anno proximo legati esse potuerunt: in hoc uno Gabinio sunt tam diligentes, qui in hoc bello, quod lege Gabiniâ geritur, in hoc imperatore atque exercitu, quem per vos ipse constituit, etiam præcipuo jure esse deberet? de quo legando spero consules ad senatum relatores: qui si dubitabunt, aut gravabuntur; ego me profiteor relaturum: neque me impedit cujusquam, Quirites, inimicum edictum, quò minùs, fretus vobis, vestrum jus beneficiumque defendam: neque, præter intercessionem, quidquam audiam; de qua, ut arbitror, isti ipsi, qui minantur, etiam atque etiam, quò id liceat, considerabunt. Meâ quidem sententiâ, Quirites, unus A. Gabinius, belli maritimi, rerumque gestarum auctor, comes Cn. Pompeio adscribitur: propterea quòd alter uni id bellum suscipiendum vestris suffragiis detulit; alter delatum, susceptumque confecit.

XX. Reliquum est , ut de Q. Catul<sup>i</sup> auctoritate , & sententia dicendum esse videatur : qui quum ex vobis quæreret , si in uno Cn. Pompeio omnia poneretis , si quid eo factum esset , in quo spem essetis habituri ; cepit magnum suæ virtutis fructum ac dignitatis , quum omnes propè unâ voce , *in eo ipso vos spem habituros esse* dixistis. Etenim talis est vir , ut nulla res tanta sit , ac tam difficilis , quam ille non & consilio regere , & integritate tueri , & virtute conficere possit : sed in hoc ipso ab eo vehementissimè dissentio , quòd , quò minùs certa est hominum ac minùs diuturna vita , hòc magis respublica , dum per deos immortales licet , frui debet summi hominis vitâ , atque virtute.

60. At enim nihil novi fiat contra exempla , atque instituta majorum. Non dico hoc loco , majores nostros semper in pace , consuetudini ; in bello , utilitati paruisse : semper ad novos casus temporum , novorum consiliorum rationes accommodasse : non dicam , duo bella maxima , Punicum & Hispaniense , ab uno imperatore esse confecta : duas urbes potentissimas , quæ huic imperio maximè minabantur , Carthaginem atque Numantiam , ab eodem Scipione esse deletas : non commemorabo , nuper ita vobis patribusque vestris esse visum , ut in uno C. Mario spes



*PRO LEGE MANILIA. 491*

imperii poneretur : ut idem cum Jugurtha , idem cum Cimbris , idem cum Theutonis bellum administraret. In ipso Cn. Pompeio , in quo novi constitui nihil vult Q. Catulus , quàm multa sint nova , summâ Q. Catuli voluntate constituta , recordamini.

XXI. Quid enim tam novum , quàm adolescentulum , privatum , exercitum difficili reipublicæ tempore conficere ? confecit : huic præesse ? præfuit : rem optimè ductu suo gerere ? gessit. Quid tam præter consuetudinem , quàm homini peradolescenti , cujus a senatorio gradu ætas longè abesset , imperium atque exercitum dari ? Siciliam permitti , atque Africam , bellumque in ea administrandum ? fuit in his provinciis singulari innocentia , gravitate , virtute : bellum in Africa maximum confecit , victorem exercitum deportavit. Quid verò tam inauditum , quàm equitem Romanum triumphare ? at eam quoque rem populus Romanus non modò vidit , sed etiam studio omni visendam putavit.

62. Quid tam inusitatum , quàm ut , quum duo consules clarissimi fortissimique essent , eques Romanus ad bellum maximum formidolosissimumque pro consule mitteretur ? missus est : quo quidem tempore , quum esset nonnemo in senatu , qui

diceret, *Non oportere mitti hominem privatum pro consule* : L. Philippus dixisse dicitur : *Non se illum suâ sententiâ pro consule, sed pro consulibus mittere*. Tanta in eo reipublicæ bene gerendæ spes constituebatur, ut duorum consulum munus unius adolescentis virtuti committeretur. Quid tam singulare, quàm ut ex senatusconsulto legibus solutus, consul antè fieret, quàm ullum alium magistratum per leges capere licuisset ? quid tam incredibile, quàm ut iterum eques Romanus ex senatusconsulto triumpharet ? quæ in omnibus hominibus nova post hominum memoriam constituta sunt, ea tam multa non sunt, quàm hæc, quæ in hoc uno homine vidimus. Atque hæc tot exempla, tanta ac tam nova, profecta sunt in eundem hominem a Q. Catuli, atque a ceterorum ejusdem dignitatis amplissimorum hominum auctoritate.

XXII. Quare videant, ne sit periniquum, & non ferendum, illorum auctoritatem de Cn. Pompeii dignitate a vobis comprobata semper esse ; vestrum ab illis de eodem homine judicium, populi que Romani auctoritatem improbari : præsertim quum jam suo jure populus Romanus in hoc homine suam auctoritatem vel contra omnes, qui dissentiunt, possit defendere ; propterea quòd, istis recla-

*PRO LEGE MANILIA. 423*

mantibus , vos unum illum ex omnibus delegistis , quem bello prædonum præponeretis.

64. Hoc si vos temere fecistis , & reipublicæ parum consulistis ; rectè isti studia vestra suis consiliis regere conantur : sin autem vos plus tum in republica vidistis : vos , his repugnantibus , per vosmetipsos dignitatem huic imperio , salutem orbi terrarum attulistis ; aliquando isti principes , & sibi , & ceteris , populi Romani universi auctoritati parendum esse fateantur. Atque in hoc bello Asiatico , & regio , non solùm militaris illa virtus , quæ est in Cn. Pompeio singularis , sed aliæ quoque virtutes animi multæ & magnæ requiruntur : difficile est in Asia , Cilicia , Syria , regnisque interiorum nationum ita versari vestrum imperatorem , ut nihil aliud , quàm de hoste , ac de laude , cogitet : deinde etiam si qui sunt pudore ac temperantiâ moderatiores , tamen eos esse tales , propter multitudinem cupidorum hominum nemo arbitratur.

65. Difficile est dictu , Quirites , quanto in odio simus apud exterarum nationes , propter eorum , quos ad eas per hos annos cum imperio misimus , injurias ac libidines. Quod enim fanum putatis in illis terris nostris magistratibus religiosum , quam civitatem sanctam , quam domum

fatis clausam ac munitam fuisse ? Urbes jam locupletes ac copiosæ requiruntur, quibus causa belli propter diripiendi cupiditatem inferatur.

66. Libenter hæc coram cum Q. Catulo, & Q. Hortensio disputarem, summis & clarissimis viris : noverunt enim sociorum vulnera : vident eorum calamitates : querimonias audiunt. Pro sociis vos contra hostes exercitum mittere putatis, an hostium simulatione, contra socios atque amicos ? Quæ civitas est in Asia, quæ non modò imperatoris, aut legati, sed unius tribuni militum animos ac spiritus capere possit ?

XXIII. Quare, etiam si quem habetis, qui collatis signis, exercitus regios superare posse videatur : tamen, nisi erit idem, qui se a pecuniis sociorum, qui ab eorum conjugibus ac liberis, qui ab ornamentis fanorum atque oppidorum, qui ab auro gazaque regia, manus, oculos, animum cohibere possit ; non erit idoneus, qui ad bellum Asiaticum, regiumque mittatur.

67. Ecquam putatis civitatem pacatam fuisse, quæ locuples sit ? ecquam esse locupletem, quæ istis pacata esse videatur ? Ora maritima, Quirites, Cn. Pompeium non solum propter rei militaris gloriam, sed etiam propter animi continentiam re-

*PRO LEGE MANILIA. 495*

quisivit. Videbat enim populus Romanus non locupletari quotannis pecuniâ publicâ, præter paucos; neque nos quidquam aliud assequi classium nomine, nisi ut, detrimentis accipiendis, majore affici turpitudine videremur. Nunc, quâ cupiditate homines in provincias, quibus jacturis, quibus conditionibus proficiscantur, ignorant videlicet isti, qui ad unum deferenda esse omnia non arbitrantur? quasi verò Cn. Pompeium non quum suis virtutibus, tum etiam alienis vitiis magnum esse videamus.

68. Quare nolite dubitare, quin huic uni credatis omnia, qui inter annos tot unus inventus sit, quem socii in urbes suas cum exercitu venisse gaudeant. Quodd si auctoritatibus hanc causam, Quirites, confirmandam putatis; est vobis auctor, vir bellorum omnium, maximarumque rerum peritissimus, P. Servilius; cujus tantæ res gestæ terrâ marique exstiterunt, ut, quum de bello deliberetis, auctor vobis gravior esse nemo debeat: est C. Curio, summis vestris beneficiis, maximisque rebus gestis, summo ingenio & prudentiâ præditus: est Cn. Lentulus, in quo omnes, pro amplissimis vestris honoribus, summum consilium, summam gravitatem esse cognoscitis: est C. Cassius, integritate, virtute, constantiâ singulari. Quare

videte , ut horum auctoritatibus , illorum orationi , qui dissentiunt , respondere posse videamur.

XXIV. Quæ quum ita sint , C. Manili , primùm istam tuam & legem , & voluntatem , & sententiam laudo , vehementissimèque comprobo : deinde te hortor ut auctore populo Romano , maneas in sententia , neve cujusquam vim aut minas pertimescas. Primùm in te satis esse animi , perseverantiæque arbitror : deinde quum tantam multitudinem cum tanto studio adesse videamus , quantam nunc iterum in eodem homine præficiendo videmus ; quid est , quòd aut de re , aut de perficiendi facultate dubitemus ? Ego autem , quidquid in me est studii , consilii , laboris , ingenii , quidquid hoc beneficio populi Romani , atque hac potestate prætoriâ , quidquid auctoritate , fide , constantiâ possum ; id omne ad hanc rem conficiendam , tibi & populo Romano polliceor , ac defero.

70. Testorque omnes deos , & eos maximè , qui huic loco temploque præsident , qui omnium mentes eorum , qui ad rem publicam adeunt , maximè perspiciunt , me hoc neque rogatu facere cujusquam , neque quò Cn. Pompeii gratiam mihi per hanc causam conciliari putem , neque quò mihi ex cujusquam amplitudine , aut præ-

*PRO LEGE MANILIA.* 497

sidia periculis , aut adjumenta honoribus quæram : propterea quòd pericula facile , ut hominem præstare oportet , innocentiam tecti repellemus : honores autem neque ab uno , neque ex hoc loco , sed eadem nostrâ illâ laboriosissimâ ratione vitæ , si vestra voluntas feret , consequemur.

71. Quamobrem , quidquid in hac causa mihi susceptum est , Quirites , id omne me reipublicæ causâ suscepisse confirmo : tantumque abest , ut aliquam bonam gratiam mihi quærere videar , ut multas etiam similitudines partim obscuras , partim apertas intelligam , mihi non necessarias , vobis non inutiles , suscepisse : sed ego me hoc honore præditum , tantis vestris beneficiis affectum , statui , Quirites , vestram voluntatem , & reipublicæ dignitatem , & salutem provinciarum atque sociorum , meis omnibus commodis & rationibus præferre oportere.



---

## NOTANDA ET CORRIGENDA.

*Numerus alter paginam , alter lineam designat.*

P. 3 , L. 16. *Ab republica.* Ita codices nostri , ut e suis Gruterus notavit. Vulgò *reipublica.*

Ibid. 20. *Sed etiam , ut quadam magis necessariâ ratione.* Aliam affert e duobus mss. Gruterus lectionem minimè spernendam , *sed etiam vi quadam magis necessariâ* , omissâ voce *ratione.*

4 , 4. *Perspicitur.* Duo nostri codices scribunt , *præcipitur* , non malè.

12 , 22. *Legem , quam ipsis videretur , dicerent.* Ita Victorius ex Nannii libro , idque habent duo nostri codices. Alii cum vulgatis habent , *legem , quæ ipsis videretur , edicerent.*

15 , 7. *Vorago est , ac gurgis.* Ita liber vetus Ursini , idque placuit Mureto ac Grævio , pro vulgato , *aut gurgis* , cui disjunctioni non est hic locus.

17 , 15. *Quæ vectigalia sunt.* Hotomanus legebat , *quâ vectigalia sunt* , ut sit sensus , ex qua parte , vel quibus in locis vectigalia sunt in Italia. Lambino placebat , *quæ vectigalis sit* ; neque enim omnis Italia vectigalis fuit.

19 , 8. *Non solum avaritiâ , sed etiam imprudentiâ accidere potuerit.* Ita cum Grutero dedimus , probatque Grævius , & firmat unus e regiis codicibus. Alii , *Non solum sine avaritia , sed etiam sine impudentia accipere potuerit.*

20 , 5. *Non a patre ei traditi.* Quis hic patri locus ? inquit Grævius , qui ex uno codice re-



ponit, non a populo Romano ei traditi.

Ibid. 28. *Apronio condemnare*. Mallet Grævius, *condonare*, hoc est, tradere vexandum ad arbitrium.

25, 19. *Constituisse vineam*. Ita ex Fabriciano & Metellano mss. Grævius, & sic etiam duo e nostris. Alii cum vulgatis, *constituisse convincam*.

27, 15. *Quam C. Marcellus*. Ita legendum ex libro superiore n. 8, & ex hoc libro infra 102. Malè in vulgatis, *quam M. Marcellus*.

Ibid. 21. *In posteritatem*. Ita Græviani & nostri codices, & plerique editi. Quidam maluerunt, *in posterum*.

31, 28. *Populo se ac coronæ daturum*. Ita Nannii codex, & hanc lectionem multis exemplis confirmat Lipsius. *Coronam* vocabant circumstantem populi multitudinem, quæ ad iudicium spectandi & audiendi causâ convenerat. Vulgò, *populo se ad coronam daturum*.

38, 23. *Atqui ab Apronio*. Ita rectè Gruteriani codices, & regius optimus. Vulgò, *atque ab Apronio*.

39, 12. *Nihil de ceteris rebus*. Delenda videtur vox ultima, quam tamen constanter servant codices nostri.

44, 16. *Ingerebat iste Artemidorum, Cornelium medicum*. Delenda vox *Artemidorum*, nata, ut videtur, ex alicujus interpretatione. Nam Cornelius medicus ipse est *Artemidorus* supra 54. Infra *repentè Cornelii*, hoc est, qui ex ista cum Cornelio medico societate facti erant *repentè Cornelii*, seu omnium mortalium, ut ille, nequissimi.

46, 1. *Recuperatores rejice*. Mallet Grævius,

*recuperatores recipe* : sed eodem sensu dixit supra 28 , *jubet recuperatores rejicere*.

47 , 21. *Quod ei dabatur*. Has voces , in vulgatis omittas , ex Nannii libro recepit cum Carolo Stephano Grævius , & has servat regius codex optimus.

48 , 7. *Sestertiūm Lx*. In hac oratione numeri plerumque depravati , qui tamen corrigi sine libris non possunt.

54 , 2. *A populo factarum . . . rerum*. Grævius delet præpositionem , quam ignorat regius codex , ut intelligantur pecuniæ bono & commodo populi factæ & quæsitæ. At Hotomanus legebat , *ab ipso* scil. Sulla *factarum*.

Ibid. 22. *Hoc est , Tertiæ*. Lambinus & Grævius addidere vocem ultimam , quæ abest a miss. Manutius putabat duas voces , *hoc est* , otiosas esse ac delendas.

57 , 7. *Servi publici ad vectigalia accedant*. Probat Grævius lectionem Nanniani codicis , *servi ad publica vectigalia accedant*.

58 , 28. *Dant Banobali medimnis*. Legendum videtur cum Manutio , *pro medimnis*.

60 , 15. *Commercium Panormitanis est*. Ita codices nostri , & veteres editi. Grævius ex Nannii codice dedit , *commercium nemini est*.

61 , 17. *Qui habitarent*. Lambinus maluit ex Nannii libro , *qui haberent* scil. possessiones.

65 , 8. *Menenorum*. Ita dedit Grævius , & sic nomen scribitur in regijs codicibus. Vulgati , *Meneniorum*.

Ibid. 14. *Vobis serviunt*. Fortè *vobis serunt*.

66 , 9. *Ietinis*. Ita legendum esse probat Grævius , non , ut vulgò , *Letinis*.

73, 1. *Ut cum decimo.* Etiam si ager cum decimo extulerit. Ita Grævius, & plerique codices nostri. Malè vulgati, *ut cum decumano.*

74, 24. *Ad singula medimna... singulos nummos.* Ita ex vetustis editis Grævius restituit, & sic habet codex ille regius optimus. Gruterus, & eum secuti dederunt, *ad singula medimnūm... singula nummūm.*

76, 29. *Cui H-S dena merces esset.* Hanc Victorianam lectionem revocavit ex Nannii codice Grævius. Vulgò qui *H-S dena meritasset.*

88, 5. *Se... venditasset.* Ita ex optimis libris Grævius, & sic etiam nostri codices. Alii malè *vindicasset.*

89, 1. *Eum... profectò ne verbo quidem graviore appellasset.* Hic videtur esse aliquid vitii, nec quidquam opis in scriptis codicibus nostris, qui nihil a vulgatis abeunt.

Ibid. 26. *Bene ais.* Ita ex optimo codice Grævius, ut & infra 146, ubi editi quoque plures habent, *bene agis.*

96, 4. *Litteras manifestas quaris.* Mirè placet Manutio & Lambino conjectura Hotomani locum hunc ita legentis, *civitatum auctoritates, testimonia, litteras: res manifestas quaris.*

101, 6. *Peroraro.* Ita Grævius e suis mss. & firmant nostri. Vulgò *perorabo.*

105, 1. *In aratorem.* Has voces, in vulgatis omissas, restituit Grævius e suis mss. quas & duo e nostris servant.

107, 20. *Unum alterarum decumarum.* Ita rectè Hotomani vetus liber, idque adstruunt duo e nostris. Vitiosè in vulgatis, *unum ceterarum decumarum.*

108, 30. *Tu*. Hoc pronomen nullum habere verbum, ad quod referatur, notat Grævius. At sic interdum veteres loquuntur, ut post interpositam parenthesim longiorem, sententiam magis, quàm verba respiciant.

109, 24. *Utrumvis licuisse*. Inserunt editi quidam verbum *feri*, quod nullus e nostris mss. agnoscit.

113, 26. *Quid accidit*. Legendum videtur cum Lambino, *qui accidit*, & paulò pòst, *qui acciderat*.

117, 14. *Eccupaverant*. Lege *occupaverant*.

121, 8. *Certiores facti petiverunt*. Ultimam vocem, tamquam irreptitiam, delet Grævius.

132, *Non hominis*. Ita teste Camerario, editio Veneta, & eòdem ducunt nostri codices, in quibus scribitur, *non homines*. Vulgati, *non omnes*.

133, 12. *Mille modium*. Observat Grævius id Latinè dici non posse: sed vel subaudiendam esse vocem *numerum*, vel legendum esse *mille modios*.

137, 22. *Hac enim plurimùm*. Mediam vocem, volentibus nostris codicibus, & plerisque editis, delevimus.

140, 20. *Senatus populusque Romanus, iudices comprobarint*. Ita nostri codices cum vetustioribus editis. Recentiores dederunt, *senatus populi que Romani iudices comprobarint*.

145, 5. *Adhuc parum est*. Ita liber vetus Ursini, & sic emendatum reperimus in uno codice regio, probatque Gruterus, pro vulgato, *at hoc parum est*.

155, 6. *Thespiadas*, quæ ad ædem Felicitatis sunt. Vulgò, *Thespiis ea*, quæ &c. Emendavit olim ex vetere libro Turnebus, & firmant quatuor regii, ut & Grævii codices. Et verò *Thespiadas*, i e, Musas, fuisse ad ædem Felicitatis docet Plinius 36, 5.

157, 13. *Relictum esse sciebat in hereditate sacrorum: non quærebat*. Ita legendum, & interpungendum esse monuit Gruterus e Cujacii libro, firmatque Grævius ex duobus suis mss. & sic habent e nostris quatuor. Malè omnino in vulgatis, *relictum esse sciebat. Ad hereditatem sacrorum non quærebat &c.*

158, 14. *Si qui esset Romæ demortuus*, nempe servus, ad quam vocem hæc referuntur, non ad *mancipium*, quod præcessit.

162, 28. *De Cybea*. Mallet Grævius *de Cymbia*, ut a Cymba formetur a Græcis Siculis *Cymbia*, navigii genus paulò majoris.

165, 15. *Nonnumquam etiam necessariò*. Mediam vocem, quam omittunt vulgati, servant nostri codices.

167, 30. *Pompeii sunt*. Donati scil. civitate Romanà a Cn. Pompeio, cujus prænomen & nomen de more sumpserant.

169, 17. *Quæsivi quemadmodum revertissent*. Ita Victorius & Grævius, idque habent e nostris codicibus quatuor, pro vulgato, *quæsivi an domum revertissent*.

170, 19. *Ut amici tui appellant, studium, cupisse*. Ita dedimus ex uno codice regio. Vulgati habent *studiosè cupisse*: sed vocem *studiosè* nullus e nostris mss. agnoscit, eamque delet Grævius.

177, 8. *Thericlea*. A Thericle figulo. Ita Sal-

masius & Grævius e tribus mss. quibus etiam accedunt tres e nostris. Alii legunt *Herculea*, ab Hercule, cujus in usum fuerint ejusmodi vasa magna & capacia, quæ tanti herois sitim extinguere possent.

180, 5. *Quique maximi fuerant*. Ita legit Priscianus, ita Gulielmius, & post eum Grævius e suo codice optimo, cui accedunt tres e nostris. Malè in vulgatis, qui *Q. Maximi fuerant*.

194, 20. *Præciperent oculis*. Ita Græviani & nostri codices, idque præferendum visum est vulgato, *perciperent oculis*.

209, 7. *Nihil minùs*. Has voces, quas omitunt vulgati, ex optimo suo codice restituit Grævius, servantque tres e nostris.

215, 14. *Quod quidem, Judices, quum iste clam fecisset*. Ita dedimus e nostris mss. quatuor, melius & rotundius, quàm in vulgatis, *quod iste, Judices, quum clam fecisset*.

Ibid. 26. *Etenim iste Agrigenti &c.* Hanc periodum loco motam fuisse censet Hotomanus, & aliquantò superiùs reponendam, totamque parenthesi includendam post hæc verba, *quod quidem, Judices, quum iste clam fecisset etenim iste Agrigenti, credo, propter &c.*

218, 5. *Factâ manu, armatâque*. Ita codices. Quidam editi malè, *armatique*.

220, 15. *Catinâ profectus esset &c.* Vulgati, *Catinam profectus esset*. Sed e codicibus, quos inspeximus, tres habent *Catinâ*, ut sensus postulat. Furtum enim, Verre ad urbem stante, factum fuerat; neque absolutio illius servi, nisi eo absente, peragi potuisset.

221, 25. *Virginum ac mulierum*. Ita cum Hotomano

Hotomano dedimus. Stare nequit vulgata lectio, *virorum ac mulierum*, quam tamen servant quatuor e nostris codicibus.

237, 6. *Gramineas hastas*. Quibus in gramine & campo se exercere solerent. Turnebus.

238, 31. *Ex æde Liberæ Parinum*, i e., Parii marmoris, *illud caput*. Ita Cujacii liber, & e nostris mss. quatuor, pro vulgato, *ex æde Liberi parvum illud caput*.

239, 15. *Flamininus*. Malè vulgati, *Flaminius*.

241, 28. *Ædilitates ornatissimas*. Ita codices & vetustiores editi. Recentiores habent *nobilissimas*.

242, 23. *Venus illa auferatur*. Victorius & Manutius dederunt *ne auferatur*. Sed negantem particulam, quæ sensum corrumpit, ignorant nostri codices.

Ibid. 24. *Europam in tauro*. Addunt vulgati, *sedentem*: quam vocem Lambinus & Grævius expunxerant, volentibus mss. suis, quibus accedunt quatuor e nostris.

243, 10. *Accipere eos*. Ita Turnebus & Grævius, e mss. & sic quoque tres e nostris. Vulgò *accidere iis*, minùs rectè.

Ibid. 24. *Non modò*. Deest in vulgatis vox *modò*, quam Lambinus primùm, ac deinde Grævius ex optimo suo codice adjecit: hanc quoque servant quatuor nostri codices. Pro vulgato, *Lenitudine*, dedimus cum iisdem & Mureto, *Lentitudine*, quæ vox propriè dicitur de iis, qui ferunt quæ ferenda non sunt.

246, 12. *Ut ei illam laudationem*. Voculam *ei*, quæ abest a quatuor nostris codicibus,

cum Rob. Stephano & Grævio delevimus.

250, 8. *Qui quæstor istius fuerat, Cæsetius.* Ita Cujacianus liber, & tres e nostris mss. Is accusationis lib. 5, 63. dicitur præfuisse classi Veris, cujus etiam videtur quæstor fuisse. Vitiosè vulgati, *Cæcilius*. Nam Ciceroni de accusando Verre contentio fuit cum Cæcilio, qui si tunc prætorem appellasset, id profectò non tacitum tulisset in divinatione.

252, 9. *Ille contrà dicere: negare &c.* Gruterus & eum sequuti tantùm habent: *ille contrà: inflare ego, omnium &c.* Verba, quæ cum Lambino & Grævio addidimus, servant Cujacianus liber & quatuor e nostris mss.

Ibid. 27. *Ab aliis.* Vulgò *ab illis*. Tres e nostris mss. habent, ut dedimus.

261, 28. *Domino denuntiatum est.* Addunt vulgati, *ut adesset*: quas voces Grævius, volentibus mss. suis expungit: eas ignorant etiam tres e nostris.

262, 15. *Fieri nihil potest.* Ita quidem vulgati nonnulli: sed primam vocem respuunt scripti codices, & editi plerique.

265, 5. *In Leonida Imacharensi.* Ita legit Cluverius ex pluribus mss. nostri quidem ita in hoc nomine variant, ut tamen proximè accedant ad lectionem Cluverianam. Vulgatam, *in Leone Macharensi*, nullus e nostris mss. agnoscit.

270, 20. *Electum.* Ita Grævius, ut Gulielmus & Gruterus conjecerant, & sic habent quatuor e nostris mss. quintus mendosè cum vulgatis, *injectum*.

271, 13. *Seq aliud genus imperatoris.* Vulgò, *sed ad aliud genus imperatorum.* Emendavit Grævius



ex optimo suo codice , cui accedunt tres e nostris.

274 , 4. *Labor operis maximè offenditur.* Cujacii liber , & e nostris quoque tres codices scribunt , *maximè offendit.* Sensus videtur esse , operoso messis labore servos ad conjurationes incitari posse.

278 , 13. *Jus imaginis ad memoriam posteritatemque prodendæ.* Grævius maluit *prodendam* , & sic e nostris mss. quatuor , qui tamen non *imaginis* , sed *imagines* præferunt.

281 , 31. *Post videbitur : ex ipsorum litteris.* Hunc locum sic expressit Car. Stephanus , *post , si videbitur , ex ipsorum litteris.*

282 , 6. *Sciente totâ Siciliâ.* Ita Grævii & nostri codices. Vulgati omittunt vocem *totâ*.

290 , 12. *Primum ut in judiciis.* Voculam *ut* , quæ sensum turbat , cum Hotomano & Manutio delevimus : hanc tamen servant nostri codices.

291 , 20. *Nova provinciae spolia.* Primam vocem , volentibus tribus mss. delevimus.

Ibid. 31. *Etiamsi precario essent rogandi , tamen.* Grævio videtur vox *precario* excidisse loco suo , legendumque , *etiamsi essent rogandi , precario tamen ab his impetraretur.* Nihil variant codices nostri.

294 , 24. *Omnes sic habent.* Addunt vulgati , *persuasum* , quam vocem Græviani & nostri codices ignorant.

300 , 11. *Salutis suæ rationem.* Ita Grævius ex optimo suo codice , & sic habent tres e nostris : quartus cum vulgatis , *salutis tuæ* , quæ lectio ferri non potest.

303 , 11. *Producis , tamen te derideri vides.* Ita Victorius , & post eum Grævius , & sic habent

quatuor nostri codices : alii cum Hotomano & Manutio dederunt ; *produces* , *tammenne id credi voles* ?

308 , 20. *In portu Odyſſea*. Ita ex emendatione Cluverii edidit Grævius , & sic habet codex unus e nostris : alii cum vulgatis ſcribunt , *in portu Ediffæ* , aut *Odiffæ*.

311 , 26. *Tum iſte excitatus*. Addunt vulgati , *exit* , cui voci nondum locus eſt : eam igitur abjecit Grævius , volente optimo ſuo codice , cui accedunt tres e nostris.

313 , 17. *Sed ipſe influat*. Mediam vocem e nostris mſſ. addidimus.

314 , 19. *Quæ eſt urbs Syracuſis*. Ita Grævii codex optimus ; ita quoque tres e nostris ; Haud paulò melius , quàm lectio vulgata , *quæ eſt urbis magna pars Syracuſis* , ut dixit ſuprà n. 95. Non ſolet Cicero eadem verba ſine neceſſitate repetere.

315 , 2. *Suppeditare poſſent*. Reponit Hotomani poſſet ; idque probat Grævius ; ut ſit , ſufficere & ſatis eſſe poſſet. Nihil variant codices noſtri.

316 , 2. *Iſtius avaritia*. Vulgò , *iſtius audacia* ; quæ lectio ferri hoc loco nequit.

317 , 14. *Ubi hoc videt*. Addunt codices , & vulgati , *illorum confeſſionem* , *teſtificationem ſuam* , quas voces rectè delet Grævius , ut quæ ex nota marginali in textum auctoris immigrarint : qui error librariis non inſolens.

319 , 3. *Implorare illi fidem prætoris*. Ita Cujacianus liber , & quatuor noſtri codices , idque placuit Gulielmio & Grutero. Vulgò *fidem populi Romani*.

327, 17. *Non domi suæ solùm.* Ita codices nostri. Vulgati alio verborum ordine, *domi suæ non solùm*, unde Grævius delebat voces, *non solùm.*

324, 14. *Inhumanitatemque.* Mallet Grævius, *immanitatemque*, ut habent codex ejus optimus, & unus e nostris: alii vitiosè scribunt *humanitatemque.*

329, 5. *Nos in septemdecim populis Siciliæ,* qui bello subacti, & duriùs ceteris tractati, quòd opem Poenis contra Romanos tulissent, *non eramus.* Ita Victorius edidit, neque aliter legit Sigonius. Vulgati vitiosè *numeramus*, quod tamen servant codices nostri. Infrà cum Grævio dedimus ex optimo ejus codice, & tribus e nostris, *ministrata sunt*, pro vulgato, *administrata sunt.*

333, 16. *Me culpam fortunæ,* videtur excidisse vox, *homini assignare.*

335, 5. *Tyndaritani.* Addunt editi, *Locrenses*; cui voci nullus hic locus: eam igitur cum Grævio delevimus, quam tres e nostris mss. non agnoscunt.

336, 20. *Quid facere posset, quum &c.* Ita Grævius, & sic habent nostri codices quatuor. Mendosè vulgati, quid facere possis? quum.

342, 2. *Ni furtis.* Præcisa locutio, pro, *ni dixisset Verrem furtis quæstum facere.* Hortensius.

344, 20. *ἰδικάθησαν*, inquit, ut *Siculi loquuntur, hoc est, supplicio &c.* Ita codices optimi & veteres editi, ut *Siculi* verbo minùs usitato loqui intelligantur. Lambinus, quem plerique sequuntur dedit *ἰδικασάθησαν*, inquit, hoc est, ut *Siculi loquuntur, supplicio &c.* quod Ernesto minimè probatur: ad quid enim hæ voces, ut *Siculi loquuntur*?

356, 12. *Hanc sibi rem præsidio sperant futurum.* De hac locutione videndus Gellius 1, 7.

357, 26. *Perangusto fretu.* Ita ex Gellio & Prisciano restituit Lambinus; alii retinuerunt *freto.*

364, 22. *Postea Q. Pompeius.* Vulgò *posteaque Pompeius.* Emendavit Ursinus ex optimis mss. quibus accedunt Grævii codex unicus, & quatuor e nostris. Infrà ex iisdem codicibus cum Grævio dedimus *laboribus*, pro vulgato *doloribus.*

368, 5. *Celeberrimo in loco pratorii.* Vox ultima apertè mendosa, quam delendam censet Verburgius, nisi malis cum Grævio reponere *populi Romani*, ut habent duo e nostris mss. aut *fori Romani.*

373, 22. *Copiis armisque compensarunt.* Copiis armisque suppeditandis, ubi reip. tempora requirebant, pensarunt populo Romano ea pericula, in quæ Galli variis in bellis Romam adduxerant. Hanc lectionem Tullio Grævius restituit, Faerno, aliisque, ex mss. notatam, quam servat etiam unus e nostris. Gruterus maluit *coriis remisque.* Alii *compensarunt* mutant in *propulsarunt.*

Ibid. 29. *Qui proximè fuerant.* Ita Ursini liber vetus, cui accedunt duo e nostris. Alii cum vulgatis, *qui proximi fuerant.*

375, 20. *Legati ad eos? Exercitus præterea Cn. Pompeii maximus &c.* Ita mutatà distinctione Lambinus & Grævius locum restituerunt, mendosum in vulgatis, *legati ad eos exercitus? Præterea Cn. Pompeius maximus &c.*

377, 5. *Ex litteris quidem nostris, quas exscripsistis.* Ita Faernus reperit in vetere libro, & sic Manutius & Grævius ediderunt. Vulgata lectio, *ex litteris quidem vestris, quas scripsistis*, explicari non potest.

Ibid. 19. *Croduni & Vulchalone*. Codices scribunt *sc Croduni &c.* quod est *scilicet Croduni &c.* Rectè igitur Ursinus has voces pro glossemate habet.

379, 24. *Si hoc judici præscriptum*. Vulgò, *si hoc, Judices, præscriptum*. Emendavit Grævius, & firmant codices nostri, in quibus scribitur *jud.*

384, 15. *Cujus numine . . . sanctam*. Veterem lectionem, quam duo e nostris mss. servant, revocavit Grævius. Recentiores dederunt, *cujus nomine . . . vindam*.

386, 11. *Magistratibus . . . convictus*. Hic interciderunt aliquot verba, tam quæ pertinent ad *magistratibus*, quàm ad *convictus*. Grævius conjiciebat, *malè gestis, ullius criminis convictus*.

387, 10. *Senatores*. Ita rectè Grævius reposuit, pro vulgato, *senatum*.

391, 16. *Claris autem hominibus*. Ita ex codice Francii locum supplevit Grævius, & firmat unus e nostris mss. in quo scribitur, *claris aut hominibus*. Vulgò, *hominibus autem*.

392, 16. *Tradere & condonare*. Ita ex conjectura certissima Faernus. Vulgò, & *condemnare*. qua in voce decresceret oratio.

401, 29. *Moram . . . acquisisse*. Gulielmius legebat, *anquisisse*.

403, 27. *Leniorem actionem*. Ita Verburgii & nostri codices. Vulgò *leviorem*.

404, 13. *Ratio juris ejus*. Nihil certius hac emendatione Gulielmii, quæ & Fabro probatur. In nostris codicibus scribitur, *ratio juris & jus*, aut *ratio juris & vis*.

406, 31. *Hominis illius hoc munus esse &c.* Ita Grævius e suis mss. quibus accedunt nostri.

Vulgò, *hominis illius ad hoc munus*, & ad &c. quod sanè manum correctoris sapit.

413, 4. *Et se servos*. Vulgati, & *se suos*. Et paulò post, *de re ipsa atque emptione*, ubi vulgati, *de ipsa emptione*, tantùm. In his Grævii codices & nostros sequimur.

416, 1. *Ut vis ac deductio moribus fieret*. Ita cum Camerario & uno e nostris mss. dedimus, ut sensus postulat. Vulgò, *ut jus ac deductio*: qui error in his vocibus non insolens librariis, qui suprà scribunt *ejus rei vis actionemque quæramus*, ubi rectè editur *ejus rei jus*: & infra 38. *jus armatorum hominum*, pro *vis armatorum hominum*.

417, 9. *Ut hoc genus unum*. Voculam *ut* cum Lambino delevimus.

Ibid. 29. *Aut ad aëtoris notionem*. Locum mendosum sic emendat & distinguit P. Faber: *quid ad causam possessionis? quid ad restituendum cum, quem oportet restitui? quid denique ad jus civile, aut ad pratoris notionem & ad animadversionem? Ages injuriarum. Plus tibi ego &c.*

420, 6. *Nullum experiendi jus*. Ita Gruteri codex unus & duo e nostris. Alii, *nulli experiendi jus*.

Ibid. 12. *Aliqua ex parte*. Hæc verba ex interpretatione alicujus magistri adjecta esse censet Grævius.

425, 31. *Rem ad verbum . . . attingere*. Hottomanus malebat, *adstringere*. Et mox pro, *neminem statu detrufum*, Muretus legebat, *neminem statuere detrufum*.

428, 5. *Usum & auctoritatem*. Grævium sequimur, qui multis probat conjunctionem esse delendam.

Ibid. 15. *Si tam severe . . . ut rem.* Ita ex codice Erfurtensi Grævius. Vulgati, *si tam verè . . . quàm rem.* Nullo sensu.

435, 2. *Sive, nive.* Ita e Palatinis duobus locum restituit Gruterus, ut jam antè Gulielmius conjecerat. Respicit autem ad formulas sponsionum, quarum initium, *si, sive; ni, nive.*

Ibid. 3. *Quod defendis.* Ita Victorius, & sic unus e nostris, ut mens auctoris postulat. Alii cum vulgatis, *quod defendit.*

437, 26. *Imponi falsæ tabulæ.* Ita quidem codices & editi: sed legendum videtur *interponi*, ut voluere Hotomanus & Lambinus.

439, 8. *Quum omnia.* Has voces esse a mala manu, atque, ut sensus constet, delendas censet Grævius.

Ibid. 28. *Iter*, quâ quis pedes aut eques commeari potest. *Actus*, ubi & armenta trajicere, & vehiculum ducere liceat. Modestinus.

440, 27. *In jure parum delectum esse.* Vulgò, *injuriarum delictum esse*, nullo sensu. Victoriam sequimur, qui hæc procul dubio e mss. hausit. Eodem sensu dixit Tullius in Vatinius 34. *urnas delegeris.* Suprà etiâ pro, *ingressum modò dejeceris*, Grævius ex codice Erfurtensi reponebat, *delegeris*; quod qui non intellexerunt, interpolare ausi sunt.

441, 12. *Non vereor.* Gruterus malè omittit particulam negantem, quam sententiâ postulat, & servant codices nostri.

442, 1. *Illud autem miror, cur vos aliquid &c.* Cæcina causam suam tuebatur auctoritate Aquilii. Huic adversarii opponebant alium jurisconsultum, de quo hic orator: sed locus in multis vexatus

ab iis, qui sequentia de Aquilio dicta existimabant. Libenter legeremus: *illud autem miror, cur aliquem contra me sentire dicatis, quum cum auctorem (scil. Aquilium) vos pro me appelletis, nostrum nominetis. Verumtamen quid ait iste vester auctor? Quibus quidque verbis actum pronuntiatumque sit, spectari convenit. Ego ex isto genere consultorum pro me nominem, ut opinor, istum ipsum, quo vos auctore &c.* Hanc lectionem in pluribus firmat codex e nostris optimus.

446, 25. *Unde dejecisti?* Hæc corrupta esse nemo non videt. Lambinus ex conjectura reponerat, *unde dejecisti Pani?* Alii malunt, *unde Tarquinius?*

447, 23. *Hoc postulat, ut in eum ipsum locum restituatur.* Hæc verba, quæ defunt in Vulgatis, supplevit ex codice Erfurtensi Grævius.

450, 20. *Per colonum.* Vulgati habent, *propter usum fructum*, quod apertè vitiosum est. Lambinus reposuit *per colonum*, quæ tamen verba abesse possunt, modò pro vulgato, *qui colonus*, legas, ut dedimus ex optimo codice, *quia colonus*.

451, 21. *Et fateris, quæ inter...* Ita codices vetustiores, & Victorius. Hic nonnulla intercederunt. In vulgatis legitur, *ut in ceteris quæ rogavit*, quæ verba videntur adscripta esse, ne nulla esset hujus loci sententia.

455, 4. *A populo Romano.* Legendum videtur, *a civibus Romanis*, ut habet codex e nostris optimus.

Ibid, 20. *Derelinquo jam &c.* Verisimilis Fabri conjectura legentis, *de reliquo jam &c.*

456, 2. *Amplissimum, Etruria nomine totius.*



Hunc locum sic emendabat Hotomanus, *amplissimum Etruria totius, hominem in utraque fortuna &c.*

458, 15. *Attingere.* Ita Gulielmius & Grævius e suis mss. quibus accedunt nostri plerique. Quidam cum vulgatis habent *contingere.*

460, 12. *Huic qui successerit.* Ita e quinque codicibus dedit Grævius, & sic habent duo e nostris, probabatque Gruterus præ vulgato *succurrerit.*

Ibid. 23. *Genus est ejus belli.* Hanc lectionem, quam servant tres mss. meritò præfert Gruterus vulgatæ, *genus est enim ejusmodi.*

464, 20. *Quàm ceteros.* Has voces delendas censet Grævius.

465, 15. *Si ad belli utilitatem . . . retinere.* Ita Gulielmius & Grævius e mss. Vulgati, *si & belli utilitatem . . . sustinere.*

466, 8. *In salinis.* De his non agit Tullius in hac oratione. Itaque Turnebus reponit *in silvis*, Hotomanus *in saltibus*, ut intelligatur scriptura, seu vestigal ex pascuis publicis exigi solitum.

469, 8. *Atque ad alias gentes.* Præpositionem cum Grævio e mss. nostris addidimus.

471, 3. *Et magnis auxiliis . . . juvabatur.* Ita Grævius e suis mss. & sic quoque plures e nostris. Alii minùs rectè, & *magnis adventitiis . . . copiis juvabatur.*

472, 3. *Quantum illud bellum factum.* Ita Græviani & nostri codices, pro vulgato, *quantum illud bellum futurum.*

473, 18. *Mistum ex civitatibus.* Mallet Grævius, *mistum ex civibus.*

474, 26. *Tum in singulis.* Addunt editi plerique, *oris*, quæ vox locum hîc non habet, nec

# 516 NOTANDA ET CORRIGENDA.

visitur in excerptis Pithœanis, nec in nostris codicibus plerisque.

482, 21. *Ad ipsum discrimen ejus temporis.* Ita Modius & Grævius ex mss. Coloniensi & Vuerdensi. In aliis excidit vox *discrimen*.

483, 13. *Misit, eum, quem Pompeius.* Ita codices, idque placuit Gulielmio & Grævio. Vulgò, *misit? eumque Pompeius.*

489, 15. *Quem per vos ipse constituit.* Ita Gruterus post Modium profert e codicibus Coloniensi, & Vuerdensi. Vitiosa lectio vulgata, *quem per se ipse constituit*, quam tamen retinent codices nostri.

490, 16. *Summi hominis.* Rectius videtur quod e Coloniensi & Hittorpiano profert Gulielmius, *summi viri.*

491, 5. *Summâ Q. Catuli voluntate.* Ita Gulielmius & Grævius, pro vulgato, *summâque Catuli voluntate.*

495, 2. *Non locupletari . . . præter paucos.* Gruterus præfert lectionem codicis Basilicani & Vuerdensis, *rejeclis voculis non & præter.*

496, 13. *Quantam nunc iterum . . . videmus.* Ita e codicibus Gruterus & Grævius; idque sanè præstat vulgatæ lectioni, *quantam non iterum . . . vidimus.*

497, 4. *Repellemus: honores autem.* Ita Græviani & nostri codices; idque præferendum Gruterianæ lectioni, *pellemus: honorem autem.*

## FINIS.



99 955140



